



6

7-a

2.3

M. $\frac{11}{11}$



theca
majori Coll. Rom.
Societ. Jesu

~~22-6-5~~

6-7.2.23

601.23

1 ft. 10 in.



IOANNIS

PASSERATIIL
ELOQVENTIÆ
PROFESSORIS, ET


Interpretis Regij, Orationes
& Præfationes.

BIBLIOTECA NAZ.
ROMA
VITTORIO EMANUELE



Apud M. HENAVLT, invico Clopiniano,
prope Gymnasium Becodianum; &
in Officina sua ad Pontem nouum,
è regione Samaritanæ.

M. DC. XXXVII.



NOBILISSIMO ET

ILLVSTRISSIMO VIRO D. D.

IOANNI IACOBO MEMMIO,

Domino de Roissy, Consisto-

riano Cardinali



*E*cce tuus iterum tibi re-
diuius sistitur P A S-
SERATIVS, (Vir
Nobilissime,) qui dum
lucem ijs, quas olim Professor regius
in Schola regia Praefationes habuit,
nouam exoptat, Numinis tui solitū
favorem supplex, quantum gratis
aliàs obsequijs, tantum humilibus
nunc per me precibus implorat. Vr-
get quippe huius seculi acrior & ini-
qua Zoilorum mordacitas, cui si ob-

stiterit tua singularis & nemini non
laudata virtus, non erit cur huius
temporis conuitia, plus quàm elapsi
furias, contremiscat. Id à te dum spe-
ro, (Vir Illustrissime,) hæc P A S-
S E R A T I I tui opuscula typis ite-
rum excudenda mandavi; cum ad
id & hortarentur & suaderent viri
inter doctissimos huius ætatis non mi-
noris literatura, ea potissimum ad-
ducti ratione, ut ex ijs uberiore fru-
ctum decerperent studiosi, neque diu-
tius tanta eruditionis suppellectile
priuata careret literaria respublica.
Et sanè quem bonorum qualiscumq;
non incessat dolor, si aliquando lucu-
brationes huius artificis Cimmeria
obliuio inuolueret? qui nullum in ea
re priorem habuit, nec secundum est

habiturus : aut si è manibus docto-
rum hominum paulatim elaberentur;
atque ijs anteferrentur nonnul-
lorum partus abortivi, qui magno co-
nato magnas sepe nugas agunt ; Et
quorum precipua laus Et virtus est,
ut sapiant ex indicibus. Ceterum
mihi diutius non est, nec etiam ha-
rèdum fuit, cuiam novam hanc edi-
tionem, sumptibus susceptam Et ab-
solutam meis, nuncuparem. Tu
(maxime virorum) unus omnibus
visuses mihi anteponendus, duplici
præsertim nomine, tum maximè
Authoris ipsius ratione, quem sum-
mo amore, nec vulgari benevolentia,
in ea qua versabatur gravissima
temporum difficultate, tuo sinu exce-
ptum humanissimè, quoad vixit, fo-

uisti; quémque liberali facultatum
tuarum profusione tibi eternum de-
uinxisti: tum etiam ratione mei, tua
debit esse hac Editio; qui, cum jam-
pridem non pauca tibi debeam, ero
in posterum plura debiturus, si, qua
soles externos, eâ & mente & beneuo-
lencia familiarem **PASSER A-
TIV M** rursus exceperis: hinc etiã
futurum est, ut ampliori studio me
tibi donem, dicem, consecrem.

Tuus ære & libra **MATHVRINVS**
HENAULT, Bibliopola Parisiensis.

Lutetiæ Parisiorum vj. Eidus
Maij, M. DC. XXXVII.



EPISTOLA PRIORIS EDITIONIS,
 QUÆ FUIT ANNO 1606.

AD VIRVM CLARISSIMVM D.D. MAXIMILIANVM
 Roſnium de Bethuna, omni Arma-
 mentario Ærarióq; Gallico Præfe-
 ctum, & apud Pictones Pro-regem.



FFERO tibi (Dux præſtantif-
 ſime) *alienæ liberalitatis munus,*
Patruſ quondam mei paxæpiſ
Paſſeratij Orationes in exorſu va-
riorũ Auctorum habitas. Hoc tibi
deberi munuſculum, & Auditorij
Regij parietes, & tua in eius Manes munificen-
tia conclamant. Tu enim ſolus es à multis annis,
qui loco huic & collegio ſplendorem addidiſti, &
patruſ mei ſepultos cineres debitis velut inferiis
cumulaſti. Dum itaq; eiufdẽ P A S S E R A T I I,
grauioris & lōgioris ſpiritus ac opera peruigilias col-
ligo, honorato tuo nomini meritò deſponſas ac deſti-
natas: patere interim, quaſo, vt hæc eiufdem poſt-
huma proles te veneretur ac ſalutet; & quam
prodeundi in publicum libertatem nunquam à pa-

rente suo viuo potuit sperare, à te legitimo patrone & pio manumisso, velut Orcinus libertus, recipiat.

Tibi in æternum addictissimus
I. de ROUGEVALET, IO. PASSERATII
nepos.

Pridie Calend. Februarij, 1606.

CLARISSIMO ET

NOBILISSIMO VIRO D.D.

CAROLO GVILLEMEAV,

Regis Christianissimi Cōsiliario,

& Medico ordinario, & Facultatis

Medicæ Parisiensis ex-Decano,


G. P. B. S. P. D.



FFERO tibi delicias tuas,
(*Vir Clarissime,*) nimirū IOAN-
NIS PASSERATIIT⁹ *μαχαρίτη*
Epistolas & Præfationes; imò
PASSERATIVM ipsam, in
arte sua planè Roscium, tuæ
virtuti debitum, gratissima

mentis veneratione offero atq; appēdo: Tuum,
inquam, an potius bonorum omnium? qui iusti
rerum æstimatores, nec tranſueſſis ſuēntibus
hirquis, magnorum virorum monumenta in
æternum victura, ardentiore animi studio
amplectuntur? E quibus facè quamplurimi
postquam politioribus Musis suam dicarunt
operam, fermè necquidquam, (vel seueriore

Censorum; queis *ῥᾶν μὴ μείδω ἢ μμείδω*, iudice,) hoc opere præstantius, hoc Orationum suavius, hoc Præfationum mōnimento elegantius existimant. Vnde faciliè conijcias quāta cum iniuria, quā immeritò, id opus densiori obliuionis & tenebrarum caligini immersum sepeliretur, quam nostro periculo videtur in regnum literarium subinducere nebulones quidam, qui optima quæque vel damnant iniqui, vel euirant inuidi; vt abortiua nobis obtudant sua: quique suis hinc & inde emendicatis laboribus, & inuiso puluere collectis atque consutis centonibus, nihil aliud, quā meram cum Lauernæ sacris impolitiam & horridam barbariem afferunt. Ne verò malè recoctum olus quod ajunt, fastidioso præsertim huius seculi palato obijcerem; vtque in posterum fieret optimi Scriptorum illustrior memoria; placuit operis fronti, in partes distracta varias doctorum virorum Elogia huc adscribenda transferre: quæ eo præsertim nomine tibi offero, vt *PASSERATIVM*, mēque ipsum, quem iamdudum ~~noto~~ ^{amici} singulari foues, deinceps amare pergas: Operis argumentum & à se, & ab Auctore, satis apud Te obtinet commendationis: Offerendi ratio, si Te spectes, multūm habet æquissimæ; si me, plurimūm officiosæ, necessitudinis. Vale.



ELOGIA VIRORVM

ERV D I T O R V M D E
IOANNE PASSERATIO Trecensi,
regio Eloquentiæ Professore Lute-
tiæ Parisiorum, ex eorum scriptis
excerpta.

IACOBVS AVGVSTVS THVANVS,
Vir clarissimus, tomo v. Historiarum sui
temporis, lib. cxxvii.



OMMEMORABITVR de
nostris Ioannes Passeratus, Au-
gustâ Tricassium natus, Latinæ
linguæ Professor dignissimus,
qui felicitate versus pangendi,
etiam Gallicos, & soluta oratione scribendi, ac
bonos scriptores interpretandi, diu magnam
laudem in Parisiensi Academia meruit. Homo
emunctæ naris, & cui aliena vix placerent, vl-
timo Elogio vouit, ne manes sui malis carmi-
nibus onerarentur: itaque pauci mortuum lau-
darunt, dum verentur ne voto eius minus re-
spondeant. Obijt mense Septembri, anni 1602.

senio effœtus , amissa oculorum luce , & iam
fatiscente ingenio, cum vel vitæ cupidissimi vi-
uere velle desinunt.

SCÆVOLA SAMMARTHANVS,
Elogiorum libro 4.



Hic est ille *PASSERATIVS* ori-
gine *Trecēsis*, vtraq; linguado-
ctissimus , qui primus apud
Parisiōs in schola Regia recon-
ditas veræ Latinitatis opes ali-
quantò maiore cura & studio
peruestigavit, iuventutique aperuit; cùm *Tur-
nebus*, *Auratus*, *Lambinus*, cæterique prius
in eadem schola professi, Græcis potissimum
interpretandis operam & industriam impen-
dissent. Poterat quidem ex umbra & schola-
stico otio in apertam fori lucem prodire, & ad
rerum administrationem se conferre: nec enim
ei deerant opportuna civilis disciplinæ præsi-
dia, cujus puros limpidosque fontes apud *Bi-
turigas* à diuturna *Iacobi Cuiacij* consuetu-
dine affatim hauserat & imbiberat. Sed *Petro*
Ramo eloquentiæ Doctore delectus à Rege
successor, in ea demum professione consenuit,
nobilēque doctrinæ suæ famam vel apud re-
motissimas orbis terræ nationes longè latēque

propagauit : cùm nihil vulgare , nihil tritum ,
nihil è medio sumptum afferret , ob idque poli-
tissimi quique homines , etiam ex ipso Senatu ,
celebre eius auditorium frequentarent ; ac ve-
lut ex nitidis & fragrantibus eius hortulis le-
ctissimos Romanæ elegantiae flores admirabili
cum voluptate exciperent . Fuit altero captus
oculo , facieque rubore suffusa , quæ triste ne-
scio quid ac seuerum præ se ferret ; sed eius inge-
nio nihil erat amœnius , nihil sermone facetius ,
nihil vsu & congressione iucundius , qua singu-
lari morum suauitate incredibiles sui amores
in mentibus hominum excitabat . Adeo qui-
dem , vt ab Henrico Memmio viro clarissimo in
amicitiam & familiam semel acceptus , ad ip-
sos vnde triginta annos apud eum in summa
animorum & studiorum conjunctione vixerit .
Extant huius gratissimi conuictûs & otij testes
multi lusus , variâque non vulgaris argumenti
poëmatia , quibus ineunte Ianuario solebat
quotannis patronum illum salutare , & quæ sitis
ex tam pretiosa Musarum supellectile muni-
bus magis ac magis demereri . Atque vtinam
quæ in Ciceronem , Plautum , & alios linguæ
Latinæ præcipuos auctores accuratè ac dili-
genter adnotauit , aliquândo quoque prodeant ,
nec diutiùs in tenebris magno studiosorum in-
commodo sepulta delitescant . Ob hæc merita

dignum illum iudicauimus, qui tot inter eximios bonarum literarum proceres locum hinc suum tueretur, atque adeo agmen ipsum iure quodam suo clauderet. His enim extremis rei literariæ temporibus, nisi Scaligeri, Lipsij, Casauboni, Fabri, cum alijs paucissimis, adhuc supersint, quis vltimum politioris literaturæ decus in huius tanti viri morte concidisse non fateatur? Perijt ex paralyfi tres & septuaginta natus annos pridie Eidus Septembr. anno millesimo sexcentesimo secundo, cum ad integrum penè quinquennium lecto misere afflictus in maxima ægitudine & molestia iacuisset, eo tamen constantis animi vigore, vt etiam inter vltima suspiria hoc sibi ipse Epitaphium pro solita iocandi libertate concinnaret:

*Hic situs in parua Ianus Passertius urna,
Ausonij doctor regius eloquij.*

*Discipuli memores tumulo date ferta magistri,
Vt vario florum munere vernet humus.*

*Hoc culta officio mea molliter ossa quiescent,
Sint modo carminibus non onerata malis.*

Sepultus est in Dominici fano ad Iacobæam portam, vbi Io. Iacobus Memmius Henrici filius V. C. libellorum in regia Magister, vt veteris in clientem beneuolentiæ pius hæres, marmoream ei statuam collocauit.

IULIUS CÆSAR BULENGERVS,
Historiarum sui temporis libro xi.



XEVNTE anno Parisijs Ioannes Passeratius, Tricassibus ortus, Romanæ Eloquentiæ regius Professor vitâ excessit, vir carminis Latinâ & vernaculâ linguâ scribendi summus; restituendis,

ac repurgandis veterum auctorum scriptis felix; Latinæ integritatis in eloquendo, si quis alius retinens, oratione acutus, & tersus, qui Cæcitatem, in quam aliquot ante obitum annis inciderat, eleganti laudatione consolatus est.

EMVNDVS RICHERIVS,
Doct̃or Theologus Parisiensis, & Socius atque Syndicus Sorbonicus, in aureo suo libello,
nim. Obstetrice Animorum.



VAM in cogitationem si nonnulli descenderent, seque homines esse recordarentur, Socratis potius, Turnebi, Lipsij, Passeratij modestiam incomparabilem, quàm Momiliuorem, & caninam facundiam sibi æmulandam proponerent: neque maximam temporis partem sibi ad do-

cendum, dicendumue præstitutam, in vellicandis aut remordendis aliorum scriptis, sed in munere suo rectè & fideliter adimplendo reponerent: quæ maledicendi consuetudo, ostendit illos valde otio abundare, vt idem dicebat Passeratius, cum ab eo quærerem, quidni etiam aliorum scripta lancinaret: Dij meliora, inquit, non mihi tantum est otij, vt à scopo & docendi prouincia tantopere aberrem.

IOANNIS PASSERATII,

Regij Professoris Elogium,

PAPYRIO MASSONO

Auctore.



P V D Trecassinam Campaniæ urbem, quæ Sequanâ fluuio interluitur, Ioannes Passeratius die festo D. Lucæ natus est, anno à partu Virginis supra mille quingentotrice simo quarto. Pater eius Pantaleo litteras multum amabat, iuuenisque & admodum senex earum radices coluit, perque varias orbis regiones diu vagatus, vxorem duxit Nicoleam Thienotiam, in eodem municipio ortam, ex qua prognatus Ioannes, qui perspicacis ingenij, atque in studijs doctrinæ, notè, celebratque nominis fuit. Si enim illum dixerò omnibus fermè Grammaticis & Rhetoribus ætatis,

suę fuisse clariorem, si que addidero vltimum Romanorum apud nos obiisse, verissimè, vt opinor, sensisse debeo videri. Maternum auunculū habebat, flaminem, seu Canonicū D. Petri Tricassium; qui sororis suę filium, vbi infantię annos excessit, ad scholam municipij cum pedagogo Laurentio Acaria Presbytero deduci quotidie curabat; sed fortè euenit, vt, propter Orbilij nescio cuius sequitiam durius habitus quàm oportuit, ex fuga in agrum Biturigum trans Ligerim flumē, abierit, habueritque Dominos, quos fortuna puero dedit, in his ferrarię magistrum; (ferrarias enim Cæsar in Biturigibus frequentes esse ait), apud eum magna voluptate piscari didicit, semper recolens quæcumque ad id tempus didicisset. Inde Sacrum Cæsaris oppidū in altissimo & vitibus vndique confito felicissimis totius regionis profectus, Religioso cuidam seruiit è Monasterio Satyri, vnde subiectum Ligerim videre & remotissimos agros oppidāque & vicos intrueri licebat. Ibi cum tres quatuorve menses fuisset, subiit patrię dulcis recordatio, reuersusque est Tricassium, & apud auūculum sistitur, qui veniā illi humaniter concessā, in Collegio vrbs suę triennio alimenta præbuit.

Quo spatio temporis elapso, Lutetiam mittitur, & Classicus Collegij Remensis fuit, do-

cente tunc Rochonio, quem Medicinæ facultas extulit. Iterum in patriam reuertitur docendi causâ, promouente Lescotio, viro Latinâ facundiâ nobili: Necnon multò post, rogantibus cum Plæsseis, vt Lutetiam ad se docendi causâ venire dignaretur, Passeratium secum adduxit, illéque primo ordini præfuit, hic secundum rexit; ac tum legendo optimos quosque ex Latinis Græcisque scriptoribus, ex ijs magno labore indices seu tabulas contexuit, in quibus quid quæq; vox Latina significaret, adhibito acri iudicio complexus est; vnde factum vt in posterum in ea lingua nihil ignoraret. Postea in Collegio Ioannis Monachi docuit: (*Hodie Cardinalitium dicitur, cui nuper præerat M. Edmundus Richer, Doct̃or Sorbonicus, vir omni laude maior:*) vbi M. Antonius Muretus Româ recens reuersus, illum vltro adiit, multumque cum eo contulit. Cæterum, grauiissima lues eum ad fugam compulit, Milliacum (*Millyen Gastinois; alij dicunt Milliodunum:*) itaq; oppidulum agri Vastinēsis in Lugdunensi via positum se recepit. Cessante morbo apud Becodianos collegas tanta celebritate professus est, quanta vllus sui temporis. Commentarios Cæsaris explicabat, habebátque auditores inter cæteros, Rambulianæ nobilis familiæ procures, Petrum Ronfardum, & Ioan-

nem Bayfium, Lazari filium, eximios Poëtas,
Græca Latinâque facundia celebres. At sine
Iuris Ciuilis sciētia sentiens Latinos scriptores
planè intelligi non posse, Auaricum urbem Bi-
turigum ab amne sic dictam, cum Alphonso
Delbenio, nunc Albiensi Episcopo, se contulit,
famâ Cujacij antecessoris illuc alliciente: ete-
nim, vt memorię mandatum est, Seruium Sul-
pitium virum etate sua doctissimum fuisse, ita
hic præter alios excellēs existimari iure debuit.
Igitur, cum illo præstantissimo viro discendi
causa triennium versatus, reuersus est in patriâ,
atque inde Spernacum Campaniæ oppidum;
deligitur ab oppidanis cum aliquot alijs, vt Hē-
ricum Borbonium Condensem infestis signis
ad obsidionē (vt videbatur) properantem, præ-
cibus ab eo conatu auerteret, atque ita esenit.
Lutetiam iterum redijt, ac Titulum de Rerum
& Verborum significatione interpretari cœpit.
multis grauib; viris ad portam Victorianam,
vbi auditorium eius erat, sponte cōfluentibus;
vnde notitia illi celebrium virorum quęsita est;
maximè Henrici Memmij, qui tum autoritate
& gratia multùm poterat; isque effecit, vt Pas-
seratius secum habitaret, quòd laxas & amœ-
nas ædes haberet. Petrus Ramus Professor elo-
quentiæ fuerat, stipendiisq; regis honorificè
subnixus docuerat; quo mortuo, anno 1572.

In eade San-Bartholomeana, Passeratius eodem honore & præmio affectus est, commendatione eius, de quo diximus, Memmij Mœcenatis. Tunc magis quàm vnquam antea, scientia eius, & apud nostrates, & apud exteros, enituit, confluentibus ad eum egregijs viris, magistratibus vrbs, plurimisque è vicina Germania adolescentibus, solitis excipere ab eius ore profluentia præcepta Eloquentiæ. A nostris quoque Regibus Carolo 9. & Henrico 3. amabatur; illi quidem venationis cupidissimo, libellum *de arte Venandi*, Gallico versu scriptum obtulit, quem amici Ronfardus, Bellaïus, Baïfius, Pimpōtiûsque & alij Poëtæ nostrates, magnopere probarunt. Latinus quoque Poëta fuit eximius, vt ostendunt 25. Poëmatia eius iam excusa, quorum quinque ad Memmium scripsit; Henrici verò 3. elogium edidit, veteribus conferendum; verùm dira paralyfi quinquennio ante mortem fuit vexatus, quæ dimidiam corporis partem, excepto capite, illi extinxit. Morbum quidem patientissimè tulit, nec vnquam ingemuit eum sibi casum à cælitibus immissum; tandem 68. ætatis anno decessit Lutetia Parisiorum, 18. Cal. Oct. anno à partu Virginis sexcentesimo secundo, inque Dominicano tēplo sepultus iacet. Firmo corpore fuit, statura mediocri, vultu multo rubore perfuso;

vnus oculi vsum amisit, in lusu pilæ, globi volitantis ictu percussus. Interdum ab Aurora vsque ad multam noctem studuit, immemor cibi & potus. Quod bonum rectumque erat libenter amplectebatur, æquitatem magnificiens; & si quando perturbationibus à vero abducebatur, bene monenti amico è vestigio credebatur, Comici vocem illam sæpe repetens, *Mutor veris*. Memoria & iudicio incredibili erat, semper aliquid noui in lectulo cogitans, excipientéque sororis filio statim dictans, & poëmatia fere pia sub mortem scribens, quin viuens ipse sibi Elogium funebrésque titulos fecit in hanc sententiam; *Hic situs est*, &c.

Hoc IOANNIS PASSERATII Elogium à PAP. MASSONO exaratum, huc inferendum accepi à M. CLAUDIO BELIN, Trecensi, Doctore Medico eruditissimo, & amico singulari.

STEPHANVS. PASCHASIVS,
Aduocatus régis in Camera Computorum
Parisiensi, lib. 2. Epigrammatum.

QVàm luse bene passerem Catullus,
Tam Passertius elegans Catullum;
Omnis viuit in hoc, in hoc quiescit,
Hunc voluit, legit, explicatque chartis

*Tam doctè & lepidè laboriosus,
Quàm doctum & lepidum ferunt Catullum,
Et ludit numeris Catullianis,
Et tam molliter ut Catullus ipse:
Credas denique passerem Catulli,
Vel quid passare mollius Catulli.*

Idem ad Ianum Passeratium.

Q*uid nihil ex nihilo stulti contenditis? ecce
Ipse vnus fieri quid ratione probo.
Tam lepidè nihilum, Passerti, carmine ludis,
Grande ut de nihilo feceris inde aliquid.*

Le mesme ESTIENNE PASQUIER, en ses Recherches de la France, liure 7.

I*EAN PASSERAT, homme duquel on ne
sçauroit assez honorer les vers, soiét Latins,
ou François, quand il en a voulu faire, fit vne
Ode en vers Saphiques, qui est telle.*

On demande en vain que la sexue raison, &c.

*Et certes si ces deux beaux esprits, i'entends
RAPIN & PASSERAT, eussent entrepris
cette querelle, tout ainsi comme fit BAIF, ils
en fussent venus à chef.*

NICOLAUS RAPINVS,
Delictorum Militarium olim in Gallia Tri-
bunus, libro 2. Epigrammatum.

In obitum Ioannis Passeratij.

Nos qui PASSERATVM plures iam vidi-
mus annos

Dimidia viuum vix bene parte sui:

Non illum verè dicemus mortuum, amici:

Dicamus potius, desijt ille mori.

IOSEPHVS SCALIGER,
Vir illustris, & undiquaque nobilissimus, lib. 4.
Epistolarum, ad CAROLVM LABBÆVM.

Accepi PASSERATII libellum magis
nobis utilem, quàm auctori gloriosum.
Rarierunt, qui eo sciant uti. Nos quanti sit, ex
eo æstimare possumus, quòd paucorum homi-
num est; & plures habebit, qui non capiant,
quàm qui eo capiantur. Ego sanè in censum
bonorum eum dedico.

GEORGIUS CRITTONIVS,
Professor Regius, in Oratione de Sortibus
Homericis, nostrum PASSERATIVM
sic affatur:

SEd obsita spinis & interclusa virgultis loca
prætereamus: ingrediamur campum æqua-
ẽ iij

bilem & floridum, qui tibi, cultissime literatissimeque PASSERATI, sese iam offert; & tanquã Parthiam squallidam & saxosam emensi, inuisamus irriguam amnibus Mediam, odoratos Bactrianorum colles, diffusam vestitamque pampinis Mesopotamiæ planiciem collustremus: sic enim Homericæ iubent sortes:

Χαῖρον αἶ, ὑλ' ἔντα δὲ ἄκρας, ἥ οἱ Ἀθῆνη,
Regionem per frondosam, per cacumina, ubi ei Mi-
nerua.

Ex te enim si petatur, quis tibi ab ipsa pueritia præfuit Genius? quis vitæ dux? quam studiorum sectam sequi malueris? respondebis, montium cacumina ac sylvas te secutum, ea quæ antiquis illis poëtis erant in delicijs adamasse: depressa compita & conualles; quas terit imperitorum vulgus, tibi fuisse semper inuisa; semper ingenium istud tuum altioris intelligentiæ cupiditate flagrasse: ingenij aliste subuectum transisse Taurum & Caucasum, superasse Parnassum, & in iugis illis sacratorum montium Deucalionis eluione non attactis confedissee. In hoc nemoroso ac arduo itinere inambulanti tibi Minerva sese obtulit, sapientiæ nempe dea, quæ te docuit ut quàm præclara tibi à natura data sit persona, intelligeres: quæ effecit, ut literato, quo nil dulcius, otio contentus, leuia, quæ vulgus miratur bona cõ-

temneres : vt studio tuo delectatus , nil aliud
quàm arborum vmbacula & fontes, quàm ru-
ris commoda & liberas animi voluptates con-
fectareris. Quid enim frequentius tua sonant
diu desiderata , sed tandem aliquando docto-
rum theatro proposita poëmatia, quàm fontes,
lucos, & viridaria villæ Memmianæ : quæ &
argumenti genere declarant hunc Homeri ver-
ficulum diuina quadam sorte tibi datum : &
styli grauitate laudistuæ inuidos fateri cogunt,
non sine propinquiore numinis afflatu, carmen
tam plenum numerosumque fundi potuisse?
Iam illud quantum est, cùm à poëtica libertate
ad oratorum sermonem verecundio rem multò
simpliciorémque te transtuleris, vt in heroïcis
numeris Virgilium, sic in concionibus & in fa-
miliari sermone Ciceronem referre? cùmque
à focco ad cothurnum altius insurgis, ita in
vtraque scena personam decenter agere, vt pa-
rem in vtrâque spectatorum plausum merearis:
ita in dissimillimorū scriptorum lectione ver-
sari, (quorum multis sua styli insunt vitia) vt ta-
men à Tullianæ dictionis munditie nitoréque
nusquam recedas: quæ auctores ipsi cacozeliis,
obsoletis, peregrinis aut barbaris vocabulis in-
ficiunt, ea tu germanissimus Romanæ ciuitatis
ciuis purè nitidéque eloquaris ac enunties?
Hæc certè duplex in vtroque orationis genere

laus, Passeratij vnus propria, facit vt dubitem,
an tui similem vlla maiorum ætas protulerit,
vlla posterorum sit habitura. Etenim si bonos
& disertos oratores singula vix ferunt, vt ille
dicebat, sæcula: quàm multis sæculis parturire
naturam oportebit, antequam vnum & eun-
dem denuo pariat, in quo hæc summi oratoris
laus cum summi poëtæ laude coniuncta resi-
deat? Quàm verò multum eadem natura desu-
dabit, quoties signiferi orbem emetiri solem
oportebit, antequam alter tui similis, Monan-
tholi, generi humano reddatur? qui, vt Passe-
ratijs eloquentiæ laudem poëtica, sic mathe-
scos scientiam Medicinæ gloriâ cumulasti.

R O D O L P H V S B O T E R E I V S,
*in magno Francia Consilio Aduocatus, de rebus
in Gallia & pene toto orbe gestis Com-
mentariorum libro X.*

IANVS PASSERATIVS, Romanæ facun-
diæ regius professor, vigiliis & æuo conse-
ctus moritur: vir cuius gloriæ, nec præconium
addere, nec liuor detrahere quidquam potest.
Plauti & scriptorum melioris æui interpres fe-
lix, fidus restitutor, prosa & versu, nedum Lati-
nè, sed vernaculè elegans, vt opuscula soluta
& vincta testantur. Cæcitas, quæ ex iugi lectu-
ra homini oborta est, ferias à publicis lectioni-

bus fecit; de illa luculentam orationem habuit,
quæ tota oculata est, & picta floribus, quâ
damnum lucis solatur. Mortui funus, non tam
libitinario apparatu, quàm literatorum lugu-
bri comitatu, conspicuum fuit. Ipse sibi hoc
Epitaphium scripsit, quod marmore incisum,
in æde Dominicanorum, vbi conditus, legitur:

*Hic situs, in parua Ianus Passertius urna,
Ausonij doctor regius eloquij:
Discipuli memores, tumulo date sertamagistri,
Ut vario florum munere vernet humus;
Hoc culta officio, mea molliter ossa quiescent,
Sint modò carminibus non onerata malis.
Veni, abij: sic vos venistis, abibitis omnes.*

Aliud.

*Miseri beatus portus hic est corporis,
Commune tectum, turbida vita quies,
Nemo unde aberrat, caca sit licet via,
Egreditur unde nullus, ingressus semel,
Neceſſitatis lege sed potentior
Hinc Christus, inuictum vnus extulit pedem,
Ad astra functis liberum pandens iter,
Hac habito clausus aeterna domu,
Vbi opes auari condita Ditis iacent.
Qui sim viator quæris, ipse nescio,
Qui sis futurus, tu tamen per me scies,
Ego, tuque puluis, umbra, & umbra somnium.*

Io. Iac. Memmius, Errici fil. Ioan. Iac.
nepos, supp. libell. in Reg.
Mag. discip. Præcept. cariss. hoc
Monum. de suo fieri cur.

Obijt XVIII. KAL. OCTOBR.
Die S. Crucis, ClO. IO. CII.

IDEM BOTEREIVS

in sua Lutetia, p. 24.

A. **I**PSE tua, at vereor, ne in verba nouissima
peccem,

Vmbra pia, Elysij permixta heroibus umbra,
Threiciꝝ vatis comes umbra, & Mantuae alumni,
Ne tua sint onerata malis qui versibus ossa
Ipse vetas, lasi, & fiam reus ipse sepulcri;
Sed tua, cui EMVNDVS mandata suprema vo-
luntas,

Dat veniam, atque tuis non illeabile carmen
Manibus hocce putat, Clarie optimus arbiter artis.

B. EMVNDVS, quo non sermonis mūdior vllus
Ausonij cultor, nec te magis alter adequat
PASSERTI, patriā utque pares, sic mente ge-
melli;

Nuper acerba virum fata inuidere Camænis,
Argiuo Latioque virum sermone potentem,
Pulpita regalis moderantem prima cathedra,
Ferre Caiſtrini mage dignum nomen oloris,
Quam gentile, tulisse leui de Passere nomen,

*Plautinum ille sciens genium, prope solus, in omnes
Proteus ingenij formas, seu lege soluto
Arpinatem aquat, victo aut sermone Maronem.*

*A. Encomium Iani Passeratij, qui quod sibi scripsit epitaphio
mala & incendit a carmina à tumulo prohibuit.*

*B. Emundus Richerius testamenti curator delectus à Passera-
tio suo contribuli.*

F R A N C I S C V S P A R E N T I V S
in Oratione de regia sua professione, habita in
aula Cameracensi, anno 1595. qua inter alia de
Animatione, ex Philosophorum veterum sen-
tentia, nonnulla differuit, hac habet de nostro
P A S S E R A T I O, pag. 34.

IN litteris humanioribus verborumque pro-
prietate ac significatione euoluenda, rara illa
& omni artium genere excultissima P A S S E -
R A T I I doctrina, quâ ille velut Phoenix, & ut
Romanus alter Varro, iudicio omnium excellit.

Libuit etiam hic, propter elegantiam verborum at-
texere, quod vir eruditus Iacobus Mantellus
Parisiensis Medicus, de Passeratio habuit, Epi-
stola quadam ad D. Belinum Tricassinum, do-
ctissimum item Medicum, scripta.

ITo nunc, & mirare hanc Ætatem summa no-
bilitum ingeniorum infrequentia dedecora-
ri. Superiore, si vspiam, apud nos sanè, vige-

bant politiores litteræ: vt si quâdo seu humanè collibuisse dicere, seu poeticè, Romanos veteres à nostris tantum non exæquari cōtendis-
ses. Tibi ne Turnebum citem ad testimonium, aut Muretum? Scaligerum aut illustrè Thuanum? Passeratium nostrum sufficiet. Ita quippe Spartam ornauit vtramq;, vt vel ab ipsis Musis nihil omnino foret in eo desideratum. Ac profectò dum quæ tum prorsà tum vorsa oratione nobis ex ipso supersunt ingenij monumenta perpendo, subit exclamare,

O suavis anima! qualem te dicam bonam

Ante hac fuisse, tales cùm sint reliquia.

Nihil enim *Kalendis Ianuarijs* variisque aliis *Poëmatibus* scitum magis aut sanioris coloris: nec Poëtam vllum (absit inuidia verbo) sua tempestate crediderim vsquam extitisse generosioris spiritus, aut *μυλοβολίας* digniorem. Quid autem *Prefationibus & Orationculis* elegantius? Mirum quomodo tam curiosa Latinitas reperiatur in Extero. Quibus nominibus laudis accessio fit maxima nostræ Campaniæ, quæ viro illi doctissimo cum E. Richerio & Pithœis, at quantis viris! patria fuit communis, &c.

SEBASTIANVS ROLLIARDVS,
in suis Musurgiis.



IANI

PASSERATII


NVPER ELOQVENTIÆ

PROFESSORIS ET INTER-
PRETIS REGII,

TRAIECTVS ELYSIVS:

& in eum

PARODICA MONODIA.

 *Ic Erebi te Diua potens, sic prauius
Hermes,
Sic regat ipse Charon, dux irremcabilis
vnde:*

O qua Cymba granem PASSERTI trajcis umbram!

Parce precor Stygia salebras haurire lacuna:

Ast saluum Elysijs hunc protinus invehc Lucis,

Deliciasque nouem seruare memento Sororum.

Olli robur erat iuuenili in pectore triplex;

Et Marpesiaco steterant praeordia saxo:

Qui prior ingenij potuit turbare veterum,

Ac fragilem trucibus studiis committere vitam.

Lubrica nec timuit praua dispendia sortis,

*Nec gelidas hyemes, rabidi non sideris astus,
 Nec simul atque nouo dulcescunt neectare fruges,
 Quos trahit Autumnus cruda in vitalia morbos,
 Quo melior Index, nec certior Arbiter ullus,
 Debile cum cerebrum tristis pituita fatigat,
 Spiret ab Æoliis Boreasne vel Auster hypæthris,
 Rideat an cælo Zephiritis amica sereno,
 An dubios Cereri minitetur Aquarius imbres..*

*Sed quibus, heu! fugiat caput obicectare periclis,
 Quem sacra perpetua firmauit adorea palma?
 Qui siccis oculis, & nil stridente molari,
 Attigerit propius Pindi quod limina seruat
 Monstrum informe, ingens, superos cui nomen*

HIDROTA

*Imposuisse ferunt, homines dixisse LABOREM:
 Abside nec clypei præfert quos horrida Pallas,
 Gorgonæa tremuit colubros spectare Medusæ,
 Imo & honore tumens, Absynthia fontis Equini
 Hausit in exhaustis labiis, ita præpete cursu,
 Tôtque per anfractus, scopulósque, morásque viarû,
 Scándit Hyantæis habitata mapalia Nymphis.*

*Ergo agè necquicquam sublimi fornice vecto,
 Nimbipotens Genitor terras discreuit Olympo,
 Si tamen audaci mens acriter incita motu,
 Fictilibus pennis volucrem se tollit in auras,
 Ætheréosque vago pedemate circinat orbes,
 Vnde gradum referens, Clarij Triuíaque meatus,
 Astrorúmque vices populis & fata recludit.*

Ergo

*Ergo agè necquicquam Telluris limite fixo,
Multa Tridentigeri porrexit brachia Nerei;
Si tamen Argolica tentant caua marmora puppes,
Atque dirempta solo, ponti commercia iungunt.*

*Denique callidior nisi nos Deus ipse fefellit,
Incassum, quæ sacra suo stant Orgia nutu,
Abdita frontigena conclusit in arce Minerva,
Si tamen inde prior potuit diuina Matheſis
Exerere ardentem quo cuncta penetrat ocellum,
Deinde plagas vasti cui sors describere Mundi,
Quæque scit innumeris numeros signare figuris,
Tumquâ Nature totus percurritur ordo,
Et graue Iudicii quæ limat acumine pondus,
Quæque serit varios vno licet ore lepôres,
Quamque iuuat rudibus cita verba notasse lituris.*

*Nec minùs Iapeti luit hanc gens postera culpam,
Aternùmque luet, dum vulturis instar Apollo,
Enthea perpetibus laniabit viscera curis,
Sisyphia. ve cruci Musarum impinget alumnos.
Nam post sydereis carptum fernalibus ignem,
Vulgatâsque artes: quæ non heu! tormina doctis?
Quos non evomuit Pandoridis arcula morbos?
Siue interciso rediuiuas tempore febres,
Aut quibus Vreter patitur distendia scrupis,
Quod vè per articulos, nodosq; vincula grassans,
Cum pedibus satagit luctari immite Duellum:
Et te quæ primos (PASSERTI) exorsa furores,
Coclitis exiguo carefecit luminis usu,*

*Ne ve quid immerita cumulo decederet ira,
Mox tibi compagem membrorum infesta resolvit.*

*Heu crudele nefas! vah! iniquo vœionis æstro,
Caciter excussi tonitrus, & ab Egide brutâ!*

*Heu misera lauri premitur queis fulmine vertex,
Et tot in-humanis obnoxia bacca Megeris!*

Cum nil tale ferant, iacitur quibus alea pernox:

*Quique terunt olidas Phæbo indignante popinas:
Vel gula queis tumidi mēsuram abdominis implet:*

*Quique Nepotino luxant patrimonia sumptu,
Cypria laruatis incunt dum festa Choreis:*

Ac strepitu Cythara curas genialiter arcent:

Mollius unde thoral fessis hoc de super unum

Adnuit, in medias somnum diffindere lucas.

*Tu sed enim contrâ; vili, sine pulse, grabato,
Seminecesque dolens (PASSERTI) sterneris artus:*

Ac licet haud valido nec Pæonis arte moveri,

Corpore torpentem lethargicus enecet alior,

Iâmque affigat humo, quod pol sibi terra licetur:

Pars tamen illa tui melior, qua Numen anhelat:

Parcarumque glomos, atque irrita licia temnit,

Non lecti involucris capitur, sed libera nexu,

Emicat interdum, solitoque accensa furore,

(Fallat ut ingenti coëuntia tadia morbo)

Idalios gracili recolit modulamine versus,

Aoniâsque fides, & Cynthia pleetra retentat,

Donec post aliquot mutili trieteridas aui,

Totque Phlegontais reuolutos curribus axes,

*Deuolat Vrania folio Thaumantias Iris,
Egregij tandem languoribus icta Poëta:
Deuotumque caput fatali crine repurgans,
Singultantem animam diuturno è carcere soluit.*

*O si digna viro pietas vos ulla remordet!
Vertite me in fluctus, resonumque madetibus aquor
Elicite ex oculis, vos ô, quibus agra liquantur
Pectora, spumosisque ruunt tenuata sub undis:
Aut hydrias mihi ferte graues, nam talia flendo,
Vix Aganippaus lacrymis suffecerit humor:
Et meritò plorem, quem pulla in veste quiritat
PARRISIOS colles crebris Academia pulsans
Questibus: heu! quianam radios mihi Phosphore
condis?*

*Heu! quianam remoues humerū succollifer Atlas:
Heu quianā mihi chare iaces, mihi bellule PASSER?
Gentis Olor, Charitum Turtur, Venerumque Pa-
lumbe,*

Flos hominū, lux semideū, Mundique voluptas?

*Catera pergentem, vix tertia verba sequuntur;
Intus at expirans pressis vox faucibus hæret:*

*Aggeminant sociale modò Regalia murmur
Pulpita, Mercuriūque parens, Suadelæque nutrix;
Et quibus illicium rosei fauet oris Iynxes:*

Grex quoque mellifluo nunquam satur amne rigari.

Totum Hippocrenes obnubilat aëra luctu,

Exstinxitque faces funebre Cupidinis agmen:

Nec Thiasos Leneus agens, comitesque Satylli;

*Nec Corythigera per deuia tesqua Napea,
Ipse nec Arcadiis gemuit Pan secius antris:
Te te (P A S S E R T I) qua vallibus incidet Echo,
Te genus alituum, queis Calica plaustra vebuntur,
Te repetit, quodcunque nouâ sub fronde susurrat,
Interitûque tuo Natalis Dindyma T R O I Æ,
More suo grauius Corybantas in ara laceffunt.*

*Fallor? an & rigido succumbere nescit Auerno,
Eumenidum-ve pati furias, Lachesis-ve bipennim?
Heroum generosa phalanx, cui barbarus hostis,
Tot dedit ancipiti de marte referre triumphos?
Cuius ouans hederis amicitur brachia Paan?
Auricomumque caput felix Amaranthus inumbrat?
Pierum quam mulcet epos? cui nobile marmor
Transit in effigiem? cui nunquam accessa profanis
Sponte deum propylæa patent? & calce supino
Ferreus indomiti vectis confringitur Orci?*

*Sic, mortale iubar sursum leuat inclyta virtus?
Ac veluti solers compactis glutine pennis
Dadalus, insolito magnum per inane volatu,
Penè tulit faciem medias in Orionis ades;
Utque lacertoso cubiti sinuamine rupit
Herculeus Phlegethonta labos: ita spiritus ingens
P A S S E R T I, editior iam quolibet aggere laudum,
Purior & positâ cum face. Liberidis urnâ,
E L Y S I U M permensus iter, se reddidit astris!*

*Nam bona quem vigili nascentem lumine vidit
Terpsichore condita mero cui Gratia philtro,*

*Afflauit niueos lingua rorantis amores:
Cui cicur in totas efferbuit hepar Athenas;
Cuius & ad Tripodem stupuit cirrata Iuuentus,
Abdita cum Latiis depromeret ara fauissis,
Aut Danaum locuplete penu. seu fortè liberet
Nunc molles Elegos querulis timuere Camænis,
Comica vel tereti proscenia currere focco,
Grandibus aut suris Tragicos aptare Cothurnos:
Hæc potuit qui cuncta virum, maiora potentem,
Scilicet imperio Libitina vadariet ausit?
Solliciti nec plena metus, hunc fallere Manes
Calliope studeat, lemurumque reuindicet umbris?*

*En faciunt ostenta fidem: vos credite vati,
Quem docuit verace patens Carmenta sigillo,
Prodidit arcani seriem cui Delphicus Idmon,
Nec calare suos voluit Dodona lebetas:
Quippe sub extremam quâ noster hic Orpheus horâ
Flabat hiascenti Cycnaas gutture voces,
Et reliquus sensim vapor omnis abibat in Euros:
Fortè LVTE TIACO de vertice sueta profundum
Percurrisse Poli stadium METEORIA virgo,
(Nemine talis eheu! scurior, Oscine casus)
Picta ferebatur tunc per laquearia Cali,
Pleiadas Hyadâsque tuens trepidumque Booten:
Cum subito rutilâ PASSERTI apparet in æthra,
Os, humerosque viro similis quem norat, imago;
Primitus illa pauens, retrahi: dein poplite paulum
Firmior, attendit, pompamque obnixa notauit.*

*Currus agebatur Paphiis hinc inde Columbis,
Ambrosiam fudit pragnans quæ Iuno papillam,
Multa in circuitu Geniorum classica, multi
Plaudebant auium glomerato examine cantus,
Aurea frenâ tenens præerat Caducifer ales,
In medio facilis PASSERTIVS ipse videri:
Dextram Oleæ termes, mixtis at tempora canis
Laurus Elichryso simul inter plexa tegebat,
Versabantque rotas geminæ (pia pectora) Nymphae,
Ambæ floridulis in Aprilibus, Atthides ambæ:
Prima, nec immeritò laudata Poëtria SIREN:
Quâ sine belligeros nec mars lenire tumultus,
Nec festas agitare dapes Pax candida nouit.
Altera, lacte, fluës, & Hymetti adspergine PITHO,
Quæ duplicis pariter constringens fœdera Mundi,
Temperat insultus populorum, ostrôque superbos
Iracunda Ioues deponere fulmina cogit.*



A Σ Π Α Σ Τ Ι Κ Ο Ν
ΙΑ Ν Ι Α Υ Ρ Α Τ Ι,
Α Δ Ι Α Ν Υ Μ Π Α Σ Σ Ε Ρ Α Τ Ι Υ Μ:
Ε Λ Υ Σ Ι Ι Ν Ε Μ Ο Ρ Ι Σ Α Ν Τ Ε - Λ Ι Μ Ι Ν Ι Ο
Σ Υ Κ Κ Ε Δ Ε Ν Τ Ε Μ.



*IS tua PASSERTI tandem vetus ap-
pulis oris,
Fama per innumeros conciliata dies;
Gratior atque oriens niueo de pectore
virtus,*

*Creber & antiqua simplicitatis bonos,
Te constans in amore fides, in agônē facultas,
Robur in arumnis, cultus in officiis:
Te plutei casura frequens, studiūque Iuuenta,
Et Schola nunc celebri nuda Magisterio;
Te pulsa haud unquam populari Barbata castu,
Sed quod ab irriguo Nectare manat Epos;
Flexanimi potior te Cecropis ore venustas,
Diuesque Hybleis mustea lingua fauis:
Te decoris quicquid, solida vel laudis ubique est,
Huc stitit, emensum plurima Lustra Senem.*

O felix! quæ Cymba meos mihi vexit Amores!
 Siue Cytoriaco creuerit illa iugo,
 Siue alibi, in Nemorum frondes dum perfurit
 Auster,
 Ediderit querulis sibila multa comis.
 Heu! tua quàm cupido propius datur ora tueri,
 Longaque quàm tristes secla tulêre moras!
 At post tot dubio reuolutos cardine menses,
 Tot quoque rupicibus functa pericla viis,
 Nunc saltem incolumi placidè collater amico,
 Eius & amplexu liberiore fruar,
 Nunc simul alternas liceat reflectere voces,
 Ac fidei signo conscriuisse manus.
 Ah quoties timui! (nàmque & post funera durat
 Sensus, & igniuoris scit superesse rogis)
 Ah timui quoties! patrio ne quassa tumultu
 Vis tua, se præsens ferret in exitium;
 Raptâ-ue cuncti-fremi necopino turbine fati,
 Pieridum tumalis mitteret inferias.
 Ne clamore virum, tua ne clangore tubarum
 Deficerent subitis territa pleetra minis,
 Fœdâque barbaries toto iam gliscera Pindo,
 Serperet in teneros (deside pube) sinus,
 Tunc potui, si bina viris nent stamina Parca,
 Bisque datur stygios exsuperare lacus;
 (Vsque adeò meminisse pudet, luctusque resurgit)
 Tunc potui innumeris mortibus ipse mori.
 Castalio siquidem princeps ego vertice Musas,

Deduxisse bonis prædicor alitibus,
In loca sentastu. steriles & primitus agros,
Quos nunc mellifluis Sequana lambit aquis.
Et paterer tantos frustra periisse labores?
Idquæ feris Martem posse libidinibus?
Plura tamen, reprimor; flendo nam ducere tempus,
Non sinit ELYSIÆ sedis amœna quies.
Hic est ille nouus totâ quem mente petisti
Orbis & Indigetum Sylua beata penu:
Purior assiduus ubi Lucifer exerit ortus,
Lunâque flammeolo candidiore nitet;
Latior ac trahitur Sirenum vocibus ather,
Et sua dat placidis gaudia Vergiliis.
Nulla procelliferos heic Sucula contrahit imbres,
Nullus Hyperboreo frendet ab axe Trion,
Heic nulli crepitant lapidosa grandine sulci,
Ægranec immodico frigore sauit hyems.
Perpes at E Iarinē Zephyrus dum Chlorida mulcet,
Ambrosiis que iterat basia multa genis,
Viuificas spirare libens non desinit auras,
Floribus ac gremium dædala pingit humus,
Baccare, purpureis violis, & olente ligustro,
Coccina quique Ducum sanguine tincta gerit:
Aut quibus irradiant stellantia pratula gemmis,
Hortus-ve insignes queis fouet areolas:
Vnde sibi Elysia texunt redimicula Nympha,
Et capiti lumen, brachioliisque decus;
Seu propter gelidos quibus ubera lactea fontes,

Seu choreas agitent vallibus auriferis;
 Aut ubi crine tegunt virides Pineta smaragdos,
 Persona Luscinij, pippula PASSERIBVS:
 Quippe suos etiam nobis integrat Aëdon
 Guttur multiplices euariante modos:
 Sed nec opem Merulus, neque picta refellit Achātis,
 Nec minùs indigena dulcè queruntur aues:
 Prasertim globulos ubi Myrtus opacat amantum,
 Exacuitque nouam Cypridis igne facem.
 Hec! quidenim pia Mens finxisse beatius ausit?
 Vel cerebro vanis optet imaginibus?
 Fortunata nimis! nimiùmque argilla Promethei!
 Quam fauor huc superùm sorsque benigna tulit?
 Nàmque fluentis sono iactatis aequore Nautis,
 Votini partus quod facit hospitium,
 Hoc super, innocua perfunctis munera vttæ,
 ELYSII nemoris prabet amica salus.
 Res quoque mira, sequi procùl hâc statione repostos,
 Quod studium viuax, antè sepulcra fuit.
 Parrhasijs viden' hos pigmentum animare tabellis:
 Quòdque eludat aues, ludat & artificem?
 Illos Phidiaco polijisse toreumata calo?
 Ducta nec vnus Mentoris ara manu?
 Audin' ut arguto pulsant hi pectine chordas?
 Et vocale iuuet concinuisse melos?
 Contemplator item, sua queis arcana reclusit
 Omniparens Sophie, Mnemonidum. ve cohors:
 Vt satagant celebres renouare docendo cathedras?

Vt volup' assiduis inuigilare libris?
Ecquàm undante fauo, sua prorsa aut vorsa, lo-
quantur?
Ac nihil abstulerit corporis interitus?
Aspice Collegas, quorum pars magna fuisti:
Et quibus aduentu cor salit omne tuo:
TVRNEBVM-ne vides? Tripodis quo Principe
 Mysta,
 Sol stupet Eous, sol stupet Occiduus?
 Huic propè TVSSANVM, VATABLVM, faciemque
 DANÆSI?
 Tene latent HELIAS, GVLLONIVSque Gener?
 Dignior & Litui GENEBRARDVS Aquēsis honore,
 Cui retulit proprias lingua Sionis opes?
 Atque alij, quos laude pares Encyclica Pallas
 Æternū vetuit nocte silente premi?
 Sed paulūm tu verte aciem, quā proxima Cycnos
 Ripa sub Orphais nutrit arundinibus:
 RONSARDVS-ne patet? Columen quod Celtica
 Phæbas,
 Maius & imperio prodidit ingenium?
 BELLAQVEI, BAIFIQVE simul vultusque IODELI,
 Et quotquot Melicis enituere lyris?
 Quæ fuerat quondam studiosa cura Palaestra,
 Maior ab exsequijs sub Phlegethonte manet.
 Sic mihi (nam fateor) persæpe re-vellicat aurem
 Cynthius, & solitam vult ferijisse Chelyn.
 Te quoque lex eadē (PASSERTI) hinc vsq; tenebit;

*Iam nunc quando nouis indigitare choris;
Huc ades expectate diu, te cuncta saluant
Agmina, iam patulas hora subire fores;
Ingredere o felix! tibi Cinnama spiritus halet;
Et sursum caespes mollior ossa premat.
Hac, pater AVRATVS, senium, pallente Corymbo,
Ornatuque micans floridiore caput,
Hac adigens lacrymas in gaudia multa, profatur,
AVREVS ille sacri Dux Ariesque gregis.
SVBII CIT at paucis contra PASSERTIVS Heros,
Nec remouet tenuem Coetus ab aure sonum.
Qua mihi grataris veteri vetus hospes Amico,
Quaque sub aspectum prospera cuncta voues:
Munifici iecoris praestant quia nobile pignus,
Me ne pari affectu reddere posse vicem?
Id valeant saltem vires, quod firma voluntas,
Aut certe in magno, sit voluisse lucrum:
Vix sat enim recolam, quem non marcentia Lethes
Pocula, fecerunt im meminisse mei.
Ac equidem, Lachesis, dum per reuolubile pensum,
Ius fuit Aonios incoluisse lares:
Semper ab AVRATI mihi Numine prima cucurrit
Linea, & eiusdem desijt exodio,
Hic mihi Phamonoës stimulos sub pectore vertit,
Hic polus auspicijs, hic Cynosura meis.
Quaque corallifero vestigia pressit in Hamo,
Iugis eo sequier tramite cura fuit,
Freta nec illius rediniuis pulpita Lauris,*

Segnius officio destituisse ferar,
Quamlibet instabiles variarent tempora casus,
Ac quocunque Erato flecteret orbe pedem;
Non licet attonitas Mauorte furente per urbes,
Obstreperent studijs Classica tortameis:
Nec licet ingenium subiens cariota senectus,
Ætatis veniam legibus appeteret.
Sustinuique libens diuturna ingentia molis
Pondera, & extremo perstitit ungue labor:
Corporca tegetis donec Mors fasce soluto,
Compulit ELYSIÆ pergere fedis iter.
At tu suscipias deuotum AVRATE Clientem,
Obsidibusque tuis annumerare velis:
Da Pater alloquio, da semper amore fruisce,
Perpetuòque tuum cingere possc latus.
Hac ubi Mercurius memori sub pectore fixit,
PASSERTI fuerat qui per Auerna Comes:
Extemplo foribus sese subducit Eburnis,
Præpes & aërias carpit ut antè vias.



IN EPITAPHIVM
CARMEN

A PASSERTIO VIVENTE SIBI
IPSI SCRIPTVM.



P S E sibi viuens condidit PASSERTIVS
Titulum sepulcri : scilicet mortis
memor:

Cuius se acerbo vindicans ab impetu,
Obliuiosi fortean præfagiit
Doctis iniquum sæculi silentium:
An vt hac (molestus nemini qui vixerat) .
Mortuus opellâ subleuaret posteros?



E P O D E
C H O R I E L Y S I I.



Von cæca vano sudat anhelitu,
Mortalium Gens, quod tacitis
vouet
Fallax acerris, quod benignos
Audet hians rogitare diuos:

Infanientis desipientiæ
Vocale pignus: num queat vberes
Fletus morari? num procacem
Democriti tenuisse risum?

En! qui molestis fascibus ambiunt
Strictas secures, sceptrâque Principum:
Ac ære non paruo coemptos
Fumiferi strepitus honores.

En! qui retruso Mygdonias sinu
Opes aceruant, textâque Scribus
Aulæa, fulgentesque rubri
Æquoris indicio lapillos.

Quid: delicati queis nihil anteit
Ventris saginam? Murrhina qui bibunt
Nardo peruncti? vel Sabæ
Inter odoriferos vapores?


Sed quotquot vsquam pascit inanibus
Mens stulta curis, turpiter occidunt:
Audítque sub cryptis Auernus
Luctificæ sonitum ruinæ.

Solus fauenti Numine Cælitum,
Stat ille fælix: qui procul ambitus
Lucrique Scylla, qui pudendo
Fræna regens potiora luxu:

Integra doctis lustra Sororibus,
Deuotiori pectore mancipat:
Sacrosque (P A S S E R T I) labores
Flexilibus veneratur vlnis.

Io triumphè, protinus aureà
Io triumphè, claret ouans manu:
Tenditque post decliue fatum,
E L Y S I A S remeare sedes.

AXAMENTA



AXAMENTA

NYMPHARVM ELYSIADVM.



AVDENT pascua, roscidique
saltus,

Ortus sideris aureæ Diones:
Gaudent confita, nobilesque
plantæ;

Et Choris Dryadū statim recessus,

Et festæ veneres salubris horti,
Et lætæ segetes feracis arui,
Hac Cytheride pampinus superbit,
Et cacumina montium resultant,
Et declivia collium virescunt:
Sic pratensibus & salicta ripis,
Et agrestibus iliceta dumis,
Et frondentibus æsculeta sylvis:

Gaudent Nereos heu iocilla; Nauræ,
Sacro Castoris atque fratris igni:
Gaudet futilis alveus carinæ,
Ac oraria blandiente lino,
Et aplustria feriante Malo,
Tunfillæque vagos trahunt colores,
Antennæque novos ciēt tenores,

Anchoræque suos leuant labores:
Quippe fideris illius recurſu,
Trux Salacia protinùs quieſcit,
Et commurmura flaminum ſileſcunt,
Et bullimina flu&uum reſidunt.

At nunc PASSERIS emicante ſigno,
Quà Cœleſtis OLOR, LYRÆ propinquat,
Et nexu triplici ſouentur vnà:
Gaudebunt agè, quotquot antra Cyrrhæ,
Quotquot Pegafidum nemus frequentant,
Quotquot Mercurij fides laceſſunt,
Quotquot Palladis aut tenent oliuam,
Aut Apollinis ambiunt corollam.
Gaudebunt quibus expetita Clio,
Verſat Nectarei liquoris vndas,
Præbet vatigenæ ſoporis umbras,
Et tendit niuei decôrûs vlnas.

Sic tandem merito recepte Cœlo,
PASSERTI precibus faue tuorum:
Da, te iam valeat ſequi Iuuentus,
Æternûmque tuis ſonare ple&tris,
Æternûmque ſacris ferire thyriſis,
Æternûmque tuis nitère Lauris.

TOMBEAU
DE MONSIEVR PASSERAT.



EL VY, qui par l'aspect de tant de
Mausolées,
Se plaint que la vertu soit subiecte
au trépas:

Et que le corps des grands serue aux vers de
repas,

Après s'en estre au Ciel les ames enuolées,

Mais qui plus a pitié des troupes desolées,

Dont le cœur dégousté de tous autres appas,

A chery seulement, & retracé les pas

Des Muses, pour jamais à l'honneur immolées.

Celuy là s'il est braue, ou de marque &
d'aloÿ,

Accuse en vain les Dieux; puisque telle est la
loy.

Du Sort impitoyable, & du Destin supreme:

Que s'il n'est de valeur: voiant les grands
mourir,

Et croiant qu'il luy faut plus tristement perir:

Ce n'est autruy qu'il pleure, ains se pleure soit
mesme.



EPITAPHIUM I. PASSERTI
PROF. REG. NVPER DEFVNCTI,

Expressum ad verbum;



FERRIGENVM si quando virum vos
perrogetvllus,
O Musæ Ægiōchi ter tria Corda
Iouis!

Cuius nam graciles modo Phœbus amauerit
Hymnos,

Et resonam Melici nectaris Harmonien?

Hoc subito date responsum: Primatis Alumnè,

Cui præsignetulit PASSERTIS aura decus:

Quem Charis in TROIÆ præpinguibus edidit
aruis,

Et puerum lactans cœlitus enutrijt.

Sin dicto obstupeat; tanti cognominis Hermè,

Nunc stratum, exiguo puluere posse premi.

Verè hoc Pierides subiungite: Carmina vatum,

Frangere vim fati, præcipitesque rogos.

ET PASSER INVENIT SIBI DOMVM;

ET TVRTVR NIDVM SIBI, VBI PONAT

PVLLOS SVOS.




D. O. M. S.

IANOPASSERTIO TRECENSI, VIRO
INTER ERVDITISS. MODESTISS.
INTER MODESTISS. ERVDITISS.
ACADEMIÆ, IN QVASOLI BARBARI
ET IGNARI PEREGRINANTVR, AS-
SERTORI PRÆCIPVO: QVEM LICET
SONTICVS MORBVS, PER PLVRES
ANNOS LECTO PROSTRATVM AF-
FLIXERIT, TAMEN VEL HOC IVVIT
STANTEM MORI, VT TRIUMPHA-
LEM REGIÆ CATHEDRÆ SESSIO-
NEM, EGREGIO PÆANE TERMI-
NANS, MOXQVE INDIGESFVTVRVS:
LITERATIS PRÆSENTIVS NVMEN
IN POSTERVVM AFFVLGERET.

ACAD. MOER. P.

*Cum reliquis dederit tam multa Epicedia vinens:
Qui facerent functo, vix habuisse, doles?*



AD LECTOREM

H*Æc nos sepositis agitamus vt otia nugis:
Scito quoque appositis tractare negotia nugis.*

SEBASTIANVS ROLLIARDVS
MELODVNENSIS IN SVPREMA
CVRIA FRANCIAE ADVOCATVS,
LVSI AN FLEVI?

AVTVMNALIBVS FERIS,
LYTETIAE PARISIORYM

CIC. IDC. III.

GILBERTI GENEBRARDI,
*Theologi Parisiensis & Aquensis Archi-
episcopi, lib. 4. Chronologia, hæc habentur.*

XIV. Septembris, die S. Crucis, Ioannes Passeratius in Academia Parisiensi Eloquæ regius professor, nostra ætate clarissimus, Parisijs obiit, & Epitaphium hoc carmen prius sibi ipse scripsit.

*Hic situs in parua Ianus Passertius urna, &c.
quale supra.*

Monfieur BERTAVT, Euefque de Sees,
Abbé d'Aunay & premier Aumosnier de
la Reine. Sur la mort de Monfieur
de Passerat.

*S'il s'est fait vn triste naufrage
D'un des ornemens de nostre âge,
Quand Passerat nous a laissez,
Et s'il faut que tout le souffire,
Il n'est nul befoin de le dire,
Ses escripts le disent assez.*

RENIER en ses opuscules poëtiques qui se
lisent apres ses Satyres.

SVR LE TRESPAS DE
Monsieur Passerat.



*ASSERAT le seiour & l'honneur
des Charites,
Les delices de Pinde, & son cher orne-
ment,*

*Qui loing du monde ingrat, que bien heureux tu
quittes,*

*Comme vn autre Apollon, reluis au firmament,
Afin que mon deuoir s'honnore entes merites,
Et mon nom par le tien viue eternellement.*

*Que dans l'eternité ces paroles escrites,
Seruent à nos neueux comme d'un testament.
Passerat fut vn Dieu sous humaine semblance,
Qui vid naistre & mourir les Muses en la Franco,
Qui de ses doux accords leurs chansons anima,
Dans le champ de ces vers fut leur gloire semee,
Et comme vn mesme sort leur fortune enferma,
Ils ont à vie esgalle, esgalle renommée.*

DIONISIVS LAMBIVS

*Monstroliensis, & literarum Græcarum Doctor re-
gius in Oratione publicè habita Lutetia
Parisiiorum, anno 1568.*

IOANNES PASSERATIVS, Trecensis, qui
tres abhinc annos se ad Iuris ciuilis studium
contulit, homo in his literis, quas nos quotidie
tractamus, magno cum acumine, iudicioque
versatus: qui viri proximè à me commemorati,
primæ classis, moderatores fuerunt.

IANVS GRVTERVS,
tomo 2. Delitiarum Poëtarum Belgicorum.
Ad Ioan. Passeratij Carmina.

S*I quis vimque decusque representare tuorum
Vult Passerati carminum:
Ille necesse habeat Cygni confundere voces
Sonis Aëdonum aureis,
Terque trium lectos Musarum adiungere voces
Siredonum melismati:
Dein lituum flatus fidibus miscere lyrarum,
Tubaque bombos barbitis.
Omnibus ex illis concentus qui fluct, is par
Vix versibus fluct tuis.*

VALERIVS ANDREAS,
Belga, in Elogijs & Iconibus doctorem virorum,
Antuerpia editis anno 1611.

IOANNES PASSERATIVS, Gallus, Elo-
quentiæ Professor regius, Philologus &
Poeta, obiit Parisijs 1602. apud Domini-
canos sodales ab Errico Memmio grato disci-
pulo conditus, atque Epitaphio honoratus.
IOANNES EDOARDVS DV MONIN,
in manipulo Poetico.

AD IOAN. PASSERATIVM,
Eloquentiæ professorem Regium.

C*vm mea per curuam festinet cymba Maleam;*
Nec patrio sedeat culta, placensque solo:
Cumque iuuet terras penitus tentare repostas,
Præda Notis fferem, nî Palinurus eas.
Ni Palinurus eas, ego dicar perdere naulum,
Sed mihi dat naulum nominis umbra tui:
Sic etenim externos oculos, aurêsq; moraris,
Vt tua quisque sibi signa moretur ouans:
Nam postquam auriculis Passertia consonat aura,
E Pylis Pitho creditur hausta labris.
Hinc, mea sub Dio ne cymba fugata moretur,
Dum petet Eoos, dum petet Hesperios,
Te, mea spes adeo supplex tua numina posco,
Vt præcas velis portus, & ora meis.

EIVSDEM ANAGRAMMA

sanè Ianos superasti.


I Anum haud Ioannem licebit dicere
Te Passerati: Tu Ianos superas enim.
Iani bi frontes: Cynthio tu centifrons,
Qui Cimmerream Lyncica caliginem
Acie penetras, & refers Olympica
Luci repostam cana nubem Palladis,
Immo te Ioannem Ianum vocabimus:
Haud námque Ianos ceteros superas modò,
Superas sed & Te: nominis Themis hac tui.

Elogiorum Io. Passeratij.


FINIS.













IO. PASSERATII,

ELOQVENTIÆ PROFESSORIS

ET INTERPRETIS REGII

in Plauti Prolegomena Oratio.

BIBLIOTECA N. A. S.
ROMA
VITTOPIO EMANUELE



E quis me officii muneris-
que mei non fatis nunc
meminisse arbitretur, Au-
ditores, quòd Eloquen-
tiam professus, Oratores
subitò reliquerim, vt me
ad Comicos Poëtas con-

ferrem, expromenda brevis esse videtur ora-
tio, & quæ multis fortasse augeat citiùs quàm
minuat admirationem. Non enim dicam,
quod vetissimè commemorare possum, id one-
ris quoque mihi Regem imposuisse, & vt per
cuncta humanitatis studia liberè vagarer per-
misisse; sed contendam, & vt spero, argumen-
tis vincam, propè necessarias ad instituendum
informandùmque Oratorem esse huiusmo-
di fabulas: nec fuisse quicquam, hoc tem-

A

pore, & ex hoc loco, potiùs explicandum: finitimus est quidem oratori poëta, cuius virtutes omneis persequitur, cum numeris sit adstrictior, ornandique generibus socius ac penè par, si optimo dicendi magistro credimus. E poëtarum autem numero Comicus ad oratorem eò propiùs accedit, quòd mentibus impellendis, in quo vires opèsq̃ suas experitur & ostentat eloquentia, maximè vnus excellit. Quam enim corporis figuram vel Lysippus cælo fingere, vel Apelles penicillo pingere ita possit, vt tot tamque dissimiles animorum motus susceptis in personis exprimit Comoedia? Illic videre licet lætitia gestientes, contabescentes egritudine, furentes iracundia, amore insanos, feruentes avaritia, luxu perditos, expectatione suspensos, debilitatos metu: Nulla denique perturbatio in communi vita reperitur, cuius exemplum non ab ipsa scena petendum sit oratori. Quantà porrò sermonis elegantia niteant fabulæ vel incisum in comici sepulcro docet epigramma:

Immortales mortales si fas esset flere,

Flerent diuæ Camæna Nauium poëtam.

Itaque postquam est Orcino traditus thesauro,

Obliti sunt Romæ linguâ loqui Latinâ.

Hoc certè carmen arrogantis, & Campanam olens superbiam: Honorificentius Stolonis

de Plauto testimonium, qui *Musas* aiebat, si *Latinè loqui voluissēt*, *Plantino sermone fuisse loquuturas*. Non minùs illustre de eo iudicium fecerunt Lælius, Claudius, Aurelius, Accius, Manilius, Seruius Papyrij Boëti frater, literatissimi homines; & omnium longè eruditissimus M. Varro: qui linguæ & elegantiae in verbis Latinæ principem esse pronuntiarunt. Iam oratori quàm suavis & utilis sit iocus, quantumque profint ad causas obtinendas facetiæ, qui non ignorat, fateatur oportet harum palmam Plauto sine summa iniuria præripì non posse. Nisi fortè transuersus incurrens Horatius, suam illam vobis insusurrauit cantilenam:

At nostri proavi Plantinos & numeros &

Laudauere sales, nimiùm patienter utrumque.

Istuc nimiùm patienter, haud patiar impunè dictum esse, huncque testem aut vt cupidum refellam, aut suo ipsius opprimam testimonio. Et enim à quo dicitur

Plautus ad exemplū Siculi properare Epicharmi?
quo poëta nihil falsius, nihil festiuius? Nempe ab eo à quo audiuntur;

--- aspice *Plantus*

Quo pacto partes tutetur amantis Ephebi;

Quàm non adstricto percurrat pulpita socco?

Quòd si auctoritas cum auctoritate comparanda est, M. Tullium cum Horatio compone-

mus, qui genere iocandi urbano, ingenioso, faceto, refertum esse Plautum scribit. Sed periculum est ne, dum pro fama Plauti acrius propugno, meam existimationem quorundam sermonibus oppugnari sinam, qui ridicula miseris his temporibus patum convenire clamitabunt. Sint ista luctuosa & funesta tempora, ut sunt sanè; consumptis tamen lacrymis quæ diuturnitate malorum iampridè exaruerunt, cur, etiam in rebus perditis, lectitare comœdias nobis non concedetur, quum Nævio in carcere, quum Plauto in pistrino molisque circumagendis, eas scriptitare licuerit & libuerit? Neque vos pudebit, opinor, Philosophiæ parentem imitari Socratem, Auditores, qui spectator frequens veteris Comœdiæ fuit, neque ex theatro ullis maledictis & conuitiis potuit explodi, quibus coram Aristophane & cæteris petulantissimè indignissimèque conercebatur. Quid aliis vsuveniat nescio: ego de meo sensu ita iudico; Heracliti vitæ rationem, Democriti instituto non esse anteponendam: nec sanum illis esse sinciput qui Timonis mores amplexi ringi malunt quàm ridere. Suum cuique ingenium & studium: meum est eiusmodi, ut si quis me roget, uter magis mihi placeat in Comœdia Stratilax an Pseudolus, ingenuè responsurus sim huius fe-

stiuam vrbauitatem mihi esse cordi ; & animum meum ab illius tristitia atque agresti immanitate prorsus abhorrere. At in Comœdijs avarus senex , amator adolescens , herus iracundus , seruus fallax , meretrix improba , periurus leno , quum in scenam prodeunt , flexibiles , & in vitia proniores iuuentutis animos facile ad turpitudinem pelliciunt : Itaque tutius est non in theatrum ingredi , quàm deterio-rem è theatro regredi domum. Agnosco vocem grauis alicuius Censoris vel patruī , ex quo libenter quæram , quum eò nos vetat accedere vbi versantur ii quos modò nominaui , quò terrarum ille suo edicto nos amandat ? Quis hominum cœtus , quæ ciuitas , quæ in terris natio tam beata , vt iis se carere gloriari possit ? Quis erit exilio locus ? an nos relegabit in eorum vrbium aliquam , quas esse habitari-que in Luna Colophonius somnauit Xenophanes ? Quantò satius est , intenta in hoc vitæ speculum mentis acie , aliorum mores intueri , vt quæ recta videbuntur , ea consecutemur ; quæ praua , fugiamus ? Homericum Vlyssē admiramur , quòd variis erroribus per totum decennium , magno cum discrimine iactatus , multarum gentium mores viderit , ampliorēq; ei tribuimus laudem quòd πολύτροπος , quàm quòd πολίπορος extiterit : coactus enim

sum Græcè dicere, quo dicerem melius. Nobis adeunda non sunt tot pericula quot Vlysses subiit, vt diuersa hominum noscamus ingenia : nihil necesse est extra caueam aut orchestram peregrinari : hîc sedentes & securi minimo discemus negotio, quo modo declinare turpia, & honesta valeamus adipisci, neque solum quo modo nobis, verum etiam quo modo nostris opem feramus, & fortunæ medeamur incommodis. Nam illa nobis deesse non debet quæ mutis animantibus largita est natura prudentiam. Scarus piscis nassa inclusus non fronte conatur erumpere, nec infestis viminibus caput inserit, sed crebris caudæ ictibus nassæ aditus laxat, atque ita retrorsum euadit: cuius periculum si Scarus alius aspexit, apprehensâ mordicus caudâ, solet nixus erumpentis adiuuare. Simillima est Comœdiarum ratio, ex quibus & mutuum licet sumere auxilium & exemplum. Age, præcepta bene viuendi, nonne mollius fabellæ auribus animisq; adolescentulorum instillant quàm rigidæ philosophorum scholæ, multoq; auidius arripiuntur, ac tenacius inhærent? Quinetiam mirū quiddam hîc accidit vt quæ inimica est virtuti, eius conciliatrix fiat voluptas:

*Ac veluti pueris absinthia tetra medentes
Cum dare conantur, prius oras pocula circum*

*Contingunt mellis dulci flavoque liquore,
Ut puerorum atas improuida ludificetur
Labrorum tenuis, interea perpotet amarum
Absinthii laticem, deceptaque non capiatur,
Sed potius tali tactu recreata valescat.*

Aureolos præstantis poëtæ versus & vobis notos inserui, ut rem ipsam qua de agitur aptissima venustissimæque similitudine sub oculos subiicerem. Equidem Comœdiæ ut falcis vinitoriæ vsus fructusque est multiplex: quemadmodum enim vinitor quum quid in aduersum pressa manu defecare vult, cultro falcis vitur: quum retrahere, sinu: cum alleuare, scalpro: quum incauare, rostro: quum ictu cedere, securi: quum in angusto expurgare, mucrone: quæ omnia sunt vnius eiusdemque falcis opera. Ita qui volet turbidum vitæ genus contemplari, spectet motoriam; qui tranquillum, statariam; qui leuibus & turpiculis gaudebit, tabernariam & mimum: qui rerum personarumque dignitate, prætextatam adhibeat fabulam: Quippe in species commutatur & formas innumerabiles Comœdia; nec est versutior rota figularis, ut Plauti nostri verba usurpemus. Longius excurreret, & in tam aperto patientique campo exultaret effusius oratio: sed breuitas quam, etsi res non postulat, tempus tamen flagitat, & initio polliciti sumus, nos ut

orationem, tamquam bonus agitator currum, sustineamus admonet: & ut ad crastinam disputationem de Comœdiæ origine, partibus, natura, Plautinæque fabellæ artificio, nos interea comparemus.

IOAN. PASSERATII,

Encomium Asini.

Tantum approbationis, suo quodam quasi genio, Plauti fabulæ consequutæ sunt, Auditores, ut nullam acclamatione aduersa vel pastoritia fistula, omnes incredibili plausu populus sæper exceperit: neque verba factoris magistratibus plus silentii præcones in foro, quam attentionis, earum solo nomine, histriones in theatro à multitudine impetrarint. Id autem siue Plauti fato, siue, quod probabilius est, lepore atque urbanitate contigerit, mihi persuadet tam elegātium fabularum ut actori, sic interpreti, minimè de colligenda beneuolentia esse laborandum. Vereor tamen ne quis insulsè facetus hoc meum irrideat consilium, quòd ab Amphitruone, graui Tragicomœdia, profectus ad Asinariam rectà contenderim: vetusque verbum in me contorquens, à diis ac regibus, tamquam ab equis, ad asinos, me

transiisse cauilletur. Quamobrem officii ratione admoneor, vt peruagatum vulgi sermonem quo aſini tantopere abiiciuntur ac conteruntur, falſum eſſe demonſtrem; & cum opinione tot ſæculis inueterata, cominus argumentis congrediar: *et ſi difficile eſt errorem, qui tam altè radices egerit & propagarit, ſtatim euellere*: ſed quò difficiliùs, æquum eſt vt hoc me benigniùs attentiùsque audiatis. Quæramus igitur cur auctôr eius prouerbii, quiſquis tandem fuit, ſanè obſcurus & ignobilis, viliffimos eſſe aſinos ſomniarit, nec vlla ex parte cum equis comparandos: an propter tarditatem? At in India, Syria, & ad Euphratem, perniciſſimi reperiuntur, quemadmodum Ælianus & Xenophon memoriæ prædiderunt. An propter virium imbecillitatem? At equis ipsis iudicibus, aſini cauſſam ſuam obtinebunt, qui ſi loqui poſſint, vt Achillis equi apud Homerum, laudem iſtam aſinis ultro concedant, ac ſponte fateantur, niſi aſininum ſemen equatum ſemini mixtum eſſet, mulos, omnium animalium, quæcûmque collo dorſoſue domantur, validiſſimos, non eſſe naſcituſos. Vnde cûm alia multa, tum hæc ſequerentur incommoda; quòd medici ægrotos viſentes, vbi properato eſt opus, ſuis, non alienis pedibus, ambulare cogèrentur: & innumerabiles futuri eſſent ſe-

natores pedarij ; lunæque currus, quem mulæ iunctæ trahunt, ingenti mortalium damno, frugumque calamitate, confisteret. An quod equi strenuam in bello nauant operam, asini ad cōmittendum prælium, & rem gerendam, parum idonei existimantur ? Facile hoc dici patior, equos ad hominum perniciem plurimum, asinos nihil conferre nisi ad salutem, & ad pacis artes recolendas atque retinendas. Huc accedit quòd equos pleròsque omnes refractarios, succussatores, vmbra metuentes, mordaces, sternaces, calcitrone, videmus: quibus à vitiis nemo nescit abesse asinos longissimè. Idcirco magna mater, siue illa Cybele, siue Isis, siue Ceres, siue quo alio gaudet nomine, asinis, non equis, se ac sua mysteria committit, insidentem asino Silenum prætereo ; ad te venio,

---- cui prima frementem

*Fudit equum Tellus magno percussa tridenti
Neptune.*

Tu consualibus, festo tibi die, asinos non minus quàm equos floribus coronari voluisti, licet in equos inclinatione voluntatis magis propendeas. Nec immeritò hic asino habitus honos, qui tot tantisque laboribus in varios humanæ vitæ vsus exercetur. Ex ea enim segete quam stercoreauit, arauit, iterauit, tertiau-

ac liravit, collectam messem conuehit in hor-
reum : post trituram in pistrinum defert, ibi
molam versat, inde domum refert farinam : &
vt ait Virgilius :

Sapè oleo tardi costas agitator aselli,

Vilibus aut onerat pomis : lapidemq; reuertens

Incusum, aut atra massam picis urbe reportat.

Quis in miserrimi quadrupedis ærumnas, non
absque magna iustaque commiseratione, in-
tuenti, venit mihi Prolemæi regis in mentem,
cui cùm Heraclides Lycius librum obtulisset,
quem inscripserat πόνος ἐγκώμιον, primam Rex
urbanissimus literam deleuit, vt ostenderet
πόνος ἐγκώμιον re verâ ὄνος esse ἐσκόμιον, eamq;
virtutem, quâ tolerandis rebus aduersis glo-
riamur, asinum sibi posse iure suo vindicare.
Quid ego de temperantia dicam ? Postquam
immanissimos labores exantlauit, & quibus ne
Hercules quidem par fuerit, vix sub multam
noctem ab opere dimissus, & sub dio relictus,
carduis, tribulis, paliuris, vescitur : tam ari-
do horridoque pastu contentus, ne ad singu-
larem patientiam non adiungatur frugalitas in
philosophorum scholis, qui eam profitentur,
inaudita. Ex qua frugalitate fructus capit vber-
rimos ; quando & tardius deficit quàm vllum
aliud armentum, & morbis rarissimè tentatur,
quibus assidue conflantur nostri Philoxeni,

Apicii, Gallonii, eiusmodique gurgites atque ventres, qui, ut Pliniani sues, animam pro sale videntur accepisse, ne tantisper dum sunt in vita putrescant. Nisi fortè ficus ab asinis quondam appetitæ in gulæ ganearumque loco ponantur, quod tamen spectaculum prodigii simile ex admiratione nimia risum immodicū, ex immodico risu repentinum interitum Philemoni Comico fertur attulisse. Eius porrò virtutis quæ ius suum cuique tribuit, & cæterarum Regina sapientum suffragiis constituitur, in asino præcipuè vis & splendor elucescit, qui pabulo semper abstinet alieno, prodest omnibus, nocet nemini: insignis adeò cultu deorum, ut religione numinum, & simulachrorum quæ gestat sanctitate consecratus sit. Ob eximiam quoque, & valde spectatam in dominos fidem, vagatur sine custode, non cohibetur ergastulis, vinculis non coercetur: cum necesse sit equum asseruare, haud minore studio quàm fugitium aliquod mancipium: quoniam noctes diésque fugam meditatur, in qua impotenter exultantem, & similem furenti Q. describit Ennius:

*Et tum sicut equus qui de præsepibus actus,
Vincla suis magnis animis abrumpit, & altè
Infert se campi per carula latæque prata
Celso pectore, sapè iubam quassat simulatam:*

Spiritus ex anima calida spumas agit albas.

Summis verò laudibus tollēda est asinarum in foetus suos charitas, ad quos per medios ignes penetrant, vt eripiant periculo, nec vllum ardorem flammæ pietas materna pertimescit ; Tantum abest vt mulierum scelus, importunosque mores imitentur, quæ partus suos interdum proiciunt : ne facinus horribilius eloquar, & cuius solam cogitationem mens mea reformidat. Sentio non defuturos qui doctrinæ omnis expertes asinos esse contendant, & in nos velitentur arreptis ex triuio maledictis, quæ à pueris aniculisque vulgò iactantur, *asinus ad lyram, asinus ad tibiam*, & id genus quifquiliis, atque ineptiis. Horum me certè miseret, qui non animaduertunt se in apertum stultitiæ crimen incurrere, cuius alios insimulant, dum aduersus asinorum prudentiam stolidæ plebeculæ leuissimis sermonibus & testimoniis vtuntur. Verùm istuc, quicquid est quod obiicitur diluamus. Asinus, vt aiunt, neque lyre modulis afficitur : neque tibiæ cantu mulceretur. Sit ita sanè. Lyra delectatus est scilicet Themistocles, & fortissim⁹ ille Iouis filius, qui Linum præstantissimum eius artis magistrum, à quo erudiebatur, plectro interfecit : aut eo minus rerum gestarum gloriâ floruit, quòd lyre molles in fractosque numeros pro nihilo

putarit. De tibia duo sunt quæ respondeantur: vnum, optimas ex asinorû ossibus fieri tibias; nec eius rei contemptum vel inscitiam vivis exprobrari oportere, cuius materia petitur à mortuis. Alterum, asinos, si maximè tibiam negligant, se deæ sapientissimæ exemplo tutari posse, cui tibia vehementissimè displicuit: & si Propertio credimus,

vado Meandri i-ēta natanit,

Turpia cūm faceret Palladis ora tumor.

Quòd si quis acumine ingenij, & celeri mentis agitatione præditum esse nescit, doctissimo- rum hominum, Origenis & Porphyrii fuisse condiscipulum ignorat: vitisque purandæ rationem abroso palmite vinitores primùm docuisse: ob id lapideum asinum Naupliæ grata posteritatis memoriâ dedicatum; eadē- que de caussa romæ asellorum capita vite alligata fuisse in tricliniorum fulcris: ac Liberum patrem eos in fidem suam & clientelam recepisse. Prætereà, nullis hostiis æquè litatur Apollini apud Hyperboreos, vbi

τέρπουσι λιπαρά φοῖβον ὀνοσφαγίαι.

inquit Callimachus: non quòd inuisi sint Asini Phœbo, vt Cereri porca, & caper Baccho, sed quòd esse constet κλειτὰς ὄνων ἑκατόμβας, sicut à Lyricorum principe nominantur, quæ Apollini immolantur vt Iunoni pauones, & Veneri

columbæ. Diis, inquam, asinus charissimus est, nec ullum lætius feliciusque augurium asini occurſu, vt tritus Aristophanis sermo declarat, ὄρος ὄρνις. Testis ille qui C. Mario in summa rerum desperatione spem salutis ostendit, cùm esset Minturnis in Fannix custodia. Testis & alter cum Eutycho agasone literarum monumentis nobilitatus Nicen, qui Augusto in aciem descendenti obuiam factus, certam ei de M. Antonio victoriam portedit. Liberatus variis, indignisque calumniis asinus, auribus adhuc tenetur, quarum magnitudo irrisione multorum immeritò luditur, cùm eadem in leporibus nequaquam reprehendatur: In promptu tamen est quod contrà referam: Nimirum id asinis vitio verti, quod à Geographis vniuersis quibusdam nationibus, Scythixque populis, vsui & ornamento tribuitur: quorum aures tam latè patent ac diffusæ sunt, vt iis totum hominis corpus faciliè contegatur. Liceret etiam exclamare,

Auriculas asini quis non habet?

nisi mallet tenebri cosi Satyrici versiculum sic leuiter immutare:

Auriculas asini quis sanus nolit habere?

Legimus enim in Græcorum Commentariis, ἡ περὶ ὄρος μάλλον τῆς ἄλλων ζώων ἀκρίβεια πλεονέχουσα: hoc est, nulli animantium, vno mure dunta-

xat excepto, acriorem audiendi sensum quàm
asino largitam esse naturam. Vnde explican-
dum est quod integumentis fabularum à poë-
tis implicatur, Midam Phrygiæ regem asini-
nas aures habuisse à in quibus inuolucris latet
hæc historia: Midæ omnia quæ suis agerentur
dicerenturve comperta exploratæque fuisse,
prudentiæque ac consilio res suas ita compo-
suisse, ut florentissimum beatissimūque re-
gnū eius extiterit. Hinc alia nata & sparsa fa-
ma est, aurea solitum efficere quæcūque ma-
nibus contrectasset. Superesse nihil eorum vi-
deo quæ asinis obiici solent præter vocem,
quam ut raucam & asperam qui minus pro-
bant, ineminerint in Gigantum aduersus deos
pugna, inclinata iam deorum acie, rudentem
Sileni asinum rem restituisse, terribilique ac
Stentoreo stridore perterritos Titanas in fu-
gam vertisse; Iouique plus in asini voce tū præ-
sidii quàm in ægide & fulmine fuisse. Idcirco,
parta constitutæque victoria, Iuppiter tam be-
ne de se & de diis omnibus meritum asinū
inter sidera collocavit. Quæ cum ita sint, Au-
ditores, nequis vestrū excandescat, si forte
asinus vocetur, non magis quàm Cleanthes,
qui cum ab iniquis asinus appellaretur, placidè
respondit, quod nullam subesse existimaret ei
verbo contumeliam, se asinum quidem esse,
sed

sed qui ferre posset farcinam Zenonis. Lōgum
esset fastos Romanorū euoluere, vt inde Asel-
lij viri consulares, Asinæ prætorij, Aselliones
historici, Vinnij Asellæ, Asinij Galli, Asinij
Dentones, & Asinij Polliones proferātur, qui-
bus omnibus antiquissimis nobilissimisque fa-
miliis id cognominis honoris causā inditum
fuit : præstat huic asininæ laudationi modum
adhibere, ne copiā rerum obruar : de quibus
me, garrientem veriūs, quàm differentem, mi-
nimè mirum est si benignè & attentè audiui-
stis. Nam ipsum eloquentiæ lumen, ac propè
numen, Demosthenes, abalienatum à se, abeun-
tēque concionem, sola asini vmbra reuoca-
uit ; & ad asinum, tanquam ad asylum, summus
orator confugit, vt languentes, iacentēsque
Atheniensium animos ad se beneuolè audien-
dum excitaret. Habetis orationem, si temporis
angustias, quibus vrgemur, spectatis, satis lon-
gam : sin, explosā imperitiæ multitudinis opi-
nionē, rei dignitatem expendatis, nimium
breuem : & in qua præstantes ingenio viros,
multiplici doctrina instructos, longōque vsu
confirmatos, par esset omnem vim dicendi
consumere. Sed quia neque eruditione, neque
vsu, neque orationis vbertate, abundamus,
rem incomptè & inornatè complexi sumus,
vt ipsa, quæ simplici sermone delectatur, ve-

ritas postulabat. Hanc si quis meliùs exornandam suscipere velit, haud equidem inuidemus, & illi maiore artificio expoliendâ, vel etiam calamistris inurendam, libenter relinquimus. Nobis enim satis est purgasse & aperuisse viâ, ut ad interpretationem Plautinæ fabulæ, quæ ab Asinis nomen accepit, sine vlla offensione perueniremus.

IOAN. PASSERATII

Prefatio in Captiuos Plauti.

NON mediocrem vtilitatem cum summa delectatione coniunctam ex Comico-
rum scriptis ad iuuentutis studia permanere, nisi antea satis ostendissemus, Auditores, nonnulli fortasse nunc orationem eiusmodi à nobis requirerent, & tanquam debitum promissumque munus palam efflagitarent. Sed quia, ut meministis, id abundè præstitimus, cum in superiores prolusimus fabulas, ridiculum putidumque esset eadem iterare, & eorum ineptias imitari, qui venales plus nimio laudant merces, quas volunt parum cupidis emptoribus obtrudere. Me tamē perpetua huius scholæ consuetudo, comœdiæque Plautinæ inscriptio, antequam ad rem ipsam accederem,

ut de Captivis pauca differerem impulerunt, quo facilius intelligatis in hominum vita, cuius imaginem exprimunt Comœdiæ, nihil esse captivis frequentius, nec ad effingendos cuiusque mores aliud esse aptius argumentum. Atque ut inde proficiscamur unde hæc ducenda est disputatio, quod vetus poëta γυναιλογίῃ quam vim habeat, & quàm latè pateat consideremus.

Οὐκ ἔστιν ἀνδρῶν ὅστις ἐστ' ἐλεύθερος.

Ἡ δὲ χημάτων γὰρ δούλος ἔστιν, ἢ τύχης.

Liber profectò nullus est mortalium; Serviimus omnes fortunæ aut pecuniæ. Præclara me Hercule, nec à Philosopho grauior expectanda sententia. Nam si verum est quod acerrimi virtutis custodes propugnatoresque defendunt, ὅτι οἱ σοφοὶ ἐλεύθεροι, καὶ μωροὶ δούλοι, præter sapientem liberum esse neminem, & stultos omnes esse servos, vereor ut in hæc urbem tanta, quid urbem dico? vereor, inquam, ut in toto terrarum orbe, ubi tam multi se liberos, ingenuos, nobiles iactant, & generis antiquitatem à fumosis repetunt imaginibus, reperiat quisquam, qui non in Plauti Captivis nomen suum cōditionemque cogatur agnoscere. Plures enim Soles quàm sapientes simul conspicias, & stultorum numerum ne Tarentinus quidem teneat Architas,

*Quem maris ac terre numeroque carentis arenæ
mentorem appellant: adeò peruagata com-
munisque res est stultitia, & utrâque pagi-
nam facit, ut in Homeri Iliade, quæ*

Stultorum regum & populorum continet æstus.
Idcirco Damasippum in sermone quodam fa-
cetè consolatur Stertinus,

*Qui male re gesta cum vellet mittere operto
Se capite in flumen, dexter stetit, & caue faxis
Te quicquam indignum: pudor, inquit, te malus
urget,*

Insanos qui inter vereare insanus haberi.

Sui sunt humanis ut corporibus sic animis
morbi: & quemadmodum non est cuiusquam
tam firma valetudo, quæ non aliquo genere
morbi tentetur; sic nullus animi status ita tran-
quillus pacatusque est, ut numquam pravis
opinionibus perturbetur, nec aliquo genere
laboret insanix:

Sollicitant alij remis freta caca, ruuntque

In ferrum, penetrant aulas & limina regum.

*Hic petit excidiis urbem, miseròsque penates,
Ut gemmâ bibat, & Sarrano dormiat ostro.*

Condit opes alius, defossoque incubat auro.

Hic stupet attonitus rostris: hunc plausus hiãtem

Per cuneos geminatus enim plebisque patrûmque

Corripuit: gaudent perfusi sanguine fratrum

Exilioque, domos & dulcè limina mutant:

Atque alio patriam quarunt sub sole iacentem.
 μάλα si quidem, ut aiunt, & πᾶσι νόμοις; idque
 malum in aliis faciliè, in nobis ægrè cernimus,
 ut pauci vident manticæ, quod in tergo est:
 eo delectamur, id fouemus, alimus, auge-
 mus; ac si quis ratione disijcere & discutere
 conetur, aut nihil egerit, aut non magnam in-
 ierit gratiam. Testis Atheniensis Thrasilaüs,
 qui atra bile percitus se quotidie in Piræum
 conferebat, & illuc appellentes naues, quod
 suas esse sibi persuadebat, benignè salutabat,
 ingenti gaudio excipiebat, reditum singulis
 gratulabatur: rursus vela facientes pati ala-
 critate dimittebat, bonisque prosequabatur
 ominibus abeuntes: Postquã autem eâ libera-
 tus est insaniã, dici non potest quàm moleste
 tulerit, & quàm suavi iucundoque vitæ fructu
 se orbatum conquestus sit. Testis & Argivus
 ille; siue, ut aliis placet, Abydenus:

*Qui se credebat miros audire tragædos,
 In vacuo latus sessor plausorque theatro.
 Ast ubi cognatorum opibus curaque refectus,
 Expulit elleboro morbum bilēmque meraco,
 Et redit ad sese, Pol me occidistis amici,
 Non seruatis, ait, cui sic extorta voluptas,
 Et demptus per vim mentis gratissimus error.
 Si tanta est igitur insanorum natio, ijque exie-
 runt è potestate mentis & consilij, nōne ca-*

ptiuorum plena sunt omnia? Fingamus in eundem campum à censore lustrum condituro, omnes ordines conuocari, nihil ei opus erit scriba, nihil tabulis, in quas libera capita referat. Nullus in senatu senator, null⁹ equiti equus relinquetur, nullus erit è plebe qui non fiat ærarius. Quid multa? existet illa *Ἀγαλόπολις*, & *πονηρόπολις*, & vetere celebrata verbo, seruorū ciuitas. Age, vt citiùs census absoluator; & vt ego egregius sine populi suffragiis censor in principum mores inquiram, faceessant proletarii, citetur præconis voce prima classis. Prodeant cum laureatis fascibus atque securibus Imperatores; & ij maximè quos inuictissimos prædicant, nisi verò vincam, non posse liberos censerì non recuso, quin eò detrudar, *vbi lapis lapidem terit*. Magnitudine animi rerumque gestarum amplitudine constat Alexandrum Philippi filium cæteris omnibus Imperatoribus esse anteponendū: Sui tamen iuris & mancipii fuisse negabit ambitio, & in eum manus iniiciet, quòd, cùm Anaxagoram differentem audisset innumerabiles esse mundos, ingemuerit ac illacrymauerit: caussamque lacrymarū percontatibus responderit, se non iniuriā flere, quòd vnus mundi regiones gentisque in suam ditionem nondum rede-gisset; & hominem inanis gloriolæ auidissimum, cui

parum erat quicquid terrarum alluit, ambituq;
suo complectitur Oceanus; vindicias in ser-
uitutem postulabit ebrietas, petetque ut sibi
addicatur iracundia, quod vino & furore in-
census, fidelissimos amicorum atque optimè
de se merito trucidarit. Abducet in neruum
ægritudo, quod sera inutilique sceleris pœni-
tentia perculsus, humi aliquot dies spectante
exercitu iacuerit, muliebrique ciulatu castra
compleuerit. In C. Cæsare, qui se totum ad
imitationem & exemplum Alexandri compo-
suit, eadem honoris cupiditas & ambitio re-
perta est, quamvis serpente simiâque dignior,
quod patriam, quæ se genuerat ac eduxerat, ar-
mis potentiâque oppressit: cuius impietatis
non eas persoluit pœnas quas meruerat. etenim
legis sententiâ, quæ est de parricidijs, in culeum
insui oportuerat, aut verbis legis Mæniæ, quæ
ita concepta fuisse ex Varrone didicimus, *Si
quis patriam maiorem parentē extinguit, culeo in-
suatur.* Cōtinentia verò temperantiâque mini-
mè cum Alexandro conferendus est, qui tem-
pla deorum in prouinciis expilarit, in vrbe per-
fregerit, diripueritq; sanctius ærarium. Con-
taminatum omnibus probris sibiq; deditum li-
bido, vel in medio triumpho ciuibus ostendit,
sublimemque in curru collocatum per ora
spectantium traduxit, magnis militum suorum
clamoribus;

*Ecce Cæsar nunc triumphat qui subegit Gallias;
Nicomedes non triumphat qui subegit Cæsarem.
Itē: Urbani seruate uxores, mæchū caluū adducim⁹:*

Auro in Gallia stuprū emisti, hic sūpsisti mutuū.
C. Cæsari qui dominationis iniustæ, idem & flagitiorum hæres exstitit, sororis nepos, simili- que aspersus est infamia, quantumvis Augu- sti nomine imperijque felicitate gloriatur. A- dulteria enim frequenter exercuisse etiam fa- miliares & necessarij confessi sunt, verū non libidine, sed ratione commissa excusarunt, vt commodiūs aduersariorum consilia per cuius- que mulieres exquireret. Hōccine excusare est, ac non potius accusare? Ignoscendum, quia sciens prudēsq̃ peccauit, quia consiliū fe- cit: Non est hīc deprecationi locus, & stulta cautio, vt insidias fugeret, irruere in adulteria. Si saluti consulendum erat, rempublicam red- deret, insidiarum causas præcidisset. Quid quòd vniuersus populus frequentissimo thea- tri confessu, ludisque publicis vt prioribus po- steriorib⁹que membris impudicum notauit, latorem legis Iuliæ, adulteriorum stuprique vindicem; & in eius contumeliam interpreta- tus est hunc versum in scena pronuntiatum:

Viden vt cinædus orbem digito temperat?

Tiberios, Caligulas, Neronēs, & huiusmodi monstra principum prætereo: libuit tantū de

pleno & de meliore nota promerè, non de sæce haurire, vt perspicuum fieret quid de cæteris iudicandum esset, si Alexandri, Cæsares, Augusti, non tam victores aliis imperarunt, quàm victi domitique turpissimis vitiis paruerunt. Potuissèm aliùs ascendere, & vetera narrare poëtarum commèra : Iouem humanarum formarum elegantissimum spectatorem, toties amore captum fuisse, ac in vincula coniectum à Titanibus, vix opera furtoque Mercurij euasisse : Iunonem incude pedibus alligata è nubibus pependisse : Neptunum & Apollinem Laomedonti mercenariam seruilémque operam locasse : Martem & Venerem à Vulcano in adulterio deprehēsos, adamātinisque retribus implicitos fideiussore patruo poenam non ignominiam redemisse : Herculem ipsum cum lana & colu apud Omphalem consedisse, & inter pedissequas pensa traxisse : Deos omnes denique, superos, inferos, maximos, medioxumos, minutos, patellarios, necessitati fatóque seruire. Sed mitto fabulosa : Venio ad magistratus, & ad eos qui aliquid cum populo contrahunt ; nōne dum sæuissimæ illi obsequuntur belluæ, longissimè absunt ab ea quæ Platonice definitur, ἐλευθερία, ἡ ἑμμανία βίη, αὐτοκρατεία, ἐπὶ πάντι ἐξουσία τῷ κατ' ἑαυτὸν ἐν βίῳ. In Ægæo mari sub Arcturi occasum, tot non

concitantur fluctus, quot in administratione Reip. oboriuntur motus; nec Euripus aut Syrtēs tam sunt instabiles, quàm incertæ frequentēsque commutationes voluntatum. Non sequitur, sed trahit; non allicitur, sed rapit retores suos multitudo: & eius immanitatis tot extāt impressa vestigia, vt rectè sensisse videantur qui sapienti non esse capeffendam Remp. censuerunt. Quisquis enim fasces à populo accepit, expertus est se molestissimas simul accepisse compedes, & cum Aristophaneo Carione coactus est exclamare:

Ως ἀρχαλέον περ ἄμ' ὄσιν, ὦ ζεῦ, καὶ θεοί,

Δῖλόν γ' ἐνεῖς παραφρονουῶτος δεσπότης.

Priuatinihilo sūt liberiores magistratibus, nec est quisquam de catasta & de machinis emptus, qui heri nutus magis obseruet, quàm humiles potentiorum, quibus spe lucri conciliandæq; gratiæ vel lenocinari sustinent. Ac quoniam lucri facta est mentio, affirmare non dubitem ab illo capite & fonte seruitutem, cæteraque in hominum cœtus manasse incommoda. Qui rebus præsunt iudicandis, pretio parantur: pretio paratur Causidici, Medici, Rhetores, Philosophi: cuncti sunt ordines nummarij: *Nulla ciuitas non vanalis est, si emptorem inuenerit.* Nulla etiam est ætas in qua non cernatur obedientia fracti animi, & arbitrio carentis suo.

Pueritia magistri metu custodiâq; coërcetur. Adolescentia temeritate & cæco animi impetu: Virilis ætas honorum contentione ducitur: laborat auaritiâ senectus, quôque minùs est vitæ, eò plus cogit pecuniæ. Multi præterea magis dotibus deliniti vxoribus ancillantur; aut, quod fœdissimum est, verbis verberibûsque domiti, muliercularum imperiis assuescunt. Ex quo genere est infelix in Cæcilij Plotio maritus, qui, salua vrbe atque arce, quasi ab hoste captum se vxori seruire queritur, ac inter viuos mortuû ambulare. Cælibes vinctisq; matrimonij soluti meliore conditione non sunt, vt qui scortillorum blanditijs irretiti, suas sæpenumero ita cælo atque terræ proloquantur miseras:

Si mihi seruitium video, dominâmq; paratam,

Iam mihi libertas illa paterna vale:

Seruitium sed triste datur, teneorq; catenis,

Et numquam misero vincla remittit amor.

Progrediar adhuc longiùs, liquidôque ostendam nos esse togata, tunicata, & palliata mancipia, hoc est, vt loquitur Plato, αἰδέσθαι ποδὰ καὶ αἰδέσθαι ποδῶδεις πείχας ἔχοντα, & miserrimam seruire seruitutem:

In culpa est animus qui se non effugit vrbem:

Scandit eratas vitiosa naues

Cura, nec turmas equitum relinquit.

Nempe, vt in Iphigenia scripsit Ennius:

*Animus nescit quid velit: nec dominos, nec militia
sumus:*

*Imus huc, hinc illuc: cū illuc ventum est, ire
illinc lubet:*

In certē errat anim⁹, præterpropter vitā viuitur.

Et vt auctor haud Ennio deterior Lucretius:

Si possent homines, proinde ac sentire videntur

Pondus inesse animo quod se gravitate fatiget,

Et quibus id fiat causis cognoscere, & unde

Tanta mali tanquam moles in pectore constet,

*Haud ita vitam agerent, vt nunc plerūque vi-
demus,*

*Quid sibi quisque velit nescire, & quærere sem-
per;*

*Commutare locum, quasi onus deponere possit,
multaque alia in eandem sententiam. Talem
in Mercatore Charinum noster descripsit
Plautus:*

*Sūmne ego miser, inquit, qui nusquā bene queo
quiescere?*

*Si domi sum, foris est animus: sin foris sum, ani-
mus domi est.*

*Ita mihi in pectore ac in corde facit amor incen-
dium.*

Serui sumus igitur infelicissimi, & impotentissi-
mos asciscimus dominos, qui neque noctu, ne-
que interdū nos consistere & conquiescere pa-

tiuntur. Nisi fortè absurdum existimatis quòd ἑρξίνος ille κύων , τὸς μὲν οἰκέτας ἔφη δευπόταις ; τὸς δὲ φαύλους ὀπιθυμίαις ἀδελεύειν ; eaque captiuitas multò turpior quàm quæ in bello contingit , proptereaquæ huius crimen culpamque in ancipites belli casus conferre possumus , illius dedecus nosmetipsi nobis comparamus qui non repugnamus , non resistimus , ac ne terga quidem vertimus ; sed abiectis armis , nefarii salutis nostræ proditores , nos præbemus constringendos voluptati , quâ neque capitalior pestis humano generi ; neque hostis infensior. Nobis certè quâto animus præstantior est corpore , tanto animi seruitus esse debet seruitute corporis acerbior. Nam qui hostium potiti sunt , vel fugâ se substrahere , vel pretio redimere , vel aliqua ratione ad suos sese recipere possunt ; qui autem semel se cupiditatibus manciparunt , numquam ad se redeunt , nec iis vllum amplius est postliminium. Serui porrò aut censu aut testamento aut vindicta sæpe libertatem adipiscuntur : Stultos , insanos , improbos , quis liberali causa manu asseret ? Quamobrem sic statuo , omnes cuiuscumque sint ordinis ac loci , captiuos esse ; etiâne sapientes ? Sanè si credimus Simonidi ; ex quo cùm Hieronis vxor quæsisset diuitem esse an sapientem magis expedirèt ? Di-

uitem, respondit; quòd pro foribus diuitum sedere consueuissent sapientes, & iis supplices esse, vt eorum opibus propulsarent grauem & odiosam inopiam. Miù id fortasse alicui videbitur, & Simonidis auctoritatē crimine auaritiæ eleuabit: Atqui virtus ipsa, ipsa, inquam, virtus, quæ tot tantisq; laudibus ad cælum tollitur, captiua trahitur, & fortunæ seruit. Nequē id audias à molli aliquo philosopho, qualis fuit is qui neruos virtutis incidisse dicitur, & illud semper in ore habuisse,

τύχη τὰ ζηντῶν παράγμα, οὐκ ἐβελία;

sed ex M. Bruto virtutis post homines natos studiosissimò, qui victus Philippensi pugna; cùm iam de se grauius cogitaret, ὦ τλήμων ἀρετῇ, inquit, λόγος ἄρα ἦσθα; ἐγὼ δὲ σε ὡς ἔργον ἡσχοῦμαι. οὐ δ' ἐδούλευες τύχῃ. Infelix virtus, nihil eras igitur præter verba? at ego te tanquam rem aliquam colebam ac exercebam; te verò fortunæ seruiebas. Hos de captiuis tanquam centones sarcire, & quicquid occurrēbat velut in satyram coniicere libuit, vbi Græca Latinis solutòque sermoni versus liberè ac de industria permiscui, ne quis me lapsum imprudentiâ in leges orationis cōmisisse arbitretur: quādoquidem vobis istam disputationem, quocūque nomine appelletis, non trado vt opus aliquod in Rhetorum officinis elaboratum &

expositum. Quicquid est tamen haud alienum duxi, hoc præsertim tempore, quo tantus belli terror impendit, armorumque strepitu aures nostræ circumsonant: hoc etiam mense, qui Martis nomine consecratus est, in cuius Dei comitatu, ut iræ, discordiæ, insidiæ, formidines, strages, sic servitutes captiuitatésque numerantur. Accedunt statæ solemnésque quadraginta dierum ceremoniæ; &, ut noster ait Plautus, esuriales feriæ, in quibus, cum nihil nisi castum & integrum ad iuuentutis eruditionem expromendum sit, vna hæc ad pudicos mores facta deligenda fuit fabula, cuiusmodi paucas poëtæ referunt Comoedias, ubi boni meliores fiant. Ita enim breuissimè verissimèque Plauti ipsius testimonio cōmendatur. Ad eam commendationem nihil est quod addamus: siquidem minimè dubium est, quod excolendis adolescentium ingeniis conformandisque moribus plurimùm prosit, id esse vobis audissimè arripiendum & complectendum. Mihi verò dandam operam ut siquam expectationem de me commouero, eam ne fallam, sed omni cura diligentiaque id assequar, ut cumulatè satis videar fecisse & suscepto muneri; & eorum, qui audient, voluntati.

IOAN. PASSERATII IN
Curculionem Plauti Prefatio.

POTERAM in eo iure in huius fabulæ interpretationem rectâ ingredi, & statim actores in scenam producere, ipsius Plauti exemplo, qui abuti operam in scribendo prologo nec voluit nec debuit. Quarum enim rerum causa eiusmodi prologia reperta sunt, earum nulla ut id faceret impellebatur. Commendatione nihil egebat comœdia, nihil comicus: quia res per se ipsa iucunda erat, & poëta populo longè charissimus. Multo minus refellenda aut regerenda in aduersarios erant maledicta, quando istuc datum Plauto, ut ab inuidia & à sibilo intactus semper è theatro discederet: quorum in utroque acerbior & iniquior fatus fuit Terentius. Quod autem ad explicationem argumenti attinet, commodius visum est, ut eius partem inter agendum protasis exponeret, partem involueret epitasis, reliqua ostenderet catastrophe: callido sanè consilio, ut scilicet incerto rei euentu suspensis omnium animis fabula spectaretur attentius. Ne tamen tantum sumpsisse mihi videar, quantum Plauto merito eius tribuebatur: & ne quis me arbitretur quorundam

dā expectationi consuetudinique Academiæ defuisse, institui paucis præfari, eosque imitari gladiatores, qui ante iustam dimicationem nonnihil olim solebāt ad speciem atque pompam proludere. Dicam igitur de Curculionū, hoc est parasitorum, ingenio ac moribus; simulque demonstrabo à veris Curculionibus minus confici, consumique triticum, quàm ab istis eorum fortunas, ad quos semel sese applicarunt. Nam posteaquàm rem familiarem comederunt, vnum illorū opus est aliorū bona & interdū famā arrodere. Vnde canes habentur partim venatici, partim molossici in Captiuis:

Prolatis rebus parasiti venatici

Sumus; quando res redierunt, molossici:

qualem describit Menium Pantolabum Horatius, qui rebus maternis atq; paternis fortiter absumptis,

--- *Urbanus cæpit haberi*

Scurra vagus, non qui certum præsepe teneret,

Impransus non qui ciuem dignosceret hoste,

Qualibet in quemvis opprobria fingere sauis,

Pernicies & tempestas barathrumq; macelli.

Neque cum canibus modò, verum etiam cum muribus comparantur, vt in Persa:

Pater, auus, proauus, abauus, atauus, tritanus,

Quasi mures semper edere alienum cibum.

Quod nobilissimus ille confirmauit Cynicus,

qui cū intueretur sub mēsa cursitantes musculos, & ea quæ sibi prandenti excidebant legentes: Ecce, inquit, & Diogenes parasitos alit. Hinc auctore Hesychio profectū est verbum *μωσπολῆν*, in eos qui muris instar vagantur, & alienas captant epulas, eibique caussa in arctissimum quēque locum subeunt; neque alia febris, quā tristi domicoēnio laborant. Speculatores venatorēsque naturæ, id de muribus prodiderunt, generari lambendo, & delingendo salem concipere, quo modo procreatur & propagatur parasitorum genus. Præsentire dicuntur mures ædium ruinam, eaque imminente confestim aliò migrare: Sic parasiti eos continuò deserunt, quos res deserere incœpit;

Vt cūque mutata potentes

Veste domos inimica linquit

Fortuna:

Diffugiunt cadis

Cum face siccatis amici

Ferte ingum pariter dolosi;

Idque parasitis est cum pediculis commune, qui ex humanis corporibus excedunt simul, atque extinctus & exhaustus est ille, quo alebantur, sanguis. Redeo ad mures. Habiti sunt sæpe in prodigiis, adeoque dira portendere existimabantur, ut vnius soricis occentus comi-

tia populi Romani dirimeret. Huc accedit quòd nonnumquam vniuersas populantur messes, eorùmque è terra tanta plerùmque vis erumpat, vt ex Troade & Gyaro insula incolas fugauerint: Itaque Persæ, Arabes, Æthiopes, nihil maiore odio prosequèbantur quàm mures, neque quicquam magis auersabantur: Idem esse de parasitis sentiendum veteres indicant Comœdiæ, in quibus nigri inducebantur, vt ex atro colore & aspectu omnes intelligerent vehementer esse fugiendos: Confert eos etiam cum cochleis Plautinus Ergasilus:

Quasi cum caletur, cochlex in occulto latent:

Suo sibi succo viuunt, rōs si non cadit.

Item parasiti rebus prolatis latent,

In occulto miseri visitant succo sub.

Ignobiles sunt & terræ filij vt cochleæ; æquè segnes tardi que ad ea quæ recta & honesta sunt capeffenda; & quocùmque ex loco pedem extulerunt; in eo nulla non apparent turpitudinis vestigia. Censentur quoque muscarum nomine ab Hegesandro, qui narrat questum esse aliquando Alexandrum, quòd à muscis (has bipedes muscas intelligebat) nimum morderetur, & idcirco ex aula omnes abigere statuisse: Tum verò dixisse Nicesium, qui palmam in arte parasitica possidebat: metuendum, ne iis

exactis, aliæ recentes gustato regis sanguine multò acriùs pungerent. Scribit Varro, muscarum esse ligurire; quod, quoties data est occasio, libentissimè auidissimèque faciunt parafiti. Muscatum est quouis se penetrare, ubique adesse, scrutari omnia, ut in Mercatore: *Musca est meus pater, nihil potest clàm haberi illi: Nec sacrum, nec profanum quicquam est, quò non adsit illicò.*

Quò non irrepit siue potiùs irrupit parasitus, si nidor culinæ naribus obiectus est?

*--- nec frana virum, nec verbera saeva,
Nec scopuli, rupesque caua, aut obiecta retardant
Flumina correptos vnda torquentia montes.*

Ingredientem aliquò videat cum opsonio coquum. En tibi δειπνῆν ἄκλιτος μῦα, ut est apud Athenæum: ad cœnam inuocata confestim aduolat musca, licèt

Expellas furcâ, tamen usque recurret.

Est enim ore ita duro, ut vel pugil esse possit: is denique postulat ab asino lanam, qui pudorem expectat à parasito: excludas, extrudas, exturbes; reuertetur, reperiet aliquam rimam, *Nec à corio unquam exterrebitur uncto.* Idèò sacerdotibus Ægyptiis placuit muscam esse impudentiæ symbolum; nec ab eorum opinione abhorrent illa HomERICA,

Η' τε καὶ ἐργασθὲν μάλα περ θεὸς ἀνδρομύοιο

Ισχαρία δακείω.

Vt œstrum auribus taurorum, aut

Immunis residens aliena ad pabula fucus,
tenacissimè adhæret;

Nec missura cutem, nisi plenâ cruoris hirudo.

Conspuatur, incessatur ossibus, colaphiscæ-
datur, frangantur ollæ in caput: omnia per-
feret, nec recusabit quin reliquo corpori ma-
lè sit, dum sit ventri benè. Vni ventri se natum
putat, vnius ventris curam gerit; rectèque in
eum contorqueri potest, quod iecit in De-
madem Antipater, tamquam mactatæ, con-
sumptæque in sacrificio victimæ, nihil ei super-
esse præter linguam & ventrem. Quare satis
facetè parasitus Melanthius, cùm ex eo quære-
retur, quo pacto Pheræorum Tyrannus, qui
eum pascere solebat, esset interfectus; gladio,
inquit, per ventrem meum. Nec inurbanè
vetus poëta parasitum appellavit cancerum,
quòd totus ex oculis & ventre constet, denti-
búsque non pedibus videatur ambulare. Bono
sanè diligentique patrifamilias non minùs suis
inimici infestique parafiti, quàm apibus can-
cri, quorum odore solo necantur: &, vt ex
canceris oriuntur scorpiones, ita ex blandis ho-
minibus, sæui truculentique obrectatores re-
pentè existunt. Omnes Protei formas in-
duunt. Nihil magis varium ac flexibile: sæpiùs

mores, vultum, & sermonem mutant, quàm colores Chamæleon. Verbi gratia, Stilponem Megaricum Alexis sophista, idémque parasitus, atrocibus conuitiis probrisque lacerabat absentem: cui vnus ex iis, qui fortè aderant: Atqui certè Stilpon de te semper honorificè loquitur. Tum Alexis nihil commotus, nec veritus palinodiam, per Iouem Stilponte meliorem virum noui neminem. Nimirum id obseruabat, quod præcipit Theognis:

Πολύ ποδὸς νόον ἴσχε πολυπλόκη, ὅς ποτὶ πέτρῃ,
Τῇ ὀροσομιλίζῃ, τοῖος ἰδεῖν ἐφάνη.

Parent huic præcepto parasiti, polypi ingenium sibi comparant, qui quemcúmque ad scopulum, quodcúmque ad saxum sese affixerit, protinus eius colorem refert. Probat eam vitæ rationē in Bacchidibus feruus Chrysalus:

Nullus frugi esse potest homo, nisi qui & bene & male facere tenet.

Improbis cum improbis sit, harpaget, furibus furetur quod queat.

Versipellem frugi esse conuenit hominem, pectus cui sapit.

Bonus sit bonis, malis malus:

Vt cùmque res sit, ita animum habeat:

Excelluerunt in eo genere ij, qui Dionysio collaces cognominati sunt. Nam cùm Dionysius parum oculis vteretur, idém sibi vitium esse simulantes, huc illuc porrecta manu, patinas

in mensa quæritabant, subuertebant, frangebantq; de industria calices. Ac si quando Dionysium cùm amicis ridentem conspexissent, quamuis procul stantes, in cachinnos effundebantur: caussamq; sciscitâri Dionysio, negabât fieri potuisse quin res illa perridicula esset, quæ ipsi risum mouisset. Par erat Clisophi cuiusdam improbitas, qui rege Macedonum Philippo, ex vulnere, quod acceperat in sura, claudicante, eodem pedè se fingeat claudicare; & Philippi oculo lana obuoluto, suum ipse oculum lanæ fascia obduxit. Turpes simiæ, & simiarum tamen vna in re dissimiles; quòd, dum homines imitantur, capiuntur simiæ; parasiti verò dum reges suos effingunt, eos in suam redigunt potestatem. Meministis, qua tractet arte Pyrgopolinice Artotrogus in Milite glorioso:

---- nempe tu illum dicis cum armis aureis,
Cuius tuleriones difflauisti spiritu:

Quasi ventus folia, aut panniculam tectoriam.

Mox: ---- Pol siquidem

Connixus esses, per corium, per viscera,
Pérque os elephanti, brachium transmitteres.

Paulò post: ---- centum in Cilicia,

Et quinquaginta centum Sycolatronide,

Triginta Sardi, sexaginta Macedones,

Sunt homines quos tu occidisti vno die.

Quanta istæ hominum summa est? septem millia.

Quid in Cappadocia, ubi tu quinquagenos simul

Ni hebes machara foret, uno ictu occideres?

Ista dum audit fatuus miles, ultro addicitur
mancipaturque Parasito:

Communicabo te, inquit, semper mensa mea:

Loquere, aures meas dedo in ditionem tuam.

Videte quã facile, dum laudatur inanis auidus
gloriæ à parasito, de mentis statu deiicitur: huic
idem contigit, quod suis accidit; qui, dum
fricantur, ita se tractabiles præbent, ut nullo
negotio humi sternantur. Trecentis orationi-
bus nemo eorum dolos, fraudes, scelera com-
plecti queat; *ijs nomina mille, mille nocendi artes.*
Modò videntur aucupes, qui imitatione vo-
cis cuiusque, insidias aibus struunt: modò
umbræ, quæ cum corporibus omnem in par-
tem flectuntur. Nunc speculi more cuiuslibet
rei obiectæ reddunt imaginem. Vim habent
cantharidum, quæ in rosis delitescentes, vene-
nato mortiferoq; aculeo incautos fodiunt. Vbi
enim in familiaritatem alicuius falsa beneuo-
lentiæ specie se insinuarunt, ex cordato stul-
tum, ex stulto insanum efficiunt. Leues homi-
nès atque fallaces, qui ad voluntatem loquun-
tur omnia, nihil ad veritatem, & quasi rotæ
figulorum, ad alterius sensum nutumque celer-
rimè conuertuntur, ut Terentianus Gnatho:

*Negat quis? nego: ait? aio: postremò imperavi,
Omnia assentare. (egomet mihi*

In hanc sententiam multa de assentationis peste differuntur à Cicerone, cùm in Lælio, tum in libro de Officiis primo: *Cauendum est*, inquit, *ne assentatoribus patefaciamus aures, nè ve adulari nos sinamus, in quo falli facilè est. Tales enim nos esse putamus, ut iure laudemur, ex quo nascuntur innumerabilia peccata, cùm homines inflati opinionibus, turpiter irridètur, & in maximis versatur erroribus.* Quamobrem Passienù Crispum valdè miror, qui voluit assentationi apertam esse interdum ianuam, cùm ei potiùs omnes ad nos aditus intercludendi sint; quemadmodum vir sapientissimus, cerà sociorum aures obturavit, seq; ad navis malum fortiter astringi iussit, ne ad Sirenum scopulos adhæresceret,

Difficiles quondam, multorùmque ossibus albos: nisi fortè eos qui assentatoribus delectantur deorum exemplo defendere voluit, ut Agis parasitus Argivus, qui suos esse diis parasitos dictitabat, Ioui Vulcanù, Cercopas Herculi, Libero patri Silenos. Quanto veriùs Antisthenes, qui satius esse ducebat, in coruos, quàm in assentatores incidere; quòd illi mortuos tantùm, hi verò etiam vivos videntèsque depascerentur. Maior est in Græcis verbis propter annominationē lepos: *κρίττον εἰς λόγους,*

ἢ εἰς κόλαχας ἐμπεσεῖν. οἱ μὲν γὰρ νεκροὺς, οἱ δὲ ζῶν-
 τας ἐσθίσουσιν. Princeps quoque philosopho-
 rum in *Phædro*, assentatorem esse scribit teter-
 rimam belluam; Et Bias interrogatus, quod
 animal omnium maximè noxium esset? è feris,
 inquit, Tyrannus; è cicuribus, assentator. Præ-
 terea Crates tā esse desertos aiebat, & oppor-
 tunos prædæ, qui inter assentatores, σιτοκέρως,
 ἀρχήτους, καὶ μάτῳ πεφομένως viuerent, quàm
 vitulos, qui inter lupos versarētur. Habet qui-
 dem assentatio iucunda principia, vt apud
 Cornificium legimus, verum eadem exitus af-
 fert amarissimos. Abundāt exemplis historiæ,
 multosque principes commemorant, qui ex
 florentissima fortuna in extremam calamita-
 tem assentatorum operā deuenerint. Totius
 orbis victorem Anaxarchi vicit & perculit as-
 sentatio, postquam ei persuasit ius fasque esse
 regibus quodcūmq; libuisset. Democrides &
 Stratocles Demetrium Antigoni pessunde-
 derunt. Ex sublimi tyrannidis opulentissimæ
 folio, in humilem ludi literarij cathedram sui
 parasiti Dionysium deturbarunt. Tarentinus
 Procudes eius Philippi subuertit imperiū, de
 quo triumphauit Flaminius. Andromachus,
 M. Crassum qui se totum eius assentationi per-
 miserat, cum vniuerso exercitu Parthis prodi-
 dit. Cæsari Iulio necis causam præbuit M. An-

tonius, cum in ciuitate regium nomē, & vnus
dominatū perosa, regni insigne per adulario-
nem Lupercalibus obtulit. Eundem Antoniū
amore Cleopatæ, ad insaniam vsque incen-
sum, assentatores affligerunt. Tiberios, Nero-
nes, & cætera principum portenta enumerare
pudet; & periculum est, si velim singula huius
vitii incommoda persequi, ne ex argumento
comico nascatur tragœdia; ne ex Curculio-
ne, tamquam ex musca, videar Elephantum fa-
cere voluisse. Melius est igitur statuere modū
huic, siue orationi, siue poëmati, siue vtriq;
& fortasse neutri. Libuit enim effutire quic-
quid in buccam, & abiectum parasitum, veluti
mimum producere vili amictum centunculo.
De Plauto alio loco satis multa, de me verbum
nullum faciam, vt nihil præstare cogar, qui
nihil audeo polliceri.

IOAN. PASSERATII IN
Militem gloriosum Plauti Oratio.

ACGVSARI silentium meum à multis,
quod tandiu patior, Auditores, vereor
ne otium potius quàm officium sequutus vi-
dear; aut priuatis, quàm vestris omnium ratio-
nibus seruisse libentiùs. Vtrūque tamen &
re ipsa, & meæ vitæ perpetua consuetudine fa-

cilè refellitur. Nam neque ullū existimationi
vmquam anteposui commodum: & quo tem-
pore cæteris dabatur huius muneris vacatio,
mihi obiectum est cum necessitate parendi, ne-
gotium hoc onere docendi longè grauius ac
molestius. Cuiusmodi fuerit istuc, nihil atti-
net dicere, me sanè ad Idus vsque Ian. sinè a-
liquo laboris fructu vehementer exercuit. Huc
accessit oculorum parum prospera etiánum
valetudo, cui vtinam nemo ignoscat, modò
ea mihi caussa fontica esse desinat. Habetis
purgatam ex parte cessationis suspiciōē: ac-
cipite quæ consequuta sunt vt me desidiæ iner-
tiæque culpa prorsus liberetis. Confecto quod
imperatum erat negotio, iis que veluti com-
pedibus exsolutus, vtrò in viam regrediebar?
iam Plauti militē formis æneis curaueram ex-
cudendum; iam librum in manus sumpseram;
& me suscepto instantem operi extremus vi-
disset Ianuarius, nisi transuersa incurrisset alia
magis incommoda valetudo, meq; lecto mor-
bus afflixisset, quo qui tentantur, inter cur-
sores & pugiles nomen non profitentur suum:
nec pugnis & calcibus committunt, vt secum
agi possit iniuriarum. Odiosum esset comme-
morare quàm dirus ac penè feralis mihi extite-
rit Februarius: quibus me febris & piaculis
lustraerit: tantum dicam vobis, vno dumta-

xat intercalari die , mihi longiorem sæculo
fuisse. Diuturnitas enim & magnitudo crucia-
tus, quicquid habebam virium & lacertorum,
comminuit: nervos elisit: coëgitque tandem
fateri, eum, quem vocant motum asperum in
corpore, à sensibus alienum, si non in malis,
at in rebus esse valdè fugiendis: quicquid Ze-
no & Chrysippus, cum suis ad stipulatoribus,
contrà garriant & arguentur. Itaque Stoïcos
virtutis robur supra vim & naturam humanam
æstimantes, à me dimittebam, explosâque co-
rum incredibili & absurda opinione, compro-
babam Hieronymi Rhodij *ἡ ἀναλυσίς* sen-
tentiam. Sub Nonas autem Martias me aceri-
mis doloribus perfunctum esse, Gallumque
Æsculapio debere arbitrabar: & ecce tãquam
prostratus semel, nec ab aduersario iugulatus
gladiator, quem infesti spectatores in arenam
reuocant, iterum iubeor decumbere. Verùm
Dei Opt. Max. benignitate recreatus, testudi-
neum mouere gradum cœpi, mēque ad inter-
missa studia referre, vt saltem ex instituto Ro-
muli, anni rerumque redeuntium à mense
Martio initium ducerem. Militem quoque no-
strum putabam opportunè mense Marti sacro
proditurum, quo vobis egregius bellator sua
narraret facinora, pugnatâsque in vmbra &
sine teste pugnas prædicaret: sed nescio quo

pactō idem Venerius nepotulus Veneris mēsem expectare maluit. Consilio id factum meo si quis arguet, haud inficiabor; & hoc amplius concedam, me, postquā ex trimestri morbo emerferam, mihi ad ludum & quietem aliquot dies pro meo iure sumpsisse: præsertim cū inuitaret verni temporis suauitas, & Herculis Euripidei auctoritas impelleret.

Παύζω, *inquit Heroiū fortissimus, μετὰ βολὰς γὰρ πόνων ἀεὶ φιλῶ.*

Satis ista de me, ac fortasse plus satis; de huius fabulæ argumento; ne morem, quem semper tenui, non obseruem, pauca nunc differantur. Post cōērcitam veteris comœdiæ nimium proteruam & petulantem licentiam, Poëtæ, ut ait Horatius,

--- *vertère modum, formidine fustis*

Ad bene dicendum delectandumque reducti:

remotōque choro, & satyris in sylvas cum sua canina facundia relegatis, nouam inierunt rationem populi ab iis quæ turpia sunt absterrendi, proposita scilicet sicut in speculo vitæ communis imagine. Quamobrem stultos, auares, & morosos senes: adolescentes prodigos & intemperantes: mulieres mulieres: callidos & furaces seruos: meretrices improbas: periuros lenones: impudentes sycophantas: edaces parasitos: pestiferos assentatores;

& id genus homines, in scenam induxerunt. Cùm enim simus in aliorum peccatis Lyncei, in nostris Thamyraë: nec ferè quisquam respiciat manticae quod in tergo est, sapientibus viris placuit, vera & peruagata vitia fictis personis tribuere, in quibus irridendis, tota theatra magnos clamores excitarent. Quod à Lacedæmoniis petiitum esse constat exemplū, qui in publicis conuiujs, quæ appellabant Phiditia, temulentos Ilotas pueris ostendere consueuerant, vt inde intelligerent quàm fœda, & homine libero indigna, esset ebrietas. Ac qui certè, si Theophrasto credimus, est quædam *δῶνος μέθη*, quæ in hac fabula potissimùm cernitur, ebriis que simileseuadunt admodum sitientes gloriæ. Similes dico? imò multò est deterior ebrietate inconsulta gloriæ cupiditas; & huic, quàm illi, est difficilius mederi. Nam, vt obiter emendatum proferam Laberij mimographi senarium,

Homo ebriatus somno sanari solet:

At quos aculei gloriæ pungunt, ij nequeunt quiescere; quod ob Miltiadis trophæa contigisse ferunt Themistocli. Velint, nolint, etiam vinosissimi, erit aliquis bibendi modus: non erit vilius gloriæ: ac si quos sibi pepigerit terminos, eos continuò euellet vterius progrediendi inexplabilis libido. Ideo Alexan-

der, tot peragratis regionibus, tot gentibus victis, cum disputaret Anaxarchus innumera- biles esse mundos, illacrymauit, suamque vi- cem conquestus est, quod nondum vno po- titus esset. Multa ebrij temerè & periculosè faciunt: Quis tamen ebrius, Deus immortalis haberi dum cupit, vt Agrigentinus Empedo- cles, in arduas Ætnæ crateras sponte sua in- filiit? aut, vt Herostratus, ne ignobilis & in- glorijs moreretur, celeberrimum pulcherri- mumque orbis terræ templum incendit? Mul- ta ebrij ridiculè: quid ambitiosi? Rex regum Xerxes, qui ambulauit maria, & nauigauit cōtinentem, stimulis fodiebat Hellespontum: fluctibus plagas infligebat; & montibus per legatos minabatur. Lyfimachus occupata Thracia, quasi Europam & Asiam armis sub- egisset, se hastæ cuspide gloriabatur cœlum contingere: ibi Pasiades Bisantinus oppidò perquam facetè, Amici, colligamus sarcinu- las, inquit; & priusquam hastæ istius mucrone terebratum cœlum in nos ruat, celeriter hinc facessamus. Pyrrhus Aquilam se cognomina- ri voluit; Antiochus Accipitrem: Clitus, ob demersas tres vel quatuor hostium triremes, Neptunum: Demetrius & Clearchus Hera- cleæ tyrannus, Iouem: M. Antonius trium- uir, Liberum patrem. Prætereo cum impie-
tate

tate coniunctâ Idæ, Capanei, Achillis, vtriûsque Aiacis, & Mezentij militarem ferociam atque insolentiam: Venio ad discipulum Antisthenis, qui cùm intueretur in δόξη πεφουσιμένους dictitabat, ὅδ' ἐν εἶναι μαχαιώτερον ἀνθρώπου καὶ τοὺς τεφάνους ἀπεχέλει δόξης ἐξανθήματα καὶ τοὺς τρισανθρώπους, ἀντὶ τῷ τεισαθλίους. Verè istuc equidem Cynicus nobilissimus, nihil esse stultius homine, qui se gloriæ mancipavit: coronas esse bullas gloriæ: & eos, qui dicendo laudem captant, gloriâque apud impositam multitudinem aucupantur, ter homines, hoc est, ter esse miseros. Nec minùs rectè profectò in Bacchi pompa, furorisque & amentię comitatu à bono poëta numerantur

--- *Cacius amor sui,*

Ac tollens vacuum plus nimio gloria verticem.
 Eo in genere est δόξοσοφία, quæ plures sectas peperit quàm Hydra Lernæ capita: arriumque parentem & magistram virtutum discerpit philosophiam. In eodem δόξοχαλία, qua formosi nobis nostra cum pernicie videmur, vt in fabulis Narcissus. His adiunge δόξοκοπία, δόξομανία, vnóque nomine κενοδοξία, quæ falsa honestatis specie mortales incautos in fraudem alliciunt, adamantinisque vinculis irritos tenent. Reperias enim multos qui neque paupertatem aut morbum reformidant:

D

neque terrore mortis deiiciuntur de statu: neque iracundiæ impetu exeunt de potestate: titillanti verò gloriolæ, cœu molles ac delicatæ mulierculæ, non valent resistere. Quare maximum in eo certamen suscipiendum est, summæque contentione dimicandum, ut appetitum obtemperare doceamus rationi: siquidem intus est proditrix φιλαυτία quæ nobis omnibus innascitur, sopitisque arcis nostræ custodibus, assentationi hosti portas aperit: Quamuis illa intromissa non palam & statim irruat, sed clam & pedetentim irsepat: deinde quibusdam laudum ac blanditiarum præstigiis illudat sensibus: ac postremo lumeni mentis vndique circumfusa, quid rectum aut prauum sit discernere vetet in tanta erroris caligine. Tunc animi iudicio, velut auriga perturbato, ater, refractarius, ac sternax Platonis equus, per ardua, per decliua: per plana, per aspera: iugalem alterum frustra renitentem secum abripit, nec ante consistit quàm agitatore curru excutiat. Quantæ hinc editæ strages commemorare longum esset:

Hoc Crassos, hoc Pompeios euertit, & illum

Ad sua qui domitos deduxit flagra Quirites:


ut inquit Satyricus Aquinas, cœque antiquior elegantiarum Neronis arbiter Petronius:

*Tres tulerat fortuna duces, quos obruit omnis
Armorum strue diuersa feralis Erinny. (gnus,
Crassū Parthus habet, Libyco iacet aquore Ma-
Tertius ingrata perfudit sanguine Romam;
Et quasi non posset tot tellus ferre sepulcra,
Diuisit cineres: hos gloria reddit honores.*

Superuacaneum est in conquirendis exemplis
operam & orationem consumere: paucissi-
mos in altum prouexit gloria, qui, licet
initio secundissimis ventis ferrentur, non ad
extremum ipsius gloriæ, & fortunarum simul
omnium fecerunt naufragium. Et quisquam
tot labores subit, seque tot periculis obij-
cit, eius rei causa quæ nascitur ex sermone
populi! posita est in assensione imbecilla
multitudinis imperitiæ, & ex fama pender,
qua quid esse potest vanius, leuius, & incon-
stantius? Sed plura persequi, neque est huius
locl; neque temporis, argumentoque fabulæ
statuendus est modus, de quo M. Tullij au-
reum extat præceptum, nec tam inscribendum
chartis quàm vniuscuiusque memoriæ. *De for-
me est de seipso prædicare, falsa præsertim, & cum
irrisione audientium imitare militem gloriosum:*
Vbi dubium non est quin stolidum hunc no-
strum Militē significet, qui eam inanis gloriæ
mercedem accipit, vt deludatur, compiletur
& vapulet. De Plauri laude, quem promū con-

dum antiquitatis Romanæ & Latini sermonis
 auctorem optimum optimi iudices pronuntia-
 runt, à me nihil est expectandum: neque de
 origine, præstantia, usu, generibus & partibus
 fabularum. Ista iam in superioribus comœdiis
 explicata sunt, & eadem apud eosdem iterare
 putidum esset. Eosdem appello, quamvis, ut
 maritimi fluctus, alijs vestrum accedant, alijs re-
 cedant. Ex Philosophis enim & Iurisperitis
 didicimus, plerisque partibus aut capitibus
 mutatis, nihilominus idem corpus & eandem
 rei speciem permanere. Dixi 1580. 27. April.

IOAN. PASSERATII IN PSEV-
dolum Planti, Prefatio.

ON temerè id esse semper existimaui,
 quod in quadam veris descriptione
 ait Horatius,

Dicunt in tenero gramine pinguium

Custodes ouium carmina fistula:

Delectantque Deum, cui pecus & nigri

Colles Arcadia placent.

Nam mihi videtur, velut aliud agens, doctis-
 simus poëta scenæ comœdiæque originem in-
 nuere voluisse. Primis enim temporibus, ru-
 dique illo sæculo, pastores

Extrema sub casum hyemis, iam vere sereno, in alicuius luci umbra densissima, ruris præfides Deos carminibus inconditis venerari & demulcere consueuerant. Inde fluxit origo scenæ, & ab his profecta comœdia principiis, paulatim ex agris in vicos; & ex vicis in oppida se contulit, ut optimi auctores prodiderunt. Itaque huius antiquitatis memor, cum Zephyris & hirundine prima, decreueram in scenam prodire, absque vlllo edicti prætorij metu, & sine infamiæ periculo Plautinam agere comœdiam. Sed totis mensibus Februario & Martio, adûsque nonas Apriles, se tanta vis effudit imbrum, ut anni pueritiam, aquarum intemperies obrueret; multique mirarentur urnam Aquarij, Iugulam, Vergilias, & fuculas non esse penitus exhaustas. Postquam liquidior affulsit tempestas, aduersa me valetudo; & anniuersarius pedum inuasit dolor, domique inuitum detinuit, donec ad Calendas Maias peruenimus. Nondum tamen à me vobis præstituta dies præterit, si C. Verri opinionem credimus, qui veris initium non à Fauonio, neque ab aliquo astro notabat; sed cum rosam viderat, tunc ver incipere arbitrabatur. Certè quocumque modo se res habet, non antè mihi adesse licuit, neque potui maturius ad constitutum, etiamsi ob desertum

vadimonium mihi causâ cadendum fuisset. Hanc à me excusationem, æqui, vt spero, accipient: iniqui autem vereor ne meum de suscepta interpretatione Pseudoli consilium improbent, quod ibi perditus amator Callidorus, periurus leno Ballio, cuiuslibet fraudis & fallaciæ architectus inducitur Pseudolus. Siccine, inquit, instituis adolescentes? Eâne tu ætati teneræ & imbecillæ ad conformandos mores exempla proponis? Dii melius! inquam: fugienda istæc, non imitanda iuuentuti proponuntur: quanquam, vt nunc sunt hominum ingenia, non est quod in nequitix ludum mittas: libidines non indigent magistris: nimioque facilius voluptatum illecebris deliniti, virtutis obliuiscuntur, quàm vt ad eam perdiscendam operam & studium adhibeant. Vetera & peruagata indicamus vitia, non monstramus noua: & hæc nisi fierent in vita, non agerentur in comœdiis: Vt enim in speculis corporum effigies, sic in comœdiis variæ animorû expressæ cernuntur imagines. Suas illic quisquis agnoscet cupiditates, pudore ab iis fortasse reuocabitur; nec ampliùs committet, vt ridiculis materiam præbeat histrionibus. Sint ergo amatores in comœdiis: vnde, quæso, nisi ex yrbibus, vbi luxuries & otium creantur; morbi duo quibus maximæ ægrotant, & sæpe

moriuntur ciuitates? An quod de cæca rerum humanarum arbitra fortuna dixit Plinius, non veriùs de cæco Veneris puero dicetur, eum in rationibus mortalium solum vtrámq; paginam facere? Peierant in comœdiis lenones; simile monstri esset si seruarent fidem, quibus iusiurandum *emplastrum est aris alieni*; vt loquitur Laberius; vel vt Pacuuius ait, *mantile quo quotidiane extergentur noxa*. Quid quòd in iisdem comœdiis, lenones poenam periurii sui, cùm diuinam tum humanam, sufferunt; exitium scilicet & dedecus? Afficiuntur damnis & contumeliis, iridentur, exsibilantur, vapulant, abducuntur in neruum, profani habentur, impii, scelesti, nefarii, sacri, & intestabiles: A Ballione ad Pseudolum, hoc est à periuro ad mendacem transeamus, quando mendacia periuriis finitima sunt, vt M. docet Tullius. Mentitur & fallit Pseudolus: seruire est mentiri, bonoque viro & liberali indignum; neque Plautus aliter censuit, cùm mendaciis turpem constituit exitum, vt fabulæ ostendit catastrophe, in qua fallaciæ, præstigiæ, & sycophantiæ Pseudoli, in scorta, conuiuia, sceddissimámque ebrietatem desinunt. Si tamen repente hic existet, & apud iudices non seuerissimos suam aget causam Pseudolus, ultro de mendacio cōfitebitur, & argumētis vincet,

eam fraudē sibi fraudi esse non oportere. Principio assumpto pallio, barbāque philosophabitur, seque Platonis auctoritate defendet, in libro de Republica tertio: τοῖς ἰατροῖς καὶ ἀρχουσι παρομιλῆσαι ἰδίᾳ δεῖται. Cū Plato magistratibus & Medicis nō putet indecorū esse mentiri, contendet sibi mentiri licuisse, vt argentariæ heri minoris inopiæ eo pharmaco mederetur. Deinde acuminibus dialecticorum punget aduersarios, & negabit sublati mendaciis, quicquam opus esse vniuersa ratione differendi. Tum implorabit Iurisconsultorum fidem; quorum è numero fauet mendaciis Paulus in lege *Electio*, de *noxal. action.* Neque hæredi, inquit, neque in hæredem, quòd defunctus mentitus est, actio danda, nec in ipsum quolibet tempore: laudabit, & testem Vlpianum in lege prima de dolo malo: Dolum esse quendam bonum, (sic Græci καλὸν καὶ ἐπαινετὸν πανεργίαν vocāt,) maximè si quis aduersus hostē & latronem quid machinetur: Communem omnium hostem lenonem à se dolo superatum, id iactabit esse palmarium. Nixam esse mendacio probabit reginam fori, & concionum moderatricem eloquentiam, vt eximius orator M. Antonius dictitabat, neq; pensum suum absolue-
re posse, nisi circumuentis auditorum mentibus, offusāque tribunalibus & subsellis multa

erroris caligine. Historiæ Græcæ & Latinæ exordia ab anilibus fabellis repetet, historiæque parentem Herodotum mendacissimum falsi coarguet, in eo præcipuè quòd Persas à mendaciò scribit tantopere abhorruisse: quoniam manifestum est ex magicarum artium vanitate, tot sæculis damnata, Persarum Magos fallendi mentiendique nobilissimam disciplinam reperisse, posterisque ut arcana quædam & mysteria tradidisse. Iam verò Poëtæ usque adeo falsa confingere, & quod nusquam est gentium excogitare coguntur, ut si vera semel mandare versibus cœperint, continuò nomen suum amittant. Commemorabit iura belli, plures insidiis quàm aperto Marte partas victorias: magnos Imperatores ex Lysandri Lacedæmonij præcepto vulpinam interdum assue-re pellem leoninæ; Vlyssisque armis quàm Aiæcis, felicius ad Troiam pugnatum esse: Verfabiturque in ore tragici sententia: *Cùm contendi nequitum est vi, clam tendenda est plaga.* Hortabitur ut Deæ sapientissimæ monitis cuncti pareamus, quæ suadet Telemacho ut inimicos de medio tollat ἢ δόλῳ ἢ ἀμφοδόν. unde apparet eos hallucinari, qui hæc verba Chorcæbo Virgiliano, ut stulto, affingunt,

--- *dolus, an virtus, quis in hoste requirat?*

Ac, quoniam in Deorum mentionem incide-

it, Mercurij Venerique præpotens inuocabit
numē; quorū alter fraudibus & furtis præest; al-
tera, δόλιος, δολιόφρων, δολοφρονέσσαι, καὶ παῖρρος,
ab Euripide cognominatur: quod ut ait Maro,

---- *dolis ridet Cytherea repertis.*

Numerabit inter mendaces Apollinem, de
quo infra cōmodiūs: neque ipsum prætermittet
Iouem, qui, ut est in Amphitruone Plauti,

versipellem se facit, quando lubet.

Quæret, si mentiri sit iniustum, cur terra ma-
ter, quæ & est & appellatur iustissima, non rarò
agricolis mentiatur, & cultores suos fallat.
Vulgò enim hæc nota sunt,

---- *spem mentita fages:*

Et, verberata grādine vineæ, Fundusq; mēdax.
Mari Neptunòque nihil esse dicet fallacius,
& iure queri Palinurum, quòd

---- *toties cali deceptus fraude sereni.*

Quare nihil se noui fecisse, quòd fefellerit, aut
mentitus sit; cū philosophi, iurisperiti, o-
ratores, historici, poëtæ, imperatores, homi-
nes, dii, deæque, cælum, terræ, maria, fallant &
mentiantur. Eodem alia quamplurima conge-
ret, velut id ex Ciceronis Ligariana, *honestum*
esse quoddam & misericors mendaciū: ut Hyper-
nestræ laudem ob insigne erga patrem menda-
cium ex suauissimis Lyrici Venusini versibus:

Vna de multis face nuptiali,

*Digna, periurum fuit in parentem
Splendide mendax, & in omne virgo
Nobilis auum.*

Aurem ei vellet Theognis, & hoc à se dictum
iubebit meminisse:

Πουλύποδος νόον ἴχε πολυπλόκο, ὅς ποτὶ πέτρῃ
Τῇ δὲ συμμιλίῳ τοῖος ἶδεν ἐφάνη.

Occurret maxima eorum turba, qui vota Lau-
uernæ suscipiunt, & ita concipiunt preces:
---*pulchra Lauerna,*

Da mihi fallere: da iustum sanctumq; videri:
nec diram imprecationem metuunt ex sollem-
ni iurisiurandi per Iouem lapidem formu-
la: *si sciens fallo, tum me Diespiter, salua vrbe
arcéque, bonis eijciat, uti ego hunc lapidem:* Cen-
sent enim eum à lapide minimum distare,
qui timeat periprij testem & vindicem silicem.
Interpretabitur esse dictum de omnibus ci-
uitatibus, quod de vna Crotone scripsit in Sa-
tyrico Arbiter Petronius: *Si urbanioris no-
te homines sustinetis semper mentiri, recta ad lu-
crum curritis. In hac vrbe non literarum studia
celebrantur; non eloquentia locum habet; non
frugalitas, sanctique mores laudibus ad fructum
perueniunt: Quoscunque homines in hac vrbe vi-
debitis, scitote in duas partes esse diuisos: Nam
aut captantur, aut captant: & quæ sequuntur
apud Petronium. Præterea nobis obijciat*

non tantum multitudinis consensum, verum etiam eorum iudicium qui sedent ad gubernacula, rempublicam administrant, & magistratus gerunt; proprium esse munus civilis prudentiæ, uti foro, servire tempori, induere Theramenis cothurnum, mutare velificationem pro ratione tempestatis, versare naturam suam ac tegere; quæ omnia Aquiliana doli mali definitione continentur, *cum aliud agitur, & aliud simulatur*. Vbi inter hæc præsidia defensionis suæ, & causæ firmamenta, aquam sibi videbit propemodum effluxisse, & aliquando perorandum; tunc ita cuncta miscebit ac perturbabit: sic in atramento suo sepia delitescet, ut à Prætoribus in consilium missi iudices, nisi absoluant, omnino pronuntiaturi sint, *non liquere*. Nos quoque ea de re amplius quæramus, & amplectamur ἀπρίαν Epicharmi; ne iure à Pseudolo irrideamur, quod ab eo parum cauisse videamur, qui in hac fabula monuerit, prædixerit, antè denuntiaret; ne quid sibi crederetur. Atque hoc idem philosophorum princeps iam olim præceperat in libro legum sexto, his verbis: ὃ γὰρ ὕχες ὃ δὲν ψυχῆς δούλης, ὃ δὲν πτεῦειν οὐδέ ποτ' οὐδέν τῷ γένει δαί τὸν νοῦν κεκτημένον. Nihil, inquit, sani, nihil synceri, in eiusmodi seruorum ingenijs, neque quicquam illis credere decet

tum, cui cor sapiat. Non expectatis, opinor, ut hîc vobis commendem Plauti fabulas; Inuendibili merci, ut ait in Pœnulo Agorastocles, oportet vltro emptorem adducere:

Proba merx facile emptorem reperit, tametsi in abstruso sita est.

Pergam igitur ad nomen ipsum Pseudoli, quod huic inditum est comœdiæ. Seruis comicis nomina imponuntur, inquit Grammaticorum eruditissimus: vel à nationibus, ut Myfis, Syrus, Dauus, Geta: vel ex accidentibus, ut Lesbia, vinosa ab insula Lesbo, vini optimi feracissima: aut ex qualitate corporis, ut Chylacus: aut ex specie formæ, ut Pinacium: aut ex negotio, ut Chrysalus: vel à moribus & vernitate, ut Pseudolus. hæc ille. Dictus est Pseudolus, quod ψευδολῶν soleret, totusque fraudibus & mendaciis constaret. Sic à Varone Satyra quædam inscripta fuit Pseudolus Apollo, cuius mentio fit apud Nonium, in verbo vagare, & in excalceare: Qua in Satyra non agebatur *ἄλλ' ἀναστρέφειν*, ut vir multiplicis ac recôditæ doctrinæ existimauit, quod seruisset Admeto, neque agnitus fuisset: sed *ἄλλ' ἔπειν ματαιώσας*, ut in melioribus Noni codicibus inscribitur, & ab aliis iam animaduersum est; quod vanitas, mendacia, & imposturæ oraculorû, præcipuè Apollinis, eâ Satyrâ

Varronis exagitantur. Sanè Pseudolum Apollinem significat apud Euripidem Orestes in Iphigenia in Tauris, hoc senariolo: *ἡμᾶς δ' ὁ ποῖλος μάντις ὤν, ἐΰστατο*, ex quo expressum id ab optimo Poëta in sexto libro Æneidos;

--- namque mihi fallax haud antè repertus,

Hoc uno responso animum delusit Apollo:

Nec absurdum est eodem Ennium respexisse in Thyeste: *Et me Apollo ipse delectat, ducat Delphicus*. Nomen autem seruale plerisque indidit Plautus fabulis, vt Pseudolo, Stichò; Epidico: propterea quòd astuti & callidi seruuli primas in iis comœdiis partes sustinent, vt in Apologis Æsopi vulpeculæ. E' Plautinis verò fabulis, ipsius iudicio Plauti, duas maximè fuisse comprobatas, ostendit apud M. Tulliū Cato, in libro de senectute: *Quid in leuioribus studiis, inquit, sed tamen acutis, quàm gaudebat bello suo Punico Nauius? quàm Truculento Plautus? quàm Pseudolo?* Gauderet etiam nunc Pseudolo, si viveret; at Truculento ingemisceret, tam lacero, manco, & mutilo, vt sine veterū librorum ope, ei facere medicinam, ne optare quidem audeamus. Reuertor ad Pseudolum: vigeat tum adhuc in theatris & actionibus nobilissimi histrionis, celebrabatur Ciceronis tempore, vt ista declarant ex defensio-

ne Q. Roscij, ubi eius aduersarium Chæream quendam insectatur, qui capite & superciliis semper erat rasis, ne ullum pilum haberet viri boni. Cuius personam, inquit, præclarè in scena tractare Roscius consuevit. Nam Ballionem illum improbissimum & periurissimum lenonem cum agit, agit Chæream. Ex Ballionis autem cōmemoratione, fabulam Pseudolum intelligi nemo ignorat: cuius ego prologum nolo attingere, quia certum est non esse Plauti. Cur enim inscribendo prologo hic operam abuteretur? An ad conciliandam populi beneuolentiam, attentionem, & silentium? At solo Plauti nomine, histrio, quasi iussu magistratus præco; faciebat audientiam. An ut aduersariorum maledicta & calumnias refelleret? At, ne mortuus quidem, aduersarios in scena ullos habuit: datumque istuc poëtæ nostro ut omnes eius starent cōmœdiæ, cum nescio quo fato, vix umquam suis Terentius potuerit tutari locum. An ut argumentum narraret fabulæ? At id aperiet, magnâque ex parte Pseudolus eloquetur perendie. Crastinus enim dies Diuo gentili meo facer est: & in hac bibliopolarum regione, ut olim in monte Albano, sunt Latinæ feriae.

PRÆFATIO IN PLAVTI

Menachmos.

ETVS illud est, & crebro vtriúsque
 linguæ sermone celebratum, mul-
 tos in amicitia simul edendos esse
 salis modios : quoniam in tam oc-
 cultis ingeniis, tamque variâ hominum natu-
 ra, difficillimum est bene nosse qualis sit, qui-
 cum ætatem degere constitueris ; nisi quoti-
 diano conuictu, assiduâque cōsuetudine, eius
 mores penitus perspectos habeas. Istuc autem
 quod in explendo amicitiz munere à sapienti-
 bus præcipitur, mihi etiam videtur in legendis,
 intelligendisque optimorum auctorum libris,
 esse diligenter obseruandum, & in Plauto
 maximè: apud quem plurimum salis delingat
 oportet, qui sibi eum familiarem efficere
 cupiat : noctes & dies cum eo versetur: con-
 fabuletur sæpissimè : sciat quibus ludatiocis,
 abstrusos eliciat sensus: distinguat ambiguos:
 vim omnem verborum : & rerum non igno-
 ret acumen : existat denique alter Papyrij
 Pæti frater Seruius, qui propositis sine
 poëtæ nomine versiculis, statim pronun-
 tiabat, hic versus non est Plauti, hic Plau-
 ti est : ita tritæ illius aures erant notandis ge-
 neribus poëtarum. Equidem permagni refert
 confi-

considerare vnde incipias, quò pergas: quem ducem, quos tibi comites adiungas: & quo instructus viatico in Latium antiquum proficiscaris, ad tibi conciliandum Sarsinatis hominis familiaritatem. Nam vt in longo itinere qui semel aberrauit, quò magis procedit, hoc recedit magis ab eo què adibat, loco: Sic, in ratione studiorum, qui rectū initio cursum non tenuit, nisi naturæ velificationem mutat, quò magis in altū prouehitur, hoc iactatur diutius; magisque fertur procul ab eo quem petebat portu: nec dissimilis est imperito gubernatori, qui soluens ex Italia, relicto supero mari, per inferū mare, Tuscum & Barbarum, nauigat in Græciam. Cauenda hîc & prouidenda sunt non pauca, quæ, ne singula enumerem, summatim vobis narrabo, & fide bona, quam institerim viam, & quò me putem peruenisse. Inde sibi quisque consilium & exemplum capiet, aut quod displicebit fugiendi, aut quod placebit sequendi. Igitur ante annos viginti,

*Dum melior vires sanguis dabat, amula necdum
Temporibus geminis canebat sparsa senectus,
cū Plautum interpretandi me cupiditas incessisset, has eius fabulas ausus sum aggredi,
Amphitruonē, Asinariam, Aululariam, Captiuos,
Curculionem, Militem gloriosum, & Pseudolum;
neque me tunc ingenuè fateor, operæ pæni-*

tebat : imò, vt illa ætas est paulò confidentior, Plautum arbitrabar esse mihi familiarem, quòd eum aliquoties salutassem; nec ignotum eum mihi esse quem valde amarem. Postquam verò inter arma scelerata & nefaria Camoenæ nostræ siluerunt, miserrimæque Academiæ Hispana insultauit barbaries, benignitate clarissimi viri Henrici Memmij, cui nunc omnia debere nunquam inficiabor, ingratum nactus otium, si quod otium in tanto tumultu esse potuit, ne nihil agerem, de Plauto coepi attentius cogitare, & ea comparare mihi, quibus fretus, & veluti exemptus numero profanorum, sperarem me in adyta venerandæ antiquitatis penetraturum esse. Itaque veteres grammaticos rursus peruolutaui, ac in primis illa glossaria, longè optima, quæ non ita pridem Henricus Stephanus excuderat : dispersas scriptorū reliquias, quæ Plauti æuo floruerunt collegi : duos hinc mihi commentarios elucubraui; vnum, priscarum vocum; alterum, de cognatione literarum, & multiplici permutatione. Plautinos codices non paucos contuli; scripturæ varietatē adnotaui; postremò Plautum à capite ad calcem totum relegi. Quid sim adsecutus, quæritis? hoc saltem, vt intelligerem me prius nihil aut parum intellexisse: vt essem aliquantò diffidentior, minúsque som-

niis aliorum vel meis crederem: neque tamen in tanta vetustatis caligine non aliqua visa est pedum via, plura me de hac re proloqui vetat pudor meus: tantum dicam, daturum me vobis esse qualiscumque mei laboris, & industriæ specimen in Menæchmorum interpretatione, nihil pollicebor amplius; & quasi pileata vendam mancipia, præterea nihil præstabo. Scio nec olim defuisse, nec nunc defuturos, qui non admodum vtilem Plautum esse censeant; & studio eloquentiæ, & moribus adolescentium: quod refellere tam in procliui est, quam imber quando pluit. Didicimus enim ex Cicero-
ne, sub exitum superioris anni, cum Plauti causâ disputationem *de Ridiculis* exponeremus, oratoris esse mouere risum, animosque audientiū lepore & facetiis permulcere: quod nemo sanè melius Plauto facit, aut frequentius. Docuit etiam togatorum doctissimus, in Satyra quæ inscribitur Parmeno, vt in argumentis Cæcilium, in ethesin Terentium, ita in sermonibus Plautum sibi palmam vindicare. Probat idem Varro L. quoque Ælij Scilonis, (mendosè legitur apud Rhetorem Fabium Stolonis) de Plauto iudicium, qui musas ipsas aiebat, si Latinè loqui vellent, Plautino sermone fuisse loquuturas. Vnius fortasse Horatij auctoritate ab iniquis oppugnabimur, ita scribentis ad Pisones:

E ij

*At nostri proavi Plantinos, & numeros, &
 Laudare sales, nimium patienter utrumque,
 Ne dicam stultè, mirati; si modo ego & vos,
 Scimus in urbanum lepidò seponere dicto:*

Legitimumq; sonum digitis callemus & aure.
 Decidenda nobis est quoquo modo hæc ab
 Horatio intorta in Plautum tragula; quod si-
 ne contumelia eius fiat, qui læsit; quippe ho-
 mo est iracundus, & qui protinus inimicum
 Hipponacteò addicat præconio:

*Qui me commòrit, inquit, melius non tangere,
 clamo,*

Flebit, & insignis tota cantabitur urbe:

Ne sæui, mi Flacce, pax sit rebus; audi æquo
 animo tria verba; mox tuus in Plautum emis-
 sus erit sine vulnere aculeus, nolo rixari te-
 cum, iocari volo, & more Plauti oraculum
 arietinum fundere. Aut verum dicere non so-
 les, mi Venusine, aut Poëta non es: elige vtrum
 malis, vtrínque profectò eleuabitur testimo-
 nij tui pondus. Si negabis te poëtam esse, tuis
 te coarguam tabulis, in quibus scripsisti:

Spiritum Phæbus, mihi Phæbus artem

Carminis, noménque dedit poëta:

Si fateberis, simul concedas necesse est te sole-
 re mentiri, ideóque tibi credendum non esse:
 quoniã tota hæc præclara vestra facultas pan-
 gendi carminis, planè est, quod ait Lucillius:

Pertica pictorum, veri nihil, omnia ficta.

age congregiamur propius, sed modò sine acerbitate. Velim mihi respondeas, ante te proavis tuis sapientio rem putes, qui quod illi tantopere laudarunt, vituperes; nec arrogantiae crimen pertimescas, qui eadem opera Plautum insulsiatis, & maiores tuos stuporis damnes ac stultitiæ? Plautini sales ad stomachum tuum non faciunt. Esto,

Tres tibi conuiua propè dissentire videntur

Poscentes vario nimium diuersa palato,
quid hinc noui? iniquum est Plautum insulsum videri, propter alieni stomachi fastidium, suis cuiq; gustus. Præterit asparagos ut edat carduos asellus: & urbis vestræ conditor, Romulus in terris, in cælo Quirinus, cum dii cæteri alatur ambrosiâ, rapis vescitur. Insuaues Plautini numeri auribus tuis accinunt: nec istuc miror: quando Rex Scytharum Atcas per Aquilonē & Acinacem deiebat (quod religiosiss. & sanctiss. Scythis iusiurandum) se equi hin nitum, quàm tibicinis Ismeniae, Græcorum præstantissimi, modulos audire libentius. Concludam hunc locum Macrobij verbis ab Horatio longissimè dissentientis: *Animaduerto, inquit, duos, quos eloquentissimos antiqua ætas tulit, comicum Plautum, & oratorem Tullium, eos ambos etiam ad iocorum venustatem cate-*

ris prestitisse. Plautus quidem ea re ita clarus fuit, ut post mortem eius, comædia, quæ incerta ferebatur, Plautina tamen esse de iocorum copia nosceretur. Discedat ergo ab hac contentione Horatius censeo, dum integro & latere tecto licet; ne quis in eum ut in cerritum arripiat saxum, id est, saxeo testimonio testimonium eius obruat. Potest enim meminisse hoc incisum fuisse Plauti sepulchro:

Postquæ est morte datus Plautus, comædia luges:

Scena est deserta: ex in risus, ludu', iocûsque:

Et numeri innumeri simul omnes conlacrumant.

Venio nunc ad alterum caput reprehensionis, videlicet ad iuventutis mores, quos Plautina lectione corrumpi, vel improbè calumniantur maligni, vel temerè sibi persuadent imperiti. Meretrices procaces, inquiunt, avari lenones, parasiti edaces, adolescentes dissoluti, stulti senes, veteratores & fallaces serui in Plauti fabulis inducuntur. Hoc si vitium est, non est Plauti vitium, vitium est comœdiæ; quæ nec ipsa in eo accusanda est: aut rectè à Liuvio Andronico & M. Tullio non definitur, *imitatio vitæ, speculum consuetudinis, imago veritatis*. Quamobrem qui hominû vitia comœdiæ imputat, idem facit quod turpes mulierculæ, quæ speculo suo irascuntur, & ei maledicunt, quod

formosam sui non referat imaginem. Tolle libidinem, luxuriã, auaritiam, stultitiam, & fraudẽ è vita, sustuleris è comœdia. Nihil illa peccat: quæ peccamus, sub alienis personis nominibûsque indicat, eoque melius de nobis meretur, quod specie blandientis castigat. Minimẽ igitur istis Aristarchis, qui censurã sine populi suffragio gerût, auscultandũ: aut actum est de litteris, & continuo præcipua humanitatis studia perierint. Traducentur per subsellia & cathedras scholarũ Ilias Homeri atq; Odysea, propter adulteriũ Paridis, Circes, Calypsus, procorũque intemperantiam: frustra Virgilius sibi ex virginali verecundia cognomen inuenerit. Sordebit & despuetur eius divinum opus ob amores Didũs & Æneæ: quamuis illos errori suo, culpæque apud Augustum deprecandæ, prætexat Ovidius, cùm ait:

Et tamen ille tua felix Aeneïdos auctor,

Intulit in Tyrios arma virũque toros.

Nec legitur pars vlla magis de corpore toto,

Quam non legitimo fœdere iunctus amor.

Sed ego ineptus, qui abutor attentione vestra, & aquã mihi effluere sino, huiusmodi refutãdis ineptiis: nec istos Plautomastigas, infami calumniæ inuidiæque morbo laborantes, iubeo abire morboniam. Reliquum est, vt breuiter exponam cur è Plauti comœdiis Menæchmos

potissimum delegerim : cuius rei duplicem
causam adfero ; vnam , quòd Sicala sit hæc
fabella , ideòque acutissima : cùm sit omnium
facetissima & callidissima Siculorum natio : al-
teram , quòd eius argumento nihil excogitari
possit festiuus & vrbanius. Siculam esse fabel-
lam , & is significat quisquis scripsit prologum :
& indicio sunt Menæchmi ac Messenio , Sicu-
la nomina : Epicharmique stylus à Plauto ex-
pressus accuratissimè , cuius cum imitatore
fuisse , vel vnus Horatius , licèt iniquior Plau-
to , satis ostenderit his verbis :

Dicitur Afrani toga conuenisse Menandro :

*Plautus ad exemplum Siculi properare Epi-
charmi.*

Apud Siculos verò natam , educatam , adul-
tam & excultam fuisse comœdiam , grauissimi
auctores prodidere : nequicquam Atticis con-
trouersiam mouentibus , aduersus quos dan-
das Siculis esse vindicias , docti viri pronun-
tiant his adducti rationibus , quòd Phormis &
Epicharmus , Siculi Comici , Chonnida &
magnete priores fuerint , quos Athenienses apud
se iactarent antiquissimos auctores comœdiæ :
quòd vicos Athenienses *δῖμυς* , Megarenses
verò , Siculorum coloni , *κόμας* appellarent :
ex quo nomen impositum comœdiæ , *ὡς τὸ πλὺν
ὠδῶν ἔχουσιν τὰς κόμας* , & quòd iidem Athenien-

ſes ἀντὶ τῆς ποιῆν, dicunt *ωράτιον*. Megarenſes
 & Siculi *δρᾶν*, & ἀπὸ τῆς *δρῆν* appellata ſint
δράματα, quæ Latinis fabulæ nominantur.
 Iam in argumento huius comœdiæ non pa-
 rum ineſt leporis & iucunditatis, ob formæ
 nominisſque ſimilitudinem: quo genere dele-
 ctatum eſſe Plautum, teſtis *Amphitruo*, & te-
 ſtarentur lenones gemini, quos citat *Priscia-*
nus, & quorum obſcura, propter mendum
 loci, eſt apud *Gellium* mentio, niſi eam nobis
 fabulam inuidiſſet, temporis & hominum in-
 iuria. Bella eſt, inquam, hæc hypotheſis, no-
 bis enim gratus eſt noſter error, & expectatio-
 ne deluſi libenter ridemus: quem vnicum ope-
 ræ ſuæ fructum captat vulgus in ſpectaculis.
 Huc adde quòd ſummam admirationem ad-
 fert ſimilitudo non geminorum modò, ſed
 multò magis alienorum, cùm internofci ne-
 queunt: ſiue iſ naturæ fortunæque ludus: ſiue
 ea vis cæli natalitiisſque ſideris in hominum for-
 mas. Ac ne priſca referam ſimilitudinis exem-
 pla; & ne *Valerij Maximi*, *Plinii*que ſcrinia
 compilem, extiterunt nobis pueris, aut adoleſ-
 centulis, vnus vxoris duo viri, *Martinus Guer-*
ra & *Arnaldus Tilius* ſic per omnia ſimiles, ut
 nec ab vxore, nec à cognatis, nec à propinquis
 & familiaribus, diſcernerentur, quod incertū
 ac ſuſpenſum diu tenuit ſenatum vniuerſum

Tolosanum: vixque diiudicata ea controuersia digna certè, quæ à nobilissimo iuriconsulto Corasio literis proderetur, editoque insuper commentario illustraretur; Sed cruentum, & infelicem in altero sortita est illa similitudo euentum, cuiusmodi fuerunt in Maronis carmine fata geminorum:

*Vos etiam gemini Rutulis cecidistis in aruis,
Daucia Larida Timbérque simillima proles,
Indiscreta suis, gratusque parentibus error.
At nunc dura dedit vobis discrimina Pallas:
Nā tibi Tymbre, caput Enādrius abstulit ensis:
Te decisa suum Larida dextera querit:
Semianimèsq; micant digiti, ferrumque retractant.*

In Menæchmis autem Plautinis, quæ turbas parit similitudo, lætos & iucundos habebit exitus: quales rebus vestris semper optamus, vt hîc præfandi finem in bono faustoque omine faciamus. Dixi.

IOAN. PASSERATII, IN
Ciceronis orationem pro Cicina,
Præfatio.

ALternam Plauto & Ciceroni me nauaturum operam cum superioribus annis receperim, fidemque meam hætenus libe-

rarim, Auditores, ut mihi perpetuò constarem, post interrogationem Vatini, aliquam Plauti fabellam oportuit interpretari. Nunc tamen pristinæ consuetudinis oblitus esse videor, qui & in Cicerone defierim, & ab eodem rursus initium ducam: unde mihi meritò leuitatis culpa pertimescenda est, & subeunda inconstantiae infamia; nisi vobis consilium meum causamque omnem paucis aperuero; Nitar igitur istam ex animis quorundam suspicionem euellere, meq; ab huiusmodi crimine alienissimum ostendere. Quod ut faciam, vestra etiam benignitas monet, & cohoreatur attentio, cui me par est morigerari, & vestrae expectationi non deesse. Plauti militem gloriosum explicare instituenti, & ad Idus Octobres planè parato atque instructo, quiddam accidit perridiculum; quo mihi suscepta ratio necessario commutanda fuit. Cum enim deessent exemplaria, quæ multa inueniri falso nuntiātū erat, nec ego pecuniæ parcere decreuissem ut excuderentur, negauit typographus chartam, quæ quidem huic rei idonea esset, vllam tunc temporis posse reperiri. Ibi magna percussus admiratione, quæsiui quonāmodo tanta in Academiam Parisiensem inuasisset. chartæ inopia, quæ vndique terrestri itinere, & secundo aduersoque flumine inuehi

quotidie cōsueuerit. Respōdit, vim eius infinitam in Hispaniam ante paucos menses asportatam esse, & operas à Philippo rege amplis conditionibus inuitatas, lucri gratiâ frequentes illò commigrasse: Id primum mihi stomachum, deinde etiam risum mouit. Ac quoniam admirationem meam auxerat, non minuerat, & illa parum mihi probabatur responsio, mecum ipse cogitare cœpi, ecquānam alia caussa tantæ subesset inopiæ. Diu multumque in hanc cogitationem defixo, tandem in mentem venit, innumerabiles scriptores, cōsque infinitè imperitos, qui per Academiam impunè grassantur, esse auctores huius mali, eoque rem rediisse vt nisi immensa libros quālibet ineptè, & indoctè scribendi licentia magistratum edictis cœrceatur, breui charta prorsus Typographos deficiat. Itaque Caligulam, facem alioqui & Phaëtonem orbis terrarum, non possum in eo non laudare, quòd id genus Aquinos, Cæsios, Volusios, spongia linguæ delere scripta sua iubebat, & interdum scripta ipsa ferulis obiurgari, aut in profluentem abiici mergique imperabat. Nullus neque modus neque modestia; vix natum hoc examen euolat, nequitque suis aluearibus contineri. Et quemadmodum vulgò videmus tenuissimum quēque de plebe abundare liberis,

qui adiuncta ad paternam egestatem inertia, ostiatim mendicantes annonam reddunt cariorem; Sic certi homines in summa tenuitate ingenij, longè plurimos animi foetus edunt, quos cum fouere & educare domi non possint, Typographis tradunt, à quibus excepti, magno chartæ dispendio per omnes ciuitatis partes dimittuntur: ubique prostant, prætercuntibus passim obtruduntur, nec ulli aliarum mercium præcones exaudiuntur. Ex hoc hominum more præpostero, grauissima in rem literariam manat incommoda; Nam si in Bibliopolarum officinis, Plauti, Cæsaris, Sallustij, & primæ classis auctorum, exemplaria conquiras, statim pro thesauro, ut est in vetere verbo, carbones: offerent meras quisquilias (pudet enim nominare, & nosse nomina piget) quibus miseri doctores infelicem alunt falluntque iuventutem. Expergiscatur, inquam, quorum interest, & vlceri scapellum adhibeant; aut si serpit cancer longius, nihil propius est, quam ut ne Ciceronis quidem ipsius vlla exemplaria reperiantur. Decima eius operum pars hodie non extat ad vsum nostrum æneis formis excusa; quo in numero cum præter opinionem oratio pro A. Cæcina inuenta esset, diu neglecta, & quasi ad tineas blattasque damnata, eam carie situmque squalentem non

sum passus putrescere, sed iacentem excitauit, fecique ut è tenebris ad lucem quodammodo reuocaretur; neque, quod ceteros auertit, me ab eius explicatione deterruit. Illi enim raro docent nisi ea quæ omnes se intelligere putant, obscuram horrent de iure ciuili disceptationem, longamque orationem tamquam longum aliquod iter refugiunt. Nimirum ut qui sunt languidiore stomacho, insolentes navigationis, postquam nauim conscenderunt, & paululum prouecti sunt, nauseant; requiruntque continentem: sic ij quibus imbecilla vis ingenij, si longius progrediendum est, statim animo linquntur, ac in porta penè deficiunt, ut Galbæ cantherius. Sibi nihilominus diligentes videntur, omnem mouent lapidem, licet nihil promoueant, meri germanique Callipides assiduo cursitant, neque vllum cubitum procedunt; Cùm autem suis pedibus Ciceronem metiatur, necesse est iudicet longiorem. Atqui sanè longissima quæque Ciceronis oratio doctioribus maxime placet, quod de orationibus Demosthenis eidem Tullio visum est. Quæ iucunda sunt, scilicet, nimium citò præterire, conquerimur, ac nimium diu quæ molesta sunt permanere: ut hyems, vel morbus, & si breuis, longior tamen apparet: Ver autem vel bonam valetudinem nimis longam nemo di-

xerit, cui sanum fuerit incipit. Obscura porro non tam natura sua est Cæcinæ controuersia, quam videtur quorundam inertiae, quibus vel acies hebetior est, vel eam satis ad perspicendam Ciceronis mentem non valent contendere. Præterea illis plerumque accidit quod sepijs, quas, aiunt, ne capiatur, effuso atramento aquam turbare, ac simul sibi & piscatori prospectum adimere. Sic multi & sibi & Ciceroni tenebras offundunt, dum ad locum aliquem ventum est, ubi metuunt ne deprehendantur in summa literarum ignorantia. Et ut ad eandem similitudinem reuoluar: quemadmodum Anaxilaüs memoriæ prodidit sepiarum atramento lucernæ addito, eos qui adsunt continuo Æthiopes videri; ita qui cōtortos & confragosos in Ciceronem commentarios scribunt, lucem optimi auctoris infuscantes, faciunt ut videatur obscurior. Verba certè, quibus utitur, aperta sunt, perspicua, & illustria: nec quisquam ore tam duro futurus est, qui oratori summo vitium orationis maximum, hoc est obscurum dicendi genus affingere audeat; in hac præsertim caussa, ubi ambigua diligentissimè distinguuntur, vsitata ac propria verba deliguntur, sine vlla contractione aut inflexione, atque immutatione sermonis. At res, & id quod in iudicium venit, perplexum

implicatūque est: sit ita sanè: an ideo absterri oportet, & ante tentatum certamē viribus nostris diffidentes hastas abiicere? Enimvero eadem opera negabimus in virtutis viam ingrediendum esse, quòd initio salebrofa sit & aspera. Sed tamen quæro cuīnam faceffat negotium? ignaro iuris ciuilis, an perito? Si hanc sibi prouinciam deposcit iuris & legum ignarus, an dicemus illi rem esse difficilem? haud hercle magis quàm Apellis spectare tabulam, aut statuam Polycleti, Tamyrae vel Tiresiae. Necesse est igitur vt huius controuersiae magnitudo pendeat, ex Iurisconsultorum estimatione, qui mores & instituta veteris populi Romani teneant, multiplicem interdictorum naturam, qui fundo deiectioni quoque pacto restitui à prætore debeant, quæ vis solida, quæ ciuilis & festucaria, quomodo fieret deductio moribus, veniretur in rem præsentem, aut in gleba totus fundus vindicaretur, quæ potestas ac munus arbitri, quæ sponsonum formulæ, quæ testamentorum, quæ municipiorum & coloniarum iura. Ista ex duodecim tabularum & veterum Iurisconsultorum parietinis ac ruderibus sua diligentia eruit, nec tamen fartis à Triboniano centonibus instructus ad Ciceronem explicandum accedit, nec est communium literarum & politioris humanitatis ex-

pers,

pers, non metuet ipse ne in tenebris offendat, & aliis antiquitatis lumen præferens offusam oculis imperitorum discutiet caliginem. Quod si in iis rebus labatur, quæ coniectura tantum nituntur, æquissimum erit ignosci, cum sit admodum lubrica tota coniecturarum ratio. De me ut non aulam multa polliceri, (ne quis fulicam parturientem mihi obiiciat, sicut est populi sermone tritum & peruagatum;) sic non inficiabor me in eo studio aliquantum temporis & laboris consumpsisse, unde spes affulsit, utinam ne inanis, orationes eiusmodi controuersis implicatas non pessimè à me posse explicari; Quinetiam prælagit animus fore ut in secundis tertiisve consistam, si primas in hoc genere alius tulerit. Ratum istuc augurium, non alitis inuolatus, non sinister oscinis cantus, aut sinistrae Iouis manubiae, non tripudium solistimum, aut insomniorum visa faciunt: excuta pedum, iecora & fibras non consului, nec eam sequutus sum quam exaratus in agro Tarquinienensi puer inuenisse fertur disciplinam. Certiora sunt alia signa quæ ad præensionem futuri à me notantur: plurima cum Cicero ne ipso, frequenti lectione, ceu familiari quodam colloquio parta consuetudo ad eius mentem sensusque faciliùs inspiciendos, quædam antiquitatis notitia, mediocris exercitatio,

& ex remissione, siue potius intermissione, acrior ad docendum alacritas: quibus omnibus signis mihi constituenda est apud vos auctoritas meæ prædictionis. Vna erit, fortasse auis arcula & inebra quæ minùs liquidum reddere, & garritu suo nostrum turbare conetur auspiciu. Vereor enim ne more suo vulgus imperitum ogganniat, consiliu[m]que meû reprehendat quòd in manus sumâ librum minimè, si diis placet, plausibilem atque popularem. Circûspiciendum aliquid fuisse quod in aures suas mollissimè blâdissimèque influeret, vt inde excitaretur hominum concursus, nec quicquam æquè prodesse doctrinæ opinionem aucupanti. Mecum agnoscitis, opinor, vocem multorum capitum bellua dignissimam, ad quam, vt ad Catadupa qui Nilum accolunt iam pridem obsurdui, adductus eloquentiæ parentis exemplo, qui in littore ad fluctuum fremitu[m]que maris declamitabat, vt aduersas plebeculæ acclamationes inanè[s]que sibilos cõtemnere assuesceret. Indignus est qui sedeat ad puppim gubernator, si orra tempestate procellarum stridore perterritus, clauum omittit; miles exautorandus est ab imperatore, qui iam acie instructa ob clangorem tubarum, clamorè[m]que hostium arma proiicit: multò minùs ferendi sint doctores regij si insulso

Inconditòque vulgi sermone ab officio dimo-
uentur. Græculum nescio quem satis in dicen-
do copiosum vel potiùs loquacem, suàmque
artem in circulis venditantem, olim risisse fer-
tur Annibal, quòd is qui nūquam castra, num-
quam exercitū vidisset, nec vllam omnino pu-
blici muneris partem attigisset, de imperato-
ris officio coram se disputaret, & de re milita-
ri sibi præcepta traderet, qui tot annos de im-
perio cum populo omniū gentium victore de-
certasset. Ridere licet etiā nunc plusquam Te-
rentianos Phormiones, nulla re nisi humana-
rū literarū ignorantia insignes (hoc enim secu-
lo eas nescire non in minima laude ponitur:)
qui cæteris arrogantissimè præscribunt, quid,
& quo pacto doceant, quibúsque artibus disci-
pulorum frequentia suā scholam celebrent, &
minimo negotio eruditionis famam apud sui
similes, callidos scilicet eius rei æstimatores
comparent. Nimirum illud est quod aiunt: *Qui*
sibi semitam non sapiunt, alteri monstrant viam.
Alios quærant quibus sua narrent somnia;
Auscultare mihi non vacat, & multò minùs
credete. Nam quod ad concursum multitu-
dinis attinet, memini me virum eximiè do-
ctum audire; cū diceret, si magnam disci-
pulorum turbam videret apud eum qui re-
ctè doceret permanentem (si quidem inter-

dum, ut sturni vel turdi gregatim aduolant & reuolant) reuoluitate stupefactum se ex vltima vsque Hetruria haruspices arcessiturum esse ad prodigium illud maioribus hostiis procurandum. Neque tamen id in dexterioris notæ præceptoribus iustam habet admirationem, ut neque in lustris condendo fuisse plures proletarios quàm assiduos. Semper enim hoc post hominum memoriam factum est, ut auditores spectatoresque plurimi ad Mimos, histriones, præstigiatores, Sanniones, lymphatos denique & ceritos libentissimè audissimèque confluant, quia vulgus nugis quàm seriis impensiùs delectatur, refertque puerile ingenium, quod puppas, mutas effigies, & inania rerum simulacra pro rebus ipsis consecratur; eorum amore sic exardescit, ut apud Euripidem Alexander, qui pro Helena, inanem effigiem atque imaginem Helenæ rapit. Quid autem mirum est si lusus inertes oblectat, & si alienæ adiutores infantiæ in otio ridere malunt, quàm cū labore, & negotio sapere. Crescit etiam numerus in immensum, quia iis idem quod pecudibus accidit, quæ dispersæ, protinus accurrunt ad sui generis gregem, quem primum conspexerint. Imò si fortè se iam aliò contulerint, & vox alicuius sophistæ, & nugatoris increpuerit, relicto priore magi-

stro ad illum properant, ibique segnes desident vt apiculæ in vuam conglobatæ. Verùm in eo dissimiles quòd fumum amant, & fumum oderunt apiculæ. Perabsurdum est igitur ortiri è populi fece iudices, quorum sententiis, & arbitriis viri docti vel indocti censeantur; cùm ne principes quidem verbum vnicum peregrinum vel insolens vllò edicto suo vsitatum reddere, aut ciuitate donare queant. Testis è grammaticorum tribu prodeat M. Pomponius Marcellus, qui cùm in oratione Tiberij Cæsaris verbum aliquod (strenas opinor) reprehendisset, (quàm sapienter in tanta principis sæuitia non disputo;) & Attcius Capito, cui plùs adulatio proiecta infamiæ, quàm iurisprudentia laudis peperit, affirmasset verbum illud Latinum esse, aut si nō esset mox futurum. Tum Marcellus, *mentitur*, inquit, *Capito; Tu enim Cæsar ciuitatem dare potes hominibus, verbis non potes.* Verè simul & liberè; Quamobrem desinant isti Censurâ sine populi suffragiis gerere, & indoctissimos pudeat de aliorum doctrina quicquam statuere, ne stultitiæ sœ idem præmium ferant, quod Midas in fabulis iudicare ausus de Apollinis cantu. Indignissimum est enim tantum sibi sumere homines postremos, quantum principibus nunquam licuerit. Ex paucorum & petitorum iudicio,

solida & expressa laus constansque eruditio-
nis fama proficiscitur, non rumusculis mul-
torumque opinione comparatur, & captantes
auram popularem fugit, sequiturque fugien-
tes. Satis iam ostendimus hanc pro A. Cæci-
na orationem, neque longam esse approbanti-
bus, neque obscuram antiquitatis monumenta
tenentibus, neque non plausibilem & iucun-
dam studiosis iuris & eloquentiæ. Itaque hos
præteruicta scopulos, & his extricata vadis,
facilem iam cursum tenet, portumque prospe-
ctat, in quem mox deferatur oratio: Nisi for-
tè adhærescit illa nauigio remora; Cæcinæ
causam, cuius patrocinium M. suscepit Tul-
lius, priuati esse iudicij, nec tantum imi, sed
etiam nullius subsellij, regnare in publicis iu-
diciis eloquentiam, ibi animos inflammari
aut restingui, eosque misceri motus, quibus
auditores in maximam rapiuntur admiratio-
nem, celebrari hominum concursu causas
quibus caput & fortunæ aguntur; in priuatis
iudiciis vim dicendi non posse efflorescere.
Subsellia grandiore vocem desiderant (fa-
teor) & in publicis iudiciis stimulos oratori
admouet populi corona; sed adstantem in co-
mitio iudicem, aut ad recuperatores verba fa-
cientem, sæpius oportet non oratoris tantum
subtilitate cum aduersario pugnare, verum-

etiam grauitate copiâque resistantē percellere. Quæ omnia in defensione Cæcinæ præstitisse Ciceronem nunc non est demonstrandum, ne operam in re non necessaria colloceamus. Itaque in oratione mea extremum id ponam quod primum præcipuumque est; videlicet in discendi docendique ratione, vt in amicitia mutuis officiis inter nos esse certandum. Verùm id monendi non estis, satis officij memores. Ego autem, modò fortuna conatum adiuuet, & facultas voluntati respondeat, meū pensum accurabo probè. Cedam multis ingenio, plerisque doctrinâ, paucis industriâ; commodorum vestrorum studio nulli quidem certè. Id si vobis persuafero, hinc ita discedam vt me amplissimum laboris mei fructum gloriæ esse consequutum. Dixi.

IOAN. PASSERATII IN
Ciceronis Orationem pro lege Manilia
Præfatio.



Vo vitio morbôve dissoluta sint anno superiore ista comitia, quia satis meminisse possumus, Auditores; ideò nec mea reprehendi matura profectio, nec accusari fera debet reuersio. Si quis

ramen nimium molestus æris nō sui flagitator
vrgebit acrius, mēque coget eloqui, cur col-
legis meis strenuè munia sua obeuntibus, vnum
atque alterum mensem cessauerim, excusatio-
nis loco scitum illud Imperatoris Romani ac-
cipiat, *Rationem otij sui neminem reddere*: quam-
quam, vt ne quid dissimulem, toto eo tempore
otij minùs mihi quàm negotij fuit. Animi qui-
dem moderatæ remissioni datum esse aliquid
haud inficiabor: ignauia verò & socordia, non
concedam: imò sponsonē facere paratus sum,
iustòve sacramento contendere, quicumque
me vadatus est vadimonio literario, num-
quam ad diem non occurrissē, nisi vis ma-
ior, quæ nulli præstanda est, obstiterit. Quòd
si quid cessatione peccatum est, id à vobis
etiā tacitus tum deprecabor, cum diligentia
farciam. Sed vbi hanc causam dixerō, & pa-
ribus pluribùsve iudicum sententiis absolu-
tus cœpero discedere, vereor ne ab iniquis
ad alios quæsitores, aliāque subsellia retra-
har. Decantatam in scholis, inquit, ora-
tionem pro lege Manilia interpretandam
suscepisti, tuæque consuetudinis oblitus, in-
choatam Plauti fabulam in actu tectio reli-
quisti. Ista nec obiicere difficile est, & facile
refellere. Nam si libros qui omnium mani-
bus teruntur nobis fas non est attingere, ea-

dem opera uti via prohibeamur, interdica-
mur foro, communi victu cultūque corporis
arceamur: aqua, igni, cælo denique hoc ac
spiritu quem omnes ducimus, velut manifesti
confessi que rerum capitalium, carere iubea-
mur. Quantò meliùs Antisthenis discipulorum
nobilissimus, qui τῆς Ἀθηνάϊς ἑφασκε (δεικνύς
τὴν τῷ Διὸς τοῦτον) καὶ πομπῆον αὐτῷ καλεῖσθαι
κένοι ἐν διαποταῖαι. Censebatur esse sine lare fa-
miliari & sine tecto: Atque ipse cōtrā existi-
bat, Iouisque porticum ostendens, Athenien-
ses sibi magnificum aiebat ædificasse domici-
lium. Scilicet quod publicum est, patriciis &
plebeiis, nobilibus & ignobilibus æquè pater;
nec ita fieri potest occupantis, ut eiusdem ciui-
tatis, vel tenuissimus quisquam excludatur.
Neque sanè obscurum est quo ex fonte tantus
error, & inueterata manarit opinio. Nempe
quæ à multis leguntur, à multis intelligi putāt;
quod quàm falsum sit, demonstrabo cum hu-
ius orationis edisseram argumentum. Interea
sic habetote: eum qui suasionem legis Mani-
liæ rectè cupiet explicare, non modò artis
Grammaticæ rudem non esse oportere, &
peruagata Rhetorum callere præcepta, sed
multa præterea nosse quæ vulgus ignorat; ut-
pote maiestatem populi Romani, vim Tri-
bunitiæ potestatis, morem legum ferenda-

rum, vnde colligerentur vectigalia, vt ab aratoribus decumæ, à pecuariis scriptura exigetur, à mercatoribus portorium: quo pacto comitiis interdum inuito senatu, mandarentur imperia; quot quantæque sint boni imperatoris virtutes: quæ optima ratio belli administrandi, & alia quam plurima ad rei militaris scientiam pertinentia. Tu igitur hæc tenes, dicat aliquis. Nihil mihi sumo; ac nescio an potius detraho. Ita enim me Musæ ament, & nostram Academiam semper florentem esse velint, vt quotidie magis magisque mihi videor imperitus. Cuius certè rei me non tam pœnitet, quàm quòd olim me non indoctum arbitrabar. Enitar tamen ope summa, & quod ingenio non possum, fortasse assequar industriâ. Verùm ex diuerticulo in viam redeamus; & quod de inchoata relictâque Plauti comœdia obiectum est, diluamus. Primum mihi liberum est quod arguitur negare. Quis enim scit an in aliud tempus distulerim, propterea quod nondum adsunt cuncti eius fabulæ auditores? Deinde regium est, præsertim in prætoriiis & arcibus extruendis, incipere, nec perficere: quicquid falsus poëta in Sertorium argutetur. Præterea stat à me Græcorum vetus verbum, πλέον ἡμῶν πάντος: & vocem Tiberij Cæsaris vsurpare licet qui vt parsimoniâ cæte-

torum suo exemplo iuaret, solemnibus cœnis pridiana & semesa opsonia, dimidiatūmq; aprum sæpe apponebat, affirmabátque dimidiatum eadem habere quæ totum. Postremò miles noster, qui nihil nisi pericula metuit, & sapienter sibi cauet loco, in urbem adhuc reuerti noluit, ex qua, ne inultus periret, fortissimè profugerat; & vbi tot millia funerum in rationem Libitinæ venisse ei nuntiatum est, vt in saluberrimam Galliæ partem cum suo cælo Sardinia crederetur immigrasse. Sed ex animo discedat mihi priuatim infelicis, & publicè calamitosæ anni memoria: hic verò melior nobis redierit precor, nec iterum interpellato studiorum nostrorum cursu, cogamur Dictatorem aliquem pangendo clauo quærere, aut, quamquam indemnati, solum vertere, & Locros, vel Crotonem, vbi numquam ista lues sæuire dicitur, cogitare. Impetratum, inauguratum est: cantus oscinis, alitis inuolatus, tripudium solistimum, ratum faciunt: quæuis addicunt & admittunt aues; nec infaustæ, & inauspicatæ, affulserunt hodiernæ Calendæ Martiæ, anni quondam initium, & quibus post reges exactos, diu Consules iniere magistratum. Calendæ, inquã, Iunoni sacræ, & apud priscos Quirites multùm fertis floribúsque celebratæ. Vos vestras modò partes agite, ego meâ susti-

nere conabor personam: nec quicquam pollicebor amplius. Quippe non sum tam callidus, ut pleròsque Italiæ caupones ac stabularios valeam imitari, qui simul atque peregrè aduenientē aliquem conspexerint, longè procurrūt obuiam, salutant benignè, hospitioque suo ambitiosè laudato, miris blanditijs inuitant, deducunt alacres vsque ad amplam & bene pictam ianuam: Postquā autē ingressus fueris, & illi ad alios hospites captandos reuolarint, nihil culina frigidius, ut aiunt, nihil inanius stabulo reperias. Eorum mores magis amplector qui neminem promissis alliciunt, sua cōmendāt parciùs, & sponte ad se diuertentes lautiùs accipiunt. Itaque hoc suscepti operis vestibulum ornatiùs esse non patiar, ut vos rectà intromittam in atriū, ubi collocatæ sunt Romanæ antiquitatis imagines, & ex quo interiora ædium cunctamque supellectilem possitis intueri. Ascendamus ergo paulò altiùs, & quæ ad suasionem legis Maniliæ, argumentumque huius orationis spectant, quasi à capite repetamus. Cùm tria sint Reip. genera, quæ quidem ab Aristotele comprobentur, Βασιλεία, αειποράτεια, δημοκρατία: Rempublicam Romanam, antequam vnius dominatione oppressa teneretur, constat ex his tribus generibus compositam & temperatam fuisse. Ni-

mirum in Consulibus regium, & erat & dicebatur imperium. Cicero libro legum tertio: *Regio imperio duo sunt, iisque præcundo, iudicando, consulendo, prætores, iudices, consules appellantur.* L. Papyrius apud Liuium libro octauo: *Quaro, inquit, Q. Fabi, cum summum imperium Dictatoris sit, pareantque ei consules, regia potestas; & quæ sequuntur.* Ecce in consulibus Βασιλεία: Videamus an ἀειποκράτεια in senatū fuerit. Polybius & Dionysius Halicarnassæus, uterque libro sexto, scribunt ærarium, prouincias, vectigalia penes senatū fuisse. Addit etiam Halicarnassæus, perpetuo legē hanc Romæ usque ab vrbe condita obseruatam, ut eorum omnium quæ ad populum ferrentur, patres auctores fierent: si quid non ita rogatū esset, eius rei ea lege nihilum rogatū. In senatu igitur ἀειποκράτεια, & optimatum principatus agnoscitur. Nunc ostendamus Δημοκρατία: Amplitudinem & dignitatem ciuitatis, totiusque imperij maiestatem in populo fuisse hinc apparet, quod non nisi à populo creabantur magistratus, eique submittebantur fasces quoties in concionem ascendebant: quod de capite ciuis populus solus iudicabat: quod leges iubebat aut antiquabat: quod bellum, pacem, fœdus, societatem, solus decernebat. Quin & ipsum Dictatorem, licet Magister populi

appellaretur, populo paruisse; declarant M. Fabij verba apud eundem Liuium eodem libro: *Tribunos plebis appello, & prouoco ad populū: eūmq; tibi fugienti exercitus tui, fugienti senātus iudiciū, iudicem fero; quicertē vnus plusquā tua dictatura potest pollētque. Videro cessurūne prouocationi sis, cui Rex Romanus Tullus Hostilius cessit.* Prætereo quòd apud Liuium libro septimo Dictator à Tribunis plebis magistratu abire compellitur: quòd Tribunis militum consulari potestate vincula minantur libro quinto: quòd libro secundo Lectorius Tribunus plebis, viatorē mittit ad Appium consulem: quòd libro vigesimo nono in castra P. Scipionis duo Tribuni plebis proficiscuntur vt imperatorem comprehendere iure sacrosanctæ potestatis Romā reducant. Indicant & veteres senatus-consulti rogationisq; formulæ quantum intersit inter senatum qui *censere* tantum dicitur; & populum, qui *velle & iubere*: quoniam in senatusconsulto erat, *de ea re ita censuerunt*; in rogatione, *velitis iubeatis, Quirites*. Quare non elatè neque oratoriè M. Tullius in oratione pro C. Rabirio perduellionis reo sic populum Romanum alloquitur: *Vos, Quirites, quorum potestas proximè ad deorum immortalium numen accedit, oro & obsecro.* Nec me mouet quòd aduersus illa quæ suprà memora-

ui, proferri potest ex ea oratione pro Rabirio:
Bonorum & fortium ciuium esse, summum in consulibus imperium putare: Si quidem extra ordinem id fiebat, & in extremo Reipublicæ discrimine. Quod vobis si fortè non persuadeo, audite grauissimum auctorem Sallustium in bello Catilinario. Itaque, inquit, quod plerumque in atroci negotio solet, senatus decreuit; Darent operam cōsules ne quid Respublica detrimenti caperet. Ea potestas per senatum, more Romano, magistratui maxima permittitur: exercitum parare: bellum gerere: coërcere omnibus modis socios atque ciues: domi militiaque imperium atque iudicium summum habere: aliter sine populi iussu null earum rerum consuli ius est. Pergamus porro, vt quorsum hæc à me disputata sint intelligatis. Qui legē ad populum ferre constituerat, eam promulgare & proponere trinundinum necesse habebat, sicut ex Ciceronis Philippica quinta, Oratione pro domo sua, & Dionysij Halicarnassei libro decimo perspicuum est. Promulgandæ autem & proponendæ legis causa fuit, vt eo interuallo trium nundinarum lex omnibus innotesceret, præcipuè tribubus rusticanis, quæ rei suæ ergo, nundinis Romanam ventitabant: ac si cui suadere vel dissuadere legem libitum erat, concedebatur. Liuius libro quadragesimo quinto: *Prator*

nouo maloque exemplo rem ingressus erat, quod non consulto senatu, non consulibus certioribus factis, de sua unius sententia, rogationem ferret: Vellent iuberentne Rhodijs bellum indici: cum antea semper senatus de bello consultus esset, deinde ad populum latum: & Tribunis plebis, cum ita traditum esset, ne quis prius intercederet legi quam priuatis suadendi dissuadendique legem potestas facta esset: eoque persape euenisset, ut qui non professi essent se intercessuros, animaduersis viuis legis, intercederent: & qui ad intercedendum venissent, desisterent, victi auctoritatibus suadentium legem. Ne vero vobis imponat quod hic ait Liuius, suadendi, dissuadendique legem priuatis potestatem fieri, id sic est exaudiendum, etiam priuatis: quia procul est ab historiarum fide, & a mente Liuij, idem non licuisse magistratibus: cum & Cicero Prætor, hanc legem rogationemque Manilij suaserit, & Consul dissuaserit legem Rulli agrariam. His ita constitutis facilis redditur causæ coniectio, & expeditum suasionis eiusmodi argumentum, ex Dionis libro trigesimo sexto, Velleij Paterculi libro secundo, Appiani Mithridatico, Plutarchi Lucullo & Pompeio. Bellum cum rege Mithridate annos iam plus quadraginta populus Romanus varia fortuna gesserat: ac tamen si à L. Lucullo multis cladibus præliorum, &

urbium

urbium expugnationibus attritæ atque comminutæ regis opes essent: tamen, ab suis, militum Fimbrianorum seditione destitutus, Mithridatem & Tigranem fugientes persequi, bellumque patrare ac conficere non potuit. Eodem tempore C. Pompeius curator oræ maritimæ lege Gabinia, quanquam deuictis prædonibus, pacatæque vniuerso mari, nihilominus immensum illud & infinitum retinebat imperium: adeoque totam Italiam fama sui nominis impleuerat, ut vnus omni dignus imperio videretur. Idcirco populares homines quod Pompeij gratiam & plebis, cui longè carissimus erat, aucuparentur, eum laudibus ad cælum ferre, nouisque subinde honoribus cumulare, certatim nitebantur. Quo ex numero C. Manilius Tribunus plebis rogationem promulgauit, ut bellum Mithridaticum, imperium, provinciam, exercitumque Luculli Pompeio transmitterentur, adiuncta Bithynia, Phrygia, Lycæonia, Gallatia, Cappadocia, Cilicia, Colchide superiore, & Armenia; præter classem & maximas copias maritimas quibus aduersus prædones usus fuerat. Hanc legem aduocata concione, nundinis, opinor, suaserunt C. Iulius Cæsar tum priuatus, & M. Tullius Cicero Prætor. Dissuaserunt Q. Lutatius Catulus, & Q. Hortensius Ortelus, duo senatus lumina. Quo

magis doctum hominem miror, qui in huius orationis argumento scribit à senatu reuocatum fuisse Lucullum; nec ei venit in mentem à Plutarcho proditum, esse indignissimum senatui visum, Lucullo non tam laboris & periculi, quàm victoriæ & triumphî successorem dari: summâque contentione patres legi restitisse vsque ad ipsum legislationis diem, quo ceteri, populi metu, animo conciderunt: solus Catulus acri inuidiosâque oratione in legem & nimiam Pompeij potentiam inuectus, vt se frustra obniti sensit, conuerso tandem ad senatores qui aderant sermone exclamauit: *Quærendus vobis nunc est, Patres conscripti, mons aliquis libertati tuenda maiorum exemplo: & arx properè munienda, in quam vos recipere, ac seruitutis iugû à ceruicibus vestris depellere, valeatis.* Cæterum, ob legis Maniliæ suasionem Cicero nonnulla leuitatis aspersus est infamia, quòd modò illarum partium à senatu ad populum transfiret, & vtrique se venditaret; idcòque ab optimatibus ei nomen *Transfuga* inditum est. Habuit hanc orationem anno ætatis quadragésimo primo, ab vrbe condita sexcentésimo octuagesimo octauo, M. Æmilio Lepido, L. Volcatio Tullo consulibus, ex Asconij commentario in orationem pro C. Cornelio, apud Dionem libro trigesimo sexto perperâ editum

est τῶν ἁλίων pro τῶν ἁλίων, vel mendo librarij, vel ipsius Dionis errore, qui homo Græculus nonnunquam in historia Romana peccat; ut cum ait Ciceronem, rogationem Maniliam suasisse, ut Ædilis à populo potius quam Tribunus plebis crearetur; cum manifestum sit, biennio ante Ciceronem ædilem fuisse: Sed hæc alias, nunc isti disputationi statuamus modum, ne memoriolæ nostræ, aut auribus vestris grauis sit longior oratio.

IOAN. PASSERATII PRÆ-
fatiuncula in orationem M. Tully pro
A. Licinio.

INTER leges Tribunitias, quæ aduersus nimias opes nobilitatis, & inuidiosam optimatum potentiâ, olim rogatæ sunt, ea non immeritò laudata, populi que Ro. consensu tandem comprobata est, quam in tribunatu L. Aurelio Cotta, L. Manlio Torquato consulibus, C. Cornelius tulit. Nam cum ad id tempus ambitiosi Prætores pro cuiusque vel gratia vel odio, variè ius dicere consueuissent; ad iuris æquabilitatem in libera ciuitate retinendam, statuit, ut ex edictis suis perpetuis res priuatas iudi-

carent, aut iudicari iuberent. Inde manasse consuetudinem arbitrantur, ut proximis comitiis designati, simul atque magistratum iniissent, in concionem ascenderent: ac postquam iurassent in leges, tum edicerent, & in albo proponerent, quid anno suo in iure dicundo essent obseruaturi. Eum morem, eaque antiquitatis vestigia persequuti, quoties ad hoc munus post vindemiales ferias reuertimur, pauca solemus præfari; ut ij, qui adsunt, intelligant quo pacto provinciam literariam simus administraturi, & quos nobis cancellos circundemus. Verum ne putidum sit eadem toties inculcare, rem tribus expediam verbis: me nihil scilicet de vetere mea docendi ratione mutaturum esse: adhibiturumque, pro ingenij tenuitate, parem diligentiam & industriam. Ad hæc, quos auctores, quoque ordine si menarraturus, breuiter indicabo. Primùm igitur M. Tullij orationem pro A. Licinio explicabimus: deinde Plauti Pseudolum, fabulam omnium festiuissimam: postremò M. Catonis, & L. Valerij, contrarias orationes de lege Oppia, si non ut habitæ, at ut scriptæ & editæ sunt à T. Liuiò. Sic triplicem aciem, ut imperatores commissuri prælium, instruemus: aut, ut periti conuiuiorum magistri, omnem nostrum apparatus tripartitò diuidemus. Oua M. Tul-

lius & lactucas: veluti pompam, & caput cœne, Plautus: secundas mensas, & bellaria, præbebit Liuius. Ne tamen ad has epulas delicati fastidij conuiuæ accedant, néve nimium auidi & famelici, locus non erit nisi iis qui paruo contenti esse poterunt, & nondum satiati æquo animo discedere. Vt frugi hominem decet, cauebo ne quid committam in leges sumptuarias, & ne per me incendatur annona. Conducam ex macello coquum, non emam qui censum mergat, qui ad detergendam stomachi nauseam nouos excogitet sapes, & exquisitis gulæ irritamentis superare meditetur Apicium. Inimicis meis cœnam illi condiant, qui in comœdiis gloriantur, se suauitate condimentorum effecturos vt conuiuæ digitos prærodant suos. Sed auertamus paulisper animum à patinis, & nonnulla de M. Tullio: nam de Plauto & Liuiio aliàs commodiùs differemus. Suspicio non defuturos qui consilium meum in eo reprehendât quod hanc potissimùm oratiunculam in manus sumpserim; peruagatam, tritam in scholis, puerisque decantatam: & qui longiorem deligi oportuisse clamitent, freti Ciceronis auctoritate, qui ex Demosthenis orationibus eam esse optimam respondit quæ esset longissima. His sermonibus imperitorum non commoueor; &, si quid eiusmodi

obicūm erit, nullo negotio refellam. Magni præcipuē viri, qui etiamnū Gallici nominis in Italia, atque adeo Italiæ ipsius decus habetur, me defendam exemplo. Is enim hanc orationem Romæ, non ita pridem, incredibili hominū literatorū concursu interpretatus est, nec pertimuit ne male operā collocasse, aut laureolam in mustaceo quæsisse videretur. Præterea, falsum est istuc quod verū esse putāt, à plurimis intelligi, quæ à plurimis leguntur: neque libris idem, quod metallis accidit, ut usu attritūque magis splendescant. Si ita esset, in Terentio, Cicerone, Virgilio, Horatio, cæterisque eiusdem notæ, qui vel indoctissimorum manibus assiduē teruntur, nihil remansisset obscuri. Imo verò, ut viæ publicæ magis puluerulentæ aut lutosæ sunt, ob frequentiam ultro citroque commeantium: utque venales merces, quæ à pluribus contrectantur, magis sordescunt; sic varietatē opinionū, clarissimi cuiusque scriptoris nitor obsolescit: & rei, qua de agitur, aliqui simplicis & apertæ, lumen, turba interpretum atque dissensione, vel obscuratur, vel obruitur. Et quemadmodum ab ea parte Geometriæ, quæ à Græcis *ὁπλίχη* nominatur, fit interdum ut in vno speculo plures vnius rei appareant imagines; sic in explicandis & emendandis libris, ubi semel aberrauimus à conie-

ctura, pro vna multæ se nobis offerunt & ostendunt sententiæ. Huc accedit, quòd dum minus cautè incedimus per ea quæ confidimus esse plana, nec aspicimus quæ sunt ante pedes; in minimis offendimus, & per lubrica delapsi fœdissimè corruimus. Quod ad longitudinem orationis attinet, non sum ex eorum numero qui libros, vt agros, decempeda metiuntur; neque si mihi animi caussa nauigandum esset, malletm vela per Ægæum facere, quàm in lacu, aut flumine remigare. Qui librorum magnitudinem & molem consecretantur, Colophonium requirant Antimachum, vel litteratorem illum Didymum, qui, vt ab auctore grauissimo Seneca memoriæ proditum est, quatuor millia voluminum conscripsit, anilibus referta nugis, & his puerilibus quæstiunculis: quænam Homeri patria fuisset; quæ vera mater Æneæ: ebrietati an libidini magis indulserit Anacreon: an Sappho corpore quæstum fecerit: aliâque id genus congescit, in quibus miseros grammaticos Cæsar exercebat Tiberius. Absterret me ab iis ineptiis nescio quis apud Suidam Callimachus, & cantilenâ suam insufurrat: τὸ μέγα βιβλίον ἴσον εἶναι τῷ μεγάλῳ κακῷ. Quinetiam breuiorem librum optarim, vt ante Cal. Ianuarias absoluerẽ: quod vereor, vt possim, sicuti cogitarã; quando triens men-

sis proximi mihi periit, sublatis ad emendationem temporum decem diebus. Operæ pretium non est in tam frigida ieiunâque calumnia diutius immorari: aliò me vocat ab oratore suscepta poëtæ defensio, vt doceam rectè atque ordine fecisse M. Tullium, quod Archie laboranti opem tulerit; eique vocem commodarit, cuius præceptis institutisque conformatam esse meminisset. Age ergo, si vobis vacat, mihi libet Ciceronis & Licinij studia componere, & quàm benè oratoribus cū poëtis conueniat, demonstrare. Omnes quidem artes, liberalesque disciplinae, sicut & virtutes, inter se coniunctæ, connexæque sunt, & communi quodam vinculo continentur: sed arctior nulla est cognatio quàm oratoriæ & poëticæ facultatis. Vis eadem vtriusque: par originis vetustas; beneficia & merita in genus humanum simillima. Id enim à nobis sibi deberi poëtæ contendunt, quòd relicta glande frugibus vescamur: quòd carminum blanditiis deliniti feritatem exuerimus, legesque & oppida condiderimus: eos fuisse domitos leones: eas lyræ sono mansuefactas tigres, ea saxa, easque arbores, quæ sedibus radicibusque suis auulsæ, Orpheum & Amphionem sequutæ esse memorantur. Sibi quoque tribuit & vindicat coetus hominum iure sociatos, copiosè

loquens sapientia : se priscos illos ferarum
more dispersos palantésque ait congregasse;
ex sylvarum montiúmque solitudine ad vr-
bium celebritatem : ex iniuria ad æquitatem :
ex agresti immanique victu ad meliorem vitæ
cultum traduxisse. Poëtarum est inflammare,
restringere, permulcere animos, & ad arbi-
trium nutiúmque suum conuertere : est orato-
rum placare iratos ; languentes incitare , eri-
gere iacentes, consolari afflictos ; omninóque
est ὁ λόγος ἰατρὸς τῆ κατὰ ψυχὴν πάθης. Vt all-
ciat voluntates, conciliétque multitudinis gra-
tiam, in aures mollissimè influit eloquentia:
Poëtarum versiculis, vt Apellis aut Parrhasij
tabulis, capimur, ducimur, detinemur. ideó-
que poësim germanã esse piëturæ censuerunt;
& elegantissimè Simonides dixit Melicus, τὴν
μὲν ζωγραφίαν ποίησιν σιωπῶσαν, τὴν δὲ ποίησιν
ζωγραφίαν λαλῶσαν. Nata in foro eloquentia,
& in subsellijs educata, aucupatur eorum, qui
audiunt, assensionem, secundã acclamationem
populi, & admirationem coronæ : Scena &
theatro, vt artis suæ incunabulis, poëtæ dele-
ctantur, plausúque vulgi tantopere mouentur,
vt eum esse putent laboris sui fructum amplif-
simú. Nec me latet ex iis quosdam reperiri, qui
vulgi odium contemptúmque præ se ferant,
quíque vt profanum lógè à sacris suis arceant:

iidem tamen illi cùm plebeculæ digito monstrantur, læticia exultant, triumphant gaudio, nec Persarum montes, qui esse aurei perhibentur, merere velint, vt hac inani careant vmbra gloriæ. Negat Dēmocritus quemquam bonum poëtam existere absque aliquo quasi furoris afflatu: Orator egregius sine aliquo mentis instinctu nullus vnquam fuit. Nisi fortè ista sunt sani hominis indicia, in agendo brachia iactare, vocem tollere, demittere, inflectere: crebrò vultum commutare: contorquere oculos: frontem ferire: percutere femur: pedem supplodere: modò ingenti clamore, ira, & indignatione perturbare omnia: modò, gemitu, lachrymis, plangore, & lamentatione miserabili forum complere. Quantulum qui hæc faciunt distant à superstitiosis, fanaticis, & Bellonariis? Mitto C. Gracchi fistulatorem, & in perorando comites insanix motus: suæne potestatis erat Seruius Galba, cùm in ea commentatione, cuius meminicit Tullius in Bruto, scriptores librariorum innocentes pessimè multabat? haud magis profectò quàm tragædorum nobilissimus, qui, cùm Atrei gereret personam, & eum in cogitatione poenæ ac ultionis penitus defixum exprimere conaretur, eam concepit animo iracundiam & furorem, vt prætereuntem fortè seruulum histrionem,

eburneo quem tenebat scipione interimeret. Quid? an Periclem, cum ab Aristophane dicebatur fulgurare, tonare, permiscere Græciam mentis compotem fuisse credimus? Nos certè ipsi dum alienam commemoramus insaniam, eiusdem morbi contagione penè correpti, & quo minimè tendebamus abrepti sumus. Quamobrem ne quis nos cum poëtis & oratoribus, ad agnatos gentilesque clamet esse deducendos, moderabimur orationi nostræ, sedatòque impetu ad reliqua pergemus.

Poëta, inquit Plautus, tabulas cum cepit sibi, Querit quod nusquã est gentiũ, repperit tamen.

Oratori ex usu commodòque suo quidvis licet comminisci, adeò ut oratoriè loqui nihil iam aliud sit, quàm cum verborum splendore dictis que phaleratis mentiri. Absurda, falsa, incredibilia, poëtæ iure suo confingant; & ut est apud Aristotelem, πολλὰ ψεύδονται αὐτοὶ: vel ut Lucillianum illud v. surpem:

Pertica pictorum, veri nihil, omnia ficta?

In quo Proteo tot figuræ; in quo polypo tot & tam varii, quàm in arte Rhetorum, colores? Quibus non modò concessum est rebus mutis vocem sermonemque tribuere, verum etiam mortuos, velut magico carmine, ab inferis excitare. Poëtæ, quantūvis mali & inepti, se omnes amant; & Musarum suarum foetus,

ut simiæ, catulos, cùm nimis amplectuntur, sæpe opprimunt: Nullus non sibi placet, & de se magnificè sentit Orator. Vbi increpuit bellitumultus, conticescit illicò poëta: cùm itum est ad saga, orator statim obmutescit. Vtrique molliorem animum ad suscipiendam quàm ad deponendam offensionem natura dedit: & vtriúsque, cùm laceffitur & irritatur, magis formidandum est styli acumen, quàm acies gladij. Nostis iambos Archilochi: Audiuistis Demosthenis verborum fulmina: non ignoratis quàm in pace metuendi fuerint: vicissim, ut enituerit eorum virtus in præliis, accipite. E' pugna quæ ab Atheniensibus ad Chæroneam malè pugната est, cùm abiecto clypeo, bonaque simul fortunâ, fugeret Demosthenes, accidit ut currentem vepres laciniâ retinerent: Tum ille trepidus, hostémque esse ratus qui se consequeretur, voce supplici, ut vitæ suæ victor parceret orauit. Archilochus verò de se vltro confessus est, & ignauiam suam nobilissimo epigrammate testatam esse voluit:

Ἀσπίδι μὲν Ζαίων τις ἀγάλλεται; ἢν ὡς
 ἑαυτῷ

Εἶνος ἀμώμητος χαλλίπον ἔκ ἐθέλων.

Ψυχὴν ἐξέσῳσα φύγων, ἀλλ' ἀσπίς ἐκείνη

Εἶρέω, ἢν αὖθις κήσομαι ἔχρακίον.

Fortes & militares viri, γλῶσσαι σπίδες, ῥίψα-

οπίδης. Archilochus fugæ maculam non cimolia, quæ creta fullonia est, sed atramento eluere nequicquam tentauit. Demosthenes facinoris sui turpitudinem prouerbiali senariolo frustra eludere conatus est; Ἀνὴρ ὁ φεύγων ἢ πάλιν μαχίσεσθαι. Atque haud scio si ea res in controuersiam disceptationemque ueniat, an Archilochi caussa deterior futura sit quàm Demosthenis: quoniam hic seipsum rubis & sentibus permisit; ille clypeum tantum commisit: illius flagitij partem texere dum, qui huius timiditatem detexere. Sed ut eò redeam, vnde paulo antè profectus sum, eloquentiæ & poëticiæ communes sunt tres characteres & formæ dicendi. Nam oratorum & poëtarum alij sunt grandiloqui, vehementes, copiosi, graues: alij tenues, acuti, subtiles, pressi, limati: Quidam ex utrôque genere temperati. Ornamenta rerum & verborum ex eodem fonte hauriunt: qualibet vagantur impunè, & ut pascuales oues, ac liberum pécus, nullis septis claustrisque cohibentur. Quanquam maior est oratoribus numerorum libertas, ut poëtis maior nouandorum faciendorumque verborum licentia. Neque enim statuo vsquequaque similes esse ut prorsus internosci nequeant, præsertim cum & in gemellis sit aliqua dissimilitudo. Hic ego te-

lam, quam exorsus sum, pertexam; si prius *μυθολογείν* mihi permittitis; & rem integumentis fabularum inuolutam euoluere: in quibus, eloquentiæ inuentor ille Mercurius, lyram quoque fertur reperisse, ut vnum artis vtriusque auctorem agnoscamus: & ex lyrae caduceique facta permutatione inter fratres deos, Mercurium & Apollinem, intelligamus poetarum & oratorum fraterna inter se commercia. Est hic mihi necessarium consistendum, ut admonui; neque, si velim, possim ulterius progredi, qui iam ad cælum peruenerim. Præterea, si placui, satis verborum est; si displicui, nimium. Quibus placuisse contigerit, ij mihi facile hanc veniam dabunt ut desinam, ne faticata minuatur aurium voluptas. Quibus displicuero, ij etiam tacere me iubebunt, ne longiore oratione augeatur illis audiendi molestia.

IOAN. PASSERATII PRÆFATIO
in 2. Ciceronem, De Petitione
Consulatus.



VI abdita, & inuoluta fabularum integumentis; acie ingenij sui euoluunt; ac, quæ poëtæ finxerunt de pœnis impiorum, in communi vita censent

repetiri, mihi faciliè persuadent Ixionis nomine ambitiosi hominis adumbratam esse imaginem. Vt enim ille pro Iunone, cuius amore incensus erat, nubem complexus, Centauros fertur genuisse; & hoc libidinis suæ luere supplicium, vt radiis rotæ districtus, pendensque, sine fine circumagatur: sic isti honoris inconsulta cupiditate inflammati, dum inanem eius speciem amplexantur, nihil animo nisi mera monstra concipiunt: vanaque expectatione suspensi, & nusquam mente vel corpore consistentes, in ambitionis rota perpetuò versantur. Quod etiam Lucretius de Sisyphi saxo, luculentis sanè versibus, interpretatur:

*Sisyphus in vita quoque nobis ante oculos est;
Qui petere à populo fasces, sauasque secures,
Imbibit, & semper victus tristisque recedit.
Nam petere imperium, quod inane est, nec datur
unquam,*

*Atque in eo semper durum perferre laborem,
Hoc est aduerso nixantem trudere monte
Saxū, quod tamen à summo iā vertice rursus
Voluitur, & plani raptim petit aquora campi.*
His autem Lucretij verbis, tristisque recedit,
Horatij verborum eodem spectantium admonet:

Qui dedit hac bodie, cras, si volet, auferet: vt si

Detulerit fasces indigno, detrahet idem.

Pone, meum est, inquit: pono, tristis que recedo.

Nulli scilicet non tristes discedunt ambitiosi, siue id, quod sequebantur, assequuti sunt: quoniam intelligunt sibi mox esse deponendum, ut inuiti cogantur in ordinem: siue repulsam patiantur, quæ illis morte acerbior. Mitto innumerabiles, & incredibiles petitionis molestias, in qua sæpe subeundi vultus inimicorum: ignoti pro notis appellandi: supplicandum indignis, & prensandæ vel operariorum dexteræ. Quâto ignominia periculo, P. Nasica, postea Princeps Senatus, & vir optimus à populo Rom. iudicatus, satis expertus est: qui cum rustici cuiusdam manum opere duratamprehendisset, & ex eo per iocum quæsiuisset, num manibus solitus esset ambulare, leuissimo dicto, nobilissimus iuuenis ædilitate curuli excidit. Meritò igitur in libro de officiis primo exclamat M. Tullius: *Miserrima est omnino ambitio, honorumque contentio*: & ea petitionis miseria liberatus Aufonius, iure has pro Consulatu agit Imperatori Gratiano gratias: *Consulego, Imperator Auguste, munere tuo, non passus septa, neque campum: non suffragia, non panem, non loculos: qui non prensauerim manus: nec consalutantium confusus occursum, aut sua amicis nomina non reddiderim, aut aliena imposuerim: qui*
tribus

tribus non circuiui: centurias non adulau: vocatis
 classibus non intremui: nihil cum sequestre depo-
 sui: cum diribitore nihil pepigi. Romanus populus,
 Martius campus, equester ordo, rostra, onilia, Sena-
 tus, Curia, vnus omnia mihi Gratianus. Felix cer-
 tē Aufonius, qui ne petierit quidem vt Cæsa-
 ris candidatus & cōsul factus sit: Infelices alij,
 quibus cum vulgo negotium est: qui aliquid
 cum importuna multorum capitum bellua cō-
 trahunt: &, vt quocunque pacto videantur im-
 perare, multitudini imperitæ foedissimè an-
 cillantur. Quod de se apud Euripidem in Iphi-
 genia, Rex ille regum ingenuè confitetur,
 προσάτιω γὰρ τίς βίη τὸν δῆμον ἔχομεν, τῷ δ' ὄχλῳ
 δουλεύομεν. Ita de regibus loquitur, quasi po-
 pulum arbitrum vitæ, rerumque suarum nacti,
 vicissim insanæ turbæ seruiant. Inde vera vox
 illic erumpit ex eodem Agamemnone, vbi ho-
 minis & vetuli, & serui, se fortunis inuidere
 ait, beatósque eos iudicat, quibus tutam & in-
 gloriam vitam traducere liceat:

Ζηλῶ σε, γέρον, ζηλῶ δ' ἄνδρῶν

Ὅς ἀκίνδυνον βίον ἐξέπερασ'

Ἀγῶς, ἀκλεῆς. τὸς δ' ἐν πικρῇ

Ἡσσον ζηλῶ.

Multa prætereo quæ in ea fabula dicuntur in
 hanc sententiam: & quibus faciliè comproba-
 tur, ambitiosos in quolibet magistratu nihilo

meliorem conditionem esse quam vilissima Saturnaliorum tempore seruitia. Imò interdum deteriore conditione sunt, quod in domino eiusmodi nulla possit esse dignitas, quæ minus turpem reddat seruitutem: cum præsertim τοῦτο θῆσι πολυκέφαλον planè sit, ut in Axiocho scribit Xenocrates, ἀχάριζον, ἀψιχορον, ἀμὸν, βάσκαρον, ἀπαίδευτον. natura ingratum, insolentia & fastidij plenum, sæuū, inuidum, & ab omni humanitate prorsus alienum. Verum hæc ego non statui vulgum accusare, quod nullo negotio faciat minimè disertus; sed prætextata vulgi mancipia: ipsamque φιλονομίαν, & φιλαρχίαν, ut omnium malorum fontem, & ex quo emanant perniciosæ simultates, funestæ seditiones, pestifera bella, & luctuosæ rerum publicarum euerfiones. Itaque istuc, ut omnia, præclatè Aristoteles, in libro Politicorum secundo, ubi de Lacedæmoniorum rep. differit, quo Spartæ institutam à Lycurgo petitionem magistratuum vehementer improbat. Aut enim emptis suffragiis creantur indigni, quo nihil absurdius & iniquius: aut blanditis renuntiantur digni, ad quos ultro, vel recusantes deferendi sunt magistratus: neutri autem ambitione vacant, in qua nihil est sani & sinceri, cum ad omnia scelera, quæ quidē voluntate suscipiantur, homines vel honoris vel pecuniæ studio impelli

consueuerunt. Aristotelis quoque, & omnis augustioris sapientiae magister Plato, in libro septimo de Repub. grauissimè reprehendit τοὺς θιαμαχοῦντας πρὸς ἀλλήλους, καὶ τασιάζοντας περὶ τοῦ ἀρχεῖν, ὡς μεγάλῃ πρὸς ἀγαθοῦ ὄντος: eos qui de honore, vt de vmbra, stultissimè dimicant, turbasque cient, & tumultus de imperio, & principatu, vt de ingenti aliquo bono. Nec aliò pertinet, quod ex eodē Platone refert M. Tullius: similiter facere eos qui inter se contendunt vter rempublicam administret, vt si nauiæ cerrent quis eorum potissimum gubernet. C. Caesarem, summum virum, nisi transuersum nimia rapuisset gloria, M. Cato vnum aiebat ex omnibus sobrium ad rempublicam euertendam accessisse: opinor, vt id ostenderet, maximam partem; ambitione veluti temulentos, temp. capeffere: ibique cuncta ruere, & miscere, quòd tunc nullis amplius cohibeantur rationis frænis & modestiæ. Hoc nempe Circæo poculo mentes hominum valdè immutantur, &, vt ait Sallustius, *ambitio multos mortales falsos fieri subegit: aliud gerere clausum in pectore, aliud promptum in lingua: amicitias inimicitiasque non ex re, sed ex commodo aestimare: magisque vultum quàm ingenium bonum habere: sic, vt nusquam melius conueniat virbanissimi poetæ Lucillij versus:*

Pertica pictorum, veri nihil, omnia ficta.

Postquam tamen se isti Protei varias in formas fallendi causâ verterunt; non ideo iis conceditur, quod olim Atellanis, ut è scena personati exeant: sed, velint nolint, ut cæteris histrionibus, inspectante populo, persona detrahitur: & tunc, ut ait Petronius,

Vera redit facies, dissimulata perit.

Atque ut nulla virtutis & prudentiæ simulatio potest esse diuturna, quidam suo iudicio astuti & callidi,prehenduntur in magistratu non plus sapere quàm visum sit eorum apparitoribus. Quod si veteris verbi memores essent: ἀρχὴ τὸν ἀνδρα δείκνυσιν, magistratus virum ostendit,cautiùs incederent,rectâque graderentur ad laudem via: nec per amfractus & diuerticula famam quærentes, inuenirent infamiam: & dum coli, ac suspici volunt, redderentur in purpura saltantes simiæ. Dies me citiùs quàm oratio deficiat, si ambitionis mala enumerare coner, & quàm pestilens sit id vitium exemplis docere: quæ utinam pauciora essent,nec noua quotidie præberent tragœdiis argumenta, ἡ δὲ φύσις τῶν αἰτίων, προσθεῖσα τοῖς ἀγαθοῖς ἅπασιν καὶ κακοῖς συμφύτης, ut inquit eruditissimus, ac diligētissimus historicus Dionysius, in extremo libro quinto, τῆς ῥωμαϊκῆς ἀρχαιολογίας. Eius rei culpam natura sustinet,

quæ cum bonis omnibus, ut mala iussit exoriri & subolescere; sic cum gloriæ studio in animis hominum inseuit nescio quid populi otio, iuris æquabilitati libertatique inimicum. Quamquam, si verum agnoscimus, eam ipse sibi populus perniciem semper attulit, qui licet legibus plurimis, ut Calpurnia, Cornelia, Bæbia, Fabia, Petilia, Tullia deniq; ambitū coërcuerit, pecunia multarit, notarit ignominia, damnarit exilio, sua tamen nunquā voluit esse gratuita suffragia. Quo nomine disertissimus Rhetor Isocrates ciues suos obiurgat, in oratione *ᾧ ἐὶ εἰρνώης. Πλείστους πηρέμμοι νόμους, ὀλίγον αὐτῶν φρονιζόμεν,* (de iis legibus loquitur, quibus ambitus & largitio capite sanciebatur.) Permultas ferimus leges, perpaucas, siue potius, nullas observamus. mox subiicit: *τῶς τῷ ποφαιρώτατα ποιούνας τῶ ἐλπίδης χειρολογούμεν,* eos qui luce palam id faciunt, qui præsentī pecunia, aridōque argento, nostra suffragia in comitiis nundinantur; duces & imperatores deligimus. Plautinus etiam Stasimus, in Trinummo idem queritur:

Nunc mores nihil faciunt quod licet, nisi quod lubet.

Ambitio iam more sancta est, liberāque à legibus.

Petere honorem pro flagitio, more fit:

Strenuos praterire more fit.

Mores iam perduxerunt leges in potestatem suam.

His accedat quod in Attici vita scribit Cornelius Nepos, ut obiter maculam quæ illis insedit, & inueterauit, deleam: *Honores*, inquit, *non petijt*, cum ei paterent propter vel gratiam, vel dignitatem: quod neque peti more maiorum, neque capi possent conseruatis legibus; in tam effusis ambitus largitionibus; neque geri sine periculo, corruptis ciuitatis moribus. In quibus verbis emendaui, *geri pro rei*, quod mendosè legitur, & mendosius reip. coniecturamque meam adiuuat ordo verborum & sententiae *peti, capi, geri*. Quorsum, inquires, ista de ambitione propemodum ambitiosa disputatio? ne quis fortè miretur ambitionis præcepta, tam accuratè à Q. Cicerone conscripta: quia si quid in eo vitij, id totum morum ac temporum fuit: quibus nonnihil indulgendum & seruiendum esse, ne philosophi quidem negant. Fuerint hæc, dicat aliquis M. Tullio, ut candidato, perutilia: quid inde tandem ad nos, & ad studia iuuentutis, peruenturum est commodi, iam intermortua, & penè sepulta eiusmodi honorum petitione? aut quid attinuit relictis tot præstantium auctorum libris, hunc potissi-

num in manus sumere? Mihi non deerit quid respondeam; nec vereor ne arguar mendacij: nullum videlicet in lingua Latina librum esse, qui ad historiæ Romanæ, Ciceronisque, ac Liuij cognitionem plus adferat adiumenti: quoniam absque eo esset, multa quæ ad veterem comitiorum rationem pertinent nesciremus: atque horum ignoratione sæpe cogermur in turpissimis erroribus versari. Pendebat enim è comitiis amplitudo ciuitatis & omnis populi Romani maiestas. Siquidem iubere aut vetare leges: pacem bellumve decernere: societates & foedera cum Regibus & populis contrahere vel dissoluere: honores & imperia mandare: statuere de capite ciuis: non nisi comitiis licebat. Quæ si maxima fuisse, vt fuerunt, concedimus: eorūque frequentissimam esse in libris mentionem: simul fateamur oportet, rerum Romanarum scriptoribus intelligendis plurimum prodesse Q. Tullij commentarium. Sed ille vel solo fratris nomine vobis notus commendatusque esse debet. Quare finem faciam, si quam breuissimè vitam eius morēsque perstrinxero. Q. Cicero Marco fuit natu minor: ita facili & procliu ad poëticam ingenio, vt quatuor tragœdias diebus sedecim absoluerit. Pomponiam Attici sororem duxit uxorem: ex qua filium Quintum sustulit, nec patre, nec

patruo dignum. Habitauit in ædibus paternis quibus ei cesserat frater, vt amicorum clientiumque causa migraret in palatium. In Gallia legatus C. Cæsari, fortem fidelēque Imperatori, operam nauauit, semel atq; iterum in hybernis innumerabilibus hostium copiis circumfessus. Legatus postea M. Fratri proconsuli fuit in Cilicia. Præturam adeptus, intra eum honorem stetit; & ex prætura Asiā nactus prouinciam, ei parum secunda fama & existimatione præfuit. Breuiore statuta eum fuisse declarat fratris iocus; qui cū in Asia clypeatam eius imaginem, ingentibus lineamentis, vsque ad pectus, ex more pictam conspexisset, Frater, inquit, meus dimidius, maior est quā totus. Iracundiæ libertisq; suis nimium indulgit, quamuis mollissimus ad depouendam offensionem. Valdè laudandus ob insignem in restituendo fratre pietatem, nisi magis vituperandus esset, quod sic auerso & alieno in eundem animo fuerit aliquando, vt compulerit ardentem dolore, hanc adtexere clausulam epistolæ nonæ libri vndecimi ad Atticum: *Hac ad te die natali meo scripsi: quo vitinam susceptus non essem, aut ne quid ex eadem matre postea natum esset.* Interfectus est à conquisitoribus proscriptorum, pauld post indignissimam fratris cædem: nec diu scelus impu-

ne tulit Philologus, à quo proditus dicitur, quia mox venit in potestatem vxoris Pomponiæ, quæ inuitatis audituque formidolosus exemplis excruciatum necauit: hæc ex Ciceronis epistolis, C. Cæsaris commentariis, Plutarcho in Cicerone, Macrobio Saturnalibus, Suetonio in Augusto, excerpere satis habui, & indicare; vnde plura, qui volet, petat. Cætera suis locis commodiùs persequemur.

IOAN. PASSERATII ARGV-
mentum & Epitoma commentarij 2.
Tully, De petitione Consulatus.

Breviculum exordium: quo se non fratris docendi, sed amoris causâ istuc ait scripsisse.

Tria fratri considerata proponit: Quis sit; Quid petat; Ciuitas quæ sit, ubi petat: Nouus sum; Consulatum peto; Roma est.



NOVITATEM nominis dicendi gloriâ subleuandam esse. Inde copiam amicorum & gratiam adfuturam, subsidiâque ipsi præsto esse maiora quàm competitoribus, Antonio præsertim & Catilinæ, quorum mores vitâque reprehendit, &

docet omnibus vel contemptos vel inuifos.

Magnitudo petitionis hinc æstimanda, quòd summum locum ciuitatis petit: quòd inuidebunt Cõsulares eũ illi honorẽ; & nati familiis Consularibus, nec eum adepti: & prætorij pariter: quòd multi inuidi in populo: quòd irati multi ob caussas contrà se actas. Aduersus ea contraria illi studia, incumbendum in summam rationem, curam & diligentiam petitionis, quæ petitio diuiditur, in

Amicorum studia, & popularem rationem, siue voluntatem.

Amicorum nomen in petitione latissimè patet. Amici enim vocantur qui quocúmque modo nobis fauent; sed quidam ex honestiore causa nobis amici sunt, vt cognitionis, affinitatis, necessitudinis. In amicis sunt sodales, tribules, vicini, clientes, liberti, serui denique nostri. Accedant illustres homines, ad speciem, concilientur magistratus, qui comitiis præsunt: & ij qui conficiunt, vel tribuunt centurias.

Amici eiusmodi, & studiosi suffragatores, tribus modis parantur:

Beneficio: si quid tibi debebunt, vt tunc referant gratiam, orandi:

Spe: si quid à te commodi expectabunt: quod genus multò esse solet officiosius, & diligentius:

Beneuolentia; id est studio voluntario, & gratuita propensione voluntatis.

In iis considerandum, quid, quantum quisque nostra causa vellet, & possit, ne frustra in iis præsidium statuamus, qui vel nolint, vel non possint. Adiungendi denique omnes Senatores, equites, plebei, urbani, rustici, municipia, colonie, præfecturæ, iuvenes & adolescentes: tota postremo Italia.

Ab amicis eiusmodi postulatur, ut saluent, ut deducant, ut affectentur. Inde tria genera officia præstantium candidato:

Salutatorum: qui domum manè veniunt salutatum, & quorum minimum est officium, retinendi tamen, ad speciem:

Deductorum: quorum maius officium, & illustrius; à quibus certis temporibus in campum deducitur candidatus.

Affectatorum: qui partim voluntarii, partim obligati: illi rogandi, hi flagitandi: eorumque magna conficienda frequentia:

Constitutis amicis; discernendi firmi à fucosis & simulatis: notandaque

Obrectatorum & aduersariorum tria genera:

Vnum, eorum quos læsisti, cum contra eos diceres, quomodo leniendi.

Alterum, eorum qui sine causa non amant:

qui de illa prauitate animi deducendi sunt.

Tertium, eorum qui competitorum amici sunt, iis inferuendum eadem ratione & oratione qua superioribus duobus.

Sequitur popularis voluntas, siue popularis ratio. Nam suprà, petitio diuisa est in amicorum studia, & popularem rationem: ea desiderat

Nomenclationem: vt nomine quémque appellando nosse eum videaris.

Blanditiam: non illam quæ detēriorem alium assentando facit, sed quæ reddit amiciorem: éstque petitori pernecessaria.

Affiduitatem: vt nusquam absis: habitēs in oculis ciuium: premas forum: appelles sæpe obuios.

Benignitatem (id est liberalitatem) in conuiujs celebrandis passim, & tributim: atque etiam in operâ præbenda: vt aditus diurni ac nocturni ad candidatum pateant: vt etiam, vultus ac frons, quæ est animi ianua: & comis sit oratio, benignè pollicendo, vel bellè negando. Interdum enim durior est eius oratio qui recipit, quàm eius qui iucundè negat se facturum: sũntque qui malint nos sibi mentiri, quàm præcisè negare. Plures quoque reperiuntur qui rogāt vt liceat vti alterius opera, quàm qui vtantur.

Rumorem: vt bona de nobis, nostrâque petitione & suffragatorum amicorûque frequentia fama spargatur; & à nobis optimum & potentissimum quémque stare.

Spem in rep. vt spes bona sit, & honesta de nobis opinio apud omnes ordines. Senatus existimet defensorem auctoritatis suæ: Equester ordo studiosum otij: plebs, non alienum à suis commodis.

Reliqua est pars tertia primæ & summæ diuisionis: *Nouus sum: Consulatum peto:*

Roma est, Ciuitas scilicet ex nationum conuentu, vbi insidiæ, fallacia, superbia, inuidia; quæ omnia effugere perdifficile est: eloquentia tamen & patrocínio multorum tollitur aut minuetur offensio.

Largitionis postrema est mentio, cui iam afflueuit ciuitas, & qua præcipuè populus capitur: integritate tamen certandum erit; & terrore iudicij ambitus coercendi competitores, ita vt metu acerrimi oratoris aut largitio nulla à competitoribus fiat, aut nihil valeat.

Peroratiuncula breuissima, & simillima exordioli.



IOAN. PASSERATII PRO-
legomena in Ciceronis Topica.



RATIONEM & operam in re
minimè necessaria fortasse abu-
tvidebor, auditores, si, cùm ar-
tè dicendi profitear, eius artis
ab optimo magistro tradita
præcepta, quæ ignorance exemplorum ha-
bentur obscuriora, illustrare statuerim. Solet
enim qui spontè ad aliquod se opus accingit,
quibus de causis id faciat commemorare, non
qui religione officij adstrictus suo munere per-
fungitur. Mihi tamen aut meum vobis expo-
nendū erat consilium, aut in apertam existima-
tionis dimicationem descendendū: quoniam
anceps ex silentio periculum imminebat, ne
in leuitatis crimen incurrerem, néve ambitio-
sæ ostentationis suspicio gravè mihi concita-
ret offensionē apud eos qui ex sua natura cæ-
teros fingunt, nec quemquam alienū esse pu-
tant ab illa culpa cui affines ipsi reperiuntur.
Leuitatis autē opinio ideo mihi perterritimen-
da est, quòd promissa suscepta que omnium Plau-
ti fabularū explicatione, ac tribus tantum ab-
solutis, Amphitruone, A sinaria, & Aulularia,

desultoris in modū ex fesso in recentē equum
subinde transultantis, à Plauto ad Ciceronem
me repentē conuerterim. Vereor, inquā, ne id
in reprehensionem cadat, & à me temerē facta
iudicetur voluntatis cōmutatio. Huic occur-
rendum est, & aspersa falso macula, priusquā
infi deat atque inueteret, penitus eluēda. Haud
sum equidem oblitus quid promiserim, nec
me, aut sponsores meum, appellari sinam; quisi,
ut bona nomina consueuerint, nulla præstituta
die, vltiō fidem meam liberabo. Nam ita
me Plautina delectant, ut, cū à Cicerone dis-
cessero, nescio sit quem Plauto anteponam, &
in quo ex aliqua ægritudine ac molestia libenti-
tius conquiescam. Tantus hominis in iocān-
do lepos, tam crebri sales ac facetiæ, tanta est
antiqui incorruptique sermonis urbanitas: cu-
ius me perstudiosum esse non inficior. Sicut
enim in antiquis moribus plus fuisse probi-
tatis nobis persuademus, sic in antiquo ser-
mone plus inesse & veritatis & suauitatis,
cique tamquam vino generoso, ac notæ Opi-
mianæ, magnam accedere ex vetustate com-
mendationem. Verū mihi concedi postu-
lo, ut alterna Plauti & Ciceronis interprefa-
tione fessum animum reficiam; & ea varietate
leuem, velut ortum ex cibi eiusdem assi-
duitate nimia languentis stomachi, fastidium.

Nullus tam suavis sonus, neque tam iucundus color, qui perpetuò placere possit, & in quem semper intenta sensus nostri acies tandem non obtundatur: rectèque monent qui præcipiunt vitandam esse similitudinem, quæ sit mater satietatis. Si quis verò docendi regio munere, & hoc suggesto indigna esse contendit Ciceronis Topica, quorum prælectione omnia ferè gymnasia personant, & se à nobis ait, expectasse grauiora; næ ille nos conditione durissima esse iubet, cùm iis prohibet quæ sunt communia: nec solùm in ordinem, verum etiam in angustissimum compellit locum, si aliis locum, si aliis permittit vt partes faciant, & quam optarint capiant, nos vetat quicquam sumere nisi quod illi contempserint ac reliquerint? Tam insignem fieri nobis non patiemur iniuriam, & ab iniquo tribunali, ad æquiores confugiemus Prætorem, cuius ea sit cognitio, quique de consilij sententia pronuntiet: Videri in alienam possessionem non irruisse, quorum prouincia non Plauti Ciceronisque terminis circumscripta sit, sed longè latèque patentibus humanitatis finibus contineatur, per quos liberè possimus nostro iure spatari. Nemo igitur qui calumniæ ignominiam effugere volet, nos in leuitatis crimen vocabit, in quibus ne tenuissima quidem hæret inconstantiae suspicio.

suspicio. Depellenda nunc est ostentationis venditationisque infamia, nec est committendum ut me quis arbitretur inanis gloriolæ cupiditate iuventutis studio velificantem populari aura huc prouectum esse, quò maiore auditorum numero hæc subsellia celebrentur. Errat qui id credit, & me ignorat profectò. Fateor enim ingenuè (absit verbo inuidia) me & ingenio meo, & instituta vitæ ratione, non ita multis iudicibus contentum esse, & eorum opinione nihil commoueri qui doctoris eruditionem discipulorum frequentia metiuntur. Non est sanè, non est æquus, nec Ædilitius iste modus; cuiusque rei locupletissimum testem vel è media scena produxero, qui paucis, hoc est bonis, non plurimis, probari cupit; quia fieri non posse videt ut quis utrisque simul probetur, cum grauissimus auctor Theognis, hoc ipsi etiam Ioui negatum esse memoriæ prodiderit:

Α' τοῖσιν δ' οὐ πω πᾶσιν ἀδεῖν δυνάμει.

Οὐδὲν θαυμαστόν, Πολυπαίδει. οὐδὲ γὰρ ὁ Ζεὺς

Οὐ γ' ὕων πάντας ἀνδράς, οὐ γ' ἀνέχων.

Beati sibi videantur, & hac felicitate diutissimè fruantur, ad quos fit plebeculæ concursus, per me licet: laureolam ego in isto non quæram mustaceo. Magnum enim eorum cogere numerum qui nihil cogitatione faciunt, & cœ-

co impetu ad sui similes rapiuntur, scio tam esse in proclui quàm agnorum gregem, quò velit, ducere facile est verueci sectario. Doctus vir, & cordatus, frequentiam, si adsit, non aspernabitur; si absit, magnoperè non requirer. Nisi fortè ad alterius famam, quicquid increpuerit, gregatim conuolantes quasi mortuos lugeat, cùm nihil intersit vtrum quis è *vitami-grasse*, an *ad plures abiisse* dicatur; quemadmodum prisci loquebantur Latini, atque adeò Græci, qui idem sentiebant. Istuc clarissimi philosophi auctoritate cõfirmauero, qui Stoicorum porticum fulcit, & Zenonis valdè nobilitat familiam. Ac ne vox eius versa barbarè de venustate sua plurimum amittat, ita proferam vt à diligentissimo scriptore literis mandata est. Οἰειδισθὲς ὑπὸ πινὸς ὅτι οὐχὶ ὠρεῖται Αἰείτωνι μετὰ πολλῶν σχολάζει. Εἰ τοῖς πολλοῖς, εἴπε, ὡρεσέῃχον, οὐκ ἂν ἐφιλοσόφησα. Præclare hoc, vt cætera, Chrysippus, qui doctore vtinoluit Aristone, eo maximè argumento quòd multos haberet auditores, id est, vt interpretabatur, imperitos, & inter quos nullus esset philosophandi locus. Quo dicto nescias turbàmne auditorum an Aristonem ipsum acriùs perstrinxerit. Cogitanti præterea quantum multitudini tribuendum sit, Menandri mihi venit in mentem, qui arte & doctrina Philemone longè præstantior,

sæpiùs tamẽ ab eo superatus est, ita turpi stultitiae
que populi iudicio, vt ridere qui vincebatur, &
qui vincebat cogere tur erubescere. Quò perti-
net & illud acutè dictum à magistro discipulũ
obiurgante cui vulgus impẽsiùs fauebat, Infelix!
nisi quid à te perperã & ineptè fieret, isti haud-
quaquã tibi plauderent. Censoris personam, &
tristis alicuius patruì non sustinebo: prodibit,
& eas partes suscipiet Petronius, cognomento
Arbiter, cui effusa Satyræ licentia potestatem
dedit liberiùs loquẽdi: *Sicut adulatores, inquit,
cũ cœnas diuitum captant, nihil priùs excogitãt
quàm quod gratissimũ auribus fore opinãtur: (ne-
que enim aliter impetrabũt quod petũt, nisi quasdã
insidias auribus fecerint:)* Sic eloquẽtia magister,
nisi tanquã piscator eam hamis escam imposuerit
quam sciat appetituros esse pisciculos, sine spe prædæ
moratur in scopulo. In hũc præposterũ morẽ in-
uectus, statim declarat quæ messis eã semẽtem
consequatur. *Adolescentulos in scholis existimo
stultissimos fieri: quia nihil ex iis quæ in usu ha-
bentur aut audiunt, aut vident, & cũ in forum
venerint, putant se in alium terrarum orbem esse
delatos. Ac paulò post: Qui inter hac nutriun-
tur, non magis sapere possunt quàm bene olere qui
in culina habitant. Plura in eam sententiam
Petronius; quæ nolo commemorare, ne multi*

non libenter audiant. Atqui ceriè si verum agnoscere volumus, nec nos nimium amamus, cū ab utrīsq; multa peccantur, tum istuc in primis, & meritò, reprehensum est, quòd discipuli sinistra interdum accipiunt quæ à doctōribus dextra porriguntur. Doctores verò non mediocri laborant invidia, quòd non satis habent nugatoriis imbuisse præceptis quos erudiēdos conduxerunt, nisi ieiunis concertationibus, frigidis quæstiunculis, absonòque clamore miseros exerceant, & in eos disputationū laqueos induant vnde nequeant expedire: ex quo effectum est vt rabularum plena sint omnia, causidici multi, disertipauci, oratoris nullum amplius extet vestigium. Quanta porrò quòtque in scholas inuexerunt in commoda; qui sublato librorum delectu, ea quæ vix, ac ne vix quidem didicerunt, docere non verentur, & ad hæc Pindari verba obsurduerunt? τὸ διδάσκαλον δὲ τοι εἰδὼ πρᾶϊτερον: ἀγνοῶν δὲ τὸ μὴ πρῶμα εἶναι.

O miram hominum impudentiam! & quibus os est adeo durum vt vel pugiles esse possint! Ecquem enim pudet (verbi gratia) quamuis rudem in vadimoniorum sponsonūque formulis, ad exponendam P. Quintij controuersiam accedere? Ecquis, licet plumbeus in Prætorum interdictis, A. Cæcinæ pertractare causam reformidat? Nónne ad Corn. Balbi

defensionem vtrò accurrunt qui in iure ciuitatis Romanæ peregrinantur? Ipsa denique Topica, quæ Tullius noster, nec imperitus iuris, & ad iuris peritissimum scripsit, commentariorum, ceu conuitorum plaustris, ij potissimum onerarunt, qui ius ciuile nulla ex parte attigerunt: non dico merum illud Romanum & decemuirale, sed istuc peruagatum quod excerptit, siue potius concerpsit Tribonianus. Quare non est mirum si in tantis tenebris tam multa turbant, & qui duces illos sequuntur in magnis versantur erroribus. Redeant aliquando in viam, ducemque sibi sumant in omni genere doctrinæ numeris omnibus absolutum (Aristotelem opinor facile intelligitis) qui vt eloquentiæ & iurisprudentiæ cognitionem ostendat, eloquentiæ originem repetit, non à Corace nescio quo & Tisia, iudiciorum ac fori ignaris homunculis, sed vsque ab Empedocle, qui Græcis iura legesque descripsisse traditur. Nempe consentaneum erat vt postquam Agrigentinus ille docuisset quomodo excolenda esset ratio, doceret quo pacto expolienda esset rationis interpret oratio: ne hirundinum more quicquid in buccam veniret garriramus, & ne in sermonis mentisque coniunctione aliquod oriretur linguæ cordisque dissidium. Idcirco sapientiæ gloriâ

quondam florentissimi Ægyptij sacerdotes, qui sculptis quibusdam notis atque simulacris, non literis, rerum notiones exprimebant, ut copulatam esse vim orationis ac iustitiæ significarent, utrâque vna oculi figura effinxerunt. Siquidem oculus velut tacitus mentis est sermo, unde ab elegantissimo poëta vocantur *oculi loquaces*, & δίκης ὀφθαλμος Diphilo, ὁμμα δίκης Orpheo nominantur, vel quod omnia quæ in terris sunt oculo iustitiæ perlustrantur, vel quod ante quàm loquamur accuratissimè perspicendum est ne quid eorum quæ dicturi simus æquitati & honestati repugnet. Alioqui in circulis inania verba fundentes, nullâque subiecta sententiâ quilibet blaterantes, omnium irrisione ludamur necesse est. Et qui rem æstimabit seueriùs, portentum esse dicet maioribus hostiis, & supplicatione ad omnia puluinaria procurandum, ut apud veteres ex haruspicum responsis, Etruscâque disciplina, fieri consuevit, cum pecudes loquutas esse nuntiabatur. Qui leniùs ac remissiùs aget, id contorquebit quod Lacon quidam in lusciniam à se captam, cum reuulsis plumis perexile corpusculum contempleretur: auem ego te esse arbitrabar, at tu nihil eras præter vocem. Pulchrè etiam conueniet id quod alius

Lacon, in illa quinquennali celebritate ludorū græciæ cursoribus obiecit: fustuario quàm corona digniores esse, qui celeritati plurimum, minimum studerent æquitati. Hos colligunt laborum suorum fructus, hæc stulticiæ suæ præmia ferunt, qui relictæ vera germanaque eloquentia, eam consecretantur quam venu-
stissimè conficito vocabulo Nouius *Tolutilo-
quentiam* appellauit. Sed hunc locum non
vrgebo diutius, ut in pauca conferam quæ
de Topicis dicenda restant. Breuitas enim
in oratione non bona, laudis aliquid habet,
& eò facilius concoquitur molestia, quò ci-
uius deuoratur. Multorum quidem manibus
is Ciceronis liber teritur, nonnulla tamen
insunt quæ fallant non admodum perspicac-
es, latetque ut in picturarum umbris quid-
dam reconditum quod prima specie non
animaduertant: ubi propius intuentes dispe-
xerint, artificis eximiam solertiam admiren-
tur; & omnia, non tam ad Aristophanis lu-
cernam, ut ait Varro, quàm ad Cleanthis,
elucubrata esse fateantur. Quid ergo est? An
inter tot interpretes vnus repertus sum Lyn-
ceus, cuius mentis aciem nihil fugiat? Tantum
nec mihi fumo, nec aliis tribuo: sed cùm co-
gitatione præceperim quàm difficile sit mu-
nus istuc & pensum absoluere, quò minus in-

genio possum, subsidio mihi diligentiam cō-
parauī. Neque sanē spem nostrā infringet per-
ficiūdi difficultas: immò experiūdi voluntas,
& adolescentium commodis inseruiendi, exa-
cuet industriam, nec in medio cursu concitati
animi alacritatem patietur elanguescere. Sub-
latum igitur onus, quod nec abiicere sine flagi-
tio, nec deponere sine turpitudine licet, per-
ferre pro mearum virium modulo enitar, mo-
dò aliquantulum vestra audiendi iudicandī-
que benignitate subleuetis. Nihil de me spon-
debo prolixius, ne mihi vsuueniat quòd
multis accidit, qui malè inita subductaque
facultatum suarum ratiuncula, vix mediocria
præstare possunt, cū ingentia facilè polli-
centur.

IOAN. PASSERATII PRÆFA-
tiuncula in disputationem de Ridiculis,
qua est apud Ciceronem in lib. ij.
de Oratore.



STENTVM ingens Neronis princi-
patu factum narratur, cū in agro
Marrucino, Vectij Marcelli vniuersū
oliuetū viam publicam trāsgressum

est: & contrà, è vestigio, in locum oliueti, arua successerunt. Magis verò stupendum apud nos, superiore lustro, prodigium accidit, cum Hispania migravit in Galliam: & in media Parisiorum ciuitate superbe inambulanti Celtiberiam adspeximus. Tum quidem primum, fateor, non absurdam iudicaui Cleanthis & Iceræ opinionem, supera stare omnia, solam in mundo terram moueri. Huc accedebat quòd pleræque huius regni oppida, sæuissimis agitata seditionum procellis, & suis penè conuulsa sedibus, Symplegadam instar, inter se concurrebant: populique velut oestro perciti, in mutuam præcipientes ferebantur perniciem. Itaque, in eà rerum perturbatione ac vertigine, non potui inducere animum, stare terram: aut audiendum esse Plinium, qui negat Galliam quati terræ motu. Facio inuitus vt recorder ciuium insanias, quas præstaret obliuione sempiterna obruere: sed neque ciuium numero habendi sunt Catilinæ, & Cethegi: neque facile est eam, quæ altè insedit, doloris iniuriæque memoriam citò deponere. Quid enim isti sceleris & amentiae prætermiserunt? In Regem suum, & optimè de se meritum, perfidiosè coniurarunt: concitata per vim multitudine, regiâ suâ, soliòque auito, quantum in ipsis fuit, immanissimè detur-

barunt: coacto latronum exercitu, audacissime oppugnarunt, ijs ducibus in quos peruagatus ille versus optimè conuenit:

Εν δὲ διχρασίῃ κάνδροκλείδης πολεμαρχεῖ.

Actandem per cucullatum licarium, emissarium suæ factionis, nefariè trucidarunt: carcerem in Senatum, Senatum in carcerem effuderunt: priuata publicis, iniis summa miscuerunt: cunctaque diuina & humana iura violarunt. Præterea hominum forma indutæ (horresco referens!) in ædibus sacris, ad homines verè sacros, concionatæ sunt Furia, & ad arma, cædes, incendia, ruinas, dirptiones urbium, populationes agrorum, regionum vastitates, perditissimum quémque impulerunt. Ventum ad supremum erat: & iam infelici patriæ acerbum funus ducebatur; iam ad rogam, cui ciuilis flammæ subijciebantur faces, mœsti atratiquè liberi parètem prosequeremur; cùm exortus HENRICVS IV. vt alter Asclepiades, salutarem ei dexteram medicinamque porrexit, & ab Orci faucibus ad vitam lucemque reuocauit. Hic nos patriæ, nobisque patriam restituit, si non rectissime valentem & incolumem, spirantem certè, & melius in dies sperantem. Hic nobis lugubria detraxit, mœrorem lacrymasque absterfit, & communis incendij restinxit ignes.

Hic à iugulis nostris pàricidarum gladios, & à ceruicibus grauissimum externæ seruitutis iugum depulit. Absque illò esset, victrix gentium Gallia ijs indignissimè pareret, quibus imperare consueuerat, &

*Impius hæc tam culta nò qualia miles haberet,
Barbarus hæc segetes. ---*

Pro quibus meritis, quas tibi laudes gratèque persoluemus? quæ vindici nostræ salutis & libertatis præmia rependemus.

*O quæ sol habitabiles
Illustrat oras, maxime Principum?
Quo nihil maius meliùsue terris
Fata donauere, bonique diui:
Nec dabunt, quamuis redeant in aurum
Tempora priscum.*

Quo sego versus hoc libètiùs vsurpo, quòd eos non tam de Augusto fuisse, quàm de HENRICO quarto, multis antè sæculis, Camœnarū & Apollinis instinctu, cecinisse videtur Horatius. Difficilis, & lubricus admodū locus, cui nūc insisto: necdū planè constitui, utrū tātus mihi rex silendus, an dicendus fuerit. Silere de tot eius benefactis, ingrati animi crimē esset, quo nullū turpius, magisq; fugiendum: de laudum eius, rerūmq; gestarū magnitudine velle dicere, ingenij esset nimium confidentis: atque huc trāsferri possit, quod super Æneïde sua scripsit ad

Augustum Virgilius : Nemo ad hoc opus aggre-
diatur , qui non laborare mentis vitio exi-
stimetur. Frustra erit , & ludet operam profe-
cto quisquis cū tā insigni argumēto paria face-
re volet , in quo expoliēdo pro dignitate ipsi de-
esset vis & facultas Demostheni , & Ciceroni
suum eloquentiæ flumen exaresceret. Alexan-
dram istum vni Lysippo fingere , vnique Apelli
pingere conceditur : deterioris notæ artifi-
bus fas non est eum suo cælo vel penicillo
committere. Viri prudentis est id duntaxat
oneris tollere quod sustinere & perferre queat ;
ac Timanthem imitari , vt quod dicendo con-
sequi non possit , tectum inuolutumque taci-
turnitatis & silentij velo relinquat. Quam-
obrem mihi satis est Regiam maiestatem ,
tanquam aliquod numinis simulacrum , de
via , autā fani limine venerari ; & libare tan-
tū , non etiam sacrificare Genio Principis ,
præsertim cū aliò me vocet officij mei ratio.
Proxima inuictissimo Regi , & longo tamen in-
teruallo proxima , salutanda est Academia ,
eorum more qui redeunt peregri , vel in bello
capti , & postliminio reuersi , saluere iuebant
terram patriam , deos penates , cognatos ,
propinquos , & quicquid ijs erat carissimum.
Adsumus quidē corpore , coacti tempori-
bus & necessitudine penè fatali constricti : sed

procul abfuimus animo, vóxque nostra obmutuit, quandiu hanc hostes, partim à suis desertam, partim proditam occuparunt, & è sacra profanam multis modis reddiderunt. Lustranda igitur & expianda nunc Academia, Musisque iterum dedicanda, diligenti cautione adhibita, ne amplius earum templa & ceremoniæ contaminentur. Id vt rectè fiat atque ordine, abigendæ sunt imprimis obscenæ volucres, quæ rapinis cōtactúque omnia fœdāt immundo:

*Decolor est illis vultus, teterrima ventris
Proluuiæ, uncaque manus, & pallida semper
Ora fame.*

Non agnoscitis volucres: agnoscite sine plumis bipedes,

Curua quibus pullam subneētit fibula vestem.
Has Harpyas nisi Senatus & amplissimi ornatissimique viri, quibus Academia, scholæque Regiæ instaurandæ tradita est prouincia, fugarint & exterminarint, vt pinnati Aquilonis filij in fabulis, frustra littoralibus dijs vora nuncupabimus: rursus ad eos scopulos, ad quos nuper est fermè adflucta, nauis nostra referetur. Nequicquam in excolendo Musarum fundo sudabimus: nequicquam lolium, lappas, & tribulos extirpabimus, nisi ex agro nostro hæc filix radicitus euellitur. Meminisse debe-

emus quónam pacto profugi homines, nec minùs vagi quàm Scythæ, noua gratuitæ doctrinæ professione vulgò commendati, huc irreperint, ἀέκκῃ in Academiæ parte confederint: quibus artibus, inhiantes locupletum fortunis, diuites orbos, vel cœlibes, deliros senes, supersticiosas mulierculas, & adolescentulos imperitos deceperint; & velut Circæo poculo, repentè immutarint: vt religionis specie, quam inexplibili auaritiæ suisque fraudibus obtendunt, equum Troianum paulatim introduxerint: vt semper in insidijs manserint, & in speculis steterint, proditiõis occasionem expectantes: vt ea oblata, machinam suam continuò aperuerint, armatisque hostibus hanc urbem, & totam Galliam omnigenere calamitatis replerint. Ne verò insidias & paratam pestem caueremus, nève impendentia prospicientibus ac prædicentibus cordatis viris crederemus, obstiterunt Chorcebi quidam atque Vcalegontes, qui plures in Illo nostro quàm Laocoontes fuerunt. Et hos adhuc habemus in sinu Sino-

*Quid hos, malum, fouemus? aut quid hi sciunt,
Nisi vncta deuorare patrimonia?*

At gratis docent: muta literulam, rem acut

tetigeris, *Gratis nocent* : eoque maſtandi
maiore infortunio, quodd gratuitò ſunt
mali : quanquam vix iſtuc ſibi perſuade-
bit qui eos benenouerit. Teſtes hone-
ſtiſſimæ ampliffimæque familiæ, quarum ſan-
guinem pro leui docendi opella, & exiguo
Mineruali, iſtæ hiruſines exorbuerunt. Teſtis
immanis eorum cenſus, qui cum Regum ac
ſummorum Põtificum opibus certat. Præclara
liberalitas, repudiare drachmam, vt talentum
extorqueas ! Mirum genº benignitatis, pro ſti-
pe menſtrua, immenſæ pecuniæ legata, opi-
mâſque captare & rapere hæreditates ! Inſtitu-
tio puerorum his aucupibus eſt illix. Pendebũt
pulchrè qui ab ea tranſenna turdi lubricum pe-
tent. Gratuita doctrina illis eſt pro hamo, vel
potiùs pro reti-iaculo, quo callidi piſcatores
cunãta conuerſunt cum puluiſculo. Stolidi pa-
rentes, qui ſuos ijs credunt liberos, eadem ope-
ra columbas accipitribus, pullos miluijs &
oues committent lupis. Sed quid tandem iſti,
per aureum funem de cælo delapſi magiſtri,
diſcipulis ſuis tradunt ? nihil ſapere, niſi ritus
Hiſpanos, odiũ legũ inſtitutique patrij, & vt
priſcis vtar verbis, imbelliã, imbalnitiem, im-
politiã, imparientiã, merãmque cum Lauernæ
ſacris barbariẽ : quam conſultò huc inuexerũt
opinor, vt eam ſoli docerent. Interim deli-

tescunt in vepretis nostris nitedulæ, quæ rem
 ciuium arrodunt: nobiscum impunè versan-
 tur speculatores & exploratores Philippi, &
 eius tyrannidis acerrimi satellites. Atqui dis-
 cuntur apud eos boni pudicique mores. Sanè
 tristes cùm aspicias, frugi censeas: nec tamen
 si fibulam gestant, sunt Hyppolyti; nec si bo-
 nos auctores euirant, ideo bonis placent; Gal-
 lis præsertim, quibus natura sunt inuisi De-
 liaci. Magna laus est scilicet, ac palmarium
 facinus, ex hirco caprum, ex ariete verue-
 cem, ac ex verre maiorem facere. Atque uti-
 nam fabri patribus eorum, qua parte opus
 fuit, perpetuam imposuissent fibulam: recta
 hîc non deprauarent ingenia, dum curua
 corrigere videntur, nec Κρήνης ἀεὶ Ψεύσαι,
 κατὰ γνώμην, suos edocerent artem mentien-
 di, & dolos, quos appellant industrios. Quid
 autem aliud præciperet vulpeculæ, si scholam
 aperirent? Sic amant verum hi Chamæleontes,
 polypi, ac stelliones. Huiusmodi doctrinam,
 & hos mores, non illis non inuidemus sibi ha-
 beant, abeantque simul cum strigibus ὠκυπό-
 ρους ὄντι νῆας: & illuc reuertantur vnde malum
 pedem huc attulerunt. Iam pridem vasa col-
 legerunt, profectionis signum datur: quid mo-
 rantur amplius? Academia nostra certè, quæ
 lōgum periculosumq; morbū eorū cōtagione
 contraxit,

contraxit, nisi hoc leuetur vomitu, vix vnquā conualescet. Reliquum est vt de suscepti muneris ratione pauca differam: & cur potissimum ad disputationem *de Ridiculis* illustrandam aggrediar, breuiter exponam. Principiò in vrbe, inuictissimi regis virtute ac felicitate, modò libera, liberè hoc eloquar: simul atque tutò mihi ridere licuit, ridere libuit. Quid facerem? inquit Arpinas Attico, *plorando fessus eram*. Vescantur betis fatui: viuant insulsi quibus displicent sales: Ruri degant ætatem inter rastros & sarcula: inter rubos sentésque, stolones ipsi, ac frutices, consenescant, quos non delectat vrbánitas. Si quis flere quàm ridere mauult, per me licet: solas cæpas prandeat, solum cœnet sinapi, solumque fumum bibat: & ad tam bellum conuiuium bellos homunculos, amicos nostros, illos dico fibulatos, quotidie inuitet: similes habebunt labra lactucas. Cùm nobis risum vt peculiarem natura dederit, humanum, & naturæ consentaneum putamus, ridere potius quàm ringi, quod canum est & asellorum. Risus autem non solum honesta & liberalis, sed etiam sacra res est. Vt enim Vitulinæ & Lubentiæ, Lætitiæ præsidibus, Romani diuinos honores decreuerunt: sic Risum in deos retulerunt Græci, diémque festum instituerunt, & an-

nuos ludos cum solemnibus sacris ei deo fecerunt: præcipue Theffali, & ex ijs Hypatenfes, qui veneratione cultûque γέλως θεοῦ valde celebres & insignes extiterunt. Lycurgus quoque, feueriffimæ ac rigidiffimæ auctor disciplinæ, Rîfus marmoreum fimulacrum Spartæ in delubro pofuit, fanxitque vt ciues fui, militiæ laboribus perfuncti, ei deo religiofè supplicarent. Nempe fapientiffimus legiflator æquum putauit & vtile, ficut corpora quiete refici, ita & mentes hilaritate recreari. Quamobrem rideamus & iocemur, quod fiat bono modo: quando nos ab omni reprehenfione & rîtus Laconum, & Lycurgi tuetur auctoritas. Adftipulantur illis philofophi à Zenone, quibus non fatis fuit eloquentiam appellare virtutem, nifi rîfus & vrbanitatis facultatem eodem nomine decoraffent. Rîfum fibi comitem, & ex eo iucundum cognomen Venus afciuit, quoniam fine Rîfu effet Venus inuenifta: vt & ipfæ, quæ Veneri ancillantur, fine Rîfu effent ingratiæ Gratia. Ex animo nunquam is dolebit cui Rîfuserit propitius. Aequus fuit Rîfus Democrito, Heraclito iniquus: vnde fata illorum contraria: & alterius perennes lacrymæ, alterius perpetui cachinni. Adfuit Rîfus nascenti Zoroaftri, qui vnus mortalium rîfit quo genitus eft die, futuræ

incredibilis scientiæ felici præfagio. Rîsus ad dicendum necessarius; non utilis modò, vel ut languentes excitet audientium animos, vel ut infensos deliniat, & conciliet auersos. Sæpè orator quæ negare non est, aut defendere, tempestiuo rîsu & cauillatione defleçtit, ac aliò trahit, coniectique in se reliquit aut retundit aciem: quemadmodum bonus gladiator, parua quadam declinatione motuque corporis, aduersarij petitiones eludit. Rîsu sæpe obruuntur, vel eleuantur, quæ contentione frangi, refellique argumentis non poterant. Sic postea Tullius repetundarum iudicium, & haud dubiè fontem, L. Flaccum, iudicio & pœnæ legum eripuit. Sic idem patronus L. Murenæ, in manifesto ambitus crimine, salutem dignitatèmq; tutatus est. Quid quòd in bello interdum plurimùm valent rîsus & facetiæ? Locatus in Gîscōnem Annibal Romanorum multitudine perterritum exercitum suum confirmavit. Lacedæmonijs iratum regem Philippum vna falsè scripta placauit literula: & qui milites in tentorijs regem Pyrrhum probris lacerauerant, facetè translato in lagenam crimine, è periculo capitis, regiæque iracundiæ flamma euolauerunt. Nimis longum esset singula id genus persequi: Itaque finem facio, quòd

vercor in aurium vestrarum fastidium incur-
rere, & quòd ista cras melius ex ipso Cicero-
ne audietis.

IOAN. PASSERATII PRÆFATIO
in Ciceronis librum de Legibus.



ST hoc moris vetustate confir-
matum, vt in ædes alienas ingre-
liatur nemo, nisi qui fores antè
pulsauerit; aut si quis rectà in-
trorumpat, non satis tenere ci-
uilem vitæ rationem existime-
tur. Idcirco Lachartus Dux Corinthiorum
Cimoni per agros popularium cum exercitu
iter facienti; *haudquaquam par fuit, ô Cimon,*
inquit, *sine bona Corinthiorum venia per illorum*
fines te agmen ducere, haud hercle magis quàm in-
jussu domini in privati hominis tecta introire.
Quod & olim non iniquè comparatum est, &
nunc iustis de causis obseruatur; vt sua videli-
cet culque domus tutissimum sit perfugium;
& ne occulta familiæ, solisque diis Penatibus
aspicienda, curiosis pateant oculis inuidorum.
Cuius consuetudinis memores primas legum
quasi fores nobis esse pulsandas duximus, an-

tequam ingrederemur, & in augustissima iustitiæ adyta penetraremus. Vereor tamen ne nimium proteruè faciam, qui duo clarissimi iurisperiti responsa labefactare coner. Multorum enim sæculorum spatio corroborata, communique hominum approbatione munita, nequeunt absque temeritatis suspitione, manifestoque offensionis periculo tentari. Sed qui erunt æqui in cognoscendo, faciles eosdem spero in ignoscendo futuros, quando simplici veritatis studio, non prava contentionis cupiditate, in eo viriculas nostras experimur. Præterea, Ciceronis sententiæ, institutoque de legibus sermoni quæ refellere cogitamus, planissimè aduersantur. Sunt autem huiusmodi: *Quod Principi placuit, legis habet vigorem*. Item, *Princeps legibus solutus est*: quæ si vera sunt, vis iuris vniuersa, dignitasque, atque adeo nomen legis è rerum natura tollitur: Sin falsa esse, sicut sunt, demonstramus, suscepta de legibus pulchrè procedet disputatio. Excutiamus igitur hæc verba Vlpiani capite primo de cõstitutionibus principum; *Quod Principi placuit, legis habet vigorem*. Vtrum recta, honesta, iusta, quamuis absit principis voluntas, legis loco non sunt? aut accedente principis voluntate, praua, turpia, iniqua, vim legis obtinebunt? Illud non negabit, opinor, & hoc af-

sentietur, fretus astipulatoribus Paulo atque Mæciano. Paulus enim, capite vndecimo de iustitia & iure, *Pratorem ait ius dicere, etiam cum iniquè decernit*: & Mæcianus, capite sexagesimo quinto ad S. C. Trebellianum, *quoderit per errorem vel ambitionem malè iudicatum, nihilominus rei iudicata pondus & auctoritatem habiturum*. Nunc demum Anaxagoræ credo niuem esse atram; & Syracusio Nicetæ, cælum, stellas, solem, lunam, supera denique stare omnia: neque præter terram, vllam rem in mundo moueri. Sunt ista non iuris antistitum, sed nescio cuius Anaxarchi assentationis proicetæ perditæque impudentiæ, qui vt Alexandrum excitaret, ex eo luctu, quem ob Cliti cædem acerbissimum conceperat, hunc in modum regem fertur alloquutus: *Ecce Alexandrum illum magnum, quem vnum omnes venerantur & intuentur. Ecce prostratum humi, flentem, & eiulantem instar Mancipij, legum ac infamiae metu. Numquid venit in mentem te vicisse vt imperes, non vt vana hominum opinioni seruias? Per te arbitrum aequitatis honestatisque fines regendi sunt: quicquid statueris iustum honestumque censebitur. Curenim Themis à poëtis fingitur asidere Ioui? Nempe quod omnia, quæ à regibus fiunt, iusta sunt & honesta. Gnathonem, aut Phormionem, non Philosophum loquutum putes, &*

verò Antiphatem aut Polyphemum: qui percontanti eidem regi cuiusmodi videretur conuiuium cui adhibitus erat; *Nihil, ait, splendidius, modo Satrapa alicuius cruentum caput apponatur: quam sæuam immanemque assentationem, quæ debuit, pœna mox consequuta est; sensique in mortarium à Nicocreonte coniectus & ferreis pistillis contusus nunquam Iustitiæ numen impunè violari. Similis oratio Caracallam præcipitem ad incestum egit. Is ad nouercam eleganti forma oculos incontinentes adiecerat; cùmque libidinis impetum nonnihil retardaret pudor, hætenus interpellauit, *vellem, si liceret. Ferebatur monstrum principis, non licere quod placebat, sed nefaria mulier hac responsione labantem ad scelus impulit: Si libet, licet. Nescis te imperatorem esse, & leges dare non accipere?* fuit & Atheniensium erga Demetrium regem adulatio longè foedissima, qui sciuerunt, vt quod ad res diuinas sanctum ac religiosum; quod ad humanas iustum & honestum esse, quicquid regi Demetrio videretur. Inscitum medijsfidijs populi scitum, quo reponebatur το δίκτυον ἐν τῇ χειρὶ, & pro ratione dominabatur principis libido. Nimirum hinc natum illud est, quo passim aulæ perso-*

nant, *Sic placitum*, quæ Iouis summi, fatique verba quo modo accipienda sint nulli magis ignorant quàm qui frequentius vsurpant; Discant ex Horatio: *Sic potenti Iustitiæ placitumq; Parcis*. Ac ne quis miretur à me iustitiam Iouis nomine appellari, sic habeat, Iouem ipsum esse solem: & veteribus Theologis persuasum fuisse, solem oculum esse iustitiæ. Ideo populus Romanus, vt memoriæ à Plutarcho proditum est, annum Ioui, & Iunoni menses consecrauit, quod Iouem esse solem & Iuno nem lunam arbitraretur. Est autem sol, vt est apud Orpheû, ὄμμα διχοφωγῶν, & qui ab Homero dicitur

Ἡέλιος, ὃς πάντ' ἐφορᾷ, καὶ πάντ' ἐπακούει.

Δίκης ὀφθαλμὸς à Diphilo comico nominatur:

Ἐστὶν δίκης ὀφθαλμὸς, καὶ τὰ πανθ' ὄρᾳ:

Vt in celebri epigrammate,

Ὀμμα δίκης καὶ ὄρᾳ πάντα τὰ γινόμενα.

Itaque quicquid iustitiæ placuit, aut principi iustitiæ cultori, quin pro lege sit non repugnabo; nullam verò legis ne umbram quidem habere fatebor, si quid princeps iubeat quod iuri & honestati non sit consentaneum. Exempli gratia, Xerxi placuit Hellefponto plagas infligi: quæro an in mare & fluctus licetor lege egerit. Placuit Caligulæ equum suum incitatum Consulem designare: quæro an

eodem iure quadrupes, hero bipede dignior principatū, consulatum initurus sit, quo centuriatis comitijs, auspicato in campo; cunctis liberisque suffragiis populi, renuntiati Metelli aut Scipiones. Versetur vobis ante oculos equus in toga candida; qui centurias ambiat, prensat ungulis, & obuio cuique adhinniat, mox cum fascibus & securibus tolutim trabeatus incedat:

Spectatum admissi risum teneatis amici.

Non est irridendus primus ab imperatore magistratus, isque legitimus, quia sic Cæsari placuit. Placuit eidem Caligulae ut Luna sibi nuptum daretur, quam plenam fulgentemque assidue in amplexus inuitauit, contracta sit cum Ioue & Apolline affinitas: Latona generum inuenerit. Placuit Neroni urbem florentissimam, domicilium imperij, caput orbis terrarum incendere; incendit: lege factum defendamus. Placuit matrem interficere, interfecit, parricidium comprobemus: placuit exectum marem, velatum flammeo, præcedente facula & tibicine vxoris loco domum ducere; è cinædo existat repente mater familias, & sint legitimæ nuptiæ. Sexcenta id genus commemorare possem, quibus si legis nomen imposueris, vel ipsi risum moueas Heraclito: ita ridiculum erit legis appellatione honestari

ea, quæ ciuium, gentium, naturæque iura per-
uertant. Melius Dionysius, licet tyrannus, &
nobilitatæ insignisque crudelitatis tyrannus,
cuius mater cum opere summo cuperet esse
in matrimonio cuiusdam adolescentis forma
& ætatē integra, ipsa iam grandis natu, con-
tendebat à filio vt ad cogendum reluctantem
vim dominationis interponeret. Tum ille: Ego
quidem, ô mater, Syracusanis suas leges suam-
que libertatem eripere potui: naturæ verò le-
ges abrogare, nec mihi nec alij cuiquam fas
fuerit. Sed ne queratur Vlpianus malè secum
agi, rationem qua nititur proferamus & expen-
damus: *Quod Principi placuit, legis habet vigo-
rem.* Quid ita? quia populus principi lege re-
gia suam omnem potestatem contulit. Fac
esse certum quod controuersum manet de le-
ge regia: tamen populus non plus concessit
principi quàm sibi tribuerat, idque me docuit
cap. quinquagesimo quarto de regulis iuris:
*Nemo plus iuris ad alium transferre potest quàm
ipse habet.* At nunquam populus tantum sibi
sumpsit vt quod iuri aduersaretur id lege lata
ratum esset. Testis est solemnis, quæque om-
nibus rogationibus adscribebatur formula: *Si
quid ius non esset rogari, eius ea lege nihilum roga-
tum esse.* Pergam porro, & ostendam non mo-
dò pro lege non habendū, si quid princeps in-

iuste jubeat, verumetiam antiquissima lege constitutum fuisse, ne fraudi esset ei, qui iniuste & per vim imperantem occidisset. Linus Apollinis filius, patrum Herculem cithara canere docebat: citharœdi præcepta tardius percipiebat Hercules, ut pote qui melius arcum & sagittas quam citharam & fides tenderet: hebes ingenium discipuli acriter Linus increpat, & verbis addit verbera. Insolens erat Herculi vapulare, idque immerito: sibi temperare non potuit, quia magistrum plectro plecteret & interimeret. Arguitur cædis, factum confiteatur: res invidiosa, facinus atrox, à discipulo magister, & fratris filius à patruo interfectus. Ex illa tamen iudicii flamma euolavit recitata lege Rhadamanti, ne Iurisconsultis quidem satis nota: ὅς ἂν ἀμύνται τῶν χειρῶν ἀδίκων ἀρχῇ ἀνῶν εἶναι, quæ lex extat apud Apollodorum in libro secundo bibliothecæ. Prospicio quid contrà referat Ulpianus, *Principem scilicet legibus solutum esse*, cap. 31. de legibus & S. C. Benè habet, istuc ibam: alterum enim est eorum quæ mihi refutanda proposui: longè petitis argumentis nihil est opus: in principum caussa, principum testimoniis negotium transfigetur. Demarathi Spartanorum regis fortunam qui à suis exilio multatus erat, nonnulli miserabantur; & malè factum dicebant quòd

rex à suis pulsus esset, nec locum ac dignitatem in vrbe sua regni viribus retinere potuisset: Imò factum est optimè, inquit Demaratus, quòd Spartæ plus leges, quàm reges valuerint; alioquitam absurdum esset in administranda ciuitate principem non teneri legibus, quàm in dirigendo nauis cursu gubernatorem non hærere gubernaculo. Rex eiusdem gentis Leonidas eo potissimum mortem suam & trecentorum, qui secum ad Thermopylas ceciderunt, consolatur, quòd dum patriæ legibus obtemperant, pro eius salute sanguinem vitamque profuderint,

Ὡς ἔειπ' ἄγλαον Λακεδαιμονίοις, ὅτι τῇδε
Κείμεθα, τοῖς κείνων περὶ νόμοι νομίμοις.

Quos Simonidis versus Latinè sic meministis redditos à M. Tullio in Tusculana prima:

Dichospes Sparta nos te hîc vidisse jacentes,

Dum sanctis patriæ legibus obsequimur.

Quid Agesilaus? inter omnes constabat rem in Asia præclarè gesturum esse, cuncta victoriam ostentabant & pollicebantur: tantus terror armorum quæ intulerat, barbarorum animos peruaferat; allata est epistola quâ reuocabatur ab Ephoris: gloriam & prædam, quæ in manibus erat, abiecit, ac è vestigio regressus est in patriam, dictitans verè munus esse regium parere institutis patriæ, & magistratus tum maxi-

mè imperare, cum maxime legibus obedirent. Pari animo Archidamus Zeuxidami filius hospiti interroganti quonam pacto fieret, ut tam bene Sparta regeretur, respondit, quod illic magistratuum imperio ciues, potestati legum vltro subiecti essent magistratus. Prætereundum silentio non est, quod regi regum quotidie nuntiabatur. Ingressus in cubiculum prima luce vnus è purpuratis, clara voce monebat, ut surgeret, & ea procuraret negotia, quibus ipsum præfecisset Mesoromasdes; is est Persarum lingua deorum maximus, eademque lex certa Dei mens, ut est in Ausonij monosyllabis:

Lex naturali quam condidit imperio ius.

Ius genitum pietate hominū, ius certa Dei mens. Testimonium super ea re dicet & is quem supra commemoravi Alexander: fauebat impensius Thessalo tragoedo, aduersus Athenodorum certanti de histrionia: victum ab aduersario Thessalum postquam audiit; Maluissē, inquit, dimidiam regni partem amittere, quā istuc accidisset; verū quid faciam? cæteris omnibus me superiorem esse studeo; legibus inferiorem omnino esse conuenit. Nec ab ea sententia multū aberat Antigonus, cum diceret *regnum & principatum nihil esse aliud, quā splendidam seruitutem.* Prodi-

rent Zaleucus & Charondas, qui suo sanguine leges à se latas sanxerunt: sed præstat ipsum producere Augustum, ad cuius legem Iuliam hæc Vlpiani verba, *Princeps legibus solutus est*, pertinent, ut ex inscriptione cognoscitur. Vehementi commotus percitusque ira, quendam ex Iuliæ filiæ adulteris manu verberabat: exclamavit ille, *Legem tulisti, ô Caesar, qua lege sua huic crimini pœna est irrogata?* Statim ad se rediit, legisque suæ à se violatæ adeo pœnituit principem, ut totum illum diem cibo potuque abstineret. Cuius principis maius fastigium est, quàm fuit Augusti? Is tamen legis amplitudini concessit, quæ omnes res exuperat, summumque cæli verticem transcendit. *Regum timendotum in proprios greges, sed reges in ipsos imperium est Iouis*, id est legis, quæ mortalium est regina, ut diuinitus scripsit Pindarus, & Pindarum imitatus Chrysippus *Θεὸν νόμος ὁ νόμος πάντων ἔστιν βασιλεὺς, γερῶν τε καὶ ἀνθρώπων πραγμάτων*, & quæ sequuntur, Martiani I. C. beneficio ab obliuione & interitu vindicata capite secundo *de legibus Senatûsque consultis*. Quamobrem male de principibus & ciuitatibus merentur, qui vel clam in aures principum insusurrant, legibus non teneri vel palam inculcant. Magnani enim ad omne facinus aperiunt fenestram, impunitate proposita, le-

gumque sublata reuerentia. Ex illo fonte, quæ manant in cœtus hominum jure sociatos incommoda? Nam, ut ad speculuni formam suam fingunt mulierculæ, sic ad principis vitam mores suos, ciues componunt: quæ si casta puraque est ab omni sceleris labe, vix vlla in ciuium moribus infidebit macula: sin se voluptati atque libidini manciparit, immane quantum noceat exemplo. Nisi enim caput ipsum rationi obtemperet, non est ut cætera membra consilio gubernentur. Poteram meo jure finem dicendi hic facere, paululum tamen adhuc commorabor in eodem loco, & ex suis subsellis Vlpianum contra se testem suscitabo. Dic mihi, Vlpiane, qui principes extra legum metum ponere voluisti, ut Deos Epicurus extra mundos, quos innumerabiles somniauit, ne fortè ruinam eorum opprimantur: quid scripsisti ad edictum Prætoris? *Quod quisque juris in alterum statuerit, ut eo ipse utatur*, capite primo. Hoc edictum summam habet æquitatem. Quis enim aspernabitur idem jus sibi dici quod alijs dixit, vel dici effecit? Inter se nullo modo possunt ista congruere, æquissimum est, ut qui jus aliquod statuit, eodem utatur: &, Princeps legibus solutus est. Si isne princeps legibus solutus erit & adstrictus simul? Quæret diuerticulum, & eò confugiet, semper excipiedum esse prin-

cipem. Istic malè delitescit, retrahetur & verba sua cogetur agnoscere, capite octauo de inofficioso testamento. *Si Imperator heres sit institutus, posse inofficiosum dici testamentum, sapissimè rescriptum est.* Finge me immerentem præteritum esse à parente vel indignè exheredatum, & principem scriptum esse heredem; si iustam esse meam de inofficioso querelam iudicibus probauero, te auctore, edicti legumque auxilio, meam principi hereditatem eripere poterò. Quid autem opis & auxilij ferent mihi leges? Princeps ijs non tenetur. Vrgere nolo diutiùs, & pertendere aduersus eum qui meo iudicio in jure familiam ducit: Vlpianum admiror, Iurisconsultorum pluris facio neminem: quare, vt cum bona eius gratia hinc discedatur, aliquam ineamus rationem. Hæc autem erit de prudentissimorum hominum sententia, Celsi videlicet cap. 29. *de legibus*: Iuliani cap. 17. *de manumissis testamento*: & Marcelli cap. 3. *de ijs quæ testamento debentur*; vt duo illa responsa benigniùs interpretemur Principibus, quales nostri qui re sunt, vt nomine principes, nihil placere, nisi aut quod rectum sit, & tunc verè dici legem, aut saltem, quòd ad suorum vtilitatem spectet, & tunc legis vim obtinere. Solutos autem videri legibus, qui sponte faciunt quod alij legum

gum metu. Quem interpretem improbabit nemo, qui Iurisconsultum Paulum audierit de legatis 3. cap. 23. *Ex imperfecto testamento, inquit, legata vel fideicommissa Imperatorem vindicare inuerecundum est. Decet enim tanta modestati seruare leges, quibus solutus esse videatur.* Satis jam factum consuetudini, pulsataque legum janua nobis patet, solis temporis angustiis excludimur. Itaque ut commodius id fiet die crastino, morem disciplinamque augurum secuti, in dissoluenda dimittendaque concione. *Alio die pronuntiabimus.*

IOAN. PASSERATII PRÆ-
fatio in Cic. Epistolam ad Hirtium
& Casarem.



ETEREM ac solemnem populo Ro. hunc fuisse morem ipsis Quiritium monumentis proditum est, ut homines ingenio abundantes, famæque & doctrinæ cupiditate incensi, Interpellata reponibus studia, vel feriis legitimisq; otio intermissas lucubrationes, Vulcanalibus potissimum instaurarent. Cuius moris premētes vestigia liberaliū doctores artium in hac Academia florentissima,

partim Calendis Octobribus rei literariæ fo-
lent auspicari: quamvis olim præstitutæ ei rei
fuerint Idus Octobres, vt Valerius indicat
Martialis:

*Ferulaque tristes, sceptrapadagogorum,
Cessent, & Idus dormiant in Octobres:*

partim, vt ij qui de fisco salarium accipiunt,
expectant donec annus litium redierit, & ad
suum se munus referunt circiter Idus Nouem-
bres. Quo fit, vt ego, qui multò seriùs in hoc
charteum, vt Varro loquitur, *stadium* regredior,
in negligentia crimen vocari possim. Neque
sanè deprecaber culpam, nisi æquum esset
ignosci, ei præsertim, qui paratus sit, quod ces-
satione peccatum erit, diligentia corrigere, &
moram sarcire industria. Liceat etiam iustissi-
ma excusatione valetudinis vti, & trimestris
morbi causam adferre vel fonticam: Sed
ægrois apud Medicos potiùs quàm apud vos
de morbo suo conquerendum. Missa igitur fa-
ciamus quæ sunt aliena, & ea persequamur
quæ ad rem vestram, fidemque meam, magis
pertinent. Memini enim me vobis pridem
pollicitum esse interpretationem *epistola Antonij ad Hirtium & Casarem*, ad quam ecce ac-
cingor, si priùs pauca de Cicerone & Demo-
sthene: ac paulò plura de Antoniano scribendi
genere dixerò. Extat inter Demosthenis opera

Philippi regis Macedonum epistola, quâ cum Atheniensibus de grauissimis iniurijs exposulat, & ad extremum illis bellum denunciat. Arripit eam occasionem Philippo infensus Demosthenes, & ad hoc bellû alacritate summa suscipiendum, fortissimèque gerendum, ut pium, iustum, necessarium, populares suos acerrimis eloquentiæ stimulis incitat. M. Tullius, qui se totum ad Demosthenis exemplum componit, similem nactus inimici Antonij epistolam, eius singula propè verba exagitat; instat, vrget, eoque incumbit, ut hostis à senatu judicetur Antonius. Infelicem vtriusque oratoris memorare conatum, exitumque belli suavoribus ipsis calamitosum, & suis ciuitatibus pestiferum, horret ac refugit animus. Amborum tamen inimicitijs id debemus, quòd, absque illis esset, neque illam Philippi, neque hanc Antonij epistolam haberemus. Audistis cur epistolam Antonij Tullius noster inseruerit ijs orationibus, quas Demosthenis imitatione Philippicas inscripsit; nunc cur Antonianum dicendi genus in eiusdem Ciceronis & aliorum reprehensionem incurrerit, attendite. Nullam omnino eloquentiæ laudem qui M. Antonio tribuit, neque cum Plutarcho, neque mecum sentit. Tenuit initio gentile decus, ut cui paternus auus fuerit vir eloquen-

tissimus M. Antonius, quem de ratione dicendum L. Crasso differentem *in libris de Oratore* M. Tullius inducit. Quanquam hæc nepotis facundia militaris magis quàm forensis fuit, & armatæ quàm togatæ aptior concioni. Verùm quicquid erat adeptus à natura boni, quadam perplexi, obscurique sermonis ambitione postea corruptit, falsa que recti specie paulatim in vitium delapsa est virtus. Cæsar quidē Augustus, qui nihil antiquius ducebat, quàm apertissimè animi sensum exprimere, in eo damnabat *reconditorum verborum*, ut appellabat, *fætore*: Et qui Tiberio priuigno non parcebat exoletas voces aucupanti, collegam suum Antonium increpabat, ut insanum; quod Annij Cimbri, Verrijque Flacci æmulus, exscriberet quæ mirarētur citiùs homines quàm intelligerent. Exorti sunt, hīs annis viginti proximis, non dissimili laborantes infania, noui quidam Antonij, utinam minùs multorum quorū causā, ne quid dissimulem, hanc præfatiunculam institui. Si quidem me facturum operæ pretium putaui, si istum animi morbum vel arte aliqua persanarem, quod in ijs difficillimum est, qui sic ægrotare malunt quàm valere, vel aliqua ex parte imminuerem: idque saltem assequeretur, ne hæc apud nostros latius serpat contagio. Atque ut ex quo capite om-

nis hic manet error videatis, has nobis turbas dedit, daturâque est inconsulta famæ cupiditas, & intempestiua eruditionis affectatio. Blandum (me hercule) malum, eoque cauendum diligentius. Nempe sibi magnificum fore, ad nominis commendationem credunt adolescentuli, si cum aliquid reppererint Grammaticorum vulgo indictum, vel inauditum, id omnibus chartis illinant, & eo utrâque impleant paginam: nec semel coronam se meruisse ciuicam arbitrantur, si vnum aut alterum verbum, eorum operâ, quasi quodam postliminii jure, videatur in Latium rediisse. Agnosco ingenium: probo indolem: nec reprehendo quod in literis sedulò moluntur; dum id bono fiat modo: & inde proficiantur vnde oportet. Nunc contrâ fieri cernimus, & ridemus, quod aiunt, *cantberium in porta*: quoniam longum iter ingressi, vt linguæ Latinæ regio longissimè latissimèque patet, non animaduertunt se ad eius limen offendisse: neglectisque auspiciis, quorum in principiis vis inest maxima, se quò magis progrediuntur, eò minus rectè feliciterque procedere. Quid ergo est? nondum illis optimus eloquendi magister persuasit, *vitium in oratione vel maximum esse, à vulgari genere, & communi consuetudine sermonis abhor-
rere*: nec illud ex Aristotelis tripode oracu-

lum audierunt, μόνη λέξεως ἀρετὴ σαφὴ εἶναι;
unicam & singularem orationis esse laudem, si
perspicua & aperta sit. Cur enim à natura data
nobis oratio? nōne ut cū fidelissima, tum
apertissima mentis nostræ sit interpret. Data
lingua, quæ tacitæ cogitationis sit internūciā,
& complicatas notiones nostras euoluat. Data
vox, ut varios animi motus exprimat, non ut
imitetur ænium garritus, qui egent augurum
interpretatione, Ἀπλοῦς ὁ μῦθος τῆς ἀληθείας,
inquit in *Phœnissis* Euripides; & qui planè sim-
plicitérque verba facere non didicit, necesse
est ignoret quid sit Romanè & Latinè loqui.
At in procliui est, inquit, nec in eo laboran-
dum quod & pueri & mulierculæ sua sponte fa-
ciunt. Experiantur isti qui desueverunt: quàm
id sibi jam sit arduum sentient. Nam quem-
admodum qui in compedibus & tenebris diu
iacuerunt, licet emissi solutique sint, vix ta-
men incedere aut lucem ferre queunt: sic in
obscuris verborum ambagibus, & densa ora-
tionis caligine diu versati, cū jubentur pro-
dire in publicum, & more cæterorum homi-
num, loqui, æstuant, hæsitant, circūspectant,
nec tria verba cōmutare possunt. Atque ut ea
quæ liquida sunt faciliùs turbaueris, quàm effe-
ceris ut quæ turbida sunt liquecant: sic ex per-
spicua obscurā, quàm ex obscura perspicuam

faciliùs reddideris orationem. Et vt cæ lãnæ, quæ natura candidæ sunt, si semel arte infuscantur, natiuum colorem numquã postea recipiunt: sic orationis candor hac vetustatis infectus fuligine, prorsus interit; & in eiusmodi maculis eluêdis fullones operam ac cimoliam perdunt. Quamobrem nondum satis constitui deridendine magis sint, an miserandi, qui omnia Latini sermonis conuerrunt purgamenta, vt eorum scripta niteant: & quod in Ennio Virgilius legit, relinquunt: quod reliquit, libentissimè legunt: est autem eiusmodi, vt si nominare velim, honos auribus præfandus sit. Splendorem, opinor, petunt è ferrugine, veterique panno depexam & detritam assuunt purpuram, vt suas nobis diuitias ostêdant; seque indoctis venditant pro gemmariis, vt à doctis habeâtur scrutarii. Quòd si nihil illos nisi priscum delectat, nuptias censeo contrahant Manilianas, & Cascus Cascam ducat: vel si perplexa & contorta illis tantopere placet oratio, ad Delphicam se conferant dictionem. Sin metuunt ne intelligantur, quin vtuntur consilio Phauorini, & tacent, atque ab infelici charta prurientem abstinere manum? Verùm nos nostraque nimium amamus sine rivali: &, vt quocunq; pacto innotescamus, ancipitè subire ingenii aleam malumus quidlibet scriptitâdo,

quàm sine vlla existimationis nostræ iactura, certissimum amplecti silentij præmium. Videte præpostera iudicia. Cum variæ mortalium linguæ, diuersique sermones eodem tendant, vt aperitè quisque nostrum eloquatur quæ sentiat, recta simplici que via, natura istuc ducit: nos hanc ducem spernimus, & imperitorum opinionem sequimur, quæ per multas salebras, multosque anfractus, tandem eò pertrahit vbi pro eloquētia balbutiem doceamur & infantiam. Sordent nobis Tullius, Cæsar, Terentius: Valerij Antiatis, Cincij, Cælij, Pisonis, Fabij Pictoris, Quadrigarij, Sisennæ annales requirimus. Vnde tam delicatum fastidium? Cato, & Varro, vix ad stomachum faciunt: vix auiditatem nostram explent primi Consulum fasces, & fastorum incunabula: Decemvirales tabulas, leges regias, Saliare carmen, iēta cum Sabinis foedera, Fecialium iura formulāsque transcendimus, vt penetremus in sermonem Aboriginum, tamquam simus cum Egeria Numæ, aut cum Euandri Carmēta loquuturi. Equidē mihi sæpe cogitanti cur hæc à iuuentute nostra tam cupidè expetantur, id vnum in mentem veniebat, *magnis erroribus magna interdum prætexi nomina*. Sectatores enim se plerique istorum esse profitentur Plauti & Sallustij; grauissimisque nituntur aucto-

ribus, nisi auctoritatem illi defugerint. At hoc non est, mihi credere, Plautum imitari, quædam modò Plauto sublegere, vel obsoleta ad antiquitatis speciem, vel obscura ad eruditionis ostentationem. Quadruplicem potius adhibeant cautionem ingenui adolescentes in evoluendo Plauto, si mihi obtemperare velint: Primùm, si quæ verba ridiculi causâ confingit, ut multa procudere solet, vel si qua jungit audaciùs Aristophanis more, ea comicæ putent esse licentiæ, neque sibi permittant. Deinde si qua occurrent obsceniora, ut lasciva fuit scena illorum temporum, nullam inde concipiant turpitudinis maculam; sed per ea sic incedant quasi per mediam Suburram: properent ad sobrium vicum, aut ad aliquod pudicitiae sacellum. Præterea nimis prisca verba, & ferè desita, sibi tantùm seponant ad cognitionis oblectationem: ut elegantes consueverunt homunculi antiqua vasa, sigilla, & numismata; quæ recondita delectant, neque deprompta inter quotidianam supellectilem deturuntur. Sirpos denique vitent, & Plautinarum quæstionum cruces, in quibus frustra se toris se viros doctissimos M. Varionē, Ælios, Gallum, & Stilonem, Ateios, Capitonem, & Philologum videmus. Cætera omnia, meo bono periculo, studiosè conspectentur, quæ si fue-

rint assequuti, non erit quòd alium Latini sermonis fontem ad hortulos suos irrigandos desiderent. Venio ad Sallustium, cuius se quoque imitatores videri volunt. Quod is olim arguitur fecisse, vt ex *Catonis Originibus* multa furaretur quæ pro suis ederet: id censeo faciant in scriptis Sallustij: furique ipsi surripiant quod non minùs aptè concinnèque in rem suam possint conuertere. Si propitia fuerit Lauerna, bonùsque Mercurius, haud metuum coïre societatem huius criminis, & ope consilióque meo furtum esse factum confiteri. Imò verò si iudex in hac quæstione sedeam, non modò eos meâ tabellâ furti absoluiam, sed etiam laude ac præmio dignos iudicabo. Atqui sanè turpius nihil est his furibus manifestariis, qui neque cauere ne deprehendantur, neque rerum furtiuarum signa commutare didicerunt. Verba tantùm obsoleta venantur, inter mortua suscitant, sepultaque effodiunt, quæ passim scriptis suis & sine vllò delectu aspergant: vsitata, trita, in medio posita, illos latent: Et qui nosse laborant quo modo rex Latinus cum Iano fabulatus sit, quis auorum suorum sermo, ante centum annos fùerit, ignorant. Cur si libet iis esse antiquariis, non prisco sermone fabellas nobis componunt Milesias, Apuleij exemplo, eiùsque felicem imitantur

audaciam; aut verecundam in eo genere A. Gellij diligentiam; quem præclari emendatores Agellium appellari jubent. Ineptè, & penè dixerim improbe, cùm id repugnante fiat Valerio Grammatico, & re & nomine Probo. Mitto quàm inæquabili ac discolori filo eorum texatur oratio: quàm longè arcessita verba, ideóque putida: quàm discrepantia, & alieno loco posita: in quibus tam perit gratia, quàm in beneficiis malè collocatis. Scio, quosdam esse, paucissimos tamen, quibus hic priscè loquendi scribendique conatus præclare successit: quorum laudi semper fauebo, tantùm abest vt quicquam de eorum fama detractum velim: Quin haud negauero me vsque eò antiquitatis studio teneri, vt si auctio necessariò facienda sit, res alias omnes potius subiecturus sim hastæ, vocique præconis, quàm abalienaturus illa, quæ animi causâ multis jam annis & vigiliis mihi comparaui: Sed monendam mihi iuuentutem putaui, vt dum tener est animus, dum flexibile ingenium, dum stylus quocunque ducis sequitur, vt statim optimis assuescat. Dehortor etiam ab imitatione dissimilimi generis hominũ, qui tori sufflati fucóque obliui, bonam habitudinẽ, munditiãque, & elegantiaẽ orationis mentiuntur: vbi propiùs inspectaris, nihil sani, nihil succi, nihil neruo-

rum: & quorum sermo funiculis ac fidiculis, non articulis, cohæret. Hi sunt qui Tullianis verbis implicati, vt in pampinis inuoluculi, longisque & contortis comprehensionibus verborum, sibi & imperitæ multitudini meri videntur Cicerones, aut saltem Ciceroniani; quod posterius ego lubens illis concedo; eoque amplius, vt syllabâ tantum nomen augeatur, sintque & habeantur Ciceroniafina. Non sunt tamen ista huius disputationis. Nam sentio me in altum abripi, metuoque ne jam longius quam destinâram prouectus sim. Itaque inhibeam, optimum est, & me referam in portum, quando susceptum definitumque cursum jam confeci. Ostendi enim quid Tullio nostro propositum fuerit in carpenda inimici Antonij epistola, eumque in hac re Demosthenis sequutum esse exemplum. Et quia *ἐξ ἀρχαιολογίας* mentio inciderat, ab eius prauo studio reuocare conatus sum illos qui nimium præcipites illuc feruntur: oravi vt paulisper se sustineant, & firmiter ac maturius iudicium expectant, quò veterum scripta legere, expendere, & in vsum suum traducere commodius possint. Rectè necne censuerim, alij viderint: hoc liquidò tantum affirmauero, me bona fide consilium dedisse, cuius neque me vnquam, neque vos, vt spero, pœnitebit.

IOAN. PASSERATIUS
N. R. S.



Mo te quòd Plautum amas, amores meos: adeoque non offendor iualibus, ut ad eius notitiam & familiaritatem adiutum permultis quotidie coner aperire. Hoc si tibi persuaseris à me fieri bona fide, quod nunc dicam bono animo, æqui bonique consules. Dum literas tuas, & libellum vnâ missum lego, animaduertite studio Plautini sermonis labi longius, & ad prauos antiquitatis imitatores diuertere, quibus omne penus est in priscis glossematis, & omnis cura in concinnando tessellato Lucillij opere. Blandum & peruicax malum ista *ἡγεμονία*, à qua nisi maturè caues, stylus tibi perpetuò perierit. Sapies, si rationem ita mutabis, ut cum tibi fingas & læuem & vberem; meminerisque sine filo æquabili orationem non rectè contexi. Aliud est enim scribere, aliud suere centones; quod quid faciunt, vix est ut non in peruagatum morbum incidant, cui jam olim à Marone inditum nomen, *Attica Febres*. Si plusculum essem nactus otij, lon-

giorem haberes epistolam. Sed ea nihil opus est, quando vir optimus, tuus pater, te monet amborum vicem: cui, sat scio, parebis monstranti bene. Is verò mihi, hæc pauca ut exararē auctor fuit, ne mireris me tibi consiliū nō petēti dare. Vale. Lutetię Parisiorū. V. Kal. Apriles.

IOAN. PASSERATII PRÆ-
fatio in Catilinam Sallustij.



VIBVS ex rebus togatorum longè doctissimus M. Varro, in satyra Menippæa *Nescis quid serus vesper vehat*, constare dixit omnibus suis numeris absolutum conuiuium; si collecti belli homunculi, si lectus locus, si tempus lectum, si apparatus non neglectus: earum ego rerum partem alteram nunc esse nobis oblatam video, alteram spero non defuturam. Adest enim locus docendi auctoritate amplissimus, discendique frequentia celeberrimus: & anni tempus dudum vnic quo nos ad hæc nostra munera referre consueuimus. Belli autem ut conueniant homunculi optare possum, præstare non possum, Auditores: id à vobis pro humanitate vestra expectatur, neque tamē ut valdè faceti, vrbani, cōmo-

dique sitis postulo : abundè comitatis erit, si,
 quod in templis olim jubebatur, *hoc agetis, fa-*
nebitis linguis, & vos hinc non commouebitis
 ante sacrorum solemne verbum, *I, licet.* Quod
 ad conuiuarum numerum attinet, Terentia le-
 ge soluti sumus, quæ vetat conuiuas intra Gra-
 tiarum, aut supra Musarum numerum adhibe-
 ri. Nam hoc quasi epulum est, tam inuocatis
 quàm vocatis præbetur, & omnibus promif-
 cuè jus est accumbere. De apparatu, nihil ma-
 gnificè pollicebor, nec eorum ambitiosas imi-
 tabor ineptias qui diuersorij ianuæ inscribe-
 bant, *Hospes hic bene manebis:* Accipiam vos vt
 potero, & vt frugi homines oportet, vt atq; Me-
 dicorū consilio qui vitandas esse monent cœ-
 nas dubias. Itaque faciã vt ante-mensam, cœ-
 næ caput, & bellaria idē esse dicatis: coctūmq;
 istuc & conditum à Chalcidensi Titi Quintij
 cōuiuatore. Interea quod apponetur boni cō-
 sulite, & in tenui apparatu vt inopiæ pudori-
 que meo succurratis, seruate placentiæ locum.
 Ecce vobis appono Sallustium. Non audetis
 attingere? Thyesteum conuiuium non est:
 conficite, consumite: confectus & consum-
 ptus ex se renascetur vt Tityj jecur in fabulis:
 & postquam famem vestrā expleuerit, nihilo-
 minus incolumis manebit. Licet auidissimè,
 & ad satietatem vsque appetatis, tanquam ex

Platonis vespertina hodie surrexeritis, cras melius prandebitis. Diffusum autem bibemus vinum, non haustum de dolio, nisi optimæ notæ defecerit cadus: & regem qui præscribat modum, incorruptis eligemus doctorum suffragiis, non incerto talorum jactu sortiemur. Flosculos, corollas, vnguenta, puluillos, venustas mulierculas, & eleganti forma ministros, relinquemus delicatis: pro fidibus, tibia, pueris symphoniacis, assentatiunculis parasiticis, & scurrilibus jocis, seria nos oblectabunt acroamata. Sed quoniam nonnulli extiterunt, & vereor ne iterum existant, qui has epulas fastidirent, nausæamque cæteris mouere conarentur, eamus obuiam calumniæ, & obtrektoribus occurramus, quibus non caruisse Sallustium haudquaquam mirum est; cum inuidiâ, sicut ignis, summa petere soleat. Dux & signifer istorum fuit Asinius Gallus Pollionis filius, quem super tanta re disceptatorem non accipio, si quis mihi iudicem ferat. Indignus enim cui de capite Sallustij tabella detur, cum ore tam duro fuerit ut M. Tullij eloquentiam contereret, totas orationes vellicaret, verba singula, ut nec propria nec Latina, insectaretur, edito libro, cui nefarius titulus *Ciceromastix*. Titus etiam Liuius parum æquus Sallustio fuisse perhibetur. Nollem profectò, vel hominis causâ, diligen-

diligētis, accurati, & eruditi scriptoris quantū
quī plurimū. Quocirca nisi alienis manibus
non tangam hoc vlcus; & ne quid offendam,
egregia cum Sallustij laude, permittam hanc
Senecæ arbitrio controuersiam. Cū sit præci-
pua in Thucydide virtus breuitas, inquit, hac eum
Sallustius vicit, & in suis illum castris cecidit.
Nam in sententia Græcā, tam breui quā saluo
sensu, detrahas vocem aliquam, constabit sensus,
si non aequè comptus, tamen integer: At ex Sallu-
stij sententia nihil demi sine sensus detrimento po-
test. Titus autem Linius tam iniquus Sallustio
fuit, ut hanc ipsam sententiam, & tāquam trans-
latam; & dum transferretur, corruptam obijceret
Sallustio: nec amore Thucydidis facit ut illum
præferat, sed laudat quem non timet, & facilius
putat à se vinci posse Sallustium, si antè à Thucy-
dide vincatur. Verū Linium bona cum gra-
tia dimittamus: neque admodum irascamur
Trogo Pompeio, si de Sallustio secus existi-
mauit: satis poenarum dedit quòd interiit. Fa-
bij verò Quintiliani censuram tanti faciamus,
quanti æstimanda est ludimagistri alicuius
cum Orbilij fascibus dictatura. Lenæi quoque
grammatici probra in Sallustium ut iratæ ani-
culæ connitia, & arrepta de triuio maledicta,
contemnamus: exquiramus potiùs omnem
obtrectationis causam & calumniæ. Duo

sunt (opinor) quæ malignè carpuntur in Sallustio : nimis concisa oratio, & nimium antiquitatis studium in verbis. Quibus non probatur Sallustiana breuitas, ij nullam breuitatem non obscuram esse putant; & hæc tam altis radicibus defixa est opinio, vt vix è quorundam animis euelli queat. Ego inutile certamen non suscipiam aduersus pertinaces; si quis tamen se doceri patietur, ostendam esse multa quæ breuiter simul & perspicuè dici scribíque possint. Atque vt Homero testimonium denunciemus, nónne brevis idem & dulcis apud eum Menelaus:

Ἦτοι μὲν Μενέλαος ὀπίτροχ' ἄνω ἄλσρευε,
 Παῦρα μὲν, ἀλλὰ μάλα λιγέως, ἔπει οὐ
 πολύμυθος.

Huius orationis breuitati si quid obscuritatis inesset, numquam ei comitem addidisset suauitatem. Prædeat item alter Homerus somnio factus, Ennius, qui nescio quem Seruiliij familiarem his exornat virtutibus:

*Doctus, fidelis, suavis homo, facundus, suusque
 Contētus, scitū atque beatū, secunda loquens in
 Tempore, commodus, & verborū vir paucorum,
 Multa tenens antiqua, sepulta.*

qua velut imagine nostrum expressum agnoscimus Sallustium. Audiamus & Phocionis vocem; cui quondam in concione sedenti v-

nus è popularibus, Videris, inquit, ô Phocion, nescio quid tecum ipse meditari. Tum ille: Non aberras à coniectura: meditor enim & cogito num ex ijs quæ ad populum verba facturus sum, aliquid valeam circumcidere & amputare. Atqui eius breuiloquentiæ tanta vis erat, vt quoties ad dicendum Phocion surgeret, ipse rex concionis ac fori Demosthenes fateretur adesse verborum suorum securim: Ideoque Polyuctus Demosthenem aiebat magnum quidem esse oratorem, sed Phocionem melius dicere. Ille videlicet copiosa, vehementi & incitata oratione, ceu gladio dimicabat: hic subtili, presso, & angusto sermone, ceu pugione, rem gerens, propius vrgebat, instabat acrius, fortius feriebat, confodiebátque aduersarium. Age verò, quid breuius epistola, non duorum modò verborum, qualis ea fuit, *Lacedamonij Philippo; Dionysius Corinthi*: sed vnus duntaxat literulæ: si quidem]

Vna fuit tantùm qua respondere Lacones

Littera, & irato regi placuere negantes,

& eâ litterâ nihil significantius, nihil apertius. Innumerabilia eiusmodi breuitatis exempla, ex Lycurgi profecta institutis, prodita sunt memoriæ, quibus prætermisiss ad Thucydide redeamus, cū quo Sallustius, vt Æterninus cū Placidiano à Criticis cōponitur. Sic igitur

de eo M. Tullius in libro secundo *de Oratore*.
Thucydides dicendi artificio facile omnes vicit;
qui ita creber est rerum frequentia, ut verborum
propè numerum sententiarum numero consequatur.
Ita porrò verbis aptus & pressus, ut nescias utrum
res oratione, an verba sententijs illustrentur. Et
 in libro *de claris Oratoribus*, vbi Cæsaris com-
 mentarios, ut nudos & rectos vehementer
 probat, negat esse quicquam in historia, pura
 & illustri breuitate dulcius. Præterea breuitas
 inter virtutes narrationis recensetur, cui sit ad-
 juncta perspicuitas. Quid autem aliud est *histo-*
ria quàm *perpetua quadam rerum gestarum nar-*
ratio? Hic fortasse nos aliquis auctoritate Ari-
 stotelis oppugnabit, qui peruagata ista, de bre-
 uitate narrationis, præcepta Rhetorum irri-
 det, ὅδε γὰρ ἐν ταῦτα βεῖ τὸ εὖ ἢ τὸ ταχὺ, ἢ τὸ σι-
 γῆρας, ἀλλὰ τὸ μετρίως, ut bene narretur, id
 non vult esse positum in celeritate, aut breui-
 tate, sed in mediocritate certoque orationis
 modo. Aristotelem Rhetoribus liceat, si li-
 beat, vlcisci; & par pari referre, quòd eum mor-
 deat. Contendent enim, Aristoteli satius fuisse
 ut breuitatis nomine malè audiret, quàm
 τῆς εἰς αἰσίωνης, & quàm ei exprobraretur fu-
 tilis & molesta loquacitas; vnde & à Theocri-
 to Chio κενόφρων appellatus sit, in hoc quòd
 Laërtius posteritati tradidit epigrammatico:

Ἑρμείας εὐνούχου, ἢ δ' Εὐβούλας ἅμα δούλας,
Σῆμα κενὸν γένεφρων τεύξει Ἀ' εἰς τοτέλης.

Dij tamen melius! quàm vt hoc vitium hæ-
rere in Aristotele cuiquam credamus; aut in
eo, cuius paulò antè mentionem fecimus, Li-
uio: quamuis Cæsar Caligula, cùm eius scri-
pta vellet abolere, vnam hanc causam con-
fingeret, quòd esset verbosus in historia. No-
bis satis erit id obtinuisse, quoddam genus esse
breuitatis minimè obscuræ, in qua vnus omni-
bus præstiterit Sallustius; & ob eam rem Va-
lerium Martialem, non tam de sua quàm de
communi eruditorum sententia, Romanæ
historiæ principem iudicasse: Qui si horridus
incultus, obscurus fuisset, vt isti somniant,
Cornelius Tacitus, & ipse breuitatis mirus
artifex, non illum nominasset *rerum Romanarum auctorem florentissimum*. Sed ego sum ridi-
culus qui de breuitate multa disputo, neque ad
alterum Sallustianum crimen protinus trans-
eo, de quo hi olim in vulgus sparsi sine aucto-
re versiculi:

Et verba antiqui multum furate Catonis

Crispe, Iugurtina conditor historiae.

Si verum est, quod arguitur, factum à Sallustio
improbè. Insimulatur enim furti, & quidē ma-
nifesti: quo quidē maleficio, vel è duodecim ta-
bulis Catoni tradendus est in seruitutem; vel,

si benignius cum eo agatur, existimationis iacturâ & quadrupli poenâ subeunda est iudicatio. Ridebit ista me hercule Sallustius, vltroque ibit in neruum, vt qui se totum iam addixerit Catoni. Nos properantem laciniâ retinebimus, & furtum esse factum non concedemus, cum inuito domino res aliena contrectata non sit. An Homerus & Ennius, si reuiscant, res suas & verba repetent à Virgilio, & manus iniectiōe vindicabunt, ac non potius gratiam habebunt quod se potissimum delegerit quos imitaretur? Quid quod res aliena esse desijt? Nam simul ac editi sunt libri, quicquid inest, publicum est, & vtitur quisque pro suo. Videtis quàm infirmum sit hoc furti crimē, & quàm non indigeat disertō patrono. Extarent Catonis Origines, è quibus multa Sallustium excerpisse ex Suetonii Augusto cognoscimus! libenter cum Sallustio cōrem huius furti societatem. Vtinam ad nos peruenissent Sisennæ historiarū libri, Pisonis, Quadrigarij & aliorum annales! ego plura inde vel palam sumerem, vel clām surriperem ac recondiderem: non vt priscè loquendo non intelligerer, quod tacendo magis possem assequi, sed vt veterum auctorum reliquias tot locis dissipatas colligerem & intelligerem facilius. Equidem, quando huc semel orationis impetu

prouectus sum, de me non dubitabo confiteri quod multò præstantiores viri semper præ se tulerunt, antiquitatis, & amissorum temporis iniuria Codicum incredibili desiderio teneri: & si quid huius generis ætatē ferre potuit, amare, amplecti, exosculari. An eirem nescio, mihi certè meus incundus est error: sinite sic infaniam: cui suus placet morbus, ei odiosus est qui parat facere medicinam. Habet quiddam ἐλκυσιχόν antiquitatis effigies: tacitè nos ad se allicit, trahit, rapit: & humanissimum quémque cogit illa venerari, vt aliqua religione consecrata, in quibus impressa cernit eius vestigia. Scrutantur alij nummos a desis iam & fugientibus notis: plerique lamellas, sigilla, truncas statuas, & frustra marmoris è ruderibus cadaueribusque oppidorum effodiunt: Multi deorum manium sanctitatem violât, neque parcunt sepulcris, dum eruant quod in bibliotheca repositum colant, & pro fumosis maiorum imaginibus ostentent: pars maxima crotas à tineis & blattis membranas conquirunt; cariosasque membranas noctes & dies euoluunt, si qua fortè superioris æui monumenta literis consignata illic reperiant. Quòd si verbum vnum aut alterum nostro sæculo inauditum ex iis tenebris in lucem protulerint, vt re bene gesta, non expectato senatusconsulto, triūphant.

Nolite enim arbitrari omnem vim antiquitatis & splendorem in rebus esse, nullum in verbis. Longè aliter æquales Sallustij (& quanti viri!) existimabant: M. Cato priscorum verborum vt priscæ sanctimonix obseruantissimus; M. Brutus, libertatis vindex fortior quàm felicior: M. Antonius qui postea triūvir reip. constituendæ: Annius Cimber, cui facete ancipiti dicto Cicero parricidium obiecit, *Germanum Cimber occidit*: Verrius Flaccus, ex cuius messe spiccas legit Festus Pompeius: Diuinarum denique & humanarum rerum scientissimus M. Varro, vt indicat pauca, quæ ex luctuosissimo eius voluminum naufragio ad nos enata sūt tabellæ. Mitto Ælii Galli, & Sinni Capitonis, clarissimorum juris antistitū curam & operam priscorum verborum explicatione collocatam: tantum dicā quod est in proverbio *Cascus cascam ducit*: Nuntia vetustatis historia verbis gaudet vetustis; & antiqui mores antiquo sermone delectantur. Quid igitur? ego ille antiquitatis admirator si mihi ducenda esset vxor, an Hecubam ducere malletm quàm Polyxenam? Dissimillima est ratio corporis & ingenij: forma corporis caduca & fluxa est, paucorumq; annorū spatio deflorescit: quod ingenio perfectū suā habet Venerem, vetustate non senescit, ex tēporis longinquitate plus ei

conciliatur gratiæ, quemadmodum piscibus ex ætate plus commendationis accedit. Quid tandem progrediar? nonne populi Romani ceremonias, rogationes, formulæque omnes prisca verbis placuit esse conceptas, quod verba rebus plus adferunt amplitudinis & maiestatis? Hactenus quid in Sallustij reprehendatur scriptis ostendimus & refellimus, satisque officio fecimus: tam curiosi autem & maleuoli non sumus ut in eius vitam inquiramus. Viderint istud magistri morum: nos id tantum studemus, eruditionis & doctrinæ illius famam fartam tectamque esse ab omni calumnia aut inuidorum aut imperitorum. Vos ex hoc vno Catilinario bello facile perspicietis quàm religiose historiæ legibus paruerit; ut nihil illic scribatur falsi, nihil non scribatur veri, suspicio gratiæ nulla sit, nulla simultatis: ut progrediatur ordine temporum: ut sub oculos subijciat regionum situs: ut consilia præcedant, facta comitentur, sequantur euentus: ut interpositis grauissimarum sententiarum aculeis pungat improbos, excitet inertes, nauos & industrios ad decus & gloriam cohortetur. Cæteras historiæ laudes oratione complecti longum esset, & huic loco non valde consentaneum. Sinamus in isto se campo pueri exerceant, ne abutamur vestrâ operâ diu-

tius, quàm bonam & benignam præbuiſtis. Purgandum nunc eſt hoc forum, quaſi præcoſupremam pronuntiarit. Quare, ſi vobis videtur, diſcedite, Auditores; nihil vos amplius moror: iam enim ventum eſt ad pontificium illud de quo ſuprà vos admonuimus, *I, licet.*

IOAN. PASSERATII IN LIBROS
Hiſtoriarum Salluſtij Oratio.



ATIVS fortaffe nunc fuerat, Auditores, ſi longiore mora culpam contraxi, cam aſtutè diſſimulare, ac præterire ſilentio, quàm leuiter obiiciendo, vel reſellendo, me mihi appoſuiſſe calumniatorem, aut præuaricatorem videri: neque tam æquitate cauſſæ, legitimæque cera, quàm diſcoloribus tabellis, & ſutorio, vt aiunt, atramento, eſſe abſolutum. Ne tamen iſta confeſſionem dicatur imitari taciturnitas, cur aliquantò ſeriùs quàm cæteri prodierim, & quid in hunc annum cœperim conſilij, dum breuiter expono, velim benignè, id eſt veſtro more, audiatis. Mihi quidem cùm hyberno tempore parum firma vâletudo eſſe ſoleat, quamuis non decu-

buerim, (neque tanti mihi sit huius muneris vacatio vt decumbam,) morbi excusatione, & verbis, quibus Meccœnatem affatur Horatius, apud vos vti licet:

*Si me viuere vis sanum, recteque valentem,
Quam mihi das agro, dabis agrotare timentî,
Auditor, veniam.*

Tueri me possum etiam oratione Terentiani Getæ:

*Gallina cecinit: interdixit hariolus:
Aruspex vetuit ante brumam aliquid noui
Negotij incipere: qua caussa est iustissima.*

Ac quoniam aruspiciis incidit mentio, monuit me Spurina ille, qui artis suæ veritatem Idibus Martiis comprobauit, ante flatum Fauonij nefas esse ad consuetudinem reuerti: vt iam temerarius haberi debeam, qui Zephyri aduentum non expectauerim. Denique periniquum est, quòd paululum ab his signis absumus, nos vt emanfores increpari, aut coërceri vt desertores: iuberique frequentes huc procedere, quibus non procedunt stipendia. Abeunt, inquam, magna ex parte, nostra præmia, & incertum quando reditura sint. Quòd abeant quæritis? quò nequam homines; ad bellum: & ad teterrimam ciuilis tumultus hydram, cuius tot capitibus contundendis & exurendis vix decem Hercules suffecerint. Nos interea capite

minuti, ridiculo genere adoptionis, in aliam
transimus familiam, & pro Volefis, aut Metel-
lis nepotibus, Pisones frugi: Imò verò metuo
ne pro Licinijs Crassis, Licinij Macri posthac
nominemur. Digna scilicet merces labore no-
stro nobis redditur, si, vt publicè docere com-
pellimur, ita & priuatim cogimur esurire. Ve-
rùm his querelis statuet modum notissima
Tragœdiæ clausula:

Πολλὰ μορφῶν
 Τῶν δαίμωνιων,
 Πολλὰ δ' αἰετῶν
 Κεαίνουσι θεοί
 Καὶ τὰ δοκῆναι
 Οὐκ ἐτελέσθη·
 Τῶν δ' ἀδοκῆτων
 Πόρον εὗρε θεός·

quod breuiùs & concinnius noster Maro:

Fata viam inuenient, aderitq; vocatus Apollo.
 Cessationis ergo crimen, si crimen illud est,
 accuratiùs diluere non placet, ne suspicionem
 culpæ augeat nimis elaborata defensio: re-
 spondebo iis potiùs qui me leuitatis & incon-
 stantiæ arguere volent, quòd Propertij susce-
 ptam interpretationem vel deposuisse videar,
 vel abiēcisse, eùm me ad Sallustium contule-
 rim. Imperiti gladiatoris hæc est, & in me fru-

stra conjecta petitio, quàm ita facilè vitabo, vt
Priami telum Pyrrhus,

---- *rauco quod protinus are repulsum*

E summo clypei nequicquam umbone pependit.

Non enim mutata mea ratio, nec me superioris consilij pœnitet: sed commodius visum est in Veneris mensem, Aprilem dico, Veneres & Amores Propertij differre. In Sallustianis autem scriptis, vt in amœno & opportuno diuersorio, tantisper commorari, dum se hyemis sæuitia frangit, & veris internunciæ reuolant ad nos hirundines. Multa verò me impulerunt vt has quatuor oratiunculas, epistolas duas, quæ solæ ex libris historiarum supersunt, explicandas sumerem: horum & illorum temporum & illorum temporum similitudo: crebritas & acumen sententiarum: delectus & nitor verborum: incredibilis, eadèmq; perspicua breuitas: ac in primis antiquitatis admiratio, cum eorum quæ amissa sunt desiderio coniuncta. Quemadmodum enim ex nobilium quondam oppidorum ruinis, projectisque cadaueribus, pristinam eorum magnitudinem animo concipimus: sic ex huius præclari operis, tanquam ingentis ædificij collapsi parietinis ac ruderibus, quale, & quantum olim fuerit æstimamus. Cætera sparsa, minuta, lacera, quæ docti diligentèsque viri vndique collegerunt,

nullum tanti corporis membrum efficiunt, ad quod abscissum seruatúmque, prisco ritu funerum, mortuo iusta faciamus, & æternæ Sallustij memoriæ parentemus. Quid quòd nec hæ concionum & epistolarum reliquiæ, ad nos integræ peruenire potuerunt; sed partim vetustatis iniuriâ deformatæ, partim librariorum inscitia & incuriâ corruptæ, malam insuper eorum manum expertæ sunt, qui, vt harpyiæ in Phinei mensis,

*Omnia contingunt, contactúque omnia fædant
Immundo.*

Eiusmodi hominum audaciæ qui resistunt; & librorum integritati, & commodis iuuenturis consulunt: quibus quia faueo impensius, quid ea de re censeam paucis ostendam. Iouis & Memoriæ filias pingi fingique virgines, nemo nescit: cur ita pingantur, finganturque, si quis ignorat, meminerit, hac nos imagine admoneri, cum in vniuersa vita, tum maximè in literis, vt virginali præditi simus modestiâ. Itaque verecundè se gerant oportet, qui in studiis humanitatis cum laude versari cupiunt; caueántque, ij præsertim qui de obscuris deprauatisque locis iudicandi partes deposcunt, ne à quoquam acerbè dissentiant: nève sibi, aut aliis nimium credant; & ante omnia, ne quid temerè affirmant; quia falsa veris, vt

vitia virtutibus, finitima sunt, paucique tenent eam notam qua verum à falso discernitur, tutissimam in scriptorum mæandris, atque labyrinthis insistant viam; qui, ubi occurrit species mendi, veteres libros, si copia est, adeunt: ut in rebus dubiis, magna cum religione, libros sibyllinos adibant Quindecimviri. Si nihil opis afferunt codices; alterâ progrediendum est opinionis, & coniecturæ viâ; quæ valdè præceps est, & lubrica; in variósque ducit errores: nisi suspensò gradu incedamus; & ut fit in tenebris, manu iter prætentemus. Lapsos enim quamplurimos, & quotidie per eam viam labi, certissimo indicio sint, *Variarum Lectio- num, Verisimilium, Coniectaneorum, Emendatio- num, Observationum*, & id genus innumerabilia volumina: in quibus eadem de re mille discrepantes reperiuntur sententiæ, cum plus una vera esse nequeat. Fateor sanè plerósque eximiâ doctrinâ viros, quòd in eluendis librorum maculis studium & operam suam libenter collocarint, bonam solidamque à præstantissimis auctoribus inisse gratiam: negari tamen non potest, quin hîc à multis multa peccentur, ut sunt ex Biantis oraculo οἱ πολλοὶ χακοί: quæ cuiusmodi sint si demonstra- ro, faciam ut quid vobis idem experientibus fugiendum, & quid sequendum sit intelliga-

tis. Principiò, nec ferendam putauì vnquam
certorum hominum in iis, quæ non probant,
mutandis confidentiam; & mihi sæpe risum, ac
interdum bilem, mouit ista verborum insolentia : *Ita hunc locum, solâ ductus coniecturâ,*
verissimè restitui : Nos primi ex ingenio felicissimè sic emendauimus: Dubium non est quin ita
scripserit, & ita repone meo periculo: Sic omnino legendum est, vel libris omnibus inuitis &c.
Aufer has, vt Comicus appellat, basilicas,
& imperiosas edictiones : indignæ sunt liberalibus disciplinis, in quibus nemo vnus regnum possidet. At enim, dicat aliquis, cùm hæc tota res arbitraria sit, vnicuique liberum est quid sentiat eloqui; & quæ videantur praua, corrigere. Ego contrà referam : quibusdam ea videri praua, quæ sunt rectissima; vt arquatibus, & veteriosis, quæ lutea non sunt lutea videntur : & vt stultis persuasum est nullum eorum qui sapiunt non insanire. Atque vtinam id & à paucis, & modicè tentaretur, Musarum vicem minùs doleremus; quarum ad hortulos depascendos nouum subinde correctorum, vt crabronum, examen aduolat; nec quisquam abigit, aut indignissimum facinus vindicat. Qui Prætoris album corrumpit, ingentis pecuniæ damno multatur : qui testamentum subiecit, partum supposuit, alienū chirographum
mitta-

imitatus est, tenetur lege Cornelia: qui mone-
tam adulteravit, capite plectitur: ij soli qui li-
bros adulterant, & sacro-sancta violant anti-
quitatis monumenta, impunè cum spongia
grassantur: delent, inducunt, circumscribunt,
toties stylum vertunt, ut plures in utraque pa-
gina lituræ quàm literæ appareant: nec prius
appingere & affingere de suo quicquid libet
desinunt, quàm totos ferè libros alios fecerint.
Nisi fortè cauillabuntur, aliam rem non fieri
partibus commutatis, ut de Thesei naue dis-
putatum est in scholis philosophorum: & à iu-
risconsultis responsum, eandem nauim existi-
mari, cuius alia facta sit carina, prora, puppis,
latera, malus, velum, antennæ, & gubernacula.
Aduersus hos librorum mangones, si repente
nunc existat aliquis è numero eorum, quorum
scripta manibus nostris teruntur: puta, Sallu-
stius ipse; profectò se in suis libris quæret, &
ignotorum hominum dissolutam benignita-
tem mirabitur, qui sibi nec roganti, & opulen-
tissimo, tantum de suis copiolis largiantur:
Idem ad extremum, misso ioco, his interpola-
toribus seriò irascetur; & aut Morboniam di-
mitter, aut Anticyram censebit esse deducen-
dam fanaticam correctorum coloniam. *Capras*
sanas, inquit Varro, *nemo sanus in lege venditio-*
nis promittit, quòd nunquam sint sine febris: ixeò

que dentem earum, & saliuam, arboribus esse venenum tradunt: ac inde nomen inuenisse, quòd carpant omnia. Qua ratione moti Astrologi, ita eas receperunt in cælum, vt excluderent extra limbum duodecim signorum: veriti, opinor, ne aliquod signum arroderent. Sic hæ bipedes capræ, siue potiùs hirci, perpetua febris laborant carpendi omnia; eùm interea se meros Chironas, & Podalirios esse credant, neque minùs gloriosè de se loquantur, quàm ille in Plauti Menæchmis Medicus, qui se ait obligasse crus fractum Æsculapio, & Apollini brachium: Non inficior multis librorum vulneribus, & viceribus faciendam esse medicinam: sed parum est, quòd horum manibus tractata recrudescunt vulnera, nisi sanæ parti scalpellum adhibeant. Medicum libri desiderant leui mollique brachio, & Critobuli similem; qui sibi gloriam peperit immortalem, extractâ Philippi regis Macædonû oculo sagittâ: & curata, citra deformitatē oris, luminis orbitate. Effrænatam correctorum licentiam non insectabor diutius; quamuis satis vituperari non possit, vt neque satis laudari eruditorum, ac bonorû virorum verecunda in eo genere industria: quos ego libenter, & honoris causa nominarem, nisi metuerem, ni quis eorum, quos nollem mihi succensere, vel à me non suo loco nominatum,

vel præteritum esse, quereretur. Reliquum est, ut fontem, unde ista manant vobis ostendam, ne quid ex eo fonte, vel eius riuulis, ad restinguendam inanis gloriolæ sitim, imprudentes hauriatis. Caput igitur erroris hoc est, quod ut molestum esse solet quicquid moram obijcit festinanti, ita quicquid nos ad optatissimum cognitionis & scientiæ finem properantes remoratur, ut odiosum tollere statim & amovere studemus, ne quid posthac nobis aut aliis exhibeat negotij. Enim verò delicias facimus, si quacumque ingredimur, cylindro æquari nobis solum, velut aræ ad trituram, volumus: & sybariticum Caligulæ renouamus exemplum, si longè profecturi, cum salebrosum, aut puluerulentum iter erit, velli nobis omnes scrupos; & verri conspergi que vias iubemus. Mitto; quod non rarò ignorationis nostræ causam libris adscribimus; & dum nos pudet nescire quæ nescimus, impudenter ea loco mouemus, quæ melius fuit non attigisse. Quippe ut sine populi Romani iussu, comitijsque Centuriatis, pelli quisquam ciuitate, aut in eam restitui iure non poterat; sic in libris, tolli, aut reponi oportet nihil, sine veterum librorum consensu, & maximo doctissimorum hominum quasi comitiatu. Dicam, quod & magis miremini: ne veteribus quidem libris auctoribus, id sem-

per esse faciendum: propterea quod, ut M. ipse Tullius vociferatur, & priscae membranæ clamant, constat ab iis ipsis qui hæc æterna ingenii sui monumenta nobis prodiderunt, multa sæpe mutata, aliterque scripta, & edita in vulgus fuisse. At veterum librorum usus, maiestasque omnis ita iacebit: mentisque nostræ aciem sinemus hebescere, si nullus erit coniecturæ locus? Eius rei componendæ perfacile ratio inibitur, si, editionibus intactis, quæ pridem vulgatæ sunt, separatim antiquæ lectiones, & seorsim coniecturæ excudantur; quibus tantum tribuo, quantum diuinationi hoc versiculo Ennius:

Bene qui conijciat, vatem hunc perhibeto optimū;

Γνώμη δ' αείσῃ, μάντις, ἢ' εὐβουλία:

ut ait in *Helena* Euripides. Plura fortasse de correctoribus quam par fuit; præsertim cum in eos nuper luserit acutissimo vir ingenio, & singulari doctrina, in eo libello quem *Somnium*, siue *Saturam* inscripsit. Nos tamen eius scrinia non compilauimus; Sed neque vobis, ut coniectoribus narrare somnium voluimus, & saturam ieiuni saturis reliquimus.

IOAN. PASSERATII PRÆFATIO
*in Catonis & Valerij Orationes
 de lege Oppia.*



TERTIVS hic est mensis ex quo celeberrimæ de lege Oppia controuersiæ interpretatio à me vobis debetur, Auditores: neque tamen vllam huius nominis non expediti culpam sustinet, aut meæ pollicitationis obliuio, aut moræ improbitas, aut fraudationis causa infamis latitatio. Istuc enim pensum iampridem confecissem, & suo tempore putatam rectè lanam reddidissem, nisi transuersa incurrisset dira vis morbi, quæ per urbem Academiàmque nostram diu grassata, necessitatem nobis attulit expectandi dum vel sub exitum Autumni consenesceret, vel hyemis aduentu omnino extingueretur. Nunc verò postquam teterrima lues, velut solemni ritu, & carmine procurata, procul hinc cum strigibus abierit *ἀποπύρεται νῆας*, alacriùs ad intermissa referamus nos studia, & aggrediamur ad legem Oppiam, de qua vel stabilienda, vel conuellenda, memorabilis exorta est inter M. Porcium Catonem

Consulem, & L. Valerium Tribunum plebis, contentio. Immensus hic aperitur campus, ubi liberiùs vagari, & exultare quævis possit oratio: sed mihi angustius curriculum ipse circumscribam, decursóque spatio, quod unicuique nostrum scho'æ consuetudine definitum est, consistam. Proficiscar autem ex iisdem carceribus ex quibus emissus Cato in mores mulierum inuehitur, suisque ciuibs ope summa nititur persuadere, ut indomito animali frenos iniicere velint, & impotentem naturam firmis legum vinculis coercere, ac constringere. Atque, ut exordiar ab immodico sumptu, luxúque muliebri; quando ἡ γυνὴ τὸ ὕψος ἔστι δαπανηρὸν, quemadmodum ait Menander; qualis & quantus est mundus ille immundus, cuius vsus tantum consistit in molliendis, pollicendis, fingendis, pingendis, comendisque mulierculis: ut sunt unguenta, cerussa, rubrica, purpurissum, specula, vossellæ, pectines, spongiæ, aciculæ, & calamistra. Adde ornamenta, in quibus recensendis, & explicandis, si laborant Iurisconsulti, quid infelices mariti faciunt in cõparandis? Cuiusmodi sunt, in aures, crotalia, armillæ, vitiole, aurum, anuli, margaritæ gemmæ, petiti ab Indico rubróque mari lapides: vittæ, mitræ, fasciæ, tæniæ, fibulæ, calantica, crocophantia, reticula, & anadema-

ta. Accedat iis vestis coloria, versicoloria, plumatilis, cumatilis, impluviata, ferruginea, cerina, ostrina, molochina, crocotula, caltula, violacea, lutea. Quo in numero sunt pallæ, pallia, togæ, tunicæ regillæ, stolæ, ricinia, capitia, zonæ, focculi, plagulæ, penulæ, & strophiola: Ancillarum, Eunuchorumque comitetur greges, vehant equi, muli, carruæ, lecticæ, sellæ, pilenta inaurata, & eburata carpêta. Hæc tam multa, tam varia, tot empta damnis, laboribus, & periculis, cui tandem rei? ut viri secum habeant, quod facetissimus & acutissimus ait Epicharmus, ἀνυχίας κοσμεμένας. Quid enim aliud est forma cultûque insignis mulier, quàm pulchrè exornata & expolita miseria? Proinde non immeritò exclamat Antiphanes,

Ὡς ἐστὶ τὸ γαμῆν ἑσχατον τῆ ἀνυχίᾳ.

Malorum extremum est uxorem ducere.

Quamvis autem theatra eiusmodi sententiis personent, paucas tamē proferam, suo quâque loco, & è leuioribus poëmatibus, ne ridiculum sit in nugis muliebribus agere tragœdias. Sequitur luxum ignauia, vetere notata palliaturum verbo, γυναικὸς πύγῃ: & excipit ignauiam libido, siue, ut mollius dicam, nequitia. Nam ut in aluearibus inutiles fuci, sic in ædibus desides feminæ, quicquid virorum operâ quæsitum, & coactum est, sciunt absumere:

quærere, & cogere, nesciunt; ideóque Gallinacei pedes iis esse perhibentur in Sirenum mythologia, quòd, vt gallinæ, pasci nequeant, etiam pleno in aceruo, quin dispergant & disperdant omnia. Quod genus mulierum Simonides ex alina scribit esse procreatum, quia nihil iis segnius est, ac tardius, ad rectè agendum; nec officium suum possunt, nisi malo, commoneri. Interim vestiuntur, pectuntur, lauantur, extergentur, alienis manibus, alienis pedibus ambulant; ac si quando pepererunt, quod inuitis accidit, à se continuò partus suos amandant, & ablegant. Melitæos videlicet catellos, vel simiolas, educare & gestare malunt, quàm liberos. Venio ad eatum impudicam impudentiam, & γὰρ ὅτι, inquit Alexis, ἀναίσχυρότερον οὐδὲν ἢ μέγιστον Γυναικός. Nulla muliere impudentior est bellua, aut quæ acrioribus stimulis libidinis concitetur. Helenas, & Clytemnæstras non commemoro: ipsa Penelope, cuius adeò nobilitata est Homericò carmine pudicitia, nōne ex Mercurio tertio; vel, vt alij tradūt ex omniū procorum congressu, Pana genuit? Sed quid ego muliebrem in terris quæro pudicitiam, cū nec in cælo usquam reperiatur? Casta & integra Minerva est, opinor. Quæne ex Vulcano genuit Erichthonium, & eum Apollinē in cuius tutela fuis-

ſc Athenas quondam crediderunt? Virgo Diana; quæ cum Virbio in ſyluis ſolet,

*Nudus & Endymion Phæbi cœpiſſe ſororem
Dicitur, & nuda concubuiſſe deæ.*

*Mercurioque ſacris fertur Bæbei dos undis
Virgineum Brimo compoſuiſſe latus.*

Quid quod ad Muſas ea ſtupri contagio peruenit & infamia?

*Hic quoque non neſcit quid ſit amare chorum.
Si tamen Oægrij quadam compreſſa figura
Biſtonijs olim rupibus accubuit.*

Vt taceam ex Strymone & Euterpe natum Rheſum. Non eſt igitur mirum tantam à viris adhiberi in cuſtodiendis mulieribus diligentiam, quas ſi Argus ſeruet, qui oculus totus fuit, is nunquam ſeruet, ut noſter loquitur Comicus. Naturâ enim eſt φιλέξοδος mulier, nec contineri limine poteſt: multo que minore negotio murus ab hoſtibus, aut à furibus pecunia defenditur, quàm arcetur à libidine mulier, ut idem ait, quem paullo ante nominavi, Alexis: ἔκ' ὅτιν, οὐτ' ἐτῆρος, οὐτ' ἐχρήματα; οὐδ' ἄλλο δουφύλακτον οὐδέν, ὥς γυνή. Par etiam imbecillitati membrorum, mentis contigit imbecillitas; nec incommodè in mulierem dixeris, quod in perſonam hiſtrionis Æſopi vulpecula: ταυτὴ κεφαλὴ ἐγκέφαλον οὐκ ἔχει. Qua de cauſa priſci rogati eos in perpetua tutorum pote-

state esse voluerunt; propter infirmitatem consilij; foro, concione, omni reip. administratio-
ne submouerunt; necnon abstemias esse iusse-
runt, capitali proposita iis poena quæ vinum
bibissent, ne commune mentis vitium propria
ebrietatis augeretur infania. Celebrata quo-
que est mulierum leuitas ore vulgi, γυναικὸς
φρένες: siquidem nolunt, vbi velis, vbi nolis, cu-
piunt vtrò: illudque Maronis, vt è tripode pro-
fectum accipimus, *varium & mutabile semper
Femina*. Neque tamen si prudentia constantiâ-
que vacant, ideo non calliditate pollent è ma-
litia: Δὲνα γὰρ αἱ γυναῖκες εὐεῖχεν τέχνας, in-
quit Menander: nec à Menandro Romanus
abludit Callimachus:

Sed vobis facile est verba & componere fraudes.

Hoc unum didicit femina semper opus.

Ac quoniam sunt non sublesta modò, sed &
scelesta fide, vt ab iis caueamus, ab eodem
poëta sæpiculè admonemur:

Μήποτε λάβῃς γυναῖκα εἰς συμβολίαν,

Ὡς ἔστι ἀπιστὸν ἡ γυναικεία φύσις;

Γυναικὶ μὴ πίστευε σὸν σαυτῷ βίον!

Γυναικὶ μὴ πίστευε, μήδ' ἂν ἀποθανῇ.

Mulierem ne tibi in consilium adhibeas. Quàm
res infida est sexus muliebris? Tuam ipsius vi-
tam mulieri ne committas. Nihil mulieri cre-
das, ne mortuæ quidem. Eodem pertinet lepi-

diffimum epigrammatum quod Arbitri Petronij nomine circumfertur:

Crede ratem ventis, animum ne crede puellis:

Namque est feminea tutior unda fide.

Femina nulla bona est; & si bona contigit una,

Nescio quo fato res mala facta bona est.

Hinc fit ut muliebris fides, ingenium, iusiurandum, prouerbiis agitentur. Futiles enim sunt, & plenæ rimarum mulieres; qualibet perfluunt; ac si quid earum vni semel narraueris, hoc erit, quod ait Antiphanes, πᾶσι τοῖς κήρυξιν ἐν ἀγορᾷ φεῖσθαι, omnibus id tradere præconibus medio in foro prædicandum. Hæc est muliebris suppellex, clarus clamor sine modo; & Eunomia Plautina ita de loquacitate nimia mulierum fatetur, ut neget mutam repertam esse vllam vlllo in seculo. Quamobrem argutissimè Xenarchus, qui longè fortunatiores censet esse hominibus cicadas: quòd in eo genere mares foli vocales sint, & mutæ prorsus feminæ:

Εἰ τ' εἰσὶν οἱ τέτιγες οὐκ εὐδαίμονες;

Ὡν ταῖς γυναιξὶν οὐδ' ὀϊοῦν φωνῆς ἐνί.

ferendum hoc esset fortasse aliquo pacto, nisi loquaci perfidiæ adjuncta esset crudelitas; ut in Propertiano miscentur versiculo:

Ah crudele genus, nec fidum femina nomen.

Confirmant id peruagati senarioli:

Θηρίων πάντων ἀγριωτέρα γυνή.

Item: *Ἰσὸν λεαίνης τῆς γυναικὸς ὁμότης.*

feratum omniū sanissima est mulier: & Leænæ mulierisque par crudelitas: satis Lemniarum mulierum scelere testata. Quin & ab eadem ratione vocatur mulier ἰὸς ἀσπίδος, quod ea nihil sit pestilentius. Hinc simultates, odia, bella, pugnae, caedes, agrorum vastitates, euersiones urbium, populorum interneciones, Ilias denique malorum, & γυναικῶν ὄλεθροι. Quocirca si quid vspiam est formidolosum, vt Empusæ, Lamia, striges, Gorgones, Grex, Harpia, Diræ, Furia, Febres, Mors, Pestis, habitu speciēque muliebri figuratur: vnōque mulieris nomine, quęcunque acerba homini eueniunt, continentur, sicut ipsæ suo iudicio testimoniōque satis comprobant. Nullo enim grauiore conuitio mulierum, verberantur aures, nec vquam in iurgio contumeliosius dimittuntur à viris, quàm cū istuc audiunt, *Abi, mulier es.* Statuite ergo tandem, vtrum satius sit cælibi vxorium pendere, an nuptiis venatorem fieri. Nam ita maritus à venusto poëta nominatur, qui cum rabiosa femina, tanquam cum cane ætatem exigit, & ad extremum sic habetote: sæpius renasci Phœnicem quàm mulierem bonam existere. Quæ à viris in mulieres jaciuntur, multis tamen consultò prætermisissis, hætenus exposui: nunc ea quo pacto refellantur, paucis accipite. Longa & inuidiosa in reprehensione sumptus luxūsque muliebris con-

sumpta est oratio, cui facillimum ita respondere, Munditiem & ornatum semper matronas decuisse, virisque earum placere. Si cui displiceant alieno, hunc sordido, horrido, & inculto ingenio esse oportere. Sumptum qui in iis fiat, nec inhonestum esse, & ciuibus suis saluti interdum fuisse: ut cum matronæ aurum omne suum duris patriæ temporibus in publicum certatim contulerunt. Quod illis redditum est à Senatu, auctumque multo verborum & rerum honore. Viros contrà, priuatae luxuriæ causa, sæpenumero publicum rapuisse, focios expilasse, vexasse prouincias, fana spoliasse; ut subuersis montibus, constratòque mari, domos & villas in vrbiū modum exædificarent. In piscinas, balneas, intempestiua conuiuià, aulæa Babylonica, conchyliata peristromata, signa, tabulas, toreumata, Deliaca, & Corinthiaca vasa malè parata, malè profudisse: quorum nihil omnino in sobriam mulierum elegantiam cadit. De ignauia non dissimilis est calumnia. Quod enim domi sedent, nec ullam reip. partem attingunt, ea virorum est injuria, qui jobent; non mulierum culpa, quæ injusto parent legum à viris latarum imperio, si leges eæ sunt quæ per vim latæ, potentiorum commodis tantum seruiunt. Falsum & delibidine quod arguitur. Vtrius enim libido ma-

ior? eius qui rogat, an quæ rogatur? eius qui cogit, an quæ cogitur? Helenæ multæ sunt & Clytemnestræ: paucioresve sunt Parides & Ægisthi? Impudentes mulieres: non impudentior est & scelestior qui deas audet insimulare impudicitia? Verum *deorum injuria dÿs cura*, vt Cæsar aiebat Tiberius. Imbecillæ mulieribus vires: Ingens crimen, quo crimine, constituto inter brutas animantes iudicio, lupi damnant oues, & Aquilæ columbas, ne videantur innocentes discerpere. At est mulieribus omnibus infirmitas consilij. Si bonam mentem dii mulieribus ademerunt, vt viris tribuerent, eorumque esset peculiaris prudentia: scire velim cur scriptum sit in duodecim, si furiosus existeret: cur à prætore tot curatores dentur, cur tot Corœbi & Tuditani ad agnatos gentilesque deducantur. Sola videlicet Agaue bachatur in scena: Nullus illic fuit Pentheus: non Alcæon & Orestes insaniunt: nec inter ceritos elleborosos, & lymphaticos palman possidet Hercules. Leues & infidæ mulieres. Vnde ergo iustissimæ mulierum de viris querelæ?

Nusquam tuta fides!

Heu, ubi pacta fides? ubi qua iurare solebas?

Tum iam nulla viro iuranti femina credat.

Femina nulla viri speret sermones fideles.

*Qui dum aliquid cupiens animus prægestit
apisci,*

Nil metuunt jurare, nihil promittere parcant.

Sed simul ac cupida mentis satiata libido est,

Dicta nihil metuere, nihil periuria curant.

Postremum hoc suum viri agnoscant ex Lacedæmonij Lyсандri præcepto: Pueros fallendos esse talis, viros jurejurando. Prætermisi quæ de calliditate & fraudibus balbutiunt; quia si concedam esse vera, suam inficiari non poterant stultitiam & vecordiam, quibus tam facile os sublinant mulierculæ. At nimium tinnunt mulieres, earumque odiosa loquacitas. Cõferte (quæso) blandos & argutos mulierum sermones cum philosophorum disputationibus, clamoribus sophistarum, causidicorum altercationibus, rabularum conuitiis, strepitumque concionum, mulierum loquacissimæ videbuntur lusciniolæ, viri plusquam hirundines. Reliqua est crudelitas, quæ quia in tam blando mollique ingenio, ac miti, est incredibilis, confugiunt ad poëtarum testimonia, fabulas aniles, & mera portenta pictorum. Quid est in re atrocissima nugari, si hoc non est? Monstra quædam esse narrantur muliebri specie. Quid artes? quid artium præfides musæ? quid virtutes ad beatè viuendum certissimæ duces? quid ipsa rerum omnium parens natura?

Nónne muliebri specie finguntur? Pudet me harum ineptiarum: Redeo ad seria, crudelitas est ubi furta, rapinæ, latrocinia, cædes, incendia, parricidia, sacrilegia, quæ omnia esse constat virilia non muliebria facinora. Et qualibet Busrídes, Phalarides, Mezentij, Caligulæ, ac Nerones. Age, si tam horribilis res est mulier, cur legis Oppiæ acerrimus propugnator M. Cato, in gremium & amplexum vxoris currebat potissimum cùm intonuisset? si mulierum tam importuni & intolerandi mores, cur alteram vxorem duxit extrema jam ætate? Cur vitum qui manus mulieri suæ adferet, proximum sacrilegio admittere scelus adfirmabat? Vrgemur poëtarum auctoritatibus: & iisdem subleuamur.

Ζῆε γυναικα δύμμάχον τῶν πραγμάτων.

Βίον χαλὸν ζήσεις, εἰ γυναικ' ἔχῃς.

Καλὸν φυτὸν πέφυκεν ἐν βίῳ γυνή.

Γυνὴ δικάια τῷ βίου σωτήριά.

Mulierem quærito rebus tuis sociam & adjutricem, honestam vitam ages, si vxorem habueris: egregia stirps est quædam in vita hominum mulier, inquit Menander. Et Antíphanes πῶς ἡδίων Γυναικὸς; πῶς δὲ λυγρότερον; quid muliere iucundius & suauius? Obruerer, si pergere porro liberet, exemplorum rationumque multitudine: sed modus esto

esto huic præfatiunculæ, in qua explicauimus
potius legis Oppiæ argumentum quàm sen-
tentiam nostram interposuimus. Non enim
in tantâ controuersia Catonis aut Valerij par-
tes sequimur, ne, si Catoni contra Valerium
adsumus, parum habeamur fortes, qui cum
mulierculis bellum geramus: sin à Valerio
consistamus aduersus Catonem, parum sani
existimemur qui in eiusmodi caussa oppugna-
re Catonis virtutem sapientiâque audeamus.

IOAN. PASSERATII PRÆ-
*fatiuncula in Ouidii consolationem
ad Liuiam.*



OST optimorum auctorum in-
terpretationem, Plauti, Cicero-
nis, Sallustij, Liuij, Catulli, Vir-
gilij, & Propertij, quos in manus
sumpsimus, ab eo tempore quo
Rex inuictissimus, æternæque memoriæ digni-
simus, Carolus eius Nominis nonus, huic nos
muneri præfecit, nunquam putauimus fore ut
Ouidianum aliquod opus attingeremus. In-
ueterauit enim opinio, vulgique fama percre-
buit, eum poetam esse non multæ doctrinæ,
humilisque & nimium luxuriantis styli; atque
etiam, si diis placet, Latinæ linguæ elegantiam

nitorémque in eo requiri: adeò vt Italus quidã vel hac re imprimis nobilis, cùm humanioribus literis vnicũ gnatum imbueret, illa miro artificio contexta mutatae ter quinque volumina formæ in patrium sermonem conuerterit, ne, si Latine legeret, ex Ouidij scriptis sor-des & barbariẽ colligeret beata pueri vena, quæ iam tum ad exemplũ Maronis properabat, vt pleriq; Italorũ, propè ab incunabulis, meri existunt iudicio suo Marones. Delicias hominis! quas an gens sua riserit nescio, musas profectò ipsas, quamlibet nũc tristes, arbitror risum non tenuisse in tam delicato & Sybaritico fastidio. Siue igitur errore vulgi, consensũque multitudinis, siue alia ratione inductus, nondum vt dixi, quicquam de Ouidio explicando cogitaram. Sed cùm sceleratus hic annus sororis filium egregiæ indolis mihi eripuisset, acerbũque eius desiderium niterer mutis librorum solatiis & alloquiis lenire, accidit vt inter cætera Ouidij quoque ad *Linia carmẽ cõsolatorium* percurrerem. Cuius carminis bis tẽrque repetita lectio mœrorẽ meum auxit potius quàm minuit: hoc tantũ sum assequutus, quòd aliquantò libentius lugere cœpi, vt sæpe fit infelicitis animi praua voluptas dolor. Accessit ad priuati casus recordationem imago publicæ calamitatis, & oculis obuersata est flebilis pa-

triæ species, quæ tot plagis cōfecta, & tāquam elata funere, ad dispergendas eius reliquias pluribus simul rogis imponitur. O miserā rerum faciem, & luctuosum spectaculum! Ardet iamdiu bello Gallia; communis omnium parens, quæ nos genuit, excepit, educauit: & vix est vt tantum excitatum incendium nr̄i florentissimi quondā regni ruinā restinguatur: quod omen in hostium capita Deus auertat. Verūm abstineamus vngues ab hoc vlcere, ne retractione crudescat: quāquam nec laurus, dum crematur, tacere potest, nec vir bonus, bonusque ciuis, intueri sidentem in cineres patriam; & sentire ardorem flammæ, quin queratur & ingemiscat. Mortalis tamen accusandus est nemo: culpam huius vastitatis sustinet

Fortuna saeuo leta negotio:

Iniurioso quæ pede proruit

Stantes columnas, cum populus frequens

Ad arma, cessantes ad arma

Concitat, imperiūque frangit:

Onerandum est inuidiā crudele fatum, cuius æternæ legi de ortu & interitu rerū humanarū, neque vlli Tribuno intercedere licet, nec vllis populorum comitiis & suffragiis vel derogare vel obrogare. Nam abrogare ne diis quidē cōceditur. Vocāda in partē criminis natura, quæ certas esse voluit ciuitatum & imperiorum

conuersiones ac euerfiones. Fuerunt hæc quæ
 patimur semper, & semper erunt; Conquiren-
 da modò eiusmodi malorum, cùm eueniunt,
 folatia. Vnde, inquires? non è libro de conso-
 latione, Ciceronis' nomine non ita pridem
 edito? minimè verò. Valeat Pseudo-Cicero, vt
 hybridam vocem vsurpem, & cum Pseudo-Ci-
 cerone facefiat Pseudo-Cornelius - Gallus.
 Ad auctores suos, qui nos fungos putant, re-
 deant trans Alpes, vnde huc malum pedem at-
 tulerunt. Leuabit melius ægitudine nostram,
 quæcumque ex publicis vel priuatis malis
 continget, is qui Liuiæ mœrorem tam bene
 permulcet. Cnidiûs: rationibus argumentis que
 peruincet, humana omnia esse humanè & mo-
 deratè ferenda: molli objurgatione querelas,
 muliebrésque eiulationes excutiet; virorum
 fortium exemplis singultus premet, ac recon-
 det gemitus: alloquutione blanda lacrymas
 abstergebit: & verum esse demonstrabit quod
 ait in oratione *ἡ εἰρῆνης* idifertissimus ac sua-
 uissimus Rhetor Isocrates: *ταῖς ψυχαῖς ταῖς νο-*
σοῦσαις οὐδὲν ἔστι ἄλλο φάρμακον, πλεὺς λόγος.
 Quibus consentiunt hæc in scenis & scholis
 decantata:

Ψυχῆς νοσοῦσας εἰσὶν ἱατροὶ λόγοι.

Λόγος γὰρ ἐστὶ φάρμακον λύτης νόσου,

ὁ λόγος ἰατρός τῶ κατὰ ψυχὴν πάθους.

Nēpe, vt canes vulnera sua lambendo, sanant, illisque pro medicamento est lingua : Sic animo ægroto, & ictu doloris saucio, salutaris est tempestiuè adhibita orationis medicina. Memoria prodiderunt Democritus & Theophrastus viperarum hominūque morsus quibusdam tiliarum infractis modulationibus curari: quod & Ischiadicis existimant prodesse plurimū. Contrà, cū Phrygios mōdos tibicen incinebat, quasi repentino furore, ac rabie perciti, Galli Cybeles, ferrū in se stringebant, & membra sua laniabant, quæ vtinam insania tanto interuallo ad eorum gentiles non peruenisset. Non dissimilis est vis orationis & facultas, quæ si vehementiūs in aures audientium infunditur, quantumuis quietas & sedatas mentes concitat ac perturbat: si leniūs influit, perturbatas & concitatas sedat, oleoque tranquilliores reddit. At istæ philosophorum, non oratorum, sunt consolandi partes? Quid si philosophos ipsos ostendero suos hortulos, vnde remedia morbis animorum petunt, Ouidij fontibus irrigasse? Optimè, vt mea fert opinio, de luctu minuendo scripsit L. Annæus Seneca. Perlegite eius consolationes ad Polybium Claudij Cæsaris libertum: ad Martiam Cordi Cremutij filiam; ad Elbiā matrem: nisi mihi concesseritis Senecam id totum Ouidij

carmen peruolutasse, edidicisse, in libros suos trātulisse: ego vobis concedam me nihilò plus sapere quàm betam. Si non erit otium, aut pigebit perlegere, istum laborẽ vobis demam, & inter explicandum singillatim indicabo quid ex Ouidio Seneca sumpserit, quid subriperit: quàm astutè dissimularit mutuum, & quàm callidè commutatis verbis, ceu signis & notis sententiarum, furtum suum occultarit. Interpellabit hĩc aliquis, & à me Ouidium dicet falso alienarum virtutum præconio commendari: quoniam eruditi viri nuper huic carmini C. Pedoni Albinouani nomen inscripserunt. Fateor, & valde sum admiratus: nec adhuc intelligere potui cur id fecerint. Veteres certè membranas, libròsque manuscriptos, sicut consueuerunt, eius rei testes nullos producunt: & vt producerent, quis æquus Prætor infirmis & titubantibus librariorum testimoniis fidem haberet, & secundum eorum tabulas litem daret: ac non potius vetaret interdicto, ne Ouidius de antiqua possessione, & velut de auito fundo deiiceretur? Aliò cõfugiunt, & Ouidianum characterem non esse, nobis persuadere conantur. Equidem si versarer in meis numis, & illi parum locupletes essent, meam illis pecuniam citiùs quàm istuc crederẽ. Quòd autem aiunt clientem Drusorum fuisse Albi-

nouanū, & idcirco hæc scripsisse laudē Drusi, cuius comes in Germania fuisset, & nauigationem in Oceano versibus mandasset, eorum pace dixerim, frustra sunt: Siquidem ex iis ipsis versibus, qui hodiēque extant apud Senecam, & ex Corn. Tacito, satis liquet non ad huius Drusi, sed ad Germanici filij nauigationem eos versus referri oportere. Nec meliūs diuinant, cūm hariolātur eundem esse Celsum Albinouanum, scribam Tiberij Neronis, æqualem & familiarem Horatij. Numquam ille fuit tam magni oris ac spiritus vt eiusmodi carmē funderet, homo pertenuis ingenii, nec ingenui pudoris, vt apertè testatur Horatius in quadam ad Iulium Florum epistola:

Quid mihi Celsus agit? monitus, multūmque monendus

Priuatæ vt querat opes, & tangere vitet

Scripta Palatinus quacūmque recepit Apollo:

Ne si fortè suas repetitum venerit olim

Grex auium plumas, moueat cornicula risum

Furtiuus nudata coloribus. ---

Postremò, ne cuiquam amplius illudat hæc Æsopica Cornicula, néve, vt Cumanus assellus Leonis gerat exuias, plus quinquaginta locorum comparatione ita comprobabo esse Ouidii, vt, quod ait malus arbiter comicorum, si quis contrà sentiat, nihil sentiat.

Vnum hoc duntaxat superest, vt Quidiani carminis argumentum paucis eloquar. Augusto Cæsari duas fuisse vxores accepimus, Scriboniam, & Liuiam. Sponsæ enim Seruiliæ Isaurici filiæ conditione vti noluit, & Claudiam Fulviæ virginem intactamque dimisit. Scriboniæ mores, ex qua filiam suscepit, Iuliam, legis Iuliæ dedecus, ferre non valuit eamque sibi res suas habere iussit. Liuiam cognomento Drusillam, captus insigni forma, matrimonio Claudij Tiberij Neronis, cui jam filium Tiberium generat, & ex altero gravidam, domum abduxit, vbi intra mensem tertium hunc Drusum peperit, cuius mortem deflet Quidius, olim Decimum, mox Neronem prænomine, quem tanta suspicio fuit ex vitrico per adulterij consuetudinem pro creatum, vt Græcus senariolus vulgò iactaretur:

Τὸς εὐλυχοῦσα ἔριπεν αἰσίδα.

Ex Liuia nihil Augustus liberorum tulit: nihilominus in liberum loco ac numero priuignos habuit Tiberium atque Drusum: eosque ad reip. curam admouit, & iussit imperij partem capeffere. De Tiberio nihil necesse est plura dicere: frater eius Drusus, in Augusti gratiam à Senatu legibus solutus, ante legitimam ætatem Quæstor, Prætor, & Consul factus est. In Quæsturæ & Præturæ honore dux Rhetici,

deinde Germanici belli præclarissimas res gestit, quas recensebit Ovidius, unde jus ouandi & triûphalia cepit ornamenta. Post præturam, inito statim consulatu repetiit expeditionem Germanicam, vbi morbo, quem ex equi lapsu contraxerat, supremum diem obiit, in æstiuis castris, quæ ex eo scelerata sunt appellata. *Adolescens ille, inquit Velleius, tot tantarûmque virtutû fuit, quot & quantas natura mortalis recipit, vel industria percipit: cnius ingenii utrû bellicis magis operibus, an ciuilibus suffecerit artibus in incerto est. Morum certè dulcedo, & suauitas & aduersus amicos aqua, ac par sui æstimatio, inimitabilis fuisse dicitur, & eximia corporis pulchritudo. Illum autem magna ex parte domitorem Germania plurimo eius gentis, variis in locis, profuso sanguine, fatorum iniquitas, consulem, agentem annum tricesimum, rapuit. Nihil attinet commemorare quâ pompâ, (ea triumpho simillima fuit) corpus relatum in urbem, crematum, sepultumque in campo Martio: utque defunctum, cum pro concione laudaret Augustus, deos precatus sit, similes ei Cæsares suos facerent, sibi que tam honestum quandóque exitum darêt, quàm illi dedissent. Elogium insuper versibus à se compositis, sepulcro inculpsit, prosaque oratione, vitam eius complexus est. Liuia mater audita morte filij, in primo illo furore, cum*

maximè feroces, impotentésque sunt miseræ, se consolandam Arrio philosopho Alexandrino præbuit: eaque orbitate masculum animū, feminaque principe dignam constantiam exhibuit; ut quæ simul cum cinere atque ossibus filij dolorem suum eius tumulo intulerit. Hæc è Velleio Paterculo, Seneca, Plinio, Suetonio, Cornelio Tacito, epitoma Liuij in pauca contulimus, ut apertior vobis esset & planior ad Ouidiani carminis explicationem via. Habetis brevis libelli breuem præfationculam: quæ tamē vereor ne sit æquo prolixior: & imitatus existimer malos architectos, aut ineptè ambitiosos patresfamilias, qui ne in re angusta videantur angustè habitare, aliquando paruis ædibus magna præstruunt vestibula.

IOAN. PASSERATII IN OVI-
dij Armorum iudicium
Præfatio.



UNQVAM fore putarem ut semel explicata consolatione ad Liuiam super morte Drusi, Ouidium rursus attingerem: non quòd eum auctorem aspernarer, quem semper existimaui perbonum & peru-

rilem stylo iuuentutis: sed quod istam operam
arbitrarer in obscurioribus scriptis illustrandis
melius collocari posse. Mutavi tamen consi-
lium; nec propterea leuitatis & inconstantiæ cri-
men pertimesco: quin vos quoque spero meâ
rationem esse probaturos, vbi cur id fecero
intelligetis. Primum quærenti mihi & circun-
spicienti libellum qui horum dierum breuitati
conueniret, occurrit mihi hæc de Achillis ar-
mis inter Ajacem & Vlysssem contentio paucis
descripta versibus: simulque obiecta Teren-
tiani Getæ religio, quâ facilius moueor, quod
meæ fauet ignauix: *Interdixit hariolus: Ha-
ruspex vetuit aliquid magni ante brumam in-
cipere.* Deinde ab officio nostro, susceptâ
que eloquentiæ professione, non est id car-
men alienum, in quo nota Rhetorum præce-
pta nemo desideret: siue ad fidem facien-
dam, siue ad flectendos permouendosque
animos eorum qui audiunt: omnesque fa-
teantur esse verissimum quod in libro primo
de Oratore scribit Marcus Tullius: *finitimus
est oratori poëta, numeris deuinctior paulò, verbo-
rum licentiâ liberior, multis ornandi generibus so-
cius, ac penè par, in hoc fermè idem, quòd nullis
circumscribat terminis ac desiniat ius suum, quo-
minus ei liceat, eadem illa facultate & copia, va-
gari quâ vellet.* Et in libro tertio: *Poëtis est cum*

oratoribus proxima cognatio. Item in Oratore ad Brutum: Etiam poëta questionem attulerunt, quidnam illud esset quo ipsi ab oratoribus differrent: numero antea videbantur & versu: nunc apud oratores numerus increbuit. Hoc autem laudabilior est poëta, quòd Oratoris virtutes persequitur, cum numero sit astrictior. At hoc poëma in minutis scholis tritum, & pueris decantatum, parum hujus loci amplitudinem decet. Improbum facinus, & animaduersione dignum censoria. Ecquid tam protritum, ecquid tam proculcatum quàm vrbis viæ, quas equi, boues, asini, muli, hominésq; clitellarij, assidue terunt? Ideóne me continebo domi, ne bipes ingrediar inter quadrupedes, & carebo publico, ne minuam majestatem ordinis; vel, si prodire huc velim, cogar dignitatis caussâ, cum simiis & felibus in tegulis ambulare? Non ascendam illuc, opinor: imitabor potius Chalcidensem T. Quintij hospitem: atque vt ille bellus scitúsque conuiuator, cum Imperatori Romano, ejúsque prætorix cohorti cœnam daret, omne genus venationis, speciémque ferinæ carnis, variis cõdimentis effinxit: Sic ego easdem istas vulgares epulas, vt cæteri, nempe Ouidium, vobis apponam, sed alio pacto condiam. Libet enim magnifica verba fundere, vt gloriosi coqui solent in Comœdiis. Tenuis erit forsitan ap-

paratus : nimirum in re tenui : quanquam, si Maroni credimus apiculas suas jactanti;

*In tenui labor, at tenuis non gloria, si qua
Numina lana sinunt, auditque vocatus Apollo.*

Huc adde quod ad interpretationem Ouidii passim Homerus adhibendus, aduocandus sæpe Sophocles, aliique Græcæ principes Tragoediæ : conquirendæ colligendæque sparsæ ac laceræ poëtarum reliquiæ qui Latinè eam fabellam expolierunt, vt Attius, & Pacuuius, omnisq; æui doctissimus M. Varro: nec Lilius Andronicus Enniusque sunt prætermittendi, quos vertisse Ajacem ex antiquis grāmaticis cognoscimus. Horum si extarent integræ tragoediæ, hodie, ne quid dissimulē, nihil mihi esset cum Ouidio negotii : nunc, quod solum licet, cū Ouidianis conferā fragmenta, quæ superesse voluit tēporū injuria: eaque locorū inter se comparatio, nisi fallor, vobis erit non injucunda. Istuc autem quod armorum judicium vocauerunt, valde olim probatum celebratūque fuit: Cēsaremque ipsum Augustum in eo genere luisse jocus illius indicat, quem refert Macrobius his verbis. *Ajacem tragædiam scripserat; eamque, quod sibi displicuisset, deleuerat. Postea Lucius, grauis tragædiarum auctor, eum interrogauit, quid ageret Ajax suus, in*

spongiam, inquit, *incubuit*. Præterea nobiles pictores, ut sunt gemini germani poetarum, (ὅτι καὶ ζωγραφία ποίησις σιωπῶσα, ποίησις δὲ ζωγραφία λαλοῦσα) in eo se argumento libenter exercuerunt, suasque tabulas iis coloribus inusserunt. Timæthem & Parrhasiū testor, quorum hic, Sami, magnis suffragiis, ut Plinius loquitur, ab illo, in Ajace armorumque iudicio superatus, heroïs nomine, se molestè ferre dicebat, quod iterum ab indigno victus esset. Itaque in eo carmine nec opera mea nec vestra ludetur: nec si prior socco stylus hic quàm cothurno, vobis vilior habebitur: nisi fortè quosdam ab Ouidij lectione abducit Senecæ Philosophi, & Fabij Rhetoris auctoritas, qui Ouidio non multum tribuunt, siue potius plurimum detrahunt. Fabio prius, posterius Senecæ respondebo. Fabius in libro decimo Institutionum Oratoriarum, capite primo, ubi de vi & facultate poetarum utriusque linguæ differit, ita de Ouidio pronuntiat: *Lascius in heroicis quoque Ovidius, & nimium amator ingenij sui*. Nec procul hinc: *Ovidius utroque (Tibullo & Propertio) lasciuior*. Ac paulò post: *Ouidij Medea (id tragædiæ nomen) videtur mihi ostendere quantum vir ille præstare potuerit, si temperare ingenio suo quàm indulgere maluisset*. Amat inge-

nium suum Ovidius: magnum crimen, & ad tribunal L. Cassij quæstoris deferendum! Mirum ni oderit: more hominum facit, & præcipuè poëtarum, qui omnes Suffeni sunt & Aquinij. Indulget Ovidius ingenio suo: aduetum credo, est aliquid ex Africa novi: an si ingenio suo indulgeret, sapere multorū judicio diceretur, Fabij sententiā diceretur insanire quòd suo indulget ingenio? Bonis nostris benigniùs & liberaliùs, citra reprehensionem, nobis uti conceditur. Nostris ingeniis, tanquam equis, quò libitum est cūmque vehimur: campūmque & planitiem nacti, non tam iis adducimus habenas, quàm laxamus & immitimus. Lasciuit Ovidius, & luxuriat, hoc ego laudi duco quod tu vitio vertis: quod tu obesse putas, id ego prodesse adolescentulorum studiis existimo. Et verò peruinca, eo si cerтемus iudice quem tu iniquum ejerare non audeas. *Volo, inquit M. Tullius in libro secundo de Oratore, se efferat in adolescēte fœcunditas. Nam faciliùs, sicut in vitibus, reuocantur quæ se nimium profuderūt, quàm si nihil valet materies, noua sarmenta culturā excitantur: ita volo esse in adolescente unde aliquid amputem. Non enim potest in eo succus esse diuturnus quod nimis celeriter est maturitatem adeptum. Sed quid ego M. Tullium appello? Te tibi iudicem fero; te tuis*

damnabo tabulis, qui longè plura in eam sententiam disputasti *capite quarto libri secundi*, quæ & breuitatis causâ prætereo: & vt ad Senecam veniam, cuius quo nomen est maius & grauior existimatio, hoc est accuratiùs censura refellenda. *In libro controuersiarum secundo, controuersia tertia*, (quod opus patrisne Senecæ, an filij sit, aliàs videro) hæc de Ouidio leguntur: *Declamabat Naso rarò controuersias, & non nisi ethicæ: libentiùs dicebat suasorias: molesta illi erat omnis argumentatio: verbis minime licenter vsus est, nisi in carminibus: in quibus non ignorauit vitia sua, sed amauit. Manifestum potest esse, quòd rogatus aliquando ab amicis suis vt tolleretur tres versus, inuicem petijt, vt ipse tres exciperet, in quos nihil illis liceret: æqua lex visa est: scripserunt illi quos tolli vellent: in iisdem codicillis iidem versus erant: ex quibus primū fuisse narrabat Albinouan^o Peto; qui inter arbitros fuit:*

Semibonemque virum, Semiuirumque bouem:

Secundum:

Egelidum Borean, egelidumque nothum.

(Valdè mihi dolet versum tertiū intercidisse.)

Ex quo apparet, subitigit Seneca, summi ingenij viro, iudicium non defuisse ad compescendam licentiam carminum suorum, defuisse animū. Aiebat interim decentiorem faciē esse, in qua aliquis nauus inesset. Purgauimus ista ferè suprà in defensione

lasci-

læstiviæ & luxuriæ quæ obijcitur à Fabio: quod autem ad næuum attinet, assentiretur Ouidio gravissimus auctor Alcæus, quem næuo in articulo pueri impensius delectatum esse accepimus. Pergit in Ouidiū Seneca, & in controuersia septima libri tertij: *Alsius*, inquit, *Flauus hanc sententiam dixit: Ipse sui & alimentum erat, & damnum. Hunc Cæstius, quasi corrupte dixisset, obiurgans: Apparet te pœtas studiosè legere. Iste sensus est eius qui hoc seculum amatoriis non artibus tantum sed sententiis impleuit, Ouidius enim in libris Metamor. dicit:*

Ipse suos artus lacero diuelleremorsu

Cæpit, & infelix minuendo corpus aiebat.

Idem in controuersia quinta libri noni. *Habet hoc Montanus vitium: sententias suas repetendo corrumpit. dum non est contentus unam rem semel bene dicere, efficit ne bene dixerit: & propter hæc & alia, quibus Orator potest pœta similis videri, solebat Scaurus Montanum inter Oratores Ouidiū vocare. Nam & Ouidius nescit quod bene cessit relinquere. Non multa referam quæ Montania Scaurus notabat, uno hoc contentus ero. Cum Polyxena esse abducta, ut ad tumulum Achillis immolaretur, Hecuba dixit:*

--- cinis ipse sepulci

In genus hoc pugnat.

Poterat hoc contentus esse, adiecit:

--- tumulo quoque sensimus hostem.
Nec hoc contentus adiecit :

Ajacidæ fœcunda fui. ---

Ajebat autem Scavrus rem veram : non minùs magnam virtutem esse, scire desinere, quàm scire dicere. Attendite quàm cæca sit aliena carpendi cupiditas; dum Ouidiom insimulat vitiij, errorem insignem errat, cùmque duplicem : & quòd hæc ab Hecuba dici ait, antequàm Polyxena immolaretur, quæ dicuntur ab Hecuba in hoc libro post necem Polyxenæ : & quòd ea reprehendit in Ouidio quæ in summis & poëtis & oratoribus laudantur. Homerus in Achillis ad matrem querimonia, ἐλὼν γὰρ ἔχει γέρας αὐτὸς ἀπούρας. Ter idem dixit ἐλὼν, ἔχει, ἀπούρας; nec vitiosum esse quisquam putat. Virgilius in oratione Ilionei:

Quem si fata virum servant, si vespicitur
aurâ

Aetheriâ, nec adhuc crudelibus occubat umbris.

Sermonem hunc nemo non emendatum putat cùm satis fuerit vnum è tribus dixisse. Simile Ciceronis illud in perduellionis caussa : *Inclusum atque abditum latere in occulto : & ignaviam suam parietum ac tenebrarum custodiis tegere.* Eiusmodi trecenta memorari possunt, quæ si in aliis dicendi virtutes habentur, cur in

Ouidio vitia existimentur, nihil causæ video, nisi in eo Senecam voluisse caninam exercere facundiam; & seueri censoris partes agere, quasi nihil vnquam in vita aut scriptis deliquerit. Quod sanè mihi verbum Catonis in mentem reuocat, *qui mirari se aiebat cur non Aruspex rideret, cum Aruspicem aspiceret*: Ita Senecam miror tenuisse risum quoties libros suos legeret, vbi commendat paupertatem feneratorum omnium locupletissimus, & laudat clementiam præceptor Neronis. Neronem de industria nominaui, vt ex ouo qualis coruus fuerit æstimetis. Et quomodo fuisset æquus Seneca Ouidio, qui Mœcenati, communi poëtarum parenti, quotquot aureo illo exorti sunt Augusti sæculo, tam infensus fuit? eius mores, facta, dicta, verba denique singula sic carpit, vt videatur in eo mustaceo laureolam quærere: & in virum post homines natos optimum, beneficentissimūque, malignum petulantis linguæ virus effundat. Ista videlicet mella legerat quondam *exul inter Corsici rupes maris*. Si hæc in Senecam acerbius, ignoscite; eò me prouexit, non odium Senecæ, sed Mœcenatis amor: &

Hoc si crimen erit, vt ait Propertius, crimen amoris erit.

Nolim illo pacto violare sanctitatem ma-

nium : verum non tam est immanitas violare manes, quam humanitas violatos manes vlcisci. Satisfaciat Ovidio & Mæcenati, ego cum illo rediero in gratiam. Sentio & loquor vt Plautinus Tranio in Mercatore: *Mihi pax est cum mortuis.*

*Ossa quieta, precor, tuta requiescite in urna,
Et sit humus cineri non onerosa suo.*



IOAN. PASSERATII PRÆFATIO
in Epithalamium Catulli. .

DE vetere nuptiarum apud Romanos ritu verba facturi, quod antiquæ religionis, ac pietatis, semper fuit, Deos præfabimur; & eos præcipuè commemorabimus, quos esse matrimoniorum præsides censuerunt.

Principium à Ioue ducemus, Iupiter quẽ δία τέλειον appellabant; Suidas, Polux, & Eustathius, rectè γαμήλιον interpretantur. Is verò inter conjugales Deos colebatur, ὅτι Ζεὺς πατὴρ καλεῖται πάντων, ut ait Dionysius Halicarnasseus.

Nec alias de caussa ἥραν τελεῖαι καὶ ζυγία venerabantur, quam Iunonem Iugam Iuno: Latini vocant, à viris feminisque conjugandis, cui Romæ ara fuit in vico, qui ob id Iugarius nuncupatus. A variis autem officiis, varia sortita est Iuno cognomina; modò enim Pronuba dicebatur, quòd in ejus tutela essent nubentes; modò Cin-

xia, à virginalis solutione cinguli: modò Vnxià, ab vngendis januæ maritalis postibus: modò Curitis, ab hasta ferenda: quod cùm sit imperij symbolum, subiiciendam significabat imperio viri vxorem: modò Domiduca, vt Deus quoque habebatur Domiducus, eadèmq; Iterduca, nisi potiùs Introduca legendum sit, quòd mariti domum nouam nuptam duceret, & in eam introduceret.

Ceres. Inuocabatur & Ceres; vel quod *Γεσμοφóρος*, & legifera; ob legitimam maris & feminæ conjunctionē: vel quòd *δαδούχος* atque tedifera, ob nuptiales faces: vel quòd rebus creandis præsit, vnde & nomen inuenit: vel quòd rei familiaris curam gerat, vnde *ἐποικιδίη* est appellata.

Liber pater. Interesse quoque connubiis Liberum patrem volebant: vel quòd vnà cum Cere semper colebatur: vel quòd Deum libertatis esse arbitrabantur, quam in mariti domo esset vxor auspicatura.

Apollo. Numerabant etiam inter conjugales Deos Apollinem, eundèmq; Phœbum, *κατὰ φῶς βίβη, καὶ λυχνήνέτιω*, quasi lucis auctorem: aut quòd auspiciis & augurijs videat, sine quibus nullæ fierent nuptiæ.

Fratrem Apollinem comitabatur Diana, & ad fœcunditatem, & ad facilitatem futuri partus.

Aduocabant Mercurium cum Venere, ut significarent benigni sapientisque sermonis voluptatem indigere conjugalem.

Atque ut Venus cœlon adferre credebatur, sic aurea vincula Veneris filius, si audimus Tibullum :

*Vota cadunt : utinam strepitantibus ad-
nolet alis,
Flanæque coniugio vincula portet
Amor!*

Præterea cum Gratiis ut adesset Peitho, siue Suada, precabantur : videlicet ut neque vi, neque jurgiis aut minis, sed vltro merisque blanditiis, conjuges à se mutuò quæ vellent impetrarent.

Sequuntur dii quidam paulò obscuriores, & è Semonum turba, ut

Pilumnus & Picunus, quibus lectus genialis in ædibus mariti sternebatur : neque ipsi

Genii maritorum prætermittendi, quos aduocare solebant pronubæ, cum femi-

næ Genios nullos, sed Iunones tantum haberent.

Ex eadem numinum turba

Iugatinus.

Iugatinus, à iugandis copulandisque viris ac feminis;

Subigus.

Subigus, qui viro subigeret, morigeramque redderet vxorem.

Domitius.

Domitius, vt in domo mariti vxor esset.

Manturna.

Manturna Dea, vt cum viro perpetuo maneret vxor.

Virginensis.

Virginensis, vt virgini zona soluere-

Perfica.

Perfica, quæ obscœnas luteasque voluptates ad exitum perficeret dulcedine inoffensa procedere.

Prema.

Prema, vt subacta nupta ne se commoueret cum premeretur.

Pertunda.

Pertunda, quæ in cubiculis præsto esset virginalem scrobem effodientibus maritis.

Mutunus.

Postremus omnium Mutunus, vel Mutinus, aut Mætinus, idem, opinor, cum hortorum custode, cuius immani fascino inequitate nuptam docebant pronubæ, vt à Deo delibata eius virginitas existimaretur.

Crassus ista fortasse, sed veritus non sum quod non puduit sanctissimos viros

Augustinum & Arnobium proferri. Nec
sanè licuit thalassionem, vt ille ait,
verbis dicere non thalassionis.

Enumeratis iis numinibus quæ adesse
nuptiis ferebantur, (nam de Hymenæo
suo loco dicetur;) transeamus ad ritum
nuptiarum, & ordiamur à sponsalibus.

Sponsalia contrahi solita vel nudo
consensu, vel interposita stipulatione &
sponsione, adhibitisque tabulis, in quas
sponsalitiæ conuentiones referrentur, no-
tissimum est, *σπονδάς*que & libationes
quasdam fieri consueuisse.

Nec illud dubium sponsum dare spon- ANNUS
101.
sæ vel mittere solitum annulum ferreum,
cùmque sine gemma.

Quod si fortè luctus in familia erat, pro-
pter sponsalia minuebatur.

Contractis sponsalibus, pater sponsæ CONVI-
NIUM.
cœnam sponso dabat; & hoc est quod M.
ait Tullius se Crassipedi, cui Tulliolam
suam desponderat, sponsalia præbuisse.

Pridiè nuptiarum regillis, tunicis al-
bis, reticulis luteis, vtrisque rectis, textis
sursum versus à stantibus, indutæ virgines
cubitus ibant ominis causa. *Festus.*

Nuptiis autem non quilibet dici pote- A'ri
diti.
rat dies. Nam totus mensis Majus, paren-

taliam, mundus cum pateret : Calendarum, Nonarum, Idus, Calendarum, Nonarum, Iduum, posterius dies, ut atri nuptiis, censebantur alieni.

*Vfus,
far, co-
emptio.*

Nihil hic necesse est de tribus generibus matrimoniorum, usu, farre, coemptione, longam orationem expromere: nullo negotio consuli possunt Cicero in *Topicis*, & ad ea Boetius, ut Arnobius & Vlpianus.

*Auspi-
ces.*

Cæterum non nisi auspicato celebrabantur nuptiæ; semperque auspices nuptiis adhibiti, etiam cum auspicia petere desierunt. Nullum verò nuptiis augurium felicius, quàm Accipitris Circi alterope de claudi aspectus. Solus aer conscius erat cum auspices adhiberent :

*Orna-
tus.
Recta
tunica.*

Pòstquam nuptura togam, prætextamque puerilem, fortunam ad virginalem detulisset, recta tunica induebatur, qualem Caia Cæcilia texuerat, cuius nomen faustum frequensque in nuptiis.

Cingulum.

Cingebatur cingulo, quod vir in lecto soluebat, facto ex lana ovis.

*Seni-
crinis.*

Senis crinibus ornabatur, siue sex crinium fertis; quòd is ornatus antiquissimus fuit; aut quòd ita ornabantur Vestales,

quarum castitatem viro spondebat.

Celibari comebatur hasta, quæ in ab-<sup>Celibat-
ris ha-
bita.</sup> iecti occisique gladiatoris corpore ste-
tisset.

Vittam rectam eo die gestare incipie-^{Vitta.}
bat. *Propertius.*

Coronam an capite gestarit, mihi est ^{Corona}
incertum, neque id planè confirmatur
his Tertulliani verbis de Corona militis:
*Coronant nuptie sponso: neque hoc Luca-
ni versu,*

*Turrita'que premens frontem matrona
corona:*

Siquidem, ut ex Synesio didicimus,
postero die nuptiarum fiebat, ut fas-
cijs redimita caput, & Cybeles instar
turrita, urbem circumiret. Corollam
certè de floribus verbenis, herbisque à
se lectis, sub amiculo tulisse non ambi-
gitur.

Obnubebatur eius caput, flammeo lu-<sup>Flamme-
mentum.</sup>
tei coloris, unde Nuptæ & Nuptiarum
nomen, quòd eo genere veli assidue flami-
nica vteretur, cui non licebat facere di-
uortium.

Sic ornata rapiebatur, aut rapi si-^{Raptus.}
mulabatur, è gremio matris: vel si ea

non esset, ex proxima necessitudine, exemplo Sabinarum, quarum raptus Romulo, priscisque illis pastoribus prospere cesserat.

*Vesper
Tint. 6.
Officiu.*

Prodibat sub noctem, exoriente stella vespero, & præcedente tibicine: magna cognatorum amicorumque frequentia, qui ad hoc officium conuenerant.

*Dedu-
ctio.
Faz.*

Tres pueri patrimi & matrimi eam deducebant, quorum vnus facem spineam, siue pineam præferebat, reliqui duo nubentem tenebant.

Vtensilia.

Colus compta cum fuso & stamine comitabatur, impubesque puer vtensilia nubentis in operto vase gestabat: quem puerum Camillum, vt vas, quod etiam Cumerum aut Cumeram vocabant.

*Camil-
lus.
Cumer-
ra.*

*Tres
affes.*

Deferebat tres asses ad maritum, quorum vnum, quem manu teneret, tanquam emendi causa, daret marito: alterum quem in pede habebat, in foco Larium familiarium poneret: tertium, quem conditum in sacciperio compito vicinali resignaret.

*Thalaf-
sus.
Ianua
& La-
res co-
ronati.*

Hac pompa, Thalassium inuocantes, nuptam domum mariti traducebant; cuius erat ianua laureata, postesque, & Lares familiares coronati.

Vbi ventum erat ad ædes mariti, nupta <sup>Laneæ
vittæ.</sup>
 Ianuam postesque laneis vittis cingebat,
 lanamque fixam tangebatur: & ne quid ma-
 li medicamenti ingrederetur, adipe lupi-
 no postes vngebatur: ex quo vxoris nomen, ^{Vnctio}
 & Vnxiæ Iunonis, vt antè diximus.

Tum maritus pro foribus interroga- <sup>Quæ?
Caiæ
Interro-
gatio.</sup>
 bat, quænam esset? respondebat se Caiam
 esse; rursus quærenti, vellètne sibi esse
 materfamilias, respondebat se velle; &
 vbi ille Caius esset, Caiam se futuram.

Haud scio an illic aqua adaspergeretur, <sup>Asper-
sio.</sup>
 an antequam deducta esset, vt pura ca- <sup>Aqua
& I-
gnis.</sup>
 staque ad vîrum veniret: Illic sanè aqua
 & igni positis in limine vxorem maritus
 accipiebat. Ignis autem è foco Aedilium
 intitione ex felici arbore, Aqua verò in
 aquali è puro fonte per puerum felicissi-
 mum adferebatur. Iubebatur nupta
 ignem & aquam tangere. *Plutarchus.*

Interea fax, qua prælucente noua nu- <sup>Pin-
nupta.</sup>
 pta deducta erat, rapiebatur ab vtriûsque
 amicis: ne aut vxor ea nocte sub viri lecto
 poneret, vel vir in sepulcro comburen-
 dam curaret; quo vtróque, mors alteru-
 trius captari putabatur.

His confectis, Limen nupta transili- <sup>Limi-
nistra-
iatio.
Clauis</sup>
 bat, quod ominosum erat contingere:

& clauē tradebantur ingredienti, siue ad signandum partus facilitatem, siue ad omnium rerum permissam administrationem & custodiam.

*lanata
pellis.*

Mox in lanata pelle statuebatur; vel propter morem vetustum, quo homines erant pellibus induti; vel vt testaretur se lanificij officium præstaturum viro.

*Togale-
sus
stratus.
Pronu-
ba.*

Nuptiali peracta coena, sternebatur togâ lectus, aduocato, vt suprà monuimus, mariti Genio, (adde huc lectum aduorsum;) ac postquā Mutono litauerant eo ritu quem indicauimus, Pronubæ, quæ vni tantum viro nupsissent, nuptam in lecto collocabant.

*Tene-
bra.
Nucti.*

Maritus verò ad nuptam non accedebat, nisi omnibus luminibus remotis, & sparsis nucibus, quas pueri cum tumultu legerent, positisque prætextis Fescenninos canerent, procaces & inconditos versiculos.

*Fescen-
nini.*

*Sacra.
munera
Repotia*

Postero nuptiarum die, noua nupta libertatem auspicans vxoriam, in mariti domo rei diuinæ operam dabat, ei que à propinquis ac cognatis munera mittebantur. Eodémque die apud nouum maritum instaurabatur potatio, cui nomen inde Repotia.

Veterem nuptiarum apud Romanos ritum perstrinximus, cuius partem maximam jampridem collegit, & libro singulari complexus est vir doctissimus, amplissimûsque Præses Brissonius; nos quædã inuestigauimus & adjunximus. Quòd si aciem nostram nonnulla fugerint, mementote ne Solem quidem ipsum, mundi oculum, videre omnia.

Non progrediar hodie longiùs. Satis enim negotij vno die confecit qui mulierem ornarit, compserit, & deduxerit.

IOAN. PASSERATII PRÆFATI-
tiuncula in Propertii librum primum.



ST præter opinionem vulgi,
 nec absurdum tamen, quod in
 Euripidis Medea nutrix con-
 queritur:

Σχαιρὸς δὲ λέγων,
 Κούδέν τι σοφούς,

Τοὺς ἀνθρώπους

Οὐκ ἂν ἀμάρτοισ.

Οἱ πνέουσιν ὕμνους

(:)

Ἐπὶ μὲν θαλίαις,

Ἐπὶ τ' εἰλαπίνας,

Καὶ παρὰ δειπνοῖς,

Εὗροντο, βίου

Τερπνὰς ἀκοάς.

(:)

Στυγίους δὲ βροτῶν

Οὐδεὶς λύπας

Εὔρετο, μοῦσιν

Καὶ πολυχόρδοις

Ωδαῖς παύειν,

Ἐξ ὧν θάνατοι

(:)

Δειναί τε τύχαι

Σφάλλουσι δόμους,

Καὶ τοὶ ταῖδε μὲν

Κέρδος

Κέρδους ἀκείῳ,
Μολπαῖσι βροτοῖς,

Ἰν' εὐδῆπνοι

Δᾶτες πμάτῳ

Τείνουσι θοάν.

Τὸ παρὸν γὰρ ἔχῃ

Τέρψιν ἀφ' αὐτῶ

Δαίμων πλῆρωμα βροτοῖσιν.

Molliculum, aut eolum, & prorsus Euripideum
Anapæstum! Cuius ego carminis venustatem
quia Latinis versibus exprimi posse diffido; cir-
cuitione ambituque verborum leuiter adum-
brabo, ut vim eius nonnullam ij saltem perci-
piant qui Græcè nesciunt. Ex priscis, *inquit*,
mortalibus, qui primus instituit ut diebus fe-
stis, epulisque solemnibus, & conuiujs, fidi-
cularum vocumque modulationes adhiberen-
tur; à luctu verò & lacrymis eas remouit: is
profectò insigniter imperitus, ne dicam stultus
fuit. Rebus enim secundis, & ad nutum fluen-
tibus, quorsum attinuit hæc interponere quæ
aures mentesque nostras permulcent: cum lau-
ta, & ad plenum instructa conuiuia, satis ex
se voluptatis habeant, sine citharædo & tibi-
cine? At cum transuersa votis nostris incurrit
fortuna, cum premimur curis, & conficimur
angoribus, tum lyrae tibique cantu, & assa-
voce solari ægritudinem satius fuerat. Hac

ratione permoti, nobis nunc maximè audiendam censuimus Propertij Musam, & Amoris quem canit hilaritate tristitiam temporum esse condiendam: ut dum hæc detumescunt negotia, repentinæque turbæ conflescant, à præsentis mali sensu, & à cogitatione publicæ calamitatis, animum tantisper abducamus. Nam pacis Amor Deus est, --- *Pacem venerantur amantes*, ut hic noster ait; & multò ante poeta vetus apud Platonem:

Εἰρήνην μὲν ἐν ἀνθρώποις, πελάγῃ δὲ γαλήνην,
 ἠννεμίαν δ' ἀνέμων, κοίτῳ, ὕπνον τ' ἐνὶ κήδεσσι.

Quæ Latine, quamvis pinguiore Minerva, reddideris:

*Magnus Amor pacem tribuit mortalibus al-
 mam:*

*Aeriosque solet motus, tumidique procellas
 Acquoris, & tristes cessatum ducere curas.*

Negat & Mimnermus apud Plutarchum οὐκ ἔστιν ἀρετῆς, esse quicquam in vita dulce unde Amor absit: nec mori recusat ubi Veneriæ militiæ commodis frui defuerit:

Τίς δὲ χάρις, τό δὲ τίς πόνος, ἀνευχρυσθῆς Ἀφροδίτης,
 Τεθναίνω, ὅτε μοι μηκέτι ταῦτα μέλει.

Qua de sententia Horatius in epistolis:

*Si, Mimnermus uti censet, sine amore iocisque,
 Nil est jucundum, viuas in amore jocique.*

Accedat his comicus senex à Casina Plauti:

Coquos equidem, inquit, nimis demiror qui utuntur condimentis,

Eos eo condimento uno non utier, omnibus quod præstat:

Namque ubi amor condimentum inerit, cuius placitum credo.

Neque falsum, neque suaue esse potest quicquam, ubi amor non admiscetur.

Fel, quod amarum est, id mel faciet: hominem ex tristi lepidum & lenem.

Adsit igitur amor stipatus Gratiarum choro: tum huius alitis felici aduolatu & auspicio spes nobis affulserit concordia. Nisi fortè periculum est ne quis nos existimet alieni amoris interpretes, eadem opera adolescentium intemperantiæ libidinum faces admouere. Quasi verò ullo sit opus ad nequitiam magistro. Vellem sanè opus esset, nec nisi assiduo labore, peruigiliquè studio vitia discerentur: minùs multos improbos hodie videremus. Sed ut bonæ fruges absque diligenti cultura, continuâque politione, etiam è pingui solo, non excitantur, cum inutiles herbæ succrescant vberissimè: sic in hominum ingeniis ægrè adulescunt semina virtutum: vitia autem, & statim oriuntur, & augentur citò: & serò vel nunquam euelluntur, altissimis defixa radicibus. Quis autem jure

nos reprehēdat, si quod facimus, antiquissimorū & eruditissimorū virorum more ac exemplo facimus? Rapta Helena: abducta Briseis: Penelopes proci; Homero Iliada & Odyssēā pepererunt; quod utrūque opus doctorum manibus quotidie teritur, & semper teretur. Homero proxima diuinæ Æneidos auctor

Intulit in Tyrios arma virūque toros.

Nec legitur pars vlla magis de corpore toto

Quam non legitimo fœdere junctus amor.

Tyrannorum exactor Alcæus,

Qui ferox bello, tamen inter arma,

Siue jactatam religarat vdo

Littore nauim:

Liberam, & Musas, Venerēque, & illi

Semper harentem puerum canebat:

idēque de se Romanus Alcæus liberè confitetur:

Nos conuiuia, nos pralia virginum,

Seclis in iuuenes vnguibus acrium

Cantamus vacni; siue quod vrimur,

Non prater solitum leues.

Cæteros poëtas prætereo, quos percensere longum esset; Comœdias certè & Tragœdias, cōponere, legere, agere, spectare, quando non licuit; quarum argumenta probri & adulterij plena sunt? Plenæ flagitiorum & stuprorum historiæ, & ipsis annalibus nihil fuisse perhibēt.

hirsutius ac lascivius. Phædrum & conuiuium
Platonis nemo non legit : & Stoicorum pater
Zeno, incredibili grauitate ac seueritate phi-
losophus, scripsit non modò *Ἐπὶ ἐρώτων*, sed
etiam *Ἐπὶ ἐρωτικῆς τέχνης*; vt iam Ouidio parā-
da non sit defensio, quòd *de arte amandi* libros
ediderit. Abeamus à poëtis, historicis, philo-
sophis; quid libentiùs auscultamus quàm lus-
cinias? ex tamen, si credimus istis qui linguas
auium intelligunt, mera stupra, & incestos
amores gartiant:

*Omne adeò genus in terris hominùmque fera-
rùmque,*

*Et genus aquoreũ, pecudes, pictæque volucres,
In furias ignemque ruunt: Amor omnibus
idem.*

Pugnare mihi liceret pluribus argumentis, te-
stimoniis, & exemplis; imò verò quatuor ver-
bis Terētianis causam obtinere possem: *Ista
nosse salus est adolescentulis*: Verum quod argui-
tur, quia falsum est, inficiari placet. Non enim
magis ad amorem & libidinem alios hortatur
suis malis & miseriis commemorandis Pro-
pertius, quàm miles enumerandis laboribus
militiæ, & suis vulneribus ostentandis alios
ad bellum vocet: aut quàm nauta inuitat ad
nauigandum, narrandis suis periculis & nau-

fragiis scilicet hæc ad amandum impellunt.

Quid tibi vis, insane? meos sentire furoros?

Miselix, properas ultima nosse mala,

Et miser ignotos vestigia ferre per ignes,

Et bibere è tota toxica Thessalia.

Velista:

Tum magis Armenias cupias accedere Tigres,

Et magis inferna vincula nosse rota;

Quàm pueri toties arcum sentire medullis.

Aucilla:

Vel tu Tantalea moucare ad flumina sorte,

Vt liquor arenti fallat ab ore sitim.

Vel tu Sisyphios licet admirere labores,

Difficile ut toto monte volutet onus:

Durius in terris nihil est quod viuat amante:

Nec modò si sapias, quod minùs esse velis.

Item:

Nunc jacere è duro corpus iuuat impia saxo,

Sumere & in nostras trita venena manus.

*Atque utinam in primis animam me ponere
cunis*

Insisset quæuis de tribus una soror.

Satis jam à corruptelæ suspitione Propertium vindicauimus: nunc paucis de suscepta eius librorum interpretatione consilium nostrum aperiamus. In elogiis scribendis, celebrandisque amoribus, principem Propertium, & Plinius minor agnoscit, & consensus eru-

ditorum confirmat : nec me Fabij Quintilian-
 ni iudicium mouet , qui Tibullum maxime
 probat ; quia non diffitetur multos esse qui Pro-
 pertium quàm Tibullum malint ; quibus me ad-
 numerari facile patiar. Longè major enim &
 reconditior in Propertio doctrina , vis & spiri-
 tus acrior , validiores numeri , lectiona verba ,
 crebriores sententiæ : ea deniq; doloris sui expri-
 mendi est inter vtrumq; dissimilitudo , vt Tibul-
 lum putes lacrymas , Propertium fundere san-
 guinem. Atque vt concedam esse illi quædam
 cum aliis communia ; hoc omnino eius pro-
 prium est , quod in effingendis amantiū animo-
 rumque perturbationibus , voluptate , mœrore ,
 cupiditate , metu , discordia , gratia , blanditiis ,
 querelis , cæteri tantum colores terunt : solus
 Propertius penicillo manum admouet , & ita li-
 neas ducit , vt ipsum te spectare credas in A-
 pellis tabula Cupidinem. Huius ergo tanti
 auctoris *ipsum* interpretari non cuiuslibet
 est hominis : quod vt ipse sum expertus ante
 annos viginti , cum (pudet dicere , nec dissi-
 mulare possum) huic muneri me imparem
 tacitus sensi , & dolui : nec non huius æta-
 tis doctissimi viri , tantum non vociferantur ;
 qui etsi Propertium in oculis ferant , & in ore
 perpetuò habeant , nihilominus eum attige-
 runt veriùs quàm pertractarunt. Quare cum

iterum idem aggredior, de me profiteri oportet quod de se prædicat in Bacchidibus Plauti Chrysalus:

*Insanum magnum molior negotium,
Verèorque possim recte ut emolirier.*

Audebo, inquam, rursus onus tollere semel à me depositum: audaciam fortasse, ut est in veteri verbo, adjuuabit fortuna; & doctrinæ meæ, ingeniique tenuitati, subsidio venient, ad studia vestra propensa nostra voluntas, & qualiscumque industria. Reliqua sunt perpauca de Propertio; nam vulgata prætereo: Cuius patrem à Cicerone significari suspicor in oratione pro domo sua; ubi ait L. Pisonem Sex. Aurelij Propertij nomen interficarios detulisse; nec ausum accusare calumniæ metu. Scripserat initio Propertius de amoribus suis librum singularem: vnde in codicibus manu exaratis, & in libris olim excusis, hæc legitur ἐπιγραφή; Sex. Aurelij Propertij Monobiblos. Librum secundum attexit postea, ut his versibus declarat:

Tu loqueris, cum sis jam toto fabula libro,

Et turpis de te jam liber alter erit.

Mox tertium adiunxit, quem amorum finem esse voluit, ut ex versibus intelligitur:

Sat sit magna, mei, si tres sint, pompa, libelli;

Quos ego Persephone maxima dona feram.

Quartus autem liber, vnâ duntaxat, aut alterâ exceptâ elegiâ; alius est, & grauioris argumenti: de vrbis Romæ laudibus; Vertumni; Aëtij Apollinis; Herculis; Iouis Feretrij, ad imitationem Hymnorum Callimachi. Scripsisse quædam existimatur præter illa quæ extant, quia Fulgentius in libello *de prisco sermone*, laudat duo testimonia Propertij: vnum in Catillare:

Catillata geris vadimonia, publicum prostibulum;

Alterum in Diuidiæ:

Diuidias mentis conficit omnis amor.

Quod ad Cynthiam attinet, cras inde nostræ interpretationis ducemus initium.

IOAN. PASSERATII PRÆFATIO
in Propertij libram
secundam.



ATIS jam anno superiore de Propertio, & amatorijs eius scriptis differuimus: rationibusque ac exemplis docuimus, nec metuendū ab iis iuuentuti periculum, & multa inde speranda esse cōmoda studiis adolefcētium. Vnum addam, quod nescio

quam in partem accepturi sint nimium seueri
 quidam censores, tristes patrui, & communis
 humanitatis penè hostes: Si quis cum amore
 & voluptate quid habeat commercij, nō ideò
 videri nuntium virtuti remisisse. Sunt enim
 φιλήδονοι plerūque, φιλόχαλοι, καὶ φιλοδιδάκτοι,
 vt Caius ille Cassius aiebat, Romanæ liberta-
 tis vindex: idque vir fortissimus, non solūm
 exitu suo comprobauit, sed etiam aureolā ma-
 gistri sui confirmauit sententiā. οὐκ ἔστιν ἡδέως
 ἄνευ τῆς φρονίμως, καὶ καλῶς, καὶ δικαίως ζῆναι
 οὐδὲ φρονίμως, καὶ καλῶς, καὶ δικαίως, ἄνευ τῆς ἡδέως.
 Quibus verbis negat iucundè viui posse, nisi sa-
 pienter, honestè, iustèque viuatur: Et sapiētiae,
 honestatis, ac iustitiæ vllum esse fructum, si à
 voluptate iucundaque vita seiunxeris. Verūm
 ista, vt dixi, satis iam disputata sunt. Itaque
 satius nunc est, quot & quantæ Veneres in Ve-
 nere Propertij lateant, prius ostendere, quàm
 ad libri secundi explicationem accedamus.
 Ordinemur autem à Simonidis melici voce me-
 ritò celebratissima: τὴν ζωγραφίαν ποίησιν εἶναι
 σιωπῶσαν, τὴν δὲ ποίησιν, ζωγραφίαν λαλῶσαν.
 Vel, vt extulit Plutarchus: ζωγραφίαν μὲν, εἶναι
 φθνευγὸς μὲν τὴν ποίησιν: ποίησιν δὲ, σιωπῶσαν
 τὴν ζωγραφίαν. Hinc auctor Rhetoricorum ad
 Herenniū in libro quarto: Si poëma loquens, pi-
 ctura est: pictura, tacitum poëma debet esse. Et M.

Tulli⁹ in quinta disputatione Tusculana:
*Traditum est, Homerum cecum fuisse: At
 eius picturam, non poësin videmus. Item
 Horatius in arte poëtica:*

*Ut pictura, poësis erit, quæ si propius
 stes,*

*Te capiet magis: & quadam, si longius
 abstes.*

Mitto quæ Aristoteles, & eius doctor
 Plato, de vtriusque artis cognatione li-
 teris mandarunt: tantum dico, ut in ob-
 lectandis pascendisque oculis varietate
 rerum, & naturæ ipsius imitatione,
 laus picturæ cernitur: sic in expri-
 mendo multiplici animorum sensu,
 atque motu, poëticæ facultatis spe-
 ctari præstantiam. Quod quoniam pig-
 mentis quibusdam efficitur: & suos
 habet colores poëta, quos versuum
 lineamentis inducit, ut suavius gra-
 tiusque carmen efflorescat: non pessi-
 mam à studiosis poëticæ inibo gratiam,
 si quo ex capite arcessita sint illa ora-
 tionis lumina, & insignia, demonstra-
 ro: ac eorum pleræque indicaro, ex Ho-
 meri potissimum fonte derivata, in
 hortulos Propertij fluxisse. Principa-
 tus verò in hoc genere translationi-

trans-
lationes
ἀνι-
στῆ-
ναι
ἀνι-
στῆ-
ναι

bus tribuitur; quæ cum sint veluti mu-
tuationes ac migrationes verborum
in alienum domicilium; quatuor è lo-
cis ducuntur: Ἀπὸ ἐμψύχων ἔστι ἐμψύχα. ut
Homero dicitur ἡνίοχος νηὸς, ἀντὶ τῆ ναυτης;
auriga navis, pro gubernatore. Ex quo
ad Mœcenatis laudem Propertius trans-
tulit:

Velorum plenos subtrahis ipse sinus:
videlicet à moderatione cursus, ad animi
& secundæ fortunæ moderationem.
Ἀπὸ ἐμψύχων ἔστι ἀψύχα, ut κορυφὴ ὄρεος, ἀν-
τὶ τῆ ἀκρότης: vertex pro cacumine Pro-
pertius:

ἀνι-
στῆ-
ναι
ἀνι-
στῆ-
ναι

*Hic erat Arganthes Pega sub vertice
montis.*

νηὸς στέφανος, quasi corona insulæ; quòd
aquis undique cingatur. Sic coronare,
pro cingere Propertius:

Fixæque congesta castra coronat humo.
Ἀπὸ ἀψύχων ἔστι ἐμψύχα: ut σιδῆρειον ἥτορ:
cor ferreum, pro ingenio durissimo, Pro-
pertius:

ἀνι-
στῆ-
ναι
ἀνι-
στῆ-
ναι

Illatamen nunquam ferrea dixit: amo.
puella ferrea, sæuissima. Ἀπὸ ἀψύχων ἔστι
ἀψύχα: ut σπέρμα πυρός. quod ad curas
Propertius traduxit:

ἀνι-
στῆ-
ναι
ἀνι-
στῆ-
ναι

Semina curarum de capite orta tuo.

Minustamen ab Homero recessit Virgilius : *quærit pars semina flammæ*. Nonnunquam Homero intelligitur ἀπὸ μέρους τοῦ ὅλου : ut φίλη κεφαλὴ , λέγειν ἀντὶ τοῦ ἀνθρώπου. ἀπὸ μέρους τοῦ ὅλου.

Propertius:

Et sumpta, & posita pace, fidele caput.

Nec te, dulce caput, mater Scribonia, læsi.

Ponit etiam Homerus id quod sequitur, pro eo quod præcedit : ut σκυλεύειν , ἀντὶ τοῦ φονεύειν : spoliare, pro occidere. Id quod sequitur, ut, pro eo quod præcedit.

Dixerat, & spoliū corruiť ille Ioui.

Corruit spoliū ; occisus , ut mox ab hoste spoliaretur. Iam μετωνυμία Homero frequens, ut Ἀΐρης, ἀντὶ τοῦ πόλεμος. μετωνυμία.

Nullus & antiquo Marte triumphauis.

Crebra quoque ἀντωνομασία, ut Ἀλρεΐδης, Πηλεΐδης, Τρὶλογένεια. Ἀντωνομασία. pro Agamemnone, Achille, Minerva. Sic Propertio Iasis, pro Atalanta : pro Tyro, Salmonis : pro Neptuno, Deus Tænarius. μετωνυμία. μείωσις, χαίρειν Homero familiaris est : ut, οὐδὲ γῆθησεν Ἀχιλλεύς, minimè lætatus est : pro , valde indoluit. Propertius:

Cum de me, & de te, compita nulla tacent:

pro, nihil aliud loquuntur: &, amor noster per urbē solus sermo est omnibus.

*Em-
brafi.* Ornat Homeri versus ἑμφασις: vt πᾶν δ' ὑπερμαίνῃ ξίφος αἵματι. totus incaluit gladius sanguine: Propertius,

Denique quis nostro curuum te funere vidit?

Atram quis lachrymis incaluisse togam?

*Ple-
asmus* Non rarò aliqua vox in Homeri versu abundat; vt δέχεται πάντα τάλαια. vbi τὸ πάντα, πλεονάζει Propertius:

Tantus erat demens inter utrumque furor.

O noctem meminisse mihi iucunda voluptas!

vbi superuacaneæ voces, demens & iucunda: cum nullus furor, dementia: & nulla voluptas, iucunditate careat.

*Pri-
brafi.* Laudatur Homericæ αἰφροσύνης, βίη H' ἑακλείη, vis Herculeæ, pro forti Hercule. Propertius:

Nec si talestem flagrans amor Herculis Heben.

amor Herculis, Hercules amans.

Qua miser ignotis error perpeffus in oris

Herculis.

Error Herculis, Hercules vagus. Illu-
strant Homeriscripta, παλιλογία, ἐπανά-
ληψις, ἀναδιπλωσις, ἐπαναφορα, καὶ ἐπ' ἀνοδος.
quarum exornationum vnum duntaxat
exemplum ab Homero petam: plura ē
Propertio. Homerus,

Τοῦ δ' ἐγὼ ἀντίος εἰμι, καὶ εἰ περὶ χεῖρας εἰσικέει,
Εἰ περὶ χεῖρας εἰσικέει μένος δ' αἰθάνει σιδήρεω.

Item:

Νιρῆος δ' αὖ Σύμηθεν ἄγει τρεῖς νῆας εἰσάας.

Νιρῆος Ἀ' γλαίης υἱὸς, Χαρόποιο τ' ἀνακτος.

Νιρῆος, ὃς κάλλιπος ἀνὴρ ὑπὸ Ἰλίοι ἦλθεν.

Dici vix potest quantum iis verbis, gemi-
natis, iteratis, & commutatis, Propertius
delectetur. Geminat verba; vt

Gemi-
nata
verba.

Non non humani sunt partus talia dona.

Iterat autem verba multis modis. Nunc
initio versuum: vt

Iterata
verba.

Sic licet & saxo patientior illa Sicano:

Sit licet & ferro durior, & chalybe.

Oscula suspensis instabant carpere palmis,

Oscula & alterna ferre supina fuga.

Nunc in eiusdem versus principio & me-
dio: vt

*Magni saepe duces, magni cecidere Ty-
ranni.*

*Non hac Calliope, non hac mihi cantat
Apollo.*

Nunc in eiusdem versus principio & fine : vt,

Quid flet abducta grauius Briseïde? quid flet?

Cæsaris hac virtus , & gloria Cæsaris hac est.

Aut verbum, quod penultimum est in priore versu , primum in posteriore collocatur : vt,

*Donc diuersas percurrents Luna fenestras;
Luna moraturis sedula luminibus.*

*Omniâque ingrato largibar munera somno,
Munera de prono saepe voluta sinu.*

Hinc etenim tantum increuit mea gloria nomen:

Gloria adhybernos lata Borysthenidas.

Aut iteratur in prioris versus medio, & posterioris initio : vt,

Interea nobis nonnunquam ianua mollis:

Nonnunquam lecti copia facta tui.

fit etiam iteratio conuerso verborum ordine : vt

Vxor me nunquam , nunquam me ducet amica:

Semper amica mihi , semper & vxor eris.

Aut vna cum verborum ordine casus variantur : vt;

Siuc illam Hesperis , siue illâ ostendet Eois:

Vret

Vret & Eoos, vret & Hesperios.

Vel mutantur simul tempora verborum;
& gradus nominum: ut

Quamuis magna daret, quamuis majora daturus.

In ejusmodi autem commutatione & iteratione vocum; aut paria paribus: aut dissimilia dissimilibus: aut contraria contrariis referuntur. Paria paribus: ut

*Cum tibi nec frater, nec sit tibi filius ullus,
Frater ego, & tibi sim filius unus ego.
Tu mihi sola places, placeam tibi, Cynthia
solus.*

Dissimilia dissimilibus: ut

*Maxima prada tibi; maxima cura mihi.
Cynthia forma potens, Cynthia verba levis.*

Contraria contrariis: ut,

*Sine ea causa gravis, sine ea causa levis.
Cynthia prima fuit, Cynthia finis erit.
Huius ero vivus, mortuus huius ero.*

Similiter desinentia, & Similiter cadentia, quæ ὁμοιοτέλευτα, & ὁμοιώματα vocant, persequi singula longum esset: nunc vno sumus exemplo contenti, Homerus:

*Simili-
ter deso-
nentia
& ca-
denti a*

*ἄρ' ἔϊνον παρέοντα φιλεῖν, ἐθέλοντα δὲ
πέμπειν.*

Propertius:

Ōsculæque opposito dicat sibi debita ventō;

R

Et nihil infido durius esse viro.

ἡλλοίη

Nec ἡλλοίη quidem inuenuſta eſt, cūm
verbum aliquod abeſt, potiūſ quam deeſt
ſententiæ. Homerus :

Ἦ μοι ἄχος μεγάλῃτορος Αἰεΐαιο.

Λεΐπει γὰρ τὸ πάρεſτιν, ἢ ſυμβέβηκεν.

Propertius:

Te nihil in vita nobis acceptius unquam,

Nunc quòque eris. ---

à verbo eris, abeſt, acceptiſſima.

*Τί ne igitur demens? nec te mea cura mo-
ratur.*

ſubaudiendum, abire paras, aut quid ſi-

ἀρεΐναι
ἀντὶ τῶν
ἐκλυτῶν.

mile. Solet Homerus ῥεῖναι τοῖς ἀρεΐναι-
κοῖς ἀντὶ τῶν ἐκλυτῶν: νεκλυτὸς ἰσποδά-
μεια, ἀντὶ τῶν κλυτῶν.

Propertius:

Sed cupidus falſis attingere gaudia palmis,

Theſſalis antiquā venerat umbra domum.

Umbra Cupidus, pro Cupidi amantiſ

νομι-
νασθῆναι
pro vo-
caſſεο.

Protheſilai. Nominandi caſum, pro vo-
candi caſu: nō ſemel Homerus uſurpat: νε-

Δὸς φίλος, οὐ γάρ μοι δοκέεισθ' ἄκατος Αἰχιδῶν.

φίλος ἀντὶ τῶν φίλε. Propertius :

--- tu criminis auētor,

Nutritus duro, Romule, lacte lupa.

Com-
paratio-
nis gra-
dus me-
nio.

Romule nutritus, pro nutrite. Idem facit
in permutando comparationis gradu.

Σαώπρος ὡς κενέω, ἀντὶ τῷ σῶος.

Propertius:

Supplicis à longis tristior excubijs:
tristior, pro tristis.

Turpior & sacli viuere luxuria:

Turpior; pro turpis. Inuenitur sæpe-
numero apud Homerum ῥῆμα τὸ ἐνεργήπι-
ον, ἀντὶ τῷ παθητικῷ: vt

ἐγὼ ἐν-
εργή-
μι, ἀντὶ
τῷ παθη-
τικῷ.

Δωρήσω τρίποδα χρυσέαν, ἀντὶ τῷ
δωρήσωμαι. Propertius:

Non ita Carpathia variant Aquilonibus
vnde:

variant, pro variantur.

Percussas domina vertat in auriculas;
pro vertatur.

At tu seu mollis quæ tendit Ionia.

tendit, pro tenditur, & porrigitur: Nus-
quam non occurrit apud Homerum nu-
merorum aut temporum enallage. Nu-
merorum, vt

Enalla-
ge nu-
merum.

Τῶν ἀμώθεν γε θεὰ θυγάτηρ Διὸς ἐπέε, καὶ
ἡμῶν, ἀντὶ τῷ ἐμῶν.

Propertius:

... non hac mihi cantat Apollo.

Ingeniam nobis ipsa puella facit.

Quid mihi desidia non cessas fingere
crimen,

Quod faciat nobis conscia Roma moram?

Enal-
lage
perso-
narum.

utrobique mihi, & nobis, promiscua. Por-
rò enallage personarum lepidissimum
continet εἰδος ἀποτροφῆς, vt

Τυδείδῳ δ' οὐκ ἂν γνοίης πολέροισι μετῇ.
ἀντὶ τοῦ, οὐκ ἂν τις γνοίη. Nescires vtrīs
Diomedes adesset : pro quibus nesciret.

Propertius:

*Tranquillo tuta descendis flumine
cymba.*

Descendis, pro quibus descendere po-
test. Et

*Nōne putas miras hunc habuisse manus?
putas, pro quibus putat. Cui schemati
etiam inest festiuissima sui allocutio: vt
Qui nullum tibi dicebas iam posse nocere,
Hastisti; cecidit spiritus ille tuus.*

Allocu-
tio sui.

Surge anima ex humili iam carmine, ---

Sic igitur prima moriere atate, Properti?

Sed morere, interitu gaudeat illa tuo.

Apo-
strophe
ad mu-
sa.

Animos legentium haud minùs permo-
uet, cùm ad res mutas sermonem con-
uertit Propertius:

*Ianua, vel dominâ penitus crudelior ipsâ,
Quid mihi tam duris clausa taces foribus?
Vos eritis testes, si quos habet arbor amores,
Fagus, & Arcadio pinâs amata deo.
Ignes castrorum, & Tatia pratoria turma;
Et formosa oculis arma Sabina meis:*

O utinam ad vestros sedeam captiva penates!
 Ergo sollicita tu causssa pecunia vita es!
 At tu, saue Aquilo, nunquam mea vela vi-
 debis,

Distinguit Homericum poëma εὐκων,
 ὁμοίωσις, καὶ ἀπαβολή, ut

Ἡ δ' ἔειπεν ἐκ θαλάμοιο φείφρων Πρωελδ-
 ῶσα,

Ἀρτεμίδι ἱκέλη, ἵε χερσὶν Ἀφροδίτῃ.

Propertius:

Fulva coma est, longaue manus; & maxi-
 ma toto

Corpore, & incedit vel Ioue digna soror.
 Aut cum Dulichias Pallas spatietur ad aras,
 Gorgonis anguifera pectus operta comis.

Hyper-
bole.

Veritatis traiectio & superlatio est in hoc
 Homeri versu, Λευκότεροι χιόνος, φείφει δ'
 ἀνέμοισιν ὁμοῖοι. id est, Virgilio interprete:
 Qui candore nives anteirent, cursibus auras.

Propertius:

Lilia non domina sint magis alba mea.
 Aut Maotica nix, minio si certet Ibero;
 Utque rosa puro lacte natant folia.

Per ἀλληγορίαν, siue inuersionem, ait Ho-
 merus:

Allego-
ria.

Νῦν μὲν δὴ μάλα πᾶγχυ, μελάνθιεν, ὑκ-
 τα φυλάξεις,

Ἐν ᾗ ἐνὶ μαλακῇ χαταλέγμενος, ὥς
 ἐπείοικεν.

R iij

Vbi aliud loquitur, aliud sentit. Propertius:

Iam tempus lustrare aliis Heliconæ choreis:

Et campum Aemonio iam dare tempus equo:

*Nunc ad te mea lux veniet, mea littora,
navis*

Servata? an mediis fidet onusta vadis?

PARA-
MIA AL-
LEGORI-
CA.

Multæ sunt apud Homerum allegoricæ paræmiæ; quibus, quoniam diligenter ab aliis collectæ sunt, super sedebam: pauculas è Propertio proferam. Est hæc omnino proverbiale allegoria, reuocare lapsum, de admonitione stulta, & præpostera. Propertius:

At vos qui serò lapsum reuocatis amici:

*Vt dare cineri medicinam, de sero, & inu-
tili auxilio.*

*Atque utinam non tam serò mihi nota
fuisset.*

Conditio, cineri nunc medicina datur.

Quemadmodum de frustra sumpta opera & malè collocata:

Ludet, qui sterili femina ponit humo.

Enumerare mihi liceret id genus sexcenta dicendi ornamenta, quæ Propertio sunt cum Homero communia: sed enumeratio illa vix esset solidi & æstiuæ diei, nedum exigui huius spatij, horæ curriculo

circumscripti. Vna est προσωποποιία, & ^{Proso-} ^{popoia} ficta personæ inductio, quam nequeo sine piaculo præterire: Et vereor tamen, ne, vt ait Plautus, in me obuertat cornua. Excitabit enim fortasse ipsum à campis Elysij, myrtæaque sylua, Propertium, qui me his suis obijurat versibus, quòd se cum Homero composuerim:

*Quid tibi cū tali demens est carmine? quis te
Carminis heroi tangere iussit opus?*

Existet etiam fortasse aliquis, qui me non potiùs Callimachi ac Philetæ, quàm Homeri, fecisse imitorem Propertium, miretur: & similitudinem in re tam dissimili quæsiuisse. Respondebo ὕπερον ἀντιπερον ὁμηρικῶς, meque tuebor Thorauij mangonis exemplo. Is (dicam verbis Plinij, quò dicam melius) M. Antonio iam Triumuiro, eximia forma pueros, alterum in Asia genitum, alterum trans Alpes, vt geminos, vendidit: tanta vnitas erat. Postquam deinde sermone puerorum detecta fraude, à furente increpitus est Antonio, inter alia magnitudinem pretij conquerente: nam ducentis mercatus erat sestertiis: respondit versutus ingenij mango, ob idipsum se tanti vendi-

R iij

disse: quoniam non esset mira similitudo in vllis eodem vtero editis : diuersarum quidem gentium natales tam concordi figura reperiri, supra omnem esse taxationem. Adeoque tempestiuam admirationem intulit, vt ille proscrip- tor animus modò, & contumelia furens, non aliud in censu magis, & fortuna sua duceret. Sic ego admiranti hanc Homeri & Propertij comparisonem referre possum : nihil me noui facturum fuisse, si Callimachum & Propertium inter se contendissem; & vt fratres, aut Venerios nepotulos, similes esse ostendissem. At quod elegiographorum principem Propertium, cum Homero Epicorum coryphæo contulerim, illam in dissimili genere similitudinem vobis plus voluptatis attulisse. Neque verò periculum est, ne mihi Propertius succenseat, quasi non & libens, & solens, Homerum imitetur. Quod si vel callidè dissimulat, vel improbè negat, aut hominem stellionatus damnabo, aut furti manifesti conuincam. Et ecce rem vobis auctorem dabo. In elegia septima libri quarti, est insignis conformatio, quam ex Homero sumtam esse cui non persuadebitur, idem vix adducetur vt credat, meridie lucere. Apud Homerum igitur Ἰλ. χ', Patrocli vmbra in somnis Achilli apparet, & alloquitur; eaque euanescente, Achilles exclamat:

Ω' πόποι, ἦ ρα τίς ἔστι χεῖ ἐν Αἰδαο δόμοισι
Ψυχὴ καὶ εἰδωλον.

Est aliqua, est certè Plutonis in adibus umbra.

Inde Propertius elegiæ duxit initium:

Sunt aliquid manes: letum non omnia finit.

Pergit apud Homerum Achilles:

Ἦλθε δ' ὅππῃ ψυχὴ Παριχλήης δολοῖο,
Πάντ' αὐτῷ μέγας ὅς τε, καὶ ὄμματά χε' εἰκέειρα,
Καὶ φωνή, καὶ τοῖα πειχέροι εἴματα ἔστο.

quæ verti, & metuo ne peruerterim:

*Adm: infelicis Patrocli venit imago,
Omnia persimilis, membra ardua, lumina pul-
chra,*

Vocemque, & tales gestabat corpore vestes.

Propertius:

*Cynthia námque meo visa est incumbere fulcro,
Murmur ad extrema nuper humata via.
Eosdem habuit secum, quibus est elata, cavillos,
Eosdem oculos: lateri vestis adusta fuit.*

Cum Achille Patroclus hic verbis expostulat:

Εὐδεις· αὐτὰρ ἐμείῳ λελασμένος ἔπλεον
Ἀχιλλεύς;

Dormísne? éfne mei dilecte oblitus Achilles?

Haud leuior de Propertio querela Cynthia:

*Perfide, nec cuiquam melior sperande puella,
In te iam vires somnus habere potest?*

Notum est vt, Iride internuntia, vocati ab
Achille venti, ei morem gesserint, pyrámque

cui Patrocli cadauer impositum erat, flatu suo accenderint. Quò pertinent Cynthiae verba:

Cur ventos non ipse rogis, ingratus, petisti?

Ait Achilli Patroclus:

Ὡς δὲ καὶ ὁ πέπλος ὁ αὐτὸς σφὸς ἀμφιχαλῦπλοι.
Sic etiam nobis lapis idem contegat ossa. Mecum eris, inquit Cynthia Propertio, & mixtis ossibus ossa terā. Narratū ad extremū, Homerus:

Ὡς ἄρα φωνήσας ὠρεῖτο χερσὶ φίλησιν,
 Οὐδ' ἔλαβεν. ψυχὴ δὲ κατὰ χθονὸς, ἣν τε καὶ πνὸς
 Ὡς χετο τελευτῶν.

*Sic fatus, carāsque manus protendit Achilles:
 Nec pote complecti: querulo nā murmure fugit,
 Sub terras umbra, ut fumus. ---*

Hæc Propertius in vnum versiculum coniecit: qui & utriusque somnio, & nostræ simul orationi, finem faciet:

Inter complexus excidit umbra meos.

IOAN. PASSERATII AMORIS
 & Fortuna inter se comparatio in eund. lib. 2.

POST longam huius muneris vacationem, & morbo datam, & rerum prolatarum silentio concessam, jam redire tempus est ad id negotium, à quo inuiti ad molestum otium pridem diuertimus. Digressi autem sumus ab elegia Propertij,

quæ est octava libri secundi, cum ad ventum esset sententiam;

Omnia vertuntur: certe vertuntur amores.

Vinceris, aut vincis: hac in amore rota est.

Cujus sententiæ quoniam duplex est ratio: una, de vicissitudine, & conuersione omnium rerum: Altera, quæ magnam Amoris & Fortunæ cognationem ostendit: de priore, posterius, quàm breuissimè: & de posteriore prius, Homérica consuetudine, differemus. Atque, ut ab auctoritate testimonióque Pausaniæ proficiscamur, Ægeiræ, quod oppidum Achaïæ non ignobile fuit, in ædicula quadam, is se vidisse testatur Fortunæ signum, cui pinnatus adsumeret Cupido: Idque interpretatur, arctiorem Amoris & Fortunæ conjunctionem, ac necessitudinem. Eodémque probari putat argumento, plus interdum in Amore posse Fortunam, quàm vllam venustatem corporis, aut formæ præstantiam. Neque sanè multum à mente Pausaniæ Propertius abludit, his versibus:

Me sine, quem semper voluit fortuna jacere,

Hanc animam extremae reddere nequitie.

Et alio loco:

Vnicuique dedit vitium natura creato:

Mi fortuna aliquid semper amare dedit:

Vt enim Amorem præsto esse nascentibus sibi

persuadebant, qua ex opinione scripsit hic noster:

*Num tibi nascenti primis, mea vita, diebus,
Aridus argutum sternuit omen amor?*

Sic vnà cum amore fortunam inter deos Præstitites numerabant Ægyptij, quos adesse quatuor homini, simul ac in lucem editus esset, existimabant, δαίμονα, τύχην, ἔρωτα, ἀνάγκην. Quò fortasse referendum est illud summi Oratoris, in oratione de parricidio: *Si tibi fortuna non dedit, ut patre certo nascerere: & quæ sequuntur.* Fortuna nunc cæca perhibetur, nunc videns, ut in Ciceronis Lælio: *Non solum ipsa fortuna cæca est, sed eos etiam plerumque cacos efficit quos cõplexæ est.* Et in Philippica decimatertia: *Quis hoc vestrum non videt, quod ipsa Fortuna: quæ dicitur cæca, vidit?* Fortunæ quoque respicientis, in libro secundo legum: ut Fortunæ videntis, L. Apuleius in libro *Milesiarum* undecimo: *In tutelam receptus es fortuna, sed videntis: qua lucis suæ splendore ceteros deos illuminat.* Cæcum esse Amorem, & Plato, & Poëtæ ferè omnes prodiderunt. Theocritus:

--- τυφλὸς δ' ἔχ' αὐτὸς ὁ Πλοῦτος,

Ἀλλὰ καὶ ἀφρόντισ' ἔρως. ---

Non solus captus est oculis Plutus, sed & Amor, qui plenus amentię. Propertius:

Ante pedes cæcis lucebat semita nobis,

Scilicet insano nemo in amore videt.

Contrà sæpe oculatus est, imò totus oculus
Amor: si quidem dictus à Græcis ὀμάλειος, ut
Hesychius docet; cuiusque oculi acres, & flam-
mei, à Moscho describuntur, in Idyllio,

Ἐρως δραπέτης, ὀμματὰ δ' αὐτοῦ

Δεινύλα, καὶ φλογέεσσα. ---

Τύχη κωφή ὄειν, ait Cebes Thebanus; Surda est
Fortuna: Et Amor surdus, præsertim turpis.

Propertius:

Turpis amor surdis auribus esse solet.

Τύχην μαρομένην vocat idem Cebes: & Fortu-
nam insanam pacuuius. Quid Amore insanius?
quid tam à ratione auersum, & consilio inimi-
cū? In Satyra Flacci, Nomentanus exclamat:

Heu fortuna, quis est crudelior in nos

Te deus? ---

In Virgilij pharmaceutria Pastor: (matres
Sæuus Amor, inquit, docuit natorum sanguine
Commaculare manus, crudelis tu quoq; mater:
Crudelis mater magis, an puer improbus ille?
Improbus ille puer: crudelis tu quoque mater.
Itaque in Cistellaria Plauti Alcesimarchus,
amorem ait primum inter homines commen-
tum esse carnificinam:

Fortuna sæuo lata negotio: &

Ludum insolentem ludere pertinax.

Veneri & Amori nihilo clementius ingenium:

--- *quæis placet impareis*

Formas atque animos sub iuga ahenæ

Sæuo mittere cum joco.

Pingi fingique volucrem Cupidinem nemo nescit. Et alas fortunæ simulacro addi solitas monet Eusebius; nec obscurè innuit Horatius:

Lando manentem, (de fortuna loquitur,) si celeres quatit

Pennas, resigno quæ dedit.

Exititè qui Amori quasi pennas vellerent, & adimerent alas: in quibus Eubulus comicus:

Τίς γὰρ ὁ γράψας τῶν τῶν ἀνθρώπων ἀεὶ

Ἡ κηροπλαστήσας ἐρωτὶ ὑπὸ πτερόν;

Ὡς οὐδὲν ἦδὲ πλὴν χελιδόνας γράφειν.

Quicumque primus, *inquit*, vel cælo, vel penicillo, aligerum Amorem expressit, ut nihil ille norat pingere præter hirundines? moxque rationem subijcit: Βαρὺς δὲ κόμιδῃ, πῶς ἂν οὐ ἔχοι πτερὰ. Cum tam lentus, actardus sit, quoniam pacto, aut quem ad usum, alas habeat? Quin & apud Virgilium in libro Æneidos primo:

Paret amor dictis cara genitricis, & alas Exuit.

Si qua fides habenda Plutarcho, in libello de fortuna populi Romani; Tiberim trajectory, & urbem Romam ingressura Fortuna, fertur alas posuisse, ut significaret, se illic velle perpetuò manere. Notæ sunt Amoris sagittæ. Nec

ignota fortunæ tela, de quibus M. Tullius in epistola qua Titium consolatur: *Homines nos esse meminerimus, ea lege natos ut omnibus fortuna telis proposita sit vita nostra.* Et in libro primo de Officijs: *quo minùs multa patent in eorum vita, qua fortuna feriat.* Et in Academicis quæstionibus: *Fortuna gravissimo percussus vulnere.* Aufonius in Parentalibus:

Expertus fortis tela cauenda deæ.

Aliquando, pro arcu & sagittis, fulmen Amori tribuitur: quo modo pictum aiunt in Alcibiadis clypeo fuisse; atque pictum etiam in Octaviæ scholis ait Plinius: *Trisulcum id Iouis telum fortuna vibrat;* ut in secundo Ciceronis disputatione Tusculana: *Non solum stimulos doloris, sed etiam fulmina fortuna contemnamus.* Facem Amori tribuunt poëtæ. De Fortuna dixit Plautus, in Persa: *Nequaquã fortuna tibi faculã lucrificã allucere vult.* Ἐρως θεῶν καὶ ἀνθρώπων τύραννον ab Euripide vocatur, & ab aliis poëtis: quoniam *Omnia vincit Amor.* Propertius:

Hic deus & terras, & maria alta domat.

Menander:

Δέσποιν' ἔρωτος οὐδὲν ἰσχύει πλέον,
Οὐδ' αὐτός ὁ κρατὺς ἐν οὐρανῷ θεῶν
Ζεὺς, ἀλλ' ἐκαίῳ πάντ' ἀναλχαθεὺς πονεῖ.

Amore nihil valentius: ne ipse quidem qui in cælo diis imperat Iuppiter: sed eo cogente

nihil nō facit. Omnia esse in fortunæ potestate;
vel Philosophi de meliore nota confitentur, vt
Theophrastus, cui⁹ ore nobilitatus hic senarius:

Τύχη τὰ θνητῶν ἀνάματα, οὐκ ἐν βελία.

Vitam regit fortuna, non sapientia. Ea de caussa
in antiquis statuis, ac numis, fortuna cum gu-
bernaculo cernitur: vocaturque à Lucretio gu-
bernans, & Omnipotens à Virgilio. Lucretius:

Quod procul à nobis flectat fortuna gubernans.

Virgilius:

*Fortuna omnipotens, & ineluctabile fatum,
His posuere locis. ---*

Tam ignota est Fortunæ, quàm Nili origo:
quid illa, & vnde, sapientum scholæ inter se di-
uersæ certant, & adhuc sub iudice lis est. Adeo
est obscurum Amoris genus, & tenebricosi na-
tales, vt vnà cum Chao, vel statim ex Chao na-
tum tradant Orpheus & Hesiodus. Anceps &
lubrica Fortuna. Nihil est facilius quàm in
Amorem labi, & præcipitem ferri. Beatos aut
miseros fortuna reddit; ex quo fortunati, aut
infortunati vulgò appellantur. Felices vel in-
felices Amor efficit. Tibullus:

Ah miseri, quos hic grauius deus urget; at ille

Felix, cui placidus leniter afflat Amor.

Pellax, & tenax est fortuna: trahit ad se cuncta,
tenetque quicquid adhæserit; ex quo à Græcis
dicta est ἰξερνεία, & à Latinis fortuna visca-

ta.

ta. Amoris blanditiis amantes, ut visco aues, capiuntur. Hinc adolescens Pistoclerus, in Bacchidibus Plauti, sic ipsas Bacchides affatur:

Viscus merus vestra est blanditia.

Quid ita? quia dua unum expetitis palumbem.

Et Philoxenus senex in eadem Comœdia:

*Tactus sum vehementer visco; quid multa?
ego amo.*

Fortuna immoderata, in bono æquè atque in malo: inquit ille, ex equite Romano, Mimus; & ex Mimo, fortunæ beneficio, Senator factus. Moderati nihil est ab Amore expectandum: *quis enim modus adsit amori?* In suatantum inconstantia constans fortuna reperitur. Amor, in eo solùm inuenitur grauis, quòd à leuitate sua nusquàm discedit. Amor odit inertes, *fortibus est fortuna viris data*; ut in septimo Annali ait Ennius, & Tibullus:

Audentes forsque Venúsque iuuat.

Fortunam & bonam & malam antiqui venerati sunt: fuitque utriusque templum Romæ. Amorem bonum & malum, dulcem & amarum, sentiunt qui amant. Propertius:

*Quin ego diminuo curam, quòd saepe Cupido
Huic malus esse solet, cui bonus ante fuit.*

Virgilius:

*Et vitula tu dignus, & hic: & quisquis amores
Aut metuet dulces, aut experietur amaros.*

Plautus in Pseudolo:

Dulce atque amarum unà nunc misces mihi.

Et in Mostellaria:

Nam acastor Amor & melle & felle est facundissimus.

Gustu qui dat dulce, amarum usque ad satietatem oggerit.

Catullus:

Multa satis lusi: non est dea nescia nostri:

Quæ dulcem curis miscet amaritiem.

Inde Græci ἐρωτα γλυκύπικρον dixerunt; vel ὀξύγλυκον quod eleganter Latino verbo redditur Dulcacidum in prisco glossario. Fortuna nuncupata est Aurea, quæ in cubiculis Cæsarum haberi, & Imperatore ipso morituro præfente, ad successorem transferri consueverat. Aureæ Veneris aureus est filius. Ovidius:

Nec mora, movit Amor gemmatas aureus alas.

Rarò simul hominibus bonam fortunam, & bonam mentem dari, ait apud Liuium Asdrubal;

Amare, & sapere, vix deo conceditur,

vt ait P. Syrus. Cui ad fine est illud eiusdem mimographi:

Fortuna, nimium quem fouet, stultum facit.

Malè geritur inquit idem Syrus, quicquid geritur fortuna fide. Qui volet in fraudem induci, se suamque Amori committat; cuius, vt Moschus ait:

Νόος ὅτιν ἀνάμερος, ἡπεροπρωτάς

Οὐδὲν ἀλαθέων, δόλιον βρέφος

mens inmitis & fraudulenta, nihil veri loquitur : dolosus est puer. Multæ hominum de fortuna querelæ : quibus si quid aduersi, quamuis meritò, euenit : id immerenti fortunæ impurant, vt M. Tullius in epistola quadam ad C. Cassium : *Horum malorum omnium culpam fortuna sustinet.* Quò valdè pertinent Plinij verba, capite septimo libri secundi : *Toto quippe inundo, & locis omnibus, omnibûsque horis, fortuna sola inuocatur : una nominatur, una accusatur, una agitur reâ, sola laudatur, sola arguitur, nec sine conuicijs colitur.* Quicquid amantes libidine sua & intemperantia peccant, id omne adscribunt Amori. Tibul.

Non ego te lasi prudens, ignosce fatenti,

Iussit Amor : contra quis ferat arma deos?

Propertius :

Vna contentum pudeat me viuere amica :

Hoc si crimen erit, crimen Amoris erit.

Mitto quæ loquitur in Aulularia Plautinus Euclio : nequæ tamen præterire possum quòd scribit poëta Consularis, in ecloga, cuius lemma est, Cupido crûci adfixus :

Reus est sine crimine, iudice nullo,

Accusatus Amor : se quisque absolvere gestit,

Transferat ut proprias aliena in crimina culpas.

S ij

Ridiculum morem ! nec dissimilem veteris Atheniensium instituti : apud quos cùm nefas esset mactare bouem , & eam tamen victimam certa sacra postularent : sacerdos, is qui βοῦ-φόνος appellatus est, percussio boue , abiecta que illicò securi , vbi se in pedes coniecerat , securis ipsa vocabatur in iudicium : & causam capitis dicere iubebatur , vt commemorat in Atticis Pausanias. De fortuna scribit Horatius :

Te semper anteit saua necessitas,

Clauos trabales, & cuneos manu

Gestans aliena : nec seuerus

Vncus abest, liquidumve plumbum.

Ea supellex non desideratur in Amoris instrumento. De Amoris clauo , Plautus in Asinaria: *Fixus híc apud nos est animus tuus clauo Cupidinis.* De plumbo , in libro primo Metamorphoseû Ouid. vbi agit de duplici amoris telo.

--- fugat hoc, facit illud amorem:

*Quod facit, auratum est, & cuspide fulget
acuta:*

*Quod fugat, obtusum est, & habet sub arundine
plumbum.*

De vncio Propertius:

Et benè cùm fixum mento discussseris vncum,

Nil erit hoc; rostro te premet ansa suo.

In eodem Horatij carmine ad Fortunam:

Te spes, & albo rara fides colit

Velata panno.

In Amoris castris spes quidem frequens, nempe sine qua nomen ipsum Amoris interiret: sed rara fides, siue potius nulla. Propertius:

Expertus dico, nemo est in amore fidelis.

Amor admitti fenestra gaudet; idque nequitiae magister in Arte amandi præcepit:

Cum melius foribus possis, admitte fenestra;
nec inficiatur Cynthia se hoc astu meretricio ductasse Propertium:

Et mea nocturnis trita fenestra dolis,

Per quam demisso quoties tibi fune pependi.

Lepida est apud Plutarchum, ἐν Πρωμαϊκῶν, narratiuncula, de Fortuna noctu ad regem Seruium Tullium, quem perditè amabat, per fenestram commeante: quod Ovidius paucis versibus cōplexus est, in libro sexto Fastorum:

Tum Deafurtivos timide profitetur amores,

Celestemque homini concubuisse pudet.

Arsit enim magni correpta cupidine Regis,

Cacæque in hoc uno non fuit illa viro.

Nocte domum parua solita est intrare fenestra:

Vnde fenestella nomina porta tenet.

Liceat, si libeat, trecenta id genus percensere, quæ sūt Amori & Fortunæ inter se cōmunia: sed ne singula persequendo longius, quàm statui, progrediar, extremum hoc erit. Ob tantam omnibus penè in rebus, Fortunæ & Amoris

similitudinem, consentaneū videri, vt Pſychæ
nescio cui clauibus ex lege duodecim tabula-
rum adeptis, eaque domo exacta, fortunam
Amor vxorem ducat: verūque fiat Homeri-
cum prouerbum, ὅς ἀπὸ τὸν ὁμοῖον ἄγει θεὸς ὅς
τὸν ὁμοῖον. Quod si quid litium & turbarum, in
eo matrimonio, vt in nullo non solet, orietur,
vtrūque iure istos hendecasyllabos audiet,

*Cum sitis similes, parēsque vita:
Vxor pessima, pessimus maritus:
Miror non bene conuenire vobis.*

Nunc reliquum est vt illud alterum percur-
ram, quod ordine prius, tractatione posterius
feci, de Amoris & fortunæ rota: hoc est de
vicissitudine rerum, præcipuè in Amore: cu-
ius æmulam meminisse iubet Parmeno Teren-
tianus in Eūnucho:

*Hoc nunc dices, eiectos hinc nos,
Omnium rerum, heus, vicissitudo est!*

Propertius:

*Iste quod est ego saepe fui: sed fors, in hora,
Hoc ipso eiecto carior alter erit.*

Id autem περὶ πικρῶς in hac elegia dixit:

Vinceris, aut vincis: hac in amore rota est.

Eius rotæ riualet admonet Tibullus:

*At tu qui potior nunc es, mea fata caueto.
Versatur celeri fors leuis orbe rota.*

Horatius verò ad aliud rotæ genus traduxit eandem sententiam:

Ingratam Veneri pone superbiam,

Ne currente retrò funis eat rota.

Est tertium rotæ genus, longè ab utròque diuersum, quo non ad vicissitudinem, sed ad cruciatum Amor vititur. Plautus in Cistellaria, *jactor, crucior, agitor, stimulo, versor in Amoris rota miser*. Alludit enim ad pœnam & rotam Ixionis, vel ipso interprete Propertio:

Tum magis Armenias cupias accedere tigres,

Et magis inferna vincula nosse rota,

Quàm pueri toties arcum sentire medullis.

Magnus hîc Rhetorum campus, in quo, vel indiferti, liberius vagetur, & exulet oratio: de varietate fortunæ: de commutatione tempestatum, & elementorum: de diern & nocturno, otij & negotij, vigiliæ & somni, laboris & quietis, doloris & voluptatis vicissitudine: de orbium denique cælestiũ rerumque & publicarum, & priuatarum cõuersione: quibus omisfis, vnã tãtũ fabellam vobis referam, quam mihi quondam ægrotanti narrauit anicula. Venatum olim profecti, parum fauente Diana, lupus & vulpes, cùm ad solis occasum campis syluisque peragratis, nihil cepissent, nec quicquam esset prædæ prædatoribus famelici, & ad famelicos catulos, per hortum quen-

dam remeantes, puteum præteribant. In quem despiciens vulpes, & ingentem in aqua visa videre caseum; nam

Nox erat, & caelo fulgebat Luna sereno:

eò, stimulante inedia, se per situlam demisit. Postquam agnouit errorẽ suũ, & se deceptam radiantis imagine lunæ: vulpinæ fraudis, & ingenij sui non oblita in tanto discrimine, statim rationem inijt, qua & sibi exitũ & lupo exitiũ crearet. Illo igitur vocato, heust tu, inquit, maior est hic caseus, quàm vt sola valeã extrahere. Proin facito vt alteri situlæ infidẽs huc venias, in partẽ oneris simul & prædæ. Vix ea Vulpes, & iam lupo esuriens erat in situla: quæ grauiore imposito pondere deorsum ferri cepit, & eadẽ opera Vulpes sursum redire. Sensit tum stolidus lupo dolum, & verbis illis quibus inter se loquuntur belluæ, Vulpis perfidiam accusabat, & ius societatis violatum querebatur. Cui ridens vulpes: Neque mirum est, si graui deorsum tendunt: neque iniquum, si pessimi pessum cant. An, stulte, nescis ita naturã comparatum esse vt hic descendat, ascendat ille? alia tollantur,, alia deprimantur?

--- Sic fata deũ rex

Sortitur, voluitque vices: hic vertitur ordo.!

Lupo quid postea factum sit, nec scio, nec curo. Nisi fortè renouato vetere rapacium

coquorum supplicio, rapax lupus in puteo
cœnam coquit: aut nisi Martis auxilio, in
cuius tutela est, illinc euasit; inopinataque
vitati periculi lætitia, λύκος παρὰ τὸ φρέαρ χορέ-
υει, vt est in Græcorum parœmia. Anicula
tamen, quæ rem gestam ita narrabat vt cre-
deres interfuisse, hoc aiebat vnum, vulpem
calliditate sua inde incolumem discessisse.
Quare & nos cum vulpe incolumes disceda-
mus; prius Apollinē νόμον, λύκον, καὶ λυκοκτένον,
precati, vt quod ei lupo accidit, cæteris omni-
bus contingat; gregibusque innoxiiis per hostiū
perniciem salute parta, quicquid est luporum
in puteos condatur.

IOAN. PASSERATII PRÆFA-
tio in tertium librum
Propertij.



INTER omnes non satis conue-
nit, rectène dictum sit ab opti-
mo poëtarum, cùm admiranda
Mecœnati polliceretur rerum
leuiū spectacula: *In tenui labor,*
at tenuis non gloria. Imperiti
enim, quorum est, fuit, & semper erit magna
natio, negant paruis rebus esse immorandum:

nec quicquam probant , ac suscipiunt , nisi quod specie , sonoque ingenti , oculos & aures feriat. Hebetes scilicet eorum sensus , ut vastæ cuiusdam ac mole sua torpentis belluæ , vehementioribus tantum stimulis excitantur , & excitati , non ratione ac iudicio , ad ea quæ sese offerunt , sed opinione impetûque rapiuntur. Ex hoc semine orti sunt innumerabiles cum asininis auriculis Midæ , qui tibiæ Marfyæ asperum stridorem , libentius quàm dulcem Apollinis lyræ strepitum , audiunt. Quibus autem natura ingenium acrius , & , ut veteres loquebantur , capitalius , largita est , immane quantum istorum dissimiles sint , qui artificum opera , ut decempedatores agros , pertica metiuntur. Quippe vnum Phidiæ sigillum , aut vasculum Mentoris , omnibus Colossis , Mausolæis , & insanis Pyramidum substructionibus anteponent ; magisque auscultabunt huic Virgilij præcepto , *laudato ingentiarura , Exiguû colito* ; quàm Hesiodo suadenti :

Νῦν ὀλίγην αἰεὶν ; μεγάλη δ' ἐν φόρτῳ γέσθαι.

Quorsum hæc instituta disputatio , aut quid ad Propertium ? Nimirum ut eorum coarguam , & comprimam sermones , qui malè poni operam in huius poëtæ interpretatione censent , & melius potuisse collocari in aliis auctoribus explicandis. Iactantur enim hæ

voces ab hominibus qui nunquam Gratijs
litarunt : quas ego silentio frangere perse-
uerarem , nisi periculum esset ne pro confes-
sione haberetur taciturnitas. Quid , obse-
cro , illos mouet , vt Propertium , quem om-
nes verè docti , quotquot sunt , admirantur ,
vulgariter doctorum nemo intelligit , tanto-
pere fastidiant ? An rei quam tractat , & styli
humilitas ?

En cor Zenodoti , en jecur Cratetis.

Tenuis , inquiunt , est amorum materia ; & te-
nues elegiarum versiculi. An propterea non est
in tenui labor , & tenuis non gloria ? Pudet in hos
stolones velitari exemplis , & rationibus pu-
gnare : abeant ad mulieres lanificas , & ab iis
quærant , vtrum difficilius sit , crassum stamen ,
an tenue substamen nere. Rogent eximios pi-
ctores , vtrum operosius sit , secare lineas te-
nuitate sua obtutum effugientes , an eas ducere
quæ in oculos incurrant , & sint vel lippis con-
spiciuæ. Sciscitentur ex Polycletis ac Myroni-
bus , procliuiusne sit argumenta sculpere in va-
luis templorum , in heroïum clypeis , & in po-
culis operis antiqui : an , vt cogitauit Stasica-
res , ex Atho monte ambitiosissimi Regis effi-
giẽ formare , quæ sinistra retineret urbẽ cū de-
cem incolarum millibus , & amnẽ dextra fun-
deret in proximum mare decurrentem. Cele-

bruit, & adhuc celebrat fama Callicratem, quòd eburneas formicas, & alia tam parua fecerit animalia, vteorum particulæ discerni nequirent. Est illustri nomine Myrmecides, quoditem exebore quadrigam cum agitatore elaborarit, quam alis suis musca integeret; & nauem, quam apicula pennis absconderet. Viget laude, monumentisque literarum, is qui fertur in nucem inclusisse Iliada Homeri: atque id scripto in membrana carmine. Tollebatur in cælum Zeuxis frequenti plausu theatri, cùm vuas in scena proposuit, ita pictas, vt aues ad eas statim aduolarent: Sed de cælo decidit, vbi Parrhasius sic pictum induxit linteum, vt Zeuxis remoueri flagitaret, quò vuæ suæ ostenderentur. Deinde errore intellecto, is qui paulò ante alitum iudicio tuebatur, ingenuo pudore coactus est palmam aduersario concedere: quoniam ipse volucres, se verò artificem Parrhasius fefellisset. Tantum valuit in eo certamine nobilissimorum pictorum exacta subtilitas. Quid Pyreïcus? nōne, quamuis humilia sequutus, summam humilitatis gloriam adeptus est: eiúsque perexiguæ tabellæ pluris vænierunt quàm maximæ multorum? Transeamus à simulatione ad veritatē: hoc est, à picturæ vmbri, ad naturæ lucem: & minutissima consideremus, quæ ob id infe-

Et nuncupantur: fatebimur communem omnium parentem maiore solertia bombyces, apes, culices, formicas, cicadas, & alia id genus architectatam esse, quàm leones, equos, tauros, & vastissimos quadrupedum elephantos. Age, comparemus Regalium cum Struthio-camelo: componamus crocodilum cum Scinco: conferamus Remoram cum ceto: cõtendamus gemmulas cum saxis, & herbulas cum arboribus: perspectis singulis, è tripode hoc vaticinatum credemus Plinium, *Nusquam magis quàm in minimis totam esse Naturam*: ignoscemusque Aristomacho Solensi, quòd in apibus contemplandis annos duodesexaginta consumpserit. Descendamus ad contemptissima, & maximè ludicra Naturæ opuscula: faciamus quod olim ad Caietam Scipio & Lælius; conchas legamus, & vmbilicos, eiectionem ta maris, & quæ fluctus quotidie in littus expuunt: qua de caussa nugas marinas vocat Apuleius, & littorales quisquillas. Sic enim emendandum opinor in Apologia priore, ubi pessimè nunc legitur, qui scyllas. Quanta in iis, quæso, lasciuiantis Naturæ, ac sine penicillo pingentis varietas? quot colorum differentiæ? quàm multiplices figuræ? planæ, concavæ: longæ, brevès: lunatæ, orbiculatæ: rugosæ, læues: denticulatæ, striatæ: virgulatæ, crispæ: imbrici-

catim undulatae: canaliculatim reticulatae; sic
 ut millesimam partem ars nulla possit imitari.
 Itaque quod antea ridiculum, nunc serium &
 memorabile queat existimari Cæsaris Caligulae
 in expeditione Britannica facinus: qui cum
 aciem instruxisset, machinasque disposuisset in
 litore Oceani, suspensis exercitus animis quid-
 nam acturus esset, repente, signo dato, militibus
 imperavit, ut conchis galeas & sinus imple-
 rent, hæc esse dictitans palatio debita, Capi-
 tolióque digna Oceani spolia. Propertium
 ergo qui carpunt, & vellicant, quod è tenui
 argumento laudem, ut laureolam è mustaceo
 petat, si quid sapiunt, ad invidiam sapunt, &
 malignè improbi sunt: quemadmodum qui
 eum paulò duriores esse prædicant, si ita sen-
 tiunt, nihil sentiunt; ac vereor ne sæpiùs in Sal-
 macide lauerint. Smyndridam Sybaritam, ho-
 minem cum vitio gentis, tum suo luxu perdi-
 tum, accepimus, cum in rosa obdormisset, vix
 tandem excitatum ad symphoniam, eiulare,
 ac lamentari cœpisse, quod sibi, de lecticius
 duritia, tergum & latera dolerent: tanquam
 rosa facti puluilli fuissent Cretensium robur,

---- *durumve cubile*

In arime, Iouis imperijs imposta Typhæo.

Par horum mollis inertia, qui si fortè ab aliis

studiis, quæ grauiora putant, requiescere aliquantisper tentauerint, quamuis teneris offensus versiculis, de ijs immerentibus conqueruntur, vt in Aulularia de sermone sororis Megadorus:

Mihi misero cerebrum excutiunt tua dicta:

Lapides loqueris.

His ego bonam mentem precabor, & vt stolidissimum Iouem medicum Menecratem Philippus Macedo, iubebo ὑγιαίνειν. Sin ægrota-
re maluerint, quàm esse mea salute saniores; nihil verabo quin Anticyra relicta, cū sui similibus, perpetuò incolant Morboniam. Cæterum in expolitione paruamur rerum triplex nobis est adhibenda cautio. Vna, ne in ματαιοτεχνίαν imprudentes delabamur, & dum admirationi esse cupimus, ludibrio simus: vt ille qui ciceris grana, certo ex interuallo missa, continuè, & sine frustratione, in acum inferebat, spectante Alexandro: A quo, vt magnificentissimo rege, cū amplissimam mercedem expectaret, eamque iam spe deuorasset: λύκος ἔχωνεν διὰ κενῆς, vt est in Græcorum prouerbio, *Inhianit frustra lupus*: donatusque duntaxat eius leguminis modio: quod præmium, vt ait Fabius, illo fuit opere dignissimum. Altera est cautio, ne nimiū velimus esse diligētes: quia sæpe plurimū obest nimia

diligentia. Ex quo jocus Africani, tribu moventis Centurionem, qui in Pauli pugna non affuerat. Cùm enim ex Censore quæreret, cur ab eo notaretur: diceretq; se custodiæ[caussa] in castris remansisse: *Non amo*, inquit, *nimiùm diligentes*. Quo nomine reprehensum quoque ferunt ab Apelle Protogenem. Nam cùm eius opus immensi laboris, ac curæ supra modum anxie, miraretur: omnia sibi dixit cum illo esse paria, aut etiam illi meliora: sed vno se præstare, quòd Protogenes manum de tabula nesciret tollere. Postremò cauendum est, ne dum exilitati studemus, inanes aridique existamus: nobisque pro sicca, & firma valetudine, contingant eæ quæ in Maronis epigrammate vocantur *Attica febres*. Siquidem non pauci tenuitatem in scribèdo consecretantes, malè pasta, ieiuna, & velut abortiua fundunt carmina: in quæ id iure contorqueatur, quod de se ait in *Captiuis Ergasilus*:

Ossa atque pellis misera macritudine.

Diuerso, nec minore laborant vitio, qui vt habitiores nitidioresque appareant, saginam cadunt, & sine vero succo, colore, & sanguine, vt veternosi, magis magisque intumescunt, qualem fuisse perhibent apud Græcos Antimachum: & nescio an apud Latinos huius morbi contagio hæserit Lucano, Papinio, Claudiano:

no:

no: quos tamen è poëtarum Senatu non eijcio, cum honeste locum suum tudentur, & id vitij aliis rependant virtutibus. Multa quidem hinc peccamus: sed vnus est fons erroris, ex quo manant omnia: quòd cum tabulas ac stylum cepimus, vt Icarus, aut Phaëthon in fabulis, modum tenere non didicimus: &, quæ est in plerisque iudicij vel imbecillitas, vel prauitas, interdum Comœdiæ cothurnum, & Tragediæ soccum induimus. Præterea, velut pedarij senatores in discessionibus, quæ pars maior videtur, in eam transimus: quatinus *indictum pessimi turba sit*, vt rectè Seneca monet. Neque enim tam bene agitur cum rebus humanis, vt meliora pluribus placeant. Hinc quidam, foliti numerare non expendere sententias, Propertij libros aspernantur non alia de causa quàm quòd à multitudine contemnuntur; si contemnere est, non legere, & non sequi, quod non valeas assequi. Ad Pauli filium, euerforem Carthaginis & Numantiæ, cum in villam ad Laurentum (sic apud Macrobiū puto scribendum esse, non Laueranium) allatus esset Acipenser, rarissimus inuentu piscis, & Apiciorum Nomentanorumque gulæ imprimis expetitus: is tam elegans nactus cœnæ caput, vnum & alterum ex iis qui se salutatum venerant inuitauit, plures:

que inuitaturus videbatur: Ibi Pontius eius familiaris in aurem insusurravit: *Vide quid agas, Scipio: Acipenser iste paucorum hominū est.* Idem de Propertio dici potest: Poëta iste perpaucorum lectorum & auditorum est: Non quòd omnes ad has discendi epulas, quandoquidem publicum est conuiuium, non admittamus, vltroque & liberaliter accepturi simus, sed quod ad multitudinis palatum & stomachum Propertius non facit. Vulgus fatuum fatuis delectatur betis: non gaudet sparsis papauere & sesamo ferculis. Liberum esse patiamur, vt Lucillianum pecus, qua lubet pascatur; nec suam inuideamus Cyprio boui merendam, vt est in Ennij Sotadico. Istuc nempe, vt cætera, præclare in Phœnissis Euripides:

Εἰ πᾶσι ταυτὸ καλὸν ἔφυ, σοφρόν θ' ἄμα,

Οὐκ ἦν ἂν ἀμφίλεκτος ἀνθρώποις ἔρις.

Pulchrum atque honestum si foret cunctis idem, nulla esset anceps hominibus contentio.

Cui consentaneus Homeri versiculus ὁ δ' ξ'.

Ἄλλος γὰρ τ' ἄλλοισιν ἀνὴρ ἐπὶ τίρπεται
ἔργῳ.

Atque vt ille ipse Homerus alium fingit esse deorum sermonem, alium hominum: Sic aliud aliis poëtis scribendi genus. Suum certè Propertio proprium, ac peculiare: valde remotum à consuetudine sensûque populari: sub-

tile, pressum, limatum : floridum historiis, varium fabulis, verborum & sententiarum crebris luminibus distinctum : refertum exoticæ, reconditæque doctrinæ. Cuius rei conscientia fretus de seipso ista non dubitavit prædicare:

*Primus ego ingredior, puro de fonte sacerdos,
Itala per Grajos Orgia ferre choros.*

*Quo me fama leuat terras sublimis, & à me
Nata coronatis Musa triumphat equis.*

*Magnum iter ascendo, sed dat mihi gloria vires;
Non iuuat è facili lecta corona iugo.*

--- opus hoc de monte sororum

Detulit intacta pagina nostra via.

Hac curent iuvenes, hac curent scripta puella:

Mèque Deum clament, & mihi sacra ferant;

Tunc me non humilem mirabere saepe poetam,

Tunc ego Romanis præferar ingeniis.

At turpe est, dixerit aliquis, suo ipsius ore celebrari; verecundioresque sunt, ut ait M. Tullius, præcones ludorum Gymnicorum, qui cum cæteris coronas imposuerant victoribus, eorumque nomina magna voce pronuntiarunt, cum ipsi ante ludorum missionem coronâ donantur, alium præconem adhibent, ne sua voce ipsi se victores esse prædicent. Respondet isti loco M. Brutus his ad Ciceronem verbis: *Iuuat magnifice loqui, & ceritè decet aduersus ignorantes quid*

rectum quid prauum sit. Nunquid porrò & M. Cato de virtutibus suis orationem habuit contra Thermum : Et alterum Calabriæ decus, vociferatur, vt exaudiant ac simul rumpantur inquit :

Sume superbiam

Quæsitam meritis : & mihi Delphica

Lauru cinge volens Melpomene comam.

Quinetiam poëtarum Princeps, qui è virginali modestia Partheniatis cognomen inuenit, de se ita loqui non erubescit:

Primus ego in patriam mecum, modò vita superfit,

Aonio rediens deducam vertice Musas,

Primus Idumaas referam tibi Mantua palmas.

Mitto Pindari, Lucretij, & aliorum iactantiunculas: litem hanc edito libello, ceu honorarius arbiter, decidit Plutarchus. Licuit igitur, libuitque simul, Propertio, insultare inuidiæ, tum eius famam arrodingenti, vt magnos homines sæpiùs quàm paruos minuti allatrant canes. Datum illi etiam ab Apolline vt præfagiret sibi venturam mortuo eam laudem quam viuo negarat inuidia, & quæ postea iudicio testimoniòque doctorum ei contigit:

At mihi quod viuo detraxerat inuida turba,

Post obitum duplici sænore reddet honos.

Doctorum dixi, quorum manibus teritur,

gestatur in oculis , fouetur in sinu : licèt dolendum sit , ex eo numero extitisse tam paucos , qui sibi corollam è delicatissimis & amœnissimis eius hortulis texuerint , ac saltem adnotatiunculis & scholiis aureos illos versus illustrarint. Primus Beroaldus, vir diligens, & vt illo sæculo , eruditus , in eum scripsit commentarium ; cui sanè tribuenda laus, quod egit : danda venia , quod reliquit, non spicas, sed vberem messem : in quam nos quoque falcem iniecimus : Quo successu, *ἡμεῖς ἐν γούνασι κείτου*. Opus hîc ingenio, eruditione opus: quod vtrûmq; in me perexiguum agnosco. Pergam nihilominus, vt occepi : nec semel susceptum onus deponam , satis officio, vel sola voluntate consulendi vestris studiis, facturus : quando, vt hic noster ait , *In magnis voluisse sat est*. Non est meum in Aquilianam de dolo malo formulam committere: Nec mihi simulatio, nec dissimulatio probatur : agam bona fide: quod sciam, id vos nō celabo : quod nesciam, id nesciū vobis tradam. qui à me plura postulabit, ejerabo, iniquus est. De me præterea nihil : hoc solum de Mantuani vatis oraculo: si vsquam verum est , *In tenui labor, at tenuis non gloria*: id in scriptis Propertij verissimū est. Qua de re si quis pertinaciùs nobiscū litigare volet : nulla per nos mora , quin jure judiciō-

que contendamus: non *caluimus*; non *struimus* pedem: rectà Prætorem adeamus. Detur nobis Q. Horatius, seuerus harum controuersiarum iudex, ne dicam fastidiosus censor, cui Plautus, facetiarum pater videtur parum facetus Is egregiè Propertium laudat, sed testimonio prope cæco. Adeò in eius verbis delitescit Amerini poëtæ iusta commendatio: quam ego primus, nisi fallor, è tenebris eruiam & in lucem proferam. Sic igitur scribit ad Iulium Florum:

Carmina compono: hinc elegos, mirabile visul

Cælatumque nouem Musis opus. ----

Obscurè inquam, per elegos, & cælatum opus nouem Musis, Propertii poëmata innuit, ipsis Camœnarum manibus expolita: quod & paullò post significat apertiùs:

Discedo Alcaeus, punèto illius: ille meo quis!

Quis nisi Callimachus? Meminerat, credo, Propertium auidè arripuisse, sibi que vindicasse, Callimachi nomen: & fortasse legerat vel audierat illos versus ex elegia prima libri quarti:

Vt nostris tumefacta superbiat Vmbria libris,

Vmbria Romani patria Callimachi.

Quicquid est, non temerè profectò Statius, in epithalamio *Stellæ & Violantillæ*, Propertium Callimacho & Philetæ socium adiungit:

---- hunc ipse choro plaudente Philetas:

Callimachusque senex ; Vmbroque Propertius

antro,

Ambissent laudare diem. ---

Amat enim hic noster se cum illis conferre , vt elegia sexta libri quarti:

Cera Philetæis certet Romana corymbis;

Et Cyrenæas urna ministret aquas.

vbi per aquas Cyrenæas Cyrenæum intelligit Callimachum, Elegia prima libri secundi:

Sed neque Phlegæos Iouis Enceladique tumultus,

Intonet angusto pectore Callimachus.

Nec mea conueniunt duro præcordia versu

Cæsaris in Phrygios condere nomen auos.

Elegia vltima:

Tu satius memorem Musis imitere Philetam,

Et non inflati somnia Callimachi.

Elegia nona libri tertij:

Inter Callimachi sat erit placuisse libellos:

Et cecinisse modis Coë poeta tuis.

Denique elegia prima eiusdem libri ; nam consultò mutauì ordinem ; vt hîc hodie desinere, vnde cras incipiendum erit:

Callimachi Manes , & Coi sacra Phileta,

In vestrum quaeso me sinite ire nemus.

IOAN. PASSERATII PRÆFA-
tio in Librum Quartum
Propertij.



ACRA Musis solemnia facturi,
vt solemnem ritum sacrorum
teneamus, ab omnibus bonis
ordiemur, & jubebimus fauere
linguis, dum Propertius noster
Carmina non prius
Audita, Musarum sacerdos,
Virginibus puerisque cantat.

Cujus rei nos admonet insani principis sapiens
magister, cum beatè viuendi præcepta tra-
dens, Quoties, inquit, sacrarum literarum
mentio interuenerit, fauete linguis: quod ver-
bum, non vt plerique existimant, à fauore tra-
hitur, sed imperatur silentium, vt ritè peragi
possit sacrum, nulla voce mala obstrepente: &
quoties aliquid ex eo proferetur oraculo, vt
intenti, & compressa voce audiatis. Neque
verò satis est, quod in sacris præcipitur, lin-
guam pascere, nisi mentem simul ipsam pasca-
mus: quod facit is qui adest animo, vt corpo-
re. Nam cuius animus & aures peregrinantur,
quamuis taceat, nihilominus obstrepat sacris

musarum, nec ullum præstat in ea taciturnitate silentium. Id quam vim haberet ut indicarent diligentissimi, peritissimique rerum diuinarum Ægypti, Isidi & Osiridi perpetuò comitem adiunxerunt Harpocratem, qui ab Ausonio dicitur Sigalion: licet aliam eius moris causam apud Diuum Augustinum reddat Marcus Varro. Ex hoc Ægyptiorum ritu credibile est philosophum illum inclytum Samium, suam hausisse ἐχεμυθίας, cùm eos quos probabat discipulos, omnium primùm docebat tacere: ut certo definitoque temporis spatium, pro cuiusque indole & ingenio, essent dumtaxat ἀκυστικοί: mox ab iis profecti initiis μαθηματικοί, ac postremò φυσικοί euaderent. Eam quoque, vel virtutem, vel virtutis administram, vocauit idem philosophus ἡσυχίας ἐν δευτέρῳ ἱερῷ λόγῳ, eo versu quo præclarum opus exorsus est, & qui aureis literis scribatur dignissimo:

ὦ νέοι, ἀλλὰ σέβετε μετ' ἡσυχίας τὰ δὲ πάντα.

Præterea vetus opinio fuit, Regem Numam, qui Pythagoræ auditor fuisse perhibetur, aut à Pythagoræ decretis non alienus, cùm Musarum consuetudine non minùs quàm Egeriæ Nymphæ vteretur, Quiritibus suis persuasisse, ut ex earum numero vnā, nomine *Tacitam*, præcipuè venerarētur, quā Plutarchus σιωπῆ-

Νῶ, καὶ νῆας, interpretatur, ob studium fidem-
 que silentii, & ætatis florem semper vigentem.
 Angeronam certè constat eos persanctè co-
 luisse, eiúsque deæ simulacrum ore obligato
 & obsignato, in ara Volupiae posuisse, vt signi-
 ficarent, silentii patientiæque beneficio ad
 maximam perueniri voluptatem. Non me la-
 tet aliud esse in sacris genus silentii, quod arca-
 na sacrorum enuntiare prohibet, ne inexpli-
 cabilis fraus admittatur: quo de genere si-
 lentii nunc loqui non instituimus: Augurum
 silentium potius optamus, hoc est, vt ipsi de-
 finiunt, omnis vitii vacuitatem: vt ad hæc sa-
 cra, pro puris manibus, pura veste, puris ver-
 benis, & puris victimis, puras aures, animúm-
 que purum adferamus: quia sic captatis auspi-
 ciis, statim quæuis addicent aues, & quicquid
 acturi erimus fortunabunt. Quisquis enim
 Sigalioni, Tacitæ, Angeronæ, castè operabi-
 tur, experietur verissimam esse Menandri sen-
 tentiam:

οὐδὲν σιωπῆς ἔστι χρησιμώτερον.

Libet autem hoc loco tria trium poëtarum in-
 signia silentii exempla proponere, quæ inter
 se collata, & leuiter emendata, reor vobis
 non iniucunda fore. Ennius in Scipione:

Mundus cæli vastus constitit silentio,

Et Neptunus saeuus undis asperis pausam dedit.

Solequis iter repressit ungulis volantibus.

Constitere amnes peremnes: arbores vento vacant.

Reperiuntur hi versus apud Macrobiū in libro sexto Saturnaliorum, capite secundo, mendosi tamen hoc modo:

Mundus cæli vastus constitit silentia.

Item consistere amnes peremnes.

Restitui, constitit silentio:

quod valet, stetit cum silentio: ut apud Virgilium in libro quarto Georgicorum:

Atque Ixionei vento rota constitit orbis:

constitit vento, stetit cum vento. Et in libro duodecimo Æneidos;

Consurgunt gemitu Rutuli:

furgunt cum gemitu. Catullus in miserabili carmine ad Manlium:

Quod mihi fortuna, casuque oppressus acerbo,

Conscriptum lacrymis mittis epistolium.

conscriptum lacrymis, scriptum cum lacrymis. Pro consistere amnes peremnes, quod reposui constitere: ita videlicet sensus poetæ postulat, & flagitat trochaïci modulus, confirmâtque is versus quem mox laudabimus. Sequitur illic, arbores vento vacant: quod nos manu ducit ad emendationem alterius versiculi Enniani ex Hectoris Lytris: *Constitit, credo, Scamæder: arbores vento vagant.*

Nempe hanc nobis lectionem obtrudit Nonius Marcellus in verbo vagas pro vagaris: vbi ridiculè nouus Orpheus arbores inducit vagantes. Atqui quauis sponſione contenderim, & meo bono periculo, legendum eſſe, *vacant*, non *vagant*. Quid enim tam geminum germanum quàm hi duo ſunt eiufdem poëtæ verſus?

Conſtitere amnes peremnes: arbores vento vacant.

Conſtitit credo Scamander: arbores vento vacant.

Quid ſit porrò arbores vento vacare, non ignorant qui norunt quid ſit *νημιά*, & meminereunt iſtud Euripideum in Bacchis, vbi Deo verba faciente, mirum exprimitur cæli, arborum, & ferarum ſilentium:

Σίγησε δ' αἰθήρ, σίγα δ' εὐλειμος νάπη
φύλλ' εἶχε, θήρων δ' ὄσ' ἀν' ἡκούσας βόλυ.

Conticuit æther, tacita frondosum nemus

Continuit folia, vocem preſſerunt fera.

In Euripidis & Ennij veſtigijs pedem poſuit Maro, cùm ait Ecloga nona:

Et nunc omne tibi ſtratū ſilet aquor, & omnes,

Adſpice, ventofi ceciderunt murmuris aura.

Verùm in libro decimo Æneïdos utrũque & ſeipſum penè ſuperauit:

Tum pater omnipotens, rerum cui ſumma poteſtas,

Infit : eo dicente, Deum domus alta filescit,

Et tremefacta solo tellus, filet arduus ather.

*Cum Zephyri posuere : premit placida aquora
pontus.*

Quibus in verbis , si quis ista consideret attentius, *Et tremefacta solo tellus* : suspicari poterit, scriptum à Virgilio fuisse ; *Et tremefacta sono tellus*, non solo : ut diuinæ vocis ingenti sono tellus conterrita intremuisse dicatur : quo modo fere loquitur in libro secundo *Æneidos* :

*Nunc omnes terrent aura, sonus excitat omnis
Suspensum, & pariter comitique onerique
mentem.*

Et Propertius in elegia quinta libri quarti :

*Nec sedeant cineri manes : & Cerberus ultor
Turpia ieiuno terreat ossa sono.*

Sustinebo tamen assensionem, ne affirmatione temeraria , in lubrica conjecturarum via uspiam labar : præsertim cum non nesciam dici sola terrarum : & satis bella sit explicatio Virgiliani loci ; Ioue loqui incipiente, ab ipso solo, fundamentisque, & quasi radicibus tremefactam terram fuisse. Sed ego nimium verbosus & loquax in edicendo silentio : vereorque ne imitari videar apparitores ac silentarios nostros, qui, ut audientiam faciant, dum suum illud *Silete, Silete*, altius ingeminant, sub-

sellia tumultu , & clamore implent curiam.
 Satis ergo multa de silentio : nunc pauca subij-
 ciamus de sacris Propertij , vt cujufmodi sint,
 & quo colenda pacto , intelligatis. Vt in ciuita-
 te , sacrorum alia sunt quæ ad vniuersos , alia
 quæ ad singulos ciues , singulâsque gentes , ac
 familias pertinent : quorum illa publica , hæc
 autem priuata , gentilitia & familiaria nomi-
 nantur. Sic Poëticorum sacrorum , alia com-
 munia sunt : alia , propria. Communia sunt ;
 quorum omnes poëtæ sunt participes , vt A-
 pollinis , Liberi patris , & Musarum : quoniam
 eorum numinum afflatu instinctûque con-
 citati vates sua fundunt oracula. De quibus
 Virgilius in libro secundo Georgicorum :

*Me verò primùm dulces ante omnia Musæ,
 Quarum sacra fero ingenti percussus amore,
 Accipiant , calique vias , & sidera monstrent.*

Ouidius in elegia decima libri secundi de
 Ponto :

Sunt tamen inter se communia sacra poëtis.

Papinius Statius in libro quinto Sylvarum ,
 vbi acerbum filij deflet interitum.

--- qua vestra sorores

Orgia Pieria ? quas incestauimus aras ?

Obscurus satyricus , & qui Democrito co-
 gnomen eripuit :

Ipse semipaganus

Ad sacra vaturn carmen affero nostrum.

Horum communium sacrorum se velut Antistitem esse gloriatur is poëta quem *Rudia* genuere *vetusta*, cum ait, *Musarū Pompilius clueo*: quasi in ceremoniis Musarum alter esset *Numa*, plusquam Rex sacrorum aut Pontifex maximus. Idcirco Theocritus in Gratiis poëtas omnes vocat Μουσάων ἑποφῆτας,

Μουσάων δὲ μάλιστα τὴν ἱεροῦς ἑποφῆτας.

Propria sunt, vel cuiusque poëtæ, vel cuiusque generis : (nam plura poëtarum genera sunt ;) de quibus hic noster initio libri tertij:

Callimachi manes, & Coi sacra Phileta;

In vestrum quaso me sinite ire nemus.

Martialis in libro septimo, de Silio Italico:

Sacra cothurnati non attigit ante Maronis.

Ea sacra rursus Propertio duplicia sunt: Vna Veneris & Cupidinis: quæ ita sacra dicenda sūt, vt homines scelesti sacri, & *Auri sacra fames*, quibus sacris polluimur non expiamur. De iis Propertius in elegia septima libri primi:

Tu caue nostra tuo contemnas carmine sacra.

Et in elegia decima libri tertij:

Noctis & instituet sacra ministra Venus.

Altera, vtpote sobriorum hominum & frugi, longè meliora sunt: ad quæ tandem se amator noster contulit, elegia penultima libri tertij:

*Nunc demum vasto fessi resipiscimus aestu,
Vulnera & ad sanum nunc coiêre mea.*

*Mens bona, si qua dea es, tua me in sacraria
dono.*

Quare gratulandum est Propertio, quod è nequitiaë vadis, & scopulis libidinum, ad bonæ mentis portum enatauit, vbi maiora concepit animo, & librum quartum scripturus, imposuit elegiaë tantum oneris, quantum vix epos ferre posset. Hinc illa magnifica promissa, & Homérico vel Pindarico spiritu digna molimina:

Sacra diésque canã, & cognomina prisca locorũ.

Roma faue tibi suadet opus: date candida ciucs

Omina, & incæptis dextera cantet anis.

Sacra facit vates: sint ora fauentia sacris.

Nunc Iouis incipiam caussas aperire Feretri:

Armæque de ducibus trina recepta tribus.

Magnum iter ascendo, sed dat mihi gloria vires,

Non inuat e facili lecta corona iugo.

Atque vt singulas elegias percurramus, quid difficilius aut grauius: quid audacius aut felicius, quàm vrbis Romæ originem, incrementa, maiestatem, tam paruis numeris, iis-que imparibus & alternis includere? quod facere aggressus est elegia prima. Quot modis stylum, & quot se in facies, Protei more vertit, cùm Dei Vortumni multiplices formas

inas, artes, nomina, spirantemque & loquentem in medio foro statuam nobis effingit elegia secunda? Proditam Sabinis hostibus ab incesta virgine Vestali arcem collis Saturnij: justam proditionis mercedem: sempiternumque sceleris monumentum æternis chartarum monumentis tradere: & Tarpeij nominis invidiam atque infamiam saxo insculpere, opus est vnius Propertij elegia quarta. Actiacam pugnam, præsens Apollinis numen, insignem Cæsaris victoriam, & Ægypto subacta propagatos imperij Romani fines ut exili versu æquavit, elegia sexta! Lantuuini draconis miraculum, & historiam suo prope sæculo incognitam, quam venuste, & quam paucis descripsit, elegia octava! Quod in elegia decima narrat; Herculis in Italiam aduentum, cum Geryonis bubus: eos boues à Caco abactos: receptam prædam, & interfectum latronem: Negatam à mulieribus aquam victori sitienti, quod non impunè tulerunt, ab eo in perpetuum iussæ eo exesse sacro quod tum Ioui statuit, vnà cum Ara maxima: hoc (inquam) ita narrat ut spectare non audire videamur. Iam verò in elegia vndecima, ut eleganter de Ioue Feretrio differit! varias nominis causas exponit, & opima spolia Camœnarum humeris reportat:

Ausa per exiguos magna referre modos;
 ut eius sodalis versiculum usurpem. Minoris
 argumenti est, nec minoris operæ, elegia ter-
 tia, siue epistola Arethusæ ad Lycotam: cui,
 ne longo quidem interuallo proxima sit vlla
 heroïdum epistola. Acrior est aliquanto elegia
 quinta, vbi Lenæ improbitatem exagitat,
 scelestum caput deuouet, dignoque eius vita
 exitio tumultoque insultat. Sunt & eximio
 artificio contexta duo epicedia: vnum in Cyn-
 thiam, elegia septima: quod totum ita dextro
 Mercurio surripuit Homero, ut vix Homerus
 ipse furtum deprehendat. Alterum in Corne-
 liam Scriboniæ, elegia vltima: planè quod ait
 Catullus:

Mæstius lacrymis Simonideis.

Superest quædã poëtæ nostri ex veterenequi-
 tia turpitude, elegia nona, vbi in alieno amore
 manifestò tenetur à Cynthia, & meritò vapu-
 lat. Eam tamen elegiam non arbitror ad
 hunc librum, sed ad aliquem superiorum per-
 tinere. Collocata sanè est præposterè, cum in
 elegia septima iam Cynthia mortua lugeatur:
 elegia autè nona, tanquam magico carmine ab
 inferis excitata rursus prodeat, rixas turbasque
 concitet; ac tandem cum Propertio redeat in
 gratiã, quòd seu librariorũ, seu grammaticorũ

flagitium, haud scio an hæcenus sit animadu-
uersum. Habetis sacra Romani Callimachi
nunc de horum cultu auscultate Propertio
Cyrenæo:

--- Εἰχὰς εἰχὰς ὅσῃς ἀλιτρώς;

Ὡ πόλλων οὐ πάντι φαίνεται, ἀλλ' ὅπῃς ἐοχλός.

--- *Procul ô procul este profani,*

*Non etenim cuius se præbet Apollo videndum;
Sed castoque bonoque viro.*

Opus videlicet his sacris, pro iniuge, placida,
& sine labe victima, libero animo, & integro,
mâsuetóq; ingenio. Græci quidē sacerdotes,
victimā probaturi, aquā in eius aurē solebāt in-
fūdere: & sic experiri an esset idonea sacrificio.
Horum imitatione, aquæ vicē, aurib⁹ Proper-
tij versus instillabimus: si quis respuet, nec leni-
ter influere patietur, bidentē reiculā censebi-
mus: amouebimus à sacris, & ab altarib⁹ ad pas-
cua, vel ad lanios remitemus. Tenebimus & il-
lū morē sacrorū, quod deos salutaturi discin-
gebātur, & capita operiebāt: si soluti erim⁹ aliis
omnibus curis & negotiis, & si nec respiciemus,
nec prospiciemus, omnémq; cogitationē no-
stram in literis defigemus. Lucius Sylla, qui,
ut sitim ciuilis sanguinis expleret, urbem, &
Italiam fermè totam cædibus exhausit, cum
ad ædem Bellonæ senatum haberet, & in vi-
cino campo trucidari septem millia ciuium

jussisset, conclamatione tot miserorum sub ferro gementium exterrito senatu: *Hoc agamus*, inquit, *Patres conscripti, pauculi seditiosi iussu meo occidantur*. Auertat Deus omen tam diri exempli: quicquid tamen acciderit, his sacris intenti simus, nec nostra putemus interesse quid vulgus tumultuetur. Alij aliud agant, nos hoc agamus, & arcium artiumq; patronā ita ritè veneremur: ὡς πάλαις τετογένεια, ἀναστ' ὄρθας, τιμὴ δὲ πόλιν τε, καὶ πολίτας, ἀτερ' ἀλγέων, καὶ γαστρῶν, καὶ θανάτων ἀώρων. Consentanea enim sunt ista, & votis, & temporibus nostris; nec absurdum est, cum à fauentia & bonis ominibus cœperimus, si in hanc precatiunculam, Alcæi verbis conceptam, designamus.

IOAN. PASSERATII PRÆ-
fatiuncula.



IN his Musarum castris, quòd magnam hyemis partem infrequens fui, si quis me vel emanforem, vel desertorem existimat: ei culpę deprecandę veterem breuēque historiam narrauerò. Gregarius olim miles, ex amore infimę conditionis mulierculę oppi-

dò corruptus, non mediocri sacramenti flagitio, nec minore capitis discrimine, fortim egredi castris, & abnoctare consueuerat. Id ubi rescivit Imperator, quia eius forti fidelique opera sæpe vsus erat, noluit pro suo jure, & seueritate disciplinæ militaris, agere: sed vocato in tabernaculum, tribusque verbis castigato, redemptam à se quam deperibat ancillulam, propriam perpetuamque tradidit. Atque ita fecit, quod negatur fieri posse, vt *canem fugitiuum alligaret agninis lactibus*. Ad hoc exemplum, arbitror mihi non veniam modò, sed & laudem deberi, quòd, dum hinc fui, amicam sequutus sum: (vtinam assequutus! nam adhuc malè morigeram experior:) & amicam eiusmodi, vt eam vel ipse sibi expetat Xénocrates: sine qua vita morte acerbior sit: vnde Venus venustatem: Cupido amorem: decorem Gratiæ: Iocus leporem: Iuuentas florem ætatulæ: robur Hercules mutuum sumat: Summo præterea genere natam, vtpote neptem Apollinis, & Æsculapij filiam: cui, nisi seruiam, neque meis, neque vestris queam seruire commodis. Nondum agnoscitis, opinor & vultis nominē? Non pudebit nominare, quā amplecti in medio foro, & in sinu fouere turpe non sit. Ea est Bona Valetudo: cujus caussa causā hanc à me qui non accipiet, vtitur illa excusatione, qua

ridiculus patronus, apud ridiculum iudicem
 Claudium Cæsarem vsus quondam fertur.
 Cùm enim excusaret testem ab eo è prouincia
 euocatum, dixit, Non potuisse præsto esse.
 Quærenti, cur ita, *mortuus est*, inquit, *credo,*
licuit. Inimicis nostris isto modo abesse liceat,
 quo citatis nemo respondet, nec solemne
 Censuræ verbum eloquitur, nisi vt in tragœ-
 dia:

Adsum, atque aduenio Acheronte.

Tanti mihi non est excusari sic, accusari malo.
 Neque verò est quòd serò venisse existimemur,
 quasi depugnato prælio, vt iocatur in Menæch-
 mis facetus vernula. In conuiuio Propertii
 satis est reliquiarum, quas nunc tempus est vt
 cum parasitis Plautinis attendeamus.

IOAN. PASSERATII PRÆFA-
 tio in Bucolica Virgilij.



AUDAT Domitii Marci versicu-
 lum de Q. Cæcilio Epeirota,
 litatore non ignobili, Suetonius,
 in libello de illustribus
 Grammaticis:

Epeirota, tenellorum nutricula vatum.

Quo versiculo nutricula vatum meritò ap-

pellavit Cæcilium Domitius: quia primus ille Grammaticorum publicè Virgilium interpretatus est, sine cuius carmine, tanquam lacte, tenera è Latio ingenia rectè ad poëticam alii, & educari non possent. Ideò Fabius Rhetor: *Vt apud Græcos Homerus, inquit, sic apud Latinos Virgilius, erudiendis pueris auspiciatissimum dedit exordium: optimèque institutum est, ut à Virgilio potissimum lectio inciperet: quamquam ad intelligendas eius virtutes firmiore iudicio esset opus.* Quare consilij mei rationem de Virgilij Bucolicorum interpretatione me omnibus probaturum esse confido: iis præsertim qui præstantissimis censent assuescendum; nec de ornando celebrandòque Virgilio laborant: cum sit hæc Virgilij gloria, quemadmodum ait apud Macrobiū Symmachus, ut nullius laudè crescat, nullius vituperatione minuatur. Tantùm dicam, post Bauium, Mæuium, Philistum, & eiusmodi paucos, indoctos, insulsosque obrectatores, qui viuo Virgilio contigerunt, inuentum esse neminem qui non hunc poëtam amarit, coluerit, admiratus sit. Nisi fortè nobis obijciatur Caius Cæsar Caligula, qui Virgilij scripta & imagines ex omnibus bibliothecis tollere conatus est, impudentissima calumnia, quòd eum diceret nullius ingenij, minimæque doctrinæ. Audio vocem

portenti & furia, non principis: caudicis, & stipitis, non hominis: qui adeo vecors fuit ut equum suum Consulem populi Romani designaret. Debuerat certè bipedum stolidissimus ac sæuissimus illum quadrupedem Cæsarem potius declarare; & equo suo, qui se esset multo sapientior, principatu imperioque cedere. Quanto melius Imperator Alexander Seuerus, qui vnà cum Ciceronis simulachro in secundo Larario, Virgilij consecrauit imaginem, vbi Achillis & heroùm collocatas habebat imagines: eumque Platonem poëtarum nominabat: ut olim à Panætio dictus est Plato philosophorum Homerus. Vnum addam modò, insigne ad laudem præconium, nec à nostro alienum argumento. Scribit enim auctor libri *de causis corruptæ eloquentiæ*: (Cornelium Tacitum qui putat, haud mecum sentit: non magis quàm qui variis centonibus confarcinaram, & nuper editam de consolatione declamatiunculam, M. Tullio repugnantem & reclamanti obtrudunt:) Scribit igitur ille, quisquis est, ad hunc modum: *Ac ne fortunam quidem vatum, & illud felix contubernium, comparare timerim cum inquieta, & anxia oratorum vita. Licet illos agitent certamina sua, & pericula, & controuersia, malo secretum & securum Virgilij secessum: in quo neque apud Diuū Augustum gra-*

tiacarnit, neque apud Populum Romanum notitia. Testes Augusti epistola: Testis Populus ipse Romanus, qui auditis in theatro Virgilij versibus, surrexit uniuersus; & forte præsentem spectantemque Virgilium sic veneratus est quasi Augustum. Hæc incerti, boni tamen auctoris, verba pertinere ad Bucolica nostra suspicor, adductis aliis verbis, è Virgilij vita, cuius scriptorem fuisse Donatum è Seruio didicimus: *Bucolica, inquit, triennio, Asinij Pollionis suasu, perfecit; eoque successu edidit, ut in scena quoque recitarentur.* Verùm ego istuc credo: at illud falsum quod mox subijcit: Ciceronem auditis quibusdam Virgilij versibus, iussisse ab initio totam eclogam recitari; eaque accuratè pernotata, exclamasse: *Magnæ spes altera Romæ:* quod Hemistichium libro duodecimo *Æneidos* Virgilius postea inseruerit. Tam hercle, inquam, hoc falsum, quàm id quod etiànum in ore est imperitæ multitudinis, & in circulis narratur: Virgilium scilicet à meretricula, quam deperibat, deceptum quondam ac delusum, è turri quadam sublimè omnibûsque conspicuum pependisse: quam mox ille magicis artibus probè sit vltus infamiam. Placet verò huius anilis fabellæ originem scrutari, & erroris occultum aperire fontem, ut vnâ operâ mendum, quod in eadem

Virgilij vita inoleuit, tollamus. Est autem illic ita scriptum: *Virgilius Maro parentibus modicis fuit, & præcipuè patre Marone: quem quidam opificem figulum; plures Magi cuiusdam viatoris initio mercenarium, mox ob industriam generum, tradiderunt.* Ex hoc loco homines non satis perspicaces, & nimium creduli; auum maternum fuisse magum arbitrati sunt: longiusque opinione prouecti, Virgilium magicas artes ab auo materno edoctum fuisse sibi persuaferunt: & inde ridiculum illum absurdumque mimum confinxerunt. Atqui erratum est in vna tantum voce à scriptore librario, quem eius qui dictabat, fefellit pronuntiatio. Scribendum enim *Maij non magi*, vt perspicuè ostendet id quod paulò post sequitur: *Prægnans mater Maia somnians enixam se laureum ramum.* Si mater Virgilij dicta Maia, necesse est auum maternum Virgilij Maium vocatum fuisse, non magum, quando paternum nomen inditum filix. Videtis ex tantillo librarij errato quanta nata, aucta, & propagata sit fabula. Progredi longius nolo: nec ad Theocriti, Hesiodi, Homeri comparisonem cum Virgilio accedere, de qua vulgò sic statuunt: Virgilium à Theocrito plerumque victum, nec rarò Theocritum à Virgilio esse superatum: Hesiodum

Virgilio longè inferiorem videri: & Homeri vim, tacitamque maiestatem, sententiarum grauitate & verborum proprietate Virgilium adæquasse. Meum non est, nec primati cuiusquam, tanta de re pronuntiare. Vocandæ omnes eruditorum centuriæ, & in suffragia mittendæ, vt maximo doctorum comitatu de maximorū hominum fama & penè capite, sententia feratur. Licèt tamen absque vlla Græcorum offensione laudem eam tribuere propriam Virgilio, quòd trium summorum poëtarum triplex argumentum triplici opere vnus exprefferit: Nimirum Idyllia 36. Theocriti, decem Bucolicorum eclogis: opera & dies Hesiodi, quatuor Georgicorum libris: Iliada & Odyssæam Homeri, duodecim voluminibus Æneïdos. Qua in re sequutus est humanæ vitæ naturæque ordinem. Etenim prima fuit, in terris, aureo illo sæculo, pastoralis vita: deinde culta rura: postremò pro cultis & feracibus agris suscepta & gesta bella. Cur autem Theocriti & Virgilij pastoralia carmina Bucolica inscribantur, in promptu est, & à plebe Grammaticorum olim reddita ratio. Tria enim constat esse genera pastorum, quorum minimὴ αἰώλοιοι, siue Caprarii: paulò honoratiores, ποιμένες, siue Opiliones: honestissimi Βυκόλοιοι, siue bubulci, à quibus Bucolica dicta;

quia capris & ouibus boues antecellunt, cùm
& maximæ victimæ hinc eligantur. Bucolicorum autem origo varia memoratur. Nam
alii à Lacedæmoniis pastoribus: alij ab Or-
ste: alij ab Apolline Nomio: alij à Libero pa-
tre: alij à Mercurio: alij à prima hominum vi-
ta, quam pastoralem fuisse paulò antè docui-
mus, eam repetunt: Nec desunt qui ad ho-
norem Panos, Fauni, & Syluani, deorùmque
agrestium, eam referant. Nonnulli ordinis,
quem Virgilius tenuit, hanc statuunt causam,
quòd cùm tria sint dicendi scribendique gene-
ra, ἰσχνόν, ἄδρὸν, μέσον: tenue, amplū, & mode-
ratum: ἰσχνόν in Bucolicis: μέσον in Georgicis:
ἄδρὸν in Æneïde Virgilius exequutus est: ut
ostenderet se nullo in genere non exercitatum
esse. Præterea, poëma omne, aut δραματικόν,
aut διηγηματικόν, aut μικτόν: δραματικόν, in quo,
personæ loquentes inducuntur, poëta silet, ut
in Bucolicorum parte maxima: διηγηματικόν, in
quo poëta loquitur, nulla interposita persona,
ut in tribus primis Georgicorum libris: μικτόν,
in quo & poëta loquitur, & alias personas lo-
quentes inducit, ut in Æneïde. Scio me, ut ait
Plautus, *vetera vaticinari*, & ea percurrere quæ
semidoctis non ignota sint: Adjiciam nihilo-
minus pauca, de Eclogis & Tityro: nec ob-
curiora, etiam ab aliis obseruata; ἐκλογεῖν

feligere est, excerpere, adnotare: vnde poë-
matia ex aliis excerpta, & adnotata, vt è Theo-
critō Bucolica Maronis, eclogas Grammatici
vocatunt, idque nomen aliquando latius pa-
tet, vt Gallix decus Turnebus admonuit. Sanè
Apollinaris lyrica Horatij poëmata Eclogas
nominat, quòd ea ex Pindaro, Alcæo, Alcma-
ne, cæterisque Lyricis, ad imitationem, ex-
cerpsisset, & selegisset:

Vernans per varij carminis eclogas,

Verborum violis multicoloribus.

Hinc apud Ciceronem *in epistolis ad Atticum*,
Eclogarij, homines eruditi, excerpere so-
liti, & in breuiarium conferre quicquid le-
gerent. Reliquum est, vt de Tityro breuiter
differamus, quo nomine Theocritus & Virgi-
lius nullum excogitare potuerūt Bucolico car-
mini aptius. Est enim Tityros calamus Hesy-
chio, vnde apud Virgilium calamo canit Tity-
rus, & Athenæo libro quarto *δειπνοσοφιστῶν*,
καλάμινος αὐλὸς πτύρινος καλεῖται ὡς καὶ τοῖς ἐν
Ἰταλίᾳ Δωριεῦσιν: addit Athenæus & musicon
organō ita vocari, alio nomine monaulō. Tity-
rus item Laconū linguā aries major aut veruex
sectarius, si credimus Seruio. Strabo libro deci-
mo inter deos agrestes Tityros nominauerat.
Scholiastes Theocriti in tertium Idylliū: *τῆς ἀρ-
γῆς πτύρης λέγει*, hinc apud Virgilium len-

tus & otiosus Tityrus. Subiungit idem scholiaſtes Tityrum Silenum dici, & Satyros Tityros, & hircos, & ποτὶ πόλυσ τῶν θειν. Camillos & miniſtros decorum haberi Tityros. Nam quod adiungit idem Scholiaſtes: ejus nominis montem eſſe in Creta inſula, & Tityros dici ſimias quaſdam exiguâ caudâ, nihil ad id quod agimus. Huc accedit quod quamlibet paſtoris perſonam Tityrus ſuſtinet ἀπόλυσ in ecloga 3.

Tityre paſcentes à flumine reice capellas. & ecl. 9.

Tityre dum redeo, brevis eſt via, paſce capellas.
In ecloga 5.

Incipe, paſcentes ſervabit Tityrus hædos.
Eſt etiam Tityrus ποιμὴν in ecloga 6.

--- *Tityre pingues*

Paſcere oportet oves, Martialis:

Ingera perdidit miſera vicina Cremona,

Flebat & abductas Tityrus ager oves.

Βεχόλος quoque inducitur in ecloga prima, cum ait ipſe,

Ille me aſerrare boves, &c.

Nihil igitur mirum ſi Virgilius à Tityro exorſus eſt Bucolica, cum & ſolius Tityri nomine ea deſignentur ab Ouidio, cum ait:

Tityrus, & ſegetes, Eneïaque arma legentur,

Roma triumphati dum caput orbis erit.

Imò verò & ab ipſo Virgilio, ut iſdem verſi-

bus meam originem claudam, quibus ille
Georgica conclusit:

*Illo Virgilium me tempore dulcis alebat
Parthenope, studiis florentem ignobilis oci,
Carmina qui lusi pastorum, audaxque iuuentâ
Tityre, te patula cecini sub tegmine fagi.*

CAROLO SALDANIO, DINCAR-
uillao, Regi ab interioribus consiliis, &
à præcipua curâ ararij,

IO. PASSERATIVS,
S. D.



RATIVNCVLAM de Cacitate,
quam nuper habui, tibi mitto, do-
nôque; dignum mcâ, non tuâ for-
tunâ, munusculum. Sed vereor,
qua cacitatis impudentia est, ne te
flagitet quod vix rogare audeo: efficias auctoritate
tua & gratia, quâ meritò potes plurimum, ut quod
mihi de pensione & liberalitate regia debetur, citò
à Quaestore numeretur, quo anagnosten alere va-
leam Caco necessarium, & studiosa iuventuti pro-
futurum. Perge, Vir clarissime, de Passeratio bene
mereri, & beneficij erga me tui magnitudinem in-
de aestima, quòd, hoc impetrato, Cacus licet, tibi
sum oculos debiturus. Vale. Lutetia Parisiorum, ex
Academia & Bibliotheca regia.

IOAN. PASSERATII ELO-
quentia Professoris & Interpretis
Regij, de Cacitate Oratio.



RÆTER spem meam, & opinionem vestram, quòd huc, longissimo interuallo, & quasi postliminio fãti, nunc reuertor, Auditores, nolim existimetis id à me factum, vt ex amplissimo, & ornatissimo ad dicendum loco, meas apud vos querar fortunas, & oculorum defleam orbitatem: Scio vos Machaonas & Podalirios non esse, nec à vobis consilium & auxilium, sicut nec ab aliis alloquium & miserationem exspecto. Huius calamitatis, si est appellanda calamitas, vnicum & certum remedium animus æquus, quẽ, Dei optimi maximi benignitate, mihi comparauit: præsertim admonitus ab aurea Euripidis sententia: quam, cùm ille Athenis Orestem fabulam doceret, Socrates dicitur reuocasse, adeò philosophica visa est philosophiæ parenti:

*Cir. in
4. Tusc.*

Οὐκ ἔστιν οὐδὲν δεινόν, ὥσθ' εἰ πεῖν ἔπος,
οὐδὲ πάθος, οὐδὲ συμφορὰ γένηται.

Ἡς ἔκ' ἂν ἄρχιτ' ἄχθος ἀνθρώπων φύσις.

Eam sententiam, apud M. Tullium, in
quarta disputatione Tusculana, vetus Poë-
ta vertit barbarè (falsò putauit Muretus
Ciceronis esse versus, cùm sint Pacuuij:
qui, more ac jure suo, paulò liberiùs, Eu-
ripideòs ita reddidit:)

*Neque tam terribilis vlla fando oratio est:
Neque fors, neque ira calitum inuictum
malum,*

*Quod non natura humanã patiendo fê-
rat.*

Prorsus aurea, vt antè dixi, γνώμη, & di-
gna quæ imis reponatur sensibus: ideò-
que à præstantissimis auctoribus valde
celebrata. Vsurpat hanc Romani voluptas
theatri, Musarumque deliciæ Plautus, in
Captiuis:

Dy immortales id voluerunt, vos hanc Sc. Dg
immor.
arumnam exsequi.

*Decet id pati animo aquo: si id facietis, le-
uior labos erit.*

Vtitur & Horatius, ad mulcendam Vir-
giliij sui ægritudinem:

*Varum mœrentis, Vari de mortē dolentis
Insolabiliter.*

Horat.
sij in
ep. 14.
l. 1.

*Durum (inquit) sed lenius fit patientia,
Quicquid corrigere est nefas.*

Quod scitè verèque dictum amico & so-
dali eius Maroni, tantopere placuit, ut
carmini diuino intexeret:

*Tum senior Nautes, unum Tritonia
Pallas*

*Quem docuit, multaque insignem reddi-
dit arte,*

*Hæc responsa dabat: vel qua portenderit
ira*

*Magna Deum, vel qua fatorum posceret
ordo.*

Isque his Aenean solatus vocibus infit:

*Nate deâ, quò fata trahunt, retrahuntque,
sequamur.*

*Quicquid erit, superanda omnis fortuna
ferendo est.*

Quoties igitur occurret ista mihi cogita-
tio, Τύφλωσίς ἐστὶ ξυμφορὰ γένηλατος. faxo
& huius continuò veniat in mentem, Τύ-
φλωσίς ἐστὶν ἀνθρώπινον κακόν. Infortunium,
& durum quidem infortunium, est cæci-
tas: humanum tamen: & humana omnia
homini humanè ferenda sunt. Huc acce-
dit, quòd sic iubet necessitas, cum qua
nec superi nec inferi pugnaverint. Præter-
ea, minuit dolorem quòd malum nec re-

pentinum est, nec antè non prouisum:

--- non ulla laborum

Nunc primùm noua mihi facies, inopinàue Anecd.
surgit. 6.

*Omnia percepi, atque animo mecum antè
peregi.*

Quid quod illuc mihi commune est cum plurimis? Non longè abiero. Sunt in hac vrbe quindeni viceni (vulgus ita loquitur, & trecentos dicere religio est) quibus idem quod mihi obtigit, vt errent inter Orcum & solem: nec eorum quemquam *ἀεχχεῖν*, aut ejulare muliebriter audimus, nisi quatenus opem & præsidium vitæ suæ ab hominum misericordia petit. At miserum est oculis non uti. Imò vereor ne me superbum potius quàm miserum nonnulli existiment, quos salutatus, vt ferè cæcis euenit, non resalutauero. Equidem malum id & miserum arbitrari minimè decet quod in vim, numen & maiestatem deorum cadit. Cæcitas, inquam, tam diuinum bonum est quàm humanum malum. Quid Amore inter deos hominésque majus? quid diuinius? quid augustius? Is & cæcus est, & cæcos omnes efficit quibus imperat. Mihi non credite locupletissimo testi, & cultissi-

324 IOAN. PASSERATII
mo poetæ Menandro.

Apud
Stobæum
in Men-
andro.

sent.
Ari-
stoph.
in Plu-
to. &
Pluto
in Lys.

--- Τόδ' ἐρεῖν

Επισκοτεῖ, ἔοικε, καὶ τοῖς εὐλόγως, καὶ τοῖς
καλῶς ἔχουσιν.

Horat.
od. 13.
l. 1.
C. 7 d. 1

Cæcus est diuitiarum deus Plutus, quem
ante Iouē, atque adeò ante Bonam Men-
tem, maxima pars hominū colit: meritó-
que cæcus, cū vt talpa in terræ visceri-
bus nascatur, alatur, & adolescat. Cæca
nominantur ab Alcæo Venusino fata,
quorum omnia reguntur arbitrio: & cæ-
ca rerum humanarum domina, ac regina,
Fortuna: *que sola, vt Plinius ait, in tota ra-
tione mortalium utrāque paginam facit.*
Quare misera nullo modo est Cæcitas,
quæ cælesti diuinæque naturæ conuenit,
& cui estis obnoxia,

Virg. l.
1. Georg.

--- vos, ó clarissima mundi

Lumina, labentem calo quæ ducitis an-
num.

Lib. 1.
Georg.

Estis profectò cæcitati obnoxia, vel ne-
quicquam stupemus

Defectus solis varios, lunaque labores.

Et quisquam indignetur oculis suis acci-
disse, quod æternis, & omni-tuentibus
mundi oculis, certis temporibus, interje-
ctu interpositūque terræ, necesse est eue-
nire? Sit horribilis cæcitas imperitæ mul-

titudini, certè nō erit sapientiæ studiosis,
qui vel vltro sibi adsciuerunt. Memorare
libet quæ de physico Democrito refert
apud Gellium Staius Cæcilius, Latinæ
princeps Comoediæ, si Safernatem &
Afrum excipias.

C. 17. J.
10.
Plautū
& Terē
tium.

*Democritus Abderites, physicus philoso-
phus, clypeum*

*Constituit contra exortum Hyperionis,
oculos*

*Effodere ut posset splendore arco : ita
radijs*

Solis aciem effodit luminis, malis bene

Esse ne videret ciuibus: sic ego

Fulgentis splendore pecunia volo

Elucificare exitum ætatis meæ,

*Ne in re bona videam esse nequam fi-
lium.*

Satius esse tunc censuit Democritus ocu-
lis orbari, quàm opibus & gratiâ florentes
improbos cernere. Nunc autem, ut sunt
tempora & mores, quibus est bene, nisi
malis? Quàm optanda viris bonis, supe-
riore decennio, cæcitas fuit, ne spectare
cogeretur ea quæ etiâ nunc animus hor-
ret refugitque meminisse? Sæpenum ero
præstat nihil omnino videre, quàm multa
videre quæ nolis: & ceteris acerbior est qui

oculis hauritur dolor, quàm qui aliis percipitur sensibus. Hinc existunt frequentes apud poëtas miserorum querelæ: ut,

Infandum, regina, jubes renouare dolorem,

Trojanas ut opes, & lamentabile regnum,

Eruerint Danaï: quæque ipse miserrima vidi,

Et quorum pars magna fui. Item:

Vidi Hecubam, centumque nûrus, Priamumque per aras

Sanguine fœdantem quos ipse sacrauerat ignes.

Quæ sumpta sunt ex Hecuba, vel Andromacha Ennii,

*Cicero.
Tusc.*

O pater, ô Priami domus! & quæ sequuntur. Mox,

Hæc omnia vidi inflammari:

Priamo vi vitam euitari:

Iouis aram sanguine turpari.

Miserabiles anapæsti, præcipuè cùm funduntur ad tibiam! nec minùs flebiles hi senarii,

Ibid.

Vidi, videre quod me passa agerrimè,

Hectorem curru quadrijugo raptarier.

Poëtas commemoro: quid oratores?

Lapidi filici mediusfidius lacrymas excuterent hæc Tulliana in defensione Cælii: *Vidi enim, vidi, & illum hausi dolorem, vel acerbissimum in vita, cum Q. Metellus abstraheretur e sinu gremioque patriæ. Caret igitur acerbissimo dolore cæcitas: & si rem suis momentis ponderare volumus, nihil habet quod de fortuna sua magnopere conqueratur. Itaque apud Ovidium Tiresias exprobranti cæcitatem Pentheo,*

Quàm felix esses, si tu quoque luminis huius

Orbus, ait, fieres, ne Bacchica sacra videres! Metam
3.

Dicam quod magis miremini: si cæcitas merito suo malè audiet, vix iure quisquam nostrum audiet bene: pluresque in vita Oedipodæ quàm Lyncei reperiètur. Quàm multa homines non vident etiam quæ vident? Quàm multa quærunt quæ manibus tenent? & procul abesse credunt quæ iacent ante pedes? Propertium interrogemus. Dic, Sexte Aureli, de hoc genere cæcitatis in amantes testimonium:

*Ante pedes cæcis lucebat semita nobis;
Scilicet insano nemo in amore videt.*

X iiij

Bl. 1.
l. 1.

Dic & tu Q. Enni, in aruspices, augures, astrologos:

Quod est ante pedes nemo spectat, cali scrutantur plagas.

Quantulū differunt à cecis qui dormiunt, dormitantve? qui cantherino ritu astantes somniant? qui aliud agunt? quorum animus peregrinatur? quos aliqua transuersos rapit quæ mentis luminibus officit perturbatio? ut amor, odium, lætitia, mœror, metus, cupiditas, pauor, pudor, iracundia, ebrietas? quarum rerum exempla in Comœdijs, ut in vitæ speculo, licet intueri. Vno atque altero contenti simus exemplo. In Amphitruone Plauti, Amphitruo ipse inquit Blepharoni:

Sc. Dī
vistiā
fidem.

A. *ubi illic scelestus est?* B. *quis?* A. *Sofia.*

B. *Eccum illum.* A. *ubi?* B. *ante oculos: non vides?* A. *vix video præ ira: adeò me istic Delirum fecit.*

Sc.
Quid
hoc
est n.

In Asinaria: *non hercle te prauideram: quæso ne vitio vortas:*

Ita iracundia obstitit oculis.

Sc. He-
ra cecū.

Addite, si vultis, tertium ex Milite glorioso exemplum, ubi mulier amatrix, quæ militē ludos facit, naso plus videre quàm oculis dicitur: ita illam excæcat Amor. Ne singulas persequar vitæ partes, tota

vita mera cæcitas : & omnes mortales
tam in suis quàm in alienis negocijs cæci:
quod , tanquam per nebulam , si quis ad-
uertat , nobis ostendit. Virgilius in ani-
morum natura describenda :

Ignæus est olivæ vigor , & celestis origo Aen.6.

Seminibus , quantum non noxia corpora
tardant ,

Terrenique hebetant artus , moribundâ-
que membra.

Hinc metuunt , cupiuntque : dolent , gau-
dentque : nec auras

Respiciunt , clausi tenebris , & carcere caco.

Hæc plerique cum legimus , nec legi-
mus , operamque ludimus : nisi perspici-
mus adumbrari vitæ caliginisque huma-
næ imaginem : & à Virgilio hæc hausta ef-
se ex philosophiæ fontibus. Tangit enim
quatuor genera perturbationum , vnde
animis nostris oboriuntur & circumfun-
duntur tenebræ : quorum duo gignuntur
ex opinione boni , totidem ex opinione
mali. Ex opinione boni ; vel præsentis ,
ut dolor : vel futuri , ut metus. Ago pin-
giore Minerua , ut adolescentuli men-
tem doctissimi poetæ assequantur , si-
múlque intelligant cur in libro secundo
de natura rerum Lucretius exclamet,

O cacas hominum mētes! ô pectora caca!

*Qualibus in tenebris vite, quantisque
periclis,*

Degitur hoc aui, quodcūque est!

Nam si nemo viuit quin gaudeat, do-
leat, speret, metuat; quis, obsecro, non
cæcus? aut cui glaucoma non obijciunt
hi à ratione auersi motus, & affectiones
mentis lumine carentes? Eminùs velitati,
propiùs nunc congregiamur, manūque
conferamus. Vno certè vincimus argu-
mento nos omnes, *Quicumque terra mu-
nere vescimur, cæcutire.* Constat enim
totam vitam iter. cōtinuum esse ad mor-
tem. Siquidem

Hor.
od. 14.
lib. 3.

*Nascentes morimur, finisque ab origine
pendet.*

Man.
li. 6.
In her-
des.
Lugotti.

Iter verò ad mortē, si Catullo credimus,
est tenebricosū, nec nisi clausis oculis itur

Ibid.

Illuc, unde negant redire quemquam.

Quod idem Virgilius innuit, cū iter
designat quod insitebant Æneas & Dei-
phobe tendentes ad Elysium,

Ann. 6.

*Ibant obscuri, sola sub nocte, per umbram.
Quale per incertam lunam, sub luce mali-
gna,*

*Est iter in syluis, ubi calum condidit
umbra*

Iuppiter, & rebus nox abstulit atra colorem.

Quæ cum ita sint ; si mihi contigit esse cæco, nihil noui contigit : scilicet homini res humana, tolerabilis ; peruagata. Multi dijs cari, & in primis Musarum alumni, cæci fuerunt :

Quique p̄ vates, & Phæbo digna locuti. Ann. 6.

Notum est de Anchisa,

--- *Vnus quem pulchra deorum*

Fari donauit diuinum pectus habere.

Ennius
ai. ad
Præf.

Vulgatum de Thamyra, Tiresia, Homero, Stesichoro, Antipatro, & aliis, quos longum sit recensere. Cæcitatibus caussam grauitè, copiosè & ornatè Ciceronem egisse, me non latet : nec me verba Senecæ fugiunt eodè pertinentia. Tuse.

Oculos perdidi. Habet & nox suas voluptates. Oculos perdidi. Quàm multis rebus carebis, quas ne videres vel eruerendi erant ? Non intelligis partem innocentie esse, cecitatem ? De re med. fort.

Huic oculi adulterium monstrant : huic incestum : huic domum quam concupiscat ; huic urbem, & mala omnia. Certè irritamenta sunt vitiorum, ducèsque scelerum. Hæc Seneca : quibus adiungere sexcenta poterit, qui in caussa tam facili disertus esse volet. Ego

paucis agere malo, & sic soleo mecum.
 Cæcus sum! Cæcus erat Appius Claudus,
 sine quo Pyrrhi bello, rei Romanæ offusa
 sempiterna nox esset. Cæcus sum! pau-
 ciores habiturus sum inimicos, inuidum
 neminem. Cæcus sum! præferam speciem
 viri boni: multique me dignum existima-
 bunt quicum in tenebris micent. Cæcus
 sum! Vnum me faciam beatiorum, & alie-
 nis utar oculis; sicut alienis quoque auri-
 bus magni quondam Persarum reges.
 Cæcus sum! Augebit familiam meam cæ-
 citas; & ut dicebat Asclepiades, vno
 puero comitator incedani. Sed bonos
 ipse libros amplius non legam: Dole-
 bit hoc, fateor, & vehementer dolebit
 cordi meo: verum est tanti non legere
 malos: ne bilem mihi moueant, & sto-
 machum in eos erumpam, ut poëta Ve-
 ronensis:

Xeno-
 phon.
 P. u-
 zarch.
 Cicer. 5.
 Tus.

Catol.
 in Sex-
 tium.

*Dij magni, horribilem, & sacrum libel-
 lum!*

Non, non hoc tibi, false, sic abibit.

Nam si luxerit, ad librariorum

Curram scrinia: Casios, Aquinos,

Suffenum, omnia colligam venena:

Acte his supplicijs remunerabor.

Non legam pictas tabulas, nec legam

sacra ; & in carcere iussu magistratus non bibam Ophiufam. Cæcus sum ! Tanto fortior. Minus cassas terriculas , larvas umbratiles , & lemures nocturnos pertimescam. Non formidat periculum qui non videt : quia , vt Amor , sic & timor , per oculos influit in animum : eaque de causa læna fœta , cùm pro catulis dimicat , oculorum aciem in terram defigit , ne venabula expauescat. Cæcus laudis , non probri nomen est : vnde præclarum & insigne nomen Scipionum. Nam Cornelius ille , cui pater cæcus velut Scipio-
Ma-
crobius.
S. l. 1.
Sat.
ni baculoque innitens firmabat gradum , sibi cognomen ex ea pietate & officio reperit : noménque ex cognomine posteris tradidit , quo nullum euasit inlustrius. Antiquum illud chaos & rerum omnium principium , cæcitas fuit. Cæcitas philosophos à Platone ad modestiam erudit , cùm ἐποχὴν καὶ ἀπεχθελήσαν induxit , vt eos ab assentiendi & affirmandi temeritate reuocaret. Cæcitas iudicibus persuasit vt in causis maioribus pronuntiarent , *Non liquere* , & *Amplius quarendum esse*. Cæcitatem otio inertiaeque meæ prætexam , cùm laboris & operæ tædebit : & si non dabitur in luce

Plin. e.
17. l. 24

Plin. r.
16. l. 2.

Ma-
crobius.
S. l. 1.
Sat.

Academici

A/caminis.

Leoni.
du. Cic.
1. Tufc.

versari, desidebo in vmbra; meque tu-
labor exemplo & responso ducis fortissi-
mi, qui solem non visurus præ sagitta-
rum multitudine, vt hostes minabantur,
hoc se ἐρῶνευόμηνος consolatus est, quod
in vmbra pugnaturus esset. Cæcitas, vt in
rebus cæteris molesta sit, hoc saltem iu-
uabit in literis, quod acuet industriam.

Actius enim animus intendendus cæco,
& diligentius erit excolenda memoria,
quod semper dicendum ex tempore,
adempta facultate dicendi de scripto.
Non postremum & hoc ad me perueniet
ex cæcitate commodum, quod si quid
deliquero, deliquero impunè: quis dictu-
rus est diem cæco? Si quem incurfauero;
si quid offendero: si pede, si lingua, si
mente titubauero, præsto erit patrona
Cæcitas: Errauit, lapsus est, parum ca-
uit, non vidit, cæco ignoscite. Si quem
inter docendum Prisciano colaphum im-
pegero, mihi nemo dicam scribet: &
omnes sribiligines imputabuntur cæci-
tati. Quin & antiquis Grammaticorum
σχήμασιν, accedet nouum σχῆμα. Τύφλω-
σις, καὶ ὁσθαλμία. Videte quo progrediar,
nimia cæcitatatis fiduciâ, cæcus alijs co-
nor lumen accendere: & cui dux opus est

ambulanti, videntibus monstro viam.
 Heu doctorum inopiam! Heu solitudi-
 nem celeberrimæ quondam Academiæ!
 cuius me sanè magis quàm mei miseret;
 pudétque huius regiæ cathedræ, vbi res
 non ad triarios, vt est in vetere verbo, sed
 ad cæcos planè rediit. Valeant tamē que-
 relæ; & habeatur potiùs cæcitati gratia,
 quæ me ad meliùs viuendum hortatur, ac
 penè cogit, mea voluntate, seriò philo-
 sophari. Nunc enim demum incipio vim
 veræ solidæque virtutis experiri, vt ad-
 uersus omnes minas impetùsque fortunæ
 præstare inuictam mentem possim, & ab
 argutis inanum quæstionum nugis, qui-
 bus miseræ scholæ personant, ad rectum
 animi cultum sapientiæ præcepta tradu-
 cere.

*Ioannis Passeratij, Trecentis, Eloquentiæ
 Professoris Regij, Orationum
 & Præfationum*

FINIS.



IOANNIS PASSERATII,
Eloquentia Professoris Regij Orationum
& Praefationum

I N D E X.

1	O Ratio in Plauti Prolegomena fol.	1
2	Asini encomion fol.	8
3	Praefatio in Captivos Plauti	19
4	Praefatio in Curculionem Plauti	32
5	Oratio in Militem gloriosum Plauti	43
6	Praefatio in Pseudolum Plauti	52
7	Praefatio in Menachmos Plauti	64
8	Praefatio in Cic. orat. pro Cecina	74
9	Praefatio in Cic. orat. pro leg. Manil.	87
10	Praefatiuncula in Cic. orat. pro Aul. Licin.	99
11	Praefatio in Q. Cic. de pet. Consul.	110
12	Argumentum in Cic. de pet. Consul.	121
13	Prolegomena in Cic. Topica	126
14	Praefatiuncula in disput. de Ridiculis, quae est apud Cicer. in lib. 2. de Oratore.	136. 316
15	Praefatio in lib. Cic. de legibus.	148
16	Praefatio in Cic. epist. ad Hirtium	161
17	Ioan. Passeratij. N. R. S.	173
18	Praefatio in Catilinam Salustij	174
19	Oratio in libros Hist. Salustij	186
20	Praefatio in Catonem de leg. Oppia	197
21	Praefatio in Ovidij Consol. ad Liviā	209
22	Praefatio in Ovidij Iudicium Arm.	218
23	Praefatio in Epithalamium Catulli	229
24	Praefatio in Propertij lib. primum	240
25	Praefatio in Propertij lib. secundum	249
26	In eundem Amoris & Fortuna Comparatio.	266
27	Praefatio in tertium librum Propertij	281
28	Praefatio in quartum librum Propertij	296
29	Praefatiuncula eiusdem	308
30	Praefatio in Bucolica Virgilij	310
31	Oratio de Catitate.	320

21-

